

O Le Liahona

Saunoaga o le Konafesi Aoao

**Ua Ausia le 15 Miliona
o le Faitau Aofai
o Tagata o le Ekalesia**

**Ua Silia ma le 80,000
le Aofai o Faifeautalai
Faamisiona**





FAAMALOGA A LE FALEIATAGA O TALAFASOLOFTO O LE EKALEIA

Pulu Pāsama i Kiliata, tusia e Annie Henrie

*“E leai ea ni pulu pasama i Kiliata?” (Ieremia 8:22). . . . O le alofa o le pulu pasama lea e aumaia le faamalologa i le agaga. . . . [O le] Alo, le alii o Iesu Keriso, na Ia foai mai Lona soifua ina ia mafai ona tatou maua le ola e faavavau, ona o Lona alofa tele i Lona Tāma ma i tatou”
(Thomas S. Monson, “O Le Faitotoa e Ta’u o le Alofa,” Liahona, Ian. 1988, 64).*

SAUNIGA O LE TAEAO O LE ASO TOONAI

- 4 Susū Maia i le Konafesi
Peresitene Thomas S. Monson
- 6 Konafesi Aoao: Faamalasia o le Faatuatua ma le Molimau
Elder Robert D. Hales
- 9 Ia Agamalu ma Maualalo le Loto
Elder Ulisses Soares
- 12 Pe O Tatou Iloa Ea Mea Ua Tatou Maua?
Carole M. Stephens
- 15 Tapa i Luma ma Talitonu
Elder Edward Dube
- 17 O Pupuni o le Lagi
Elder David A. Bednar
- 21 Sau, Auai faatasi ma i Matou
Peresitene Dieter F. Uchtdorf

SAUNIGA O LE AFIAFI O LE ASO TOONAI

- 25 O Le Lagolagoina o Taitai o le Ekalesia
Peresitene Henry B. Eyring
- 26 O Le Ki i le Puipuiga Faaleagaga
Peresitene Boyd K. Packer
- 29 O Le Malosiaga Amiotonu o Tamaitai
Elder D. Todd Christofferson
- 33 Faanatinatiina o le Fuafuaga o le Taaloga a le Alii!
Elder S. Gifford Nielsen
- 35 O Mea Laiti ma Faatauavaa
Elder Arnulfo Valenzuela
- 37 E Te Fia Malolo Ea?
Elder Timothy J. Dyches
- 40 Peiseai o se Ipu ua Nutililii
Elder Jeffrey R. Holland
- 43 Ia Outou Faalagolago i le Alii
Elder M. Russell Ballard

SAUNIGA A LE AU PERISITUA

- 46 O Aoaoa Faavae ma Mataupu Faavae o Loo I Ai i Mataupu Faavae o le Faatuatua
Elder L. Tom Perry
- 49 E Le o Toe Tagata Ese Outou
Epikopo Gérald Causse
- 52 Ua Ia Valaau Mai e Folafofa Atu Lana Afioga
Elder Randy D. Funk

- 55 E Mafai Ona E Faia Nei Lava!
Peresitene Dieter F. Uchtdorf
- 58 Fusi i o Latou Manua
Peresitene Henry B. Eyring
- 61 O Leoleo Mamoe Moni
Peresitene Thomas S. Monson

SAUNIGA O LE TAEAO O LE ASO SA

- 69 I Fanau a La'u Fanau
Peresitene Henry B. Eyring
- 72 Leai Ni Atua Ese
Elder Dallin H. Oaks
- 76 Ia Outou Liua
Bonnie L. Oscarson
- 79 O Le Malosi e Tutumau ai
Elder Richard J. Maynes
- 82 Malosi Patino e ala i le Togiola a Iesu Keriso
Elder Richard G. Scott
- 85 "Ou Te Le Tuua Lava Oe, Ou Te Le Tuulafoai Lava la Te Oe"
Peresitene Thomas S. Monson

SAUNIGA O LE AFIAFI O LE ASO SA

- 88 O Auega a Ieremia: Faateete i le Nofopologa
Elder Quentin L. Cook
- 92 Mana i le Perisitua
Elder Neil L. Andersen
- 96 Aoao Atu i le Mana ma le Pule a le Atua
David M. McConkie
- 99 Piimau Pea
Elder Kevin S. Hamilton
- 102 Tapa i Luga
Elder Adrián Ochoa
- 104 Faalatalata Atili i le Atua
Elder Terence M. Vinson
- 106 O Filifiliga mo le Faavavau
Elder Russell M. Nelson
- 110 Seia Tatou Toe Feiloai
Peresitene Thomas S. Monson

SAUNIGA AOAO A LE AUALOFA

- 111 O Le Mana, Olioli, ma le Alofa e Maua i le Tausiga o Feagaiga
Linda K. Burton
- 115 E I Ai se Mafuaaga Sili mo i Tatou e Olioli Ai
Carole M. Stephens
- 118 Avatu Faamanuiaga o a Outou Feagaiga
Linda S. Reeves
- 121 E Le Tuua Lava Na o i Tatou
Peresitene Thomas S. Monson
- 64 Au Pulega Aoao o Le Ekalesia a Iesu Keriso o le Au Paia o Aso e Gata Ai
- 124 Au Peresitene Aoao o Ausilali
- 125 Faasino Upu o Tala o le Konafesi
- 126 Tala Fou o le Ekalesia



Aotelega mo le Konafesi Aoao Lona 183 Faaleatatausaga

TAEAO O LE ASO TOONAI, 5 OKETOPA, 2013, SAUNIGA AOAO

Pulefaamalumu: Peresitene Thomas S. Monson. Taitai: Peresitene Henry B. Eyring. Tatalo Amata: Elder Kent F. Richards. Tatalo Faaiu: Matthew O. Richardson. Musika na saunia e le Aufaipese a le Tapeneko; Mack Wilberg ma Ryan Murphy, taitai pese; Andrew Unsworth ma Clay Christiansen, taokeni: "Maeu le Atua e," *Viiga*, nu. 53; "Ia Fiafia Tatou," *Viiga*, nu. 3; "Isaraelu, Ua Valaau Mai le Atua," *Viiga*, nu. 6, arr. Wilberg, e lei lolomia; "Ua Susulu Mai Nei o le La," *Viiga*, nu. 140; "Tausi Poloaiiga," *Tusipese a Tamaiti*, 68, arr. Murphy, e lei lolomia; "O Mai, E ua Faafetai," *Viiga*, nu. 52, arr. Wilberg, pub. Oxford.

AFIAFI O LE ASO TOONAI, 5 OKETOPA, 2013, SAUNIGA AOAO

Pulefaamalumu: Peresitene Thomas S. Monson. Taitai: Peresitene Dieter F. Uchtdorf. Tatalo Amata: Elder Paul V. Johnson. Tatalo Faaiu: Carol F. McConkie. Musika na saunia e le aufaipese a se aiga mai siteki i Roy, Kanesville, Hooper, ma West Haven, Iuta; Jane Fjeldsted, taitai pese; Linda Margetts, taokeni: "On This Day of Joy and Gladness," *Viiga*, nu. 64, arr. Fjeldsted/Margetts, e lei lolomia; "I Know That My Savior Loves Me," pese mai le Polokalama o le Sauniga Faamanatuga a Tamaiti 2010, saunia e Bell ma Creamer, arr. Fjeldsted/Margetts, e lei lolomia; "Le Au Paia Uunai i Luma," *Viiga*, nu. 44; "A I Ai i le Aiga le Alofa," *Viiga*, nu. 181, arr. Fjeldsted/Margetts, e lei lolomia.

AFIAFI O LE ASO TOONAI, 5 OKETOPA, 2013, SAUNIGA A LE AU PERISITUA

Pulefaamalumu: Peresitene Thomas S. Monson. Taitai: Peresitene Henry B. Eyring. Tatalo Amata: Elder Paul E. Koelliker. Tatalo Faaiu: Elder Walter F. González. Musika na saunia e le aufaipese a le Au Perisitua Arona mai siteki i Murray, Iuta; Kelly DeHaan, taitai pese; Richard Elliott, taokeni: "Sing Praise to Him," *Viiga*, nu. 70, arr. Kempton, e lei lolomia; "Like Ten Thousand Legions Marching," *Viiga*, nu. 253, arr. Elliott, e lei lolomia; "Fai Mea Tonu," *Viiga*, nu. 148; "O Le Atua o o Matou Tama," *Viiga*, nu. 43, arr. Huff, e lei lolomia.

TAEAO O LE ASO SA, 6 OKETOPA, 2013, SAUNIGA AOAO

Pulefaamalumu: Peresitene Thomas S. Monson. Taitai: Peresitene Dieter F. Uchtdorf. Tatalo Amata: Cheryl A. Esplin. Tatalo Faaiu: Elder Francisco J. Viñas. Musika na saunia e le Aufaipese a le Tapeneko; Mack Wilberg, taitai pese; Clay Christiansen ma Richard Elliott, taokeni: "Le Atua Malie Lau Galuega," *Viiga*, nu. 82; "Fiafia, o le Alii o le Tupu!" *Viiga*, nu. 38; "Matai e, Ua Sou le Vasa," *Viiga*, nu. 58, arr. Wilberg, e lei lolomia; "Uunai Atu ia ma Tulei," *Viiga*, nu. 163; "O Divine Redeemer," saunia e Gounod; "Ia Viia Oe le Atua," *Viiga*, nu. 10, arr. Wilberg, e lei lolomia.

AFIAFI O LE ASO SA, 6 OKETOPA, 2013, SAUNIGA AOAO

Pulefaamalumu: Peresitene Thomas S. Monson. Taitai: Peresitene Henry B. Eyring. Tatalo Amata: David L. Beck. Tatalo Faaiu: Elder Claudio R. M. Costa. Musika na saunia e le Aufaipese a le Tapeneko; Mack Wilberg ma Ryan Murphy, taitai pese; Bonnie Goodliffe, taokeni: "They, the Builders of the Nation," *Viiga*, nu. 36, arr. Wilberg, pub. saunia e Jackman; "Pe A Ia Toe Afio Mai," *Tusipese a Tamaiti*, 46–47, arr. Murphy, e lei lolomia; "Tofia e Auauna i le Atua," *Viiga*, nu. 156; "Iesu, Sei e Faatasi Mai," *Viiga*, nu. 93, arr. Wilberg, e lei lolomia.

AFIAFI O LE ASO TOONAI, 28 SETEMA, 2013, SAUNIGA AOAO A LE AUALOFA

Pulefaamalumu: Peresitene Thomas S. Monson. Taitai: Linda K. Burton. Tatalo Amata: Laraine Swenson. Tatalo Faaiu: Ana De Agostini. Musika na saunia e le aufaipese a le Aualofa mai le Nofoaga Autu e Aoao ai Faifeautalai i Provo; Emily Wadley, taitai pese; Bonnie Goodliffe, taokeni: "Faaola o Isaraelu," *Viiga*, nu. 5; "Talati Atu o Iesu," *Viiga*, nu. 168; "Galulue e Pei o Ni Uso i Siona," *Viiga*, nu. 196, arr. Sally DeFord, e lei lolomia; "Ou Te Alu i Mea e te Tofia," *Viiga*, nu. 169, descant arr. Wadley, e lei lolomia; "Faapaia Mai Au," *Viiga*, nu. 70, arr. Lyon, lom. saunia e Jackman.

E MAUA SAUNOAGA O LE KONAFESI

Ina ia maua saunoaga o le konafesi aoao i le tele o gagana, asiasi ane i le conference.

lds.org. Ona filifili lea o se gagana. E masani lava ona maua lipine faalogologo i faletusi autu, i totonu o le lua masina e sosoo ma le konafesi.

SAVALI A FAIAOGA O AIGA MA FAIAOGA ASIASI

Mo savali a faiaoga o aiga ma faiaoga asiasi, faamolemole ia filifili se lauga e aupito sili ona fetai lelei ma tulaga o loo manaomia e i latou tou te asia.

I LE FAAVA

Luma: Ata na pueina e Cody Bell.
Tua: Ata na pueina e Cody Bell.

PUEGA O ATA O LE KONAFESI

Vaaiiga o le konafesi aoao i le Aai o Sate Leki na pueina e Welden C. Andersen, Cody Bell, Randy Collier, Weston Colton, Scott Davis, Craig Dimond, Lloyd Eldredge, Collin King, John Luke, Leslie Nilsson, Matthew Reier, Christina Smith, ma Byron Warner; i Arraiján, Panama, na pueina e Josué Peña; i Brasília, Pasila, na pueina e Tomé Siqueira; i Cavite, Filipaina, na pueina e Danilo Soleta; i Colleyville, Texas, ISA, na pueina e Mark Mabry; i Foz do Iguaçu, Pasila, na pueina e Lincoln Parmezan de Melo; i le Aai o Kuatemala, na pueina e Don Searle; i Lima, Peru, na pueina e Stephanie Navarette; i Lonetona, Egelani, na pueina e Preston Judy; i Lyon, Farani, na pueina e Carolyn Carter; i le Aai o Panama, Panama, na pueina e Josué Peña; i Roma, Italia, na pueina e Massimo Criscione; ma i Santiago, Chile, na pueina e Cristian F. Castro Marin.



**NOVEMA 2013 VOL. 37 NU. 11
O LE LIAHONA 10791 890**

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Mervyn B. Arnold, Shayne M. Bowen, Stanley G. Ellis, Christoffel Golden Jr.

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonotonu: R. Val Johnson

Pule Faatonotonu Lagolago: Ryan Carr

Au Tuitusi ma Faatonotonu: Susan Barrett, Brittany Beattie, David Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Jennifer Grace Jones, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Tom Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J.

Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le Faletusi Tutotonu i Peseqa. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tuitusiga ma faafesili i luga o le

initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O le *Liahona* (o lona uiga i le Tusi a Mamona o le "tapasa" po o se "faatonuuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Igilisi, Estonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Latvia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafagofieina), Silovenia, Sipaniolo, Suetena, Swahili Tagaloka, Tahiti, Tai, Toga, Iukureini, Urutu, ma Viatenama. (E eseese lava gagana.)

© 2013 Puletaofia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

E mafai ona kopi tala ma ata o le *Liahona* mo le toe faaagaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufatuga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

November 2013 Vol. 37 No. 11. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



**FAILAUGA I LE FAASOLOGA
FAAALAFAPETA**

Andersen, Neil L., 92
Ballard, M. Russell, 43
Bednar, David A., 17
Burton, Linda K., 111
Caussé, Gérard, 49
Christofferson, D. Todd, 29
Cook, Quentin L., 88
Dube, Edward, 15
Dyches, Timothy J., 37
Eyring, Henry B., 25, 58, 69
Funk, Randy D., 52
Hales, Robert D., 6
Hamilton, Kevin S., 99
Holland, Jeffrey R., 40
Maynes, Richard J., 79
McConkie, David M., 96
Monson, Thomas S., 4, 61,
85, 110, 121
Nelson, Russell M., 106
Nielsen, S. Gifford, 33
Oaks, Dallin H., 72
Ochoa, Adrián, 102
Oscarson, Bonnie L., 76
Packer, Boyd K., 26
Perry, L. Tom, 46
Reeves, Linda S., 118
Scott, Richard G., 82
Soares, Ulisses, 9
Stephens, Carole M., 12, 115
Uchtdorf, Dieter F., 21, 55
Valenzuela, Arnulfo, 35
Vinson, Terence M., 104

FAASINO AUTU

Agaalofa, 40
Agaga Paia, 96
Agamalu, 9
Aiga, 29, 69, 72, 88, 106
Aiga o Isaraelu, 88
Ala o faasalalauga, 102
Alofa, 12, 35, 43, 49, 69, 104,
111, 121
Alofa Mama, 58
Amiotonu, 79
Aoa atu, 96
Aso gataaga, 26
Ata o le faaolataga, 72
Atuatuvale, 40
Auai, 21
Auauna atu, 12, 58, 61, 82,
96, 111
Faaumeaina, 21, 49
Faaipoipoga, 69, 72, 106
Faamagaloga, 37
Faamalologa, 37
Faamanatuga, 99, 118
Faamanuiga, 17
Faatoagaina Mai, 12, 21, 35
Faatuatua, 15, 21, 43, 104
Faatupulaia o le Ekalesia, 4
Faiaoga o aiga, 61
Faifeautalai, 33
Faigata, 40, 55, 79, 85, 104,
118, 121
Faitalia, 106
Feagaiga, 12, 82, 99, 111,
115, 118
Fiafia, 69, 85
Filemu, 26
Fonotaga a le Ekalesia, 15, 99
Galuega faafaifeautalai, 4,
33, 35, 43, 52
Iesu Keriso, 9, 15, 37, 82,
102, 111

Iosefa Samita, 96, 102
Konafesi aoao, 6, 110
Legavia/Ola Mama, 29, 72
Liua, 76
Loto faafetai, 85
Lotogatasi, 15, 49
Loto-pulea, 9
Malumala, 17, 115, 118
Mana, 92, 96
Mataupu Faavae o le Faa-
tuatua, 46
Molimau, 76, 79, 102
Musumusuga, 6, 58
Nofopologa, 88
Perisitua, 46, 58, 92, 115
Perofeta, 6
Poloaiga, 72
Salamo, 26, 52, 55, 82, 118
Saolotoga o tapuaiga, 88
Sapati, 99
Sauniga, 92, 115
Sauniuniga, 102
Sefuluai, 17
Suesue i tuitusiga paia, 46,
96, 121
Taitai o le Ekalesia, 25
Tama Faalelagi, 69
Tamaitai, 29
Tatalo, 121
Taulaga, 76
Tino faaletino, 106
Togiola a Iesu Keriso, 52,
55, 69, 82, 118
Tulaga faatinā, 29, 72
Tumau, 40, 79, 85, 99
Tusi a Mamona, 82
Tuitusiga Paia, 26
Valaauga o le Ekalesia,
15, 69
Vavega, 43



Saunia e Peresitene Thomas S. Monson

Susū Maia i le Konafesi

O lau tatalo ina ia faatumuina i tatou uma e le Agaga o le Alii a o tatou faalogologo atu ma aoao.

Ua matagofie lava ou uso e ma tuafafine, le toe feiloai faatasi ai foi. Ua silia teisi nei ma le 183 tausaga talu ona faatulagaina e le Perofeta o Iosefa Samita le Ekalesia, i lalo o le taitaiga a le Alii. I lena sauniga i le aso 6 Aperila, 1830, sa auai ai tagata e toano o le Ekalesia.¹

Ua ou fiafia lava e faasilasila atu i le lua vaiaso ua tuanai ua oo atu ai le aofai o tagata o le Ekalesia i le 15 miliona. O loo faaauau pea ona tuputupu ae le Ekalesia ma le mausali ma ua suia ai olaga o tagata e toatele i tausaga uma. Ua salalau atu i le salafa o le lalolagi a o saili e a tatou faifeautalai i latou o loo sailia le upumoni.

Ua silia teisi lava ma le tausaga talu ona ou faasilasila atu le tuuitiitia o le tausaga o auunaga faaifeautalai. Talu mai lena taimi, ua faateleina lava le aofai o faifeautalai faamisiona mai le 58,500 ia Oketopa 2012 i le 80, 333 i le asō. E mau le ofoofogia ma le musuia o le tali mai ua tatou molimuina!

E le o i ai lava i tusitusiga paia se isi folafolaga e sili atu ona fitoitonu, leai se tiutetauave e sili atu ona noatia, leai se faatonuga e sili atu ona tuusao nai lo le poloaiga na tuuina mai e le Alii toetu ina ua Ia faaali atu

i Kalilaia i aposetolo e toasefulutasi. Sa Ia fetalai, “O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia.”² Sa tautino mai le Perofeta o Iosefa Samita, “I le uma ai o faamatagala uma lava ua faia, o le tiute silisili ma matua taua o le talaiina o le Talalelei.”³ O nisi o outou o loo i ai iinei i le asō o le a manatuaina ia upu a Peresitene Tavita O. MaKei, na faaupuina le fuaitau ua masani ai “O tagata uma lava o se faifeautalai!”⁴

Ou te faaopoopo atu foi sa’u upu i a latou saunoaga. O le taimi lenei mo tagata uma ma faifeautalai e o mai faatasi ai, ia galulue faatasi, ma galueaiina le tovine a le Alii ina ia aumai agaga ia te Ia. Ua Ia saunia auala mo i tatou e faasoa atu ai le talalelei i le anoanoai o ala, ma o le a Ia fesoasoani mai ia i tatou i la tatou galuega pe afai o le a tatou galulue i le faatuatua e faatau-nuu Lana galuega.

Ina ia fesoasoani e faatumauiina le faatoateleina o faifeautalai, na ou talosagaina ai o tatou tagata i se taimi ua fano ia foi atu, pe a latou gafatia, i le tupe mo faifeautalai i a latou uarota po o le Tupe mo Faifeautalai Lautele a le Ekalesia. O le tali mai i



lena talosaga e faamalieloto ma ua fesoasoani e lagolago le faitau afe o faifeautalai ia e le o faatagaina e o latou tulaga i latou e lagolago ai i latou lava. Ou te faafetai atu ia te outou mo a outou sao lotofoai. E manaomia pea le fesoasoani, ina ia mafai ona faaauau pea ona tatou fesoasoani atu ia i latou



o loo i ai se manao tele e auauna atu ae ua latou le mafai e i latou lava ona maua ni auala e faia ai.

Ia uso e ma tuafafine, ua tatou o mai iinei ina ia aoaoina ma musuiaina. E anoanoai savali, o le a aofia ai le tele o autu o le talalelei, o le a tuuina atu i nei aso e lua. O na alii

ma tamaitai o le a saunoa atu ia te outou na saili atu i le fesoasoaniga a le lagi e faatatau i savali o le a latou tuuina atu.

O lau tatalo ina ia faatumuina i tatou uma e le Agaga o le Alii a o tatou faalogologo atu ma aoao. I le suafa o lo tatou Faaola, o Iesu Keriso, amene. ■

FAAMATALAGA

1. E ui sa toatele lava ni nai tagata sa i ai i le aso na faatulagaina ai le Ekalesia, ae e toaono lava na lisiina aloaia o ni tagata na faatulagaina [le Ekalesia].
2. Mataio 28:19.
3. *Aoaoga a Peresitene o le Ekalesia: Iosefa Samita* (2007), 330.
4. Tavita O. MaKei, i le Conference Report, Apr. 1959, 122.



Saunia e Elder Robert D. Hales

○ Le Korama a Aposetolo e Toasefululua

Konafesi Aoao: Faamalosia o le Faatuatua ma le Molimau

Tatou te matua manaomia lava konafesi aoao! E ala atu i konafesi e faamalosia ai lo tatou faatuatua ma faalolotoina ai a tatou molimau.

Faafetai Peresitene Monson, mo lau aoaoga ma faataitaiga o auunaga faaKeriso ma lau faamoemoega mo i matou uma ia avea ma faifeautalai. O loo matou tatalo pea mo oe.

I la tatou tisipenisione, ua faasino atu le Faaola o Iesu Keriso i le faapotopotoina o le Au Paia o “*la’u* konafesi aoao.”¹

Po o fea lava o tatou i ai i lenei lalolagi, po o le a lava le auala o tatou maimoa ai i nei taualumaga o le konafesi, ou te molimau atu ua tatou potopoto i *Lana* konafesi. Ou te molimau atu foi o le a tatou faalogo i Lana afioga, aua na ia fetalai, “Pe i lo’u lava leo po o i le leo o a’u auuana, ua tutusa lava.”²

Ua avea lava ia konafesi ma se vaega o le Ekalesia moni a Iesu Keriso. Na faapotopoto e Atamu ana fanau ma vavalalo atu i ai i mea o le a oo mai. Na faapotopoto e Mose le fanauga a Isaraelu ma aoao i latou i poloaiga na ia maua. Na aoao atu e le Faaola ia motu

o tagata na faapotopoto uma i le Nuu Paia, ma i le konetineta o Amerika. Sa faapotopoto e Peteru ē talitonu i Ierusalem. O le uluai konafesi aoao lava i nei aso e gata ai na faia i le lua masina talu ona faatulagaina le Ekalesia ma na faaaauu ai lava konafesi e oo mai i lenei aso.

O nei konafesi o loo i ai pea i lalo o le taitaiga a le Alii, ma taialaina e Lona Agaga.³ O matou o failauga, e le atofaina mai i ai ni autu faapitua. I le gasologa o vaiaso ma masina, e tele lava i po lēmamoe, matou te faatalitali i le Alii. E ala i le anapogi, tatalo, suesue, ma le mafaufau loloto, matou te iloa ai le savali ua *Ia* finagalo matou te tuu atu.

Atonu e fesili nisi, “Aisea e le faigo-fie tele ai ma vave oo mai ia musumusuga?” Na aoao atu e le Alii ia Oliva Kaotui, “E ao ina e suesue i ai i lou mafaufau; ona ao lea ona e ole mai

ia te au pe ua sao.”⁴ E oo mai savali mo le konafesi ia i matou pe a maea sauniuniga ma le agaga tatalo, e ala i le Agaga Paia.

E moni lenei mataupu faavae mo tagata uma o le Ekalesia pe a tatou saunia e auai i konafesi faaleuarota, faalesiteki ma konafesi aoao. Matou te suesue i o matou mafaufau mea matou te manaomia ma naunau i ai mai le Tama Faalelagi, ma e matou te tatalo ia malamalama ma faaaoga na mea ua matou aoaoina. A o oo mai taimi o konafesi, tatou te ositulagaina isi gaoioiga ma “tuu ese mea o lenei lalolagi, ma saili mo mea o se lalolagi sili atu ona lelei.”⁵ Ona tatou faapotopoto mai lea o o tatou aiga e faalogo i le afioga a le Alii, e pei ona faia e le nuu o le Tupu o Peniamina.⁶

E fiafia le fanau ma le autalavou e faaaofia ai ma latou. Tatou te faia se mea sese ogaoga pe afai tatou te manatu o le konafesi o se mea latou te le malamalama i ai faaleagaga. I le autalavou o le Ekalesia, ou te folafola atu afai o le a outou faalogo, o le a outou lagonaina le faateleina o le Agaga i totonu o outou. O le a tau atu e le Alii ia te outou mea e finagalo o Ia ia outou faia i o outou olaga.

I konafesi e mafai ona tatou maua ai le afioga a le Alii ua na o i tatou e faatatau i ai. Sa molimau mai se tasi tagata o le Ekalesia: “Ina ua ou faalogo i lau lauga, sa ou maofa lava. . . . O lau lauga o se faaaliga patino tuusao mai le Alii mo lo’u aiga. Ua ou lagonaina se faaaliga malosi o le Agaga i lo’u olaga i na minute a o fetalai tuusao mai le Agaga Paia ia te au.”

Sa fai mai se isi, “Ou te lei lagonaina lava muamua se mamana o se lauga na tuu mai ia te au.”

E mafai ona tupu lea mea ona e molioo e le Agaga Paia le afioga a le Alii i o tatou loto i le ala tatou te malamalama ai.⁷ A ou tusitusi ni manatu

i konafesi, ou te le tusia i lalo i taimi uma mea tonu o loo saunoa ai le faila-uga; ae ou te tusia faatonuga patino a le Agaga o loo tuuina mai ia te au.

E le taua tele mea o *tautalagia* i lo mea tatou te *faalogo* i ai ma mea tatou te *lagonaina*.⁸ O le mafuaaga lena tatou te faia ai se taumafaiga ia maua se aafiaga mai le konafesi i se siosiomaga lea e manino ai le faalogo, lagona, ma le malamalama i le leo filemu ma le itiiti o le Agaga.

Tatou te matua manaomia lava konafesi aoao! E ala atu i konafesi e faamalosia ai lo tatou faatuatua ma faalolotoina ai a tatou molimau. Ma pe a liua i tatou, tatou te faamalosia le tasi ma le isi ina ia tutu malosai ai i le lotolotoi o faaososoga i nei aso e gata ai.⁹

I le silia ma le sefulu tausaga talu ai nei, sa tele vaega o le Ekalesia sa le oo i ai ni malamalamaaga sese matuia ma sauaga ia na oo i ai uluai Au Paia. O le a le faapena i taimi uma. O loo o ese le lalolagi mai le Alii i se saosasoa faateleina nai lo se isi lava taimi muamua. Ua faasaolo solo le tiapolo i le lalolagi. Ua tatou matamata, faalogo, faitau, suesue, ma faasoa atu upu a perofeta ina ia muai lapataiina ma puipuia ai i tatou. Mo se faataitaiga, “O Le Aiga: O Se Folafolaga i le Lalolagi” ua leva ona tuuina mai ae tatou te le i taitai oo i luitau ua feagai nei ma aiga. “O Le Keriso Soifua: O Le Molimau a Apusetolo” ua leva lava ona saunia mo le taimi o le a sili ona tatou manaomia ai.

Atonu tatou te leiloa ni mafuaaga uma pe aisea e lauga mai ia i tatou perofeta ma failauga o le konafesi i ni autu faapitoa i konafesi, ae ua silafia e le Alii. Sa aoao mai Peresitene Harold B. Lee: “E na o le pau le saogalemu i le avea ai ma tagata o lenei ekalesia o le . . . usitai lea i afioga ma poloaiga o le a tuu mai e le Alii e auala mai i Ana perofeta. . . . O le a i ai



nisi mea e manaomia ai le onosai ma le faatuatua. Atonu e te le fiafia i mea o le a tau mai e le pulega o le Ekalesia. Atonu o le a feteenai ma ou manatu [faaletagata lava ia]. Atonu o le a feteenai ma ou manatu faaleagafesootai. Atonu o le a faalavelave i nisi o vaega o lou olaga tafao. Ae a e faalogo i nei mea, e pei lava o loo pa’u mai i le fofoga o le Alii Lava Ia, i le onosai ma le faatuatua, o le folafolaga e faapea ‘o le a le manumalo lava faitotoa o seoli ia te oe; . . . ma o le a tafiese e le Atua mana o le pouliuli mai ou luma, ma faia ia luluina le lagi mo lou lelei ma le mamalu o lona suafa’ (MF&F 21:6).¹⁰

Na faapefea ona silafia e Peresitene Lee mea o le a tatou feagai ai i o tatou aso? Na ia silafia ona sa avea o ia o se perofeta, tagatavaai, ma talifaaaliga. Ma afai tatou te faalogo i perofeta i le taimi nei, e aofia ai i latou o le a lauga mai i lenei lava konafesi, o le a faamalosia ma puipuia i tatou.

O faamanuiaga silisili o le konafesi aoao e oo mai ia i tatou pe a mavae le konafesi. Manatua le mamamu o loo faamaumau soo i tusitusiga paia: tatou te faapotopoto e faalogo i afioga a le Alii, ma a tatou toe foi atu i o tatou aiga ia tatou ola ai.

Ina ua uma ona aoaoina e le Tupu o Peniamina lona nuu, “sa faataape atu e ia le motu o tagata, ma sa latou foi atu, o tagata taitoatasi, e tusa ma

o latou aiga, i o latou lava fale.”¹¹ I lona vaitaimi, sa faia ai foi e le Tupu o Limae lea lava mea e tasi.¹² Ina ua uma ona aoao ma auuina atu i tagata i le malumalu i Nuumau, na augani atu le Faaola i tagata, “Ia outou o atu i o outou fale, ma mafaufau i mea ia na ou fai atu ai, ma ole atu i le Tama, i lou igoa, ina ia outou malamalama, ma saunia o outou mafaufau mo a taeao, ma ou te toe sau ai ia te outou.”¹³

Tatou te taliaina le valaaulia a le Faaola pe a tatou mafaufau loloto ma tatalo ia malamalama i mea sa aoaoina ona o lea i luma ma faia Lona finagalo. Manatua upu a Peresitene Kimball: “Ua tonu i lo’u mafaufau e faapea pe a ou alu i le fale mai lenei konafesi [aoao] . . . e matua anoanoai vaega o lo’u olaga e mafai ona ou faaatoaoina. Ua ou faia se lisi faalemafaufau o na mea, ma ou faamoemoe ou te alu ma galue i le taimi lava e maea ai.”¹⁴ Sa saunoa Peresitene Monson talu ai nei: “Ou te uunaia outou e faitau i lauga . . . ma mafaufau loloto i savali o loo i ai i totonu. Ua ou iloaina i lou lava ia olaga e mafai ona ou mauaina nisi mea sili atu mai nei lauga musuia pe a ou suesueina i le loloto atili.”¹⁵

E faapoopo atu i le valaauliaina o i tatou e faia suesuega o tusitusiga paia faaletagata lava ia ma faaleaiga, ua finagalo le Tama Faalelagi ia tatou suesueina soo ma faaaoaga



mea ua tatou aoaoina i le konafesi. Ou te molimau atu o ē e tuu lo latou faatuatua i le Alii ma faalogo i lenei fautuaga i le faatuatua o le a mauaina le malosi sili atu e faamanuia ai o latou lava olaga ma o latou aiga mo tupulaga a sau.

Ua saunia e le Tama Faalelagi le auala. I lenei konafesi, ua mafai e le 97 pasene o le Ekalesia ona lagonaina nei savali i a latou lava gagana. E faitau miliona tagata o le ekalesia i atunuu e 194 o le a maimoa i lenei konafesi i gagana e 95. I totonu o aso e lua pe tolu o le a maua ai savali i luga i le LDS.org i le FaaPeretania, ma i totonu o le vaiaso e tasi o le a amata ai ona maua i gagana e 52. O le taimi nei ua tatou mauaina ia mekasini a le Ekalesia ua lolomiina i totonu o le tolu vaiaso pe a maea le konafesi aoao. Ua tatou le toe faatalitali mo ni masina mo lauga ina ia taunuu mai le meli. I luga o se komepiuta, telefoni, po o isi masini faaeletonika, ua mafai ona tatou faitauina, faalogo, matamata, ma faasoia atu aoaoga a perofeta. I soo se taimi i soo se mea, ua mafai ona faalautele lo tatou malamalama, faamalosi lo tatou faatuatua ma le molimau, puipuia o tatou aiga, ma taitai saogalemu atu i latou i le aiga.

O savali o lenei konafesi o le a aofia ai foi le mataupu aoaoina a le autalavou i luga o le initoneti. Matua, e mafai ona outou mauaina lesonea a le autalavou mo outou lava i luga o le LDS.org. Saili i ai po o a mea o loo aoaoina e a outou fanau, ma avea o ni mataupu o au lava ia suesuega, talanoaga faaleaiga, afiafi faaleaiga, fonotaga faaleaiga, ma faatalanoaga patino

taitoatasi ma lau fanau e faatatau i mea e ao ona aoaoina ai i latou taitoatasi.

Ou te uunaia tagata uma o le ekalesia ia faaaoaga ia punaoa o i luga o uepisaite a le Ekalesia ma polokalama feaveai. O loo faaauau pea ona faaleleia ina ia faafaigofie pea ona faaogaina ma sili atu ona talafeagai ma o outou olaga. I luga o le LDS.org o le a e maua ai punaoa e fesoasoani ia te oe e suesue ai i le talalelei, faamalosi ai lou aiga ma le auai, ma auaina ai i lou valaauga. Ua mafai foi ona e sailia ou tuua o e o loo manaomia ia sauniga o le malumalu ma punaoa e lagolago ai oe i le galuega o le faolagata, e aofia ai le faasoaina atu o le talalelei. E mafai e matua ona taimua i le sauniaina o a latou fanau mo papatisoga, le perisitua, misiona faamamaluina, ma le malumalu. E mafai ona fesoasoani ia i tatou ia savavali i le ala sao ma le vaapiapi o sauniga ma feagaiga o le malumalu ma agavaa ai mo faamanuiaga o le ola e faavavau.

I le konafesi talu ai ia Aperila, i le sauniga aoao o le perisitua, sa ou faamatalaina ai se tala e uiga i le tusiaina e lou tama o se ata o se fitafita ma le ofutau e aoao ai au e uiga i le ofuina o



O Jason i lana "ofutau atoa a le Atua."

le ofutau atoa a le Atua ma le puipuiga faaleagaga na te aumaia.

Ina ua uma lena sauniga, na lipoti atu e se tamā i lona aiga se mea na ia aoaoina. I le musuia ai, na saili ai e lo la atalii laitiiti o Jason le LDS.org e fia faalogo i le savali mo ia lava. I ni nai aso mulimuli ane na ia tu ai i le afiafi faaleaiga e faasoia atu le lesonea i ona uso ma tuafafine. O ia lenei:

O se savali faigofie, na musuia e le Alii, na mauaina e se tamaitiiti, ma sa aoaoina i se aiga i se ala patino ma mamana. Ou te fiafia i lana ufiufafata o le amiotonu. Ou te fiafia i lana talita o le faatuatua e taofia ai u fanafana mumu a le fili. O faamanuiaga nei o le konafesi.

Ou uso e ma tuafafine, ou te tuu atu lau molimau faapitoa o loo soifua le Alii o Iesu Keriso ma o loo tu i le ulu o lenei Ekalesia. O *Lana* konafesi aoao lenei. Ou te folafola atu ia te outou i lona suafa afai tou te tatalo ma se manaoga faamaoni ia faafofoga i le siufofoga o lou Tama Faalelagi i savali o lenei konafesi, o le a outou iloaina o loo Ia fetalai atu ia te outou, e faamalosi outou, ma taitai outou i le aiga i lona afioaga. I le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 124:88; faaopoopo le faamamafa.
2. Mataupu Faavae ma Feagaiga 1:38.
3. Tagai Mataupu Faavae ma Feagaiga 46:2.
4. Mataupu Faavae ma Feagaiga 9:8.
5. Mataupu Faavae ma Feagaiga 25:10.
6. Tagai Mosaea 2:5.
7. Tagai 2 Nifae 33:1.
8. Tagai Spencer W. Kimball, i le Conference Report, Tonga Area Conference 1976, 27.
9. Tagai Luka 22:31–32.
10. *Aoaoga a Perisitene o le Ekalesia: Harold B. Lee* (2000), 84–85.
11. Mosaea 6:3.
12. Tagai Mosaea 8:4.
13. 3 Nifae 17:3.
14. Spencer W. Kimball, "Spoken from Their Hearts," *Ensign*, Nov. 1975, 111.
15. Thomas S. Monson, "Ia Faatasi le Atua ma Outou Seia Tatou Toe Feiloai," *O Le Liahona*, Nov. 2012, 110.



Saunia e Elder Ulisses Soares

○ Le Au Peresitene o Fitugafulu

Ia Agamalu ma Maualalo le Loto

O le agamalu e le o le vaivai, ae o lona uiga o le amio pulea faatasi ai ma le amiolelei ma le agalelei.

Na aoao mai Mamona faapea “e le mafai [e se tagata] ona i ai ia te ia le faatuatua ma le faamoemoe, vagana ai ua agamalu, ma maualalo o ia i le loto.”¹ Na ia faaopopo mai a aunoa ma ia ituaiga uiga, “faatuatua ma le faamoemoe, ona e leai se tasi e ono talia i luma o le Atua, vagana ai i latou o e ua agamalu ma maualalalo i le loto.”²

O le agamalu o se uiga auau mama o i latou o e ua “mataui i le Atua, amiotonu, faamaualalo, e mafai ona aoaoina, ma le onosai i puapuaga.”³ O i latou o e ua i ai lenei uiga e agavaivai, agalelei ma naunau e mulimuli ia Iesu Keriso ma o o latou natura e toafimalie, filemu, faapalepale, ma usitai.

Na aoao atu e le Aposetolo o Paulo e faapea o le agamalu o le fua o le Agaga.⁴ O le mea lea e matua faigo-fie ona maua pe afai tatou te “ola i le Agaga.”⁵ Ma o le ola i le Agaga, e tatau ona atagia mai i o tatou olaga le amiotonu i luma o le Alii.

A tatou ave i o tatou luga le suafa o Keriso, ua faamoemoeina ia tatou taumafai e faataitaia Ona uiga ma sui a tatou amio ia avea atili e faapei o Ia i aso taitasi. Na apoapoai atu le Faaola i Ona soo, e faapea, “Ia

atoatoa ona lelei o la outou amio, e pei o lo outou Tama o i le lagi e atoatoa ona lelei o ia.”⁶ Afai tatou te “o mai ia Keriso, ma faafiti i [tatou] lava mai mea e le faaleatua uma; . . . ma alolofa i le Atua,” o le alofa tunoa o Keriso o le a mafai ai i se aso ona tatou atoatoa ia te Ia.⁷

“O uiga faaKeriso o ni meaalofa ia mai le Atua. E oo mai [nei uiga] a o [tatou] faaagaina ma le amiotonu lo [tatou] faitalia. . . . Faatasi ai ma se manao e faafiafia le Atua, [e ao ona tatou] iloa o [o tatou] vaivaiga ma moo-mooga ma popolega ia faaleleia.”⁸

O le agamalu e taua mo i tatou ina ia avea atili ai e faapei o Keriso. A aunoa ma le [agamalu] e le mafai ona tatou atiina ae isi uiga mama taua. O le agamalu e le o le vaivai, ae o lona uiga o le amio pulea faatasi ai ma le amiolelei ma le agalelei, ua faaalua ai le malosi, toafimalie, faatauaina lelei o oe lava ia, ma le loto pulea.

O le agamalu o se tasi lea o uiga sa sili ona taatele i le soifuaga o le Faaola. O Ia lava na Ia aoao atu i Ona soo, “Ia outou faaaoao ia te au, aua o au le agamalu ma le loto maualalo.”⁹

Ua faamanuiaina i tatou e fananau mai ma le fatu o le agamalu i o tatou

loto. E manaomia ona tatou malamalama e le mafai ona ola ma atiae lena fatu i le emo o se mata ae i le faagasologa o le taimi. Ua talosagaina i tatou e le Faaola ina ia “ave [o tatou] satauro i aso fai soo,”¹⁰ o lona uiga e tatau ona avea o se taumafaiga ma se naunautauga tumau.

Na aoao mai Peresitene Lorenzo Snow, o le perofeta lona lima o la tatou tisipenisione, “O la tatou tiute le taumafai ina ia atoatoa, . . . ia faaleleia i aso taitasi, ma suesue mea na tatou faia i le vaiaso ua tuanai ma faia mea ia sili atu le lelei i lenei vaiaso; faia ni mea i le asō ia sili atu nai lo ananafi.”¹¹ O lea, o le laasaga muamua lava ina ia agamalu o le faaleleia lea i aso taitasi. E manaomia ona tatou taumafai i aso taitasi ina ia sili atu le asō nai lo le aso ua mavae ao tatou agai atu i luma i lenei faagasologa.

Na faaopopo mai Peresitene Snow:

“E i ai nai a tatou gaoioiga faavalevaleyalea ma o tatou vaivaiga; e tatau ona tatou taumafai e faatoilaloina i le vave e mafai ai, ma . . . tatau ona [tuuina] lenei lagona i loto o a tatou fanau . . . ina ia mafai ai ona latou aoao e [amio pulea] ai ma le tatau i Ona luma i tulaga uma lava.

“Afai e mafai e le tane ona nonofo faatasi ma lana ava i le aso e tasi, e aunoa ma le tauaimisa po o le aunoa ma le agaleaga atu i se tasi, pe, aunoa foi ma le faatiga i le Agaga o le Atua . . . ; ua matua atoatoa lava o ia. Ona taumafai lea e faia faapena i le aso e sosoo ai. Ae, a faapea e toilalo o ia i lana taumafaiga i le aso e sosoo ai, e le tatau ona avea lena ma mafuaaga o le a le taumafai ai ia faamanuiaina i le faia o lena mea i le aso lona tolu.”¹²

O le faailoa atu o lo tatou tuuto ma le maelega, o le a foai mai ai e le Alii ia i tatou ia mea ia na le mafai ona tatou mauaina ona o lo tatou le atoatoa ma vaivaiga faaletagata.



O le isi laasaga taua o le mauaina o le agamalu o le aoao lea o le auala e pulea ai lo tatou ita. Talu ai e nofo le tagata natura i totonu o i tatou taitoatasi ma ona tatou te nonofo i se lalolagi ua tumu i ta'iga, o le puleaina o lo tatou ita e mafai ona avea ma se tasi o luitau i o tatou olaga. Mafaufau mo ni nai sekone pe faapefea ona e tali atu pe afai e le gauai atu se tasi i ou manaoga i le taimi tonu lea e te manao ai ia i latou e gauai atu. Ae a pe a le malilie tagata i ou manatu, e ui lava ua e matua mautinoa o le tali tonu lea i se faafitauli? O le a sau tali pe a faatiga se tasi ia te oe, faitio i au taumafaiga, pe agaleaga atu foi ona na te le o maua se faalogona lelei? O taimi faapea ma isi tulaga faigata, e tatau ai ona tatou iloa pulea lo tatou ita ma faailoa atu o tatou lagona ma le onosai ma se faatauana agamalu. E taua tele lenei mea i totonu o o tatou aiga faapea ma a tatou sootaga ma a tatou soa e faavavau. I le aluga o le 31 tausaga talu ona ou faaipoipo i la'u manamea, e masani lava ona ia tuuina mai ia te au ni faamanatu agamalu o lenei mea ao ma fetaiiai ma ma ni luitau le mautonu o le olaga.

Na tuuina atu e le Aposetolo o Paulo ni faatonuga o loo maua lea i Lana Tusi Lona Lua ia Timoteo:

“Aua e le tatau ona finau o le auauna a le Alii, a ia agamalu i tagata uma, ia mafaia ona aoao atu, ma ia onosai,

“Ia aoao atu ma le agamalu i e o finau mai; pe mafai lava le Atua ona foai atu ia te i latou le salamo, ina ia latou iloa lelei le upu moni;

“Ia latou ala mai foi e na moe.”¹³

O le puleaina o a tatou amioga, i le toafimalie ma le faapalepale, ma aloese mai finauga, o le a amata ona tatou agavaa mo le meaalofa o le agamalu. Sa saunoa mai i se tasi taimi ia Peresitene Henry B. Eyring, “A tatou puleaina lo tatou ita i le faatuatua ma taofi lo tatou faamaualuga, e tuu mai e le Agaga Paia Lana faamaoniga, ma o le a mautinoa lava ia folafolaga ma feagaiga paia.”¹⁴

O le isi laasaga e mauaina ai le agamalu o le lotomauualalo lea. Na faatonuina e le Alii Thomas B. Marsh e ala i le Perofeta o Iosefa Samita faapea, “Ia e lotomauualalo; ma o le a taitai oe e le Alii lou Atua i le lima, ma tuu mai ia te oe tali i au tatalo.”¹⁵

Ou te talitonu, uso e ma tuafafine, ua na o i latou o e lotomauualalo e mafai ona iloa ma malamalama i tali a le Alii i a latou tatalo. O e lotomauualalo e mafai ona aoaoina, iloa le ala o latou

faalagolago atu ai i le Atua ma manaao ai ina ia mulimuli i Lona finagalo. O i latou o e lotomauualalo e agamalu ma maua le tomai e uunaia ai isi ia faapena o latou uiga. O le folafolaga a le Atua i e lotomauualalo o le a Ia taitaiina i latou i le lima. Ou te matua talitonu o le a tatou aloese mai ala piopio ma faanoanoaga i o tatou olaga pe a tatou savavali faatasi pea ma le Alii.

O se tasi o faataitaiga o le agamalu o aso nei e sili ona matagofie ua ou iloina o le liua o Uso Moses Mahlangu. Sa amata lona liua i le 1964, ina ua ia mauaina se kopi o le Tusi a Mamona. Sa faagaetiaina o ia ao ia faitauina lenei tusi, ae ina ua oo i le amataga o le vaiata o le 70 faatoa ia vaai ai i se faailo o le Ekalesia AAG i luga o se fale i Johannesburg, Aferika i Saute ao ia savali atu i le auala. Na fafia Uso Mahlangu ma ulu atu ai i le fale ina ia aoao atili i le Ekalesia. Na tau atu ia te ia ma le agalelei e le mafai ona ia auai i sauniga pe papatisoina ona sa lei faatagaina e tulafono a le taunuu i lenei taimi.

Na talia e Uso Mahlangu lenei faaiuga ma le agamalu, loto mauualalo, ma e aunoa ma se ita, ae sa faauau pea ona ia maua se naunautaga malosi ina ia aoao atili e uiga i le Ekalesia. Sa

ia talosagaina taitai o le Ekalesia pe mafai ona faamatala se tasi o faamalama o le falelotu i taimi o sauniga o le Aso Sa ina ia mafai ai ona ia saofai i fafo ma faalogo atu i sauniga. Mo le tele o tausaga, na auai ai e le aunoa ia le aiga o Uso Mahlangu ma uo i le lotu “e ala atu i se faamalama.” I se tasi aso i le 1980 na tau atu ai ia i latou ua mafai ona latou auai i le lotu ma papatisoina. Oka o se aso ina a faamamaluina mo Uso Mahlangu.

Mulimuli ane, na faatuina e le Ekalesia se paranesi i lona alalafaga i Soweto. Pe ana leai le naunautaiga, lototele, ma le faamaoni o tagata e pei o Uso Mahlangu o e na tumau faamaoni mo le tele o tausaga i tulaga faigata, semanu e le tupu lenei mea.

O se tasi o uo a Uso Mahlangu, o le sa auai i le Ekalesia i lea lava taimi e tasi, na toe faamatala maia lenei tala ia te au ina ua ou asia le siteki a Soweto. I le faaiuga o la maua talanoaga, sa ia opoina au. Sa ou lagonaina i lena taimi, uso e ma tuafafine, e pei o opoina au e aao agaalofa o le Faaola. Na faaalua i fofoga o lenei uso lelei le agamalu. Ma se lotu ua tumu i le agalelei ma le lotu faafetai loloto, sa ia talosaga mai ai pe mafai lava le na ona ou tau atu ia Peresitene Thomas S. Monson lona lotofaafetai ma le faamanuiaina o ia ma le toatele o isi mo le mauaina o le talalelei moni i o latou olaga. O faaitaitaiga o le agamalu o Uso Mahlangu ma ana uo na matuai uunaia ai le tele o olaga mo le lelei—aemaise lava au.

Uso e ma tuafafine, ou te talitonu o le Faaola o Iesu Keriso o le faaitaitaiga sili lea o le agamalu. Na oo lava i ona toe taimi o Lona soifuaga faaletino, i le tuuaia ma le sauaina le tonu, amoina ma le tiga o Lona satauro i luga i Kolo-kota, ulagia ma upuleagaina e Ona fili, tuulafoaia e le toatele o e na iloa o Ia ma molimauina Ana vavega, sa tuituiina o Ia i luga o le satauro.

Na oo lava ina ua mavae le tiga matuitui faaletino, na liliu atu le Alii i Lona Tama ma fetalai atu mai le loloto o Lona lotu agamalu ma le maualalo: “Lou Tama e, ia e faamagaloina atu ia te i latou, aua ua latou le iloa le mea ua latou faia.”¹⁶ Na fetaiai Keriso ma tiga matuitui faaletino ma le faaleagaga, ma tuuina mai ai ia i tatou le avanoa e sui ai o tatou uiga faaleagaga ma ia agamalu faapei o Ia.

Ou te molimau atu o Iesu Keriso o lo tatou Faaola. Ou te molimau atu ia te outou, ma le faafetai i Lona alofa, ua mafai ai e i tatou ona suia. E mafai ona lafoai o tatou vaivaiga. E mafai ona teenaina ia faatosinaga leaga i o tatou olaga, pulea lo tatou ita, agamalu, ma atiina ae ia uiga o lo tatou Faaola. Na Ia faaali mai ia i tatou le ala. Na Ia tuuina mai ia i tatou le faaitaitaiga atoatoa ma poloaiina i tatou taitoatasi ina ia avea faapei

o Ia. O Lana valaaulia ia i tatou, o le mulimuli atu lea ia te Ia, mulimuli i Lana faaitaitaiga, ma ia avea faapei o Ia. Ou te molimau atu ai i nei upumoni i le suafa paia, o Iesu Keriso, amene. ■

FAAMATALAGA

1. Moronae 7:43.
2. Moronae 7:44.
3. Taiala i Tuisitusiga Paia, “Agamalu,” scriptures.lds.org.
4. Tagai Kalatia 5:22–23.
5. Kalatia 5:25.
6. Mataio 5:48.
7. Moronae 10:32.
8. *Talai Lau Talalelei: O Se Taiala mo le Galuega Faafaifeautalai* (2004), 124.
9. Mataio 11:29.
10. Luka 9:23.
11. Lorenzo Snow, i le Conference Report, Apr. 1898, 13.
12. *Aoaoga a Peresitene o le Ekalesia: Lorenzo Snow* (2012), 100, 101.
13. 2 Timoteo 2:24–26.
14. Henry B. Eyring, “O Aiga ua Osi Feagaiga,” *Liahona*, Me 2012, 65.
15. Mataupu Faavae ma Feagaiga 112:10.
16. Luka 23:34.





Saunia e Carole M. Stephens

Fesoasoani Muamua i le Au Peresitene Aoa o le Aualofa

Pe O Tatou Iloa Ea Mea Ua Tatou Maua?

Ua tuuina mai e sauniga ma feagaiga o le perisitua le avanoa tatou te mauaina ai le atoaga o faamanuiaga na folafola mai ia i tatou e le Atua, lea ua mafai ona o le Togiola a le Faaola.

I le “O Le Aiga: O Se Folafolaga i le Lalolagi,” na ta’ua ai e le Au Peresitene Sili ma le Korama a Aposetolo e Toasefululua: “O tagata uma—tane ma le fafine—ua foafoaina i le faatusa o le Atua. O i latou taitoatasi o se atalii po o se afafine agaga faapelepele a ni matua faalelagi, ma, o lea ua tofu ai ma se natura paia ma se taunuuga.”¹ Ina ia ausia lenei faamoemoega paia, e manaomia e atalii ma afafine uma o le Atua ia sauniga ma feagaiga o le perisitua.

Tatou te manaomia le papatiso. A faatofuina i tatou i vai o le papatisoga, ua tatou osifeagaiga e tauave i o tatou luga le suafa o Keriso, manatua pea o Ia, ma tausi Ana poloaiga, ma auauna atu ia te Ia e oo i le iuga, ina ia tatou maua pea Lona Agaga e faatasi ma i tatou.²

Tatou te manaomia le meaalofo o le Agaga Paia. O lena sauniga, e mafai ai ona tatou maua le mafutaga faifaipea ma le Agaga. Na aoao mai e Peresitene Uilifoti Uitifafi: “O alii ma tamaitai uma o e ua ulufale mai i totonu o le ekalesia a le Atua ma papatisoina mo le faamagaloina o agasala e i ai lana aia e maua ai faaaliga, le aia i le Agaga o

le Atua, e fesoasoani ia i latou i a latou galuega, i le taitaiina o a latou fanau, i le fautuaina o a latou fanau ma i latou uma o loo i lalo o la latou faamalu-maluga. O le Agaga Paia e le faapitoa i alii, po o aposetolo po o perofeta; e i ai i alii ma tamaitai faatuatua taitoatasi, ma tamaiti taitoatasi o le ua lava lona matua e talia ai le talalelei a Keriso.”³

E manaomia ona tatou mauaina ia faaeega paia o le malumalu. Na saunoa mai Elder M. Russell Ballard: “A o atu ia alii ma tamaitai i le malumalu, ua faaee uma mai ia i laua le mana lava e tasi, o lona uiga o le mana o le perisitua. . . . O le faaeega paia o se meaalofo moni lava o le mana.”⁴

Tatou te manaomia le sauniga o le faamauga, lea e taitai atu ai i le ola e faavavau, “le meaalofo silisili lea o meaalofo uma a le Atua.”⁵ O lenei sauniga o le perisitua ua na o le alii ma le tamaitai ua tuufaatasia e mauaina. Na aoao mai Elder Russell M. Nelson, “Ua toefuatai mai le pule o le perisitua ina ia mafai ai ona faamauina aiga e faavavau.”⁶

Tatou te manaomia le avanoa e faafou ai a tatou feagaiga i vaiaso taitasi ao tatou fetagofi atu i le faamanatuga. Na aoao mai e perofeta ma aposetolo

o aso e gata ai e faapea pe a tatou fetagofi atu ma le agavaa i le faamanatuga, e le gata ua tatou faafouina a tatou feagaiga o le papatisoga ae “o feagaiga uma ua osia ma le Alii.”⁷

Ua tuuina mai i nei sauniga ma feagaiga o le perisitua le avanoa tatou te mauaina ai le atoaga o faamanuiaga na folafola mai ia i tatou e le Atua, lea ua mafai ona o le Togiola a le Faaola. Latou te faaaaupegaina ia atalii ma afafine o le Atua i le mana,⁸ ma tuuina mai ia i tatou le avanoa e maua ai le ola e faavavau—ina ia toe foi atu i le afioaga o le Atua ma nonofo faatasi ma Ia i Lona aiga e faavavau.

Sa matou o talu ai nei ma taitai perisitua e asiasi i aiga o ni tamaitai se toafa i Honduras. Na manaomia e nei tamaitai ma o latou aiga ia ki ma le pule o le perisitua, sauniga ma feagaiga o le perisitua, ma le mana ma faamanuiaga o le perisitua.

Na matou asia se uso pele ua faaipoipo ma e toalua lana fanau aulelei. E faamaoni ma malosi o ia i le Lotu, ma o loo ia aoaoina lana fanau e filifili le mea sa’o. E lagolagoina e lona toalua lona auai i le Ekalesia, ae e le o ia o se tagata o le Ekalesia. E malosi le latou aiga, peitai ina ia olioli i le malosi sili atu, latou te manaomia ni faamanuiaga faaopopo o le perisitua. Latou te manaomia le mauaina e le tama o sauniga o le papatisoga ma le meaalofo o le Agaga Paia ma ia faaee atu i ona luga le perisitua. Latou te manaomia le mana o le perisitua lea e mafai ona oo mai e ala i le faaeega paia ma le faamauga.

O le matou asiasiga na sosoo ai, o le aiga o se auuso nofofua e toalua, o ni tamaitai e maoae le faatuatua. O se tasi o le auuso e i ai sana tama o loo sauni mo se misiona. O le isi o loo faia togafitiga mo le kanesa. I taimi o le lotovaivai ma le faanoanoa, na la manatua ai le Togiola a le Faaola ma ua faatumulia i le faatuatua ma le



faamoemoe. Ua la manaomiaina uma ia faamanuiaga ma le mana faaopopo ia o loo maua e ala atu i sauniga o le malumalu. Na matou uunaia i laua e tutu faatasi ma faifeautalai o le lumanai o i lo latou aiga i le sauniaina ina ia maua na sauniga.

O la matou asiasiga mulimuli o le aiga lea o se tamaitai sa maliu talu ai nei lona toalua i se faalavalave matuia. O se tagata faatoa liliu mai i le Ekalesia, sa ia le malamalama e mafai ona ia maua ni ona lava faaeega paia ma faamauiina i lana tane. Ina ua matou aoaoina o ia e mafai ona la mauaina ma lana tane ua maliu nei faamanuiaga, na faatumulia o ia i le faamoemoe. O le iloaina o sauniga ma feagaiga o le

malumalu o le a mafai ona faamauiina ai faatasi lona aiga e faavavau, ua ia maua ai le faatuatua ma le naunautuiga e feagai ai ma luitau o i luma atu.

O loo sauni le tama a le tina ua maliu lana tane ia maua le Perisitua Arona. O le faauuina o ia o le a avea ma se faamanuiaga sili ia te ia ma lona aiga. O le a i ai se tasi e umia le perisitua i lo latou aiga.

Ina ua ou feiloai i nei tamaitai faamaoni i Honduras, na ou iloa lo latou taumafai e faatumau pea le malosi o lo latou aiga i le talalelei. Na latou faaalua le faafetai mo tagata tausii feagaiga a le uarota o e na tausii ma le agaaloa i latou ma fesoasoani i le tausiga o lo latou manaoga faaletino ma faaleagaga.

Peitai, na tofu uma nei tamaitai ma manaoga e lei taulimaina ma le atoatoa.

I aiga taitasi sa matou asia, sa fesiligia e se taitai perisitua atamai ia uso taitasi pe sa ia mauaina se faamanuiaga faaleperisitua. O tali taitasi o le leai. Na talosagaina e uso taitasi se faamanuiaga faaleperisitua ma maua ai i lena aso. Na fetagisi uma i latou ao faaalua e le tagata lava ia le faafetai mo le mafanafana, taitaiga, faamalolosiauga, ma musumusuga lea na oo mai lona Tama Faalelagi e ala mai i se tasi o loo agavaa e umia le perisitua.

Na uunaia au e nei uso. Na latou faaalua le faaaloalo mo le Atua ma Lona mana ma le pule. Sa ou faafetai foi mo taitai perisitua o e na matou asia faatasi nei aiga. Ina ua tuua nei aiga taitasi, sa matou fefautuaai faatasi e uiga i le auala e fesoasoani atu ai i nei aiga ina ia maua ia sauniga latou te manaomia e alualu ai i luma i le ala o le feagaiga ma faamalolosia o latou aiga.

O loo i ai i lenei vaitaimi se manaoga sili mo alii ma tamaitai ina ia atiina ae le faaaloalo o le tasi i le isi o ni atalii ma ni afafine o le Atua atoa ai ma le faaaloalo mo lo tatou Tama oi le Lagi ma Lana perisitua—o Lana pule ma le mana.

E i ai Lana fuafuaga mo i tatou, ma a tatou faaaogaina lo tatou faatuatua ma faalagolago i Lana fuafuaga, o le a faamalolosia lo tatou faaaloalo mo Ia ma mo Lana pule ma le mana o le perisitua.

I le aoaoga mo taitai i le lalolagi atoa i le *Faamalolosia o le Aiga ma le Ekalesia e ala i le Perisitua*, ua aoao mai ai i tatou e faapea e le tatau ona lagona e tuafafine e le o i ai nisi o umia le perisitua i o latou aiga le tuuatoatasi. Ua faamanuiaina ma faamalolosia i latou e ala i sauniga sa latou mauaina ma feagaiga ua latou tausii. E le tatau ona latou faatuai e aapa atu pe a manaomia le fesoasoani. Sa aoao mai Elder M. Russell Ballard e faapea e tatau ona silafia e tamaitai uma i le



Ekalesia o loo i ai sona epikopo, se peresitene o le korama a toeaina, se faiaoga o aiga, ma isi tagata agavaa o loo umiaina le perisitua o e e mafai ona ia faalagolago i ai e sau i le fale ma fesoasoani ia te ia ma “tuuina mai se faamanuiaga.”⁹ e pei ona faaopopo mai ai Sister Rosemary M. Wixom.

Na aoao mai foi Elder Ballard: “E matamau le Tama oi le Lagi i Lona mana. E maua e alii ma tamaitai uma lenei mana e fesoasoani ai i o latou lava olaga. O i latou uma ua osia ni feagaiga paia ma le Alii ma e e faamamaluina nei feagaiga, o le a agavaa e maua se faaaliga patino, ina ia faamanuiaina ai e le auaunaga a agelu, [ma] talanoa ma le Atua.”¹⁰

Tatou te manaomia uma lava le tasi ma le isi. E manaomia e atalii o le Atua ia afafine o le Atua, ma e manaomia e afafine o le Atua atalii o le Atua.

E eseese a tatou meaalofa ma malo-siaga. Ua faamamafa mai e le Korinito Muamua mataupu e 12 le manaomia e atalii ma afafine o le Atua, o i tatou taitoatasi, ona faataunuuna a tatou matafaioi ma tiutetauave taitoatasi e tusa ai ma le fuafuaga a le Alii ina ia manuia ai tagata uma.¹¹

Atalii o le Atua, o outou iloa ea po o ai outou? O outou iloa ea mea ua outou mauaina? O outou agavaa e faa-aoga le perisitua ma maua le mana ma faamanuiaga o le perisitua? O outou talisapaia ea a outou matafaioi ma tiutetauave o le faamalolosia o aiga o ni tama, tama matutua, atalii, tuagane,

ma tane o aiga? O outou faaaliga ea le faaalolo i tamaitai, tulaga faatamaitai, ma tulaga faatina?

Afafine o le Atua, o tatou iloa ea po o ai i tatou? O tatou iloa ea mea ua tatou mauaina? O tatou agavaa ea ina ia maua le mana ma faamanuiaga o le perisitua? O tatou mauaina ia meaalofa na tuuina mai ia i tatou ma le agaga faafetai, alofa tunoa, ma le malualii? O tatou talisapaia ea a tatou matafaioi ma tiutetauave ia faamalolosia aiga i le avea ai ma ni tina, tina matutua, uso, ma fafine o aiga? O tatou faaaliga ea le faaalolo i alii, tulaga faatamatane, ma tulaga faatama?

I le avea ai ma ni atalii ma afafine o le feagaiga, o tatou maua ea le faatua-tua i lo tatou Tama Faalelagi ma Lana fuafuaga e faavavau mo i tatou? O tatou faatua-tua ea ia Iesu Keriso ma Lana Togiola? O tatou talitonu ea e i ai so tatou natura paia ma le taunuuga? Ma o tatou taumafaiga ina ia ausia lenei faamoemoega ma maua mea uma ua i ai i le Tama,¹² ua tatou malamalama ea i le taua o le mauaina o sauniga o le perisitua ma osia, tausia, ma toe faafouina a tatou feagaiga ma le Alii?

O i tatou o atalii ma afafine agaga faapelepele o ni matua faalelagi, ma se natura paia ma le taunuuga. Ua lava le alofa o lo tatou Faaola, o Iesu Keriso ia i tatou na foai mai ai Lona soifua mo i tatou, ma ua saunia e Lana Togiola le auala mo i tatou e agai ai i luma i le ala ma lo tatou aiga faalelagi e ala atu i sauniga ma feagaiga paia o le perisitua.

O nei sauniga ma feagaiga o le perisitua na toefuataiina i le lalolagi e ala mai i le Perofeta o Iosefa Samita, ma o loo umia i le taimi nei e Peresitene Thomas S. Monson ia ki uma o le perisitua i luga o le fogaeleele.

Na aoao mai Elder D. Todd Christofferson, “O Le Ekalesia a Iesu Keriso o le Au Paia o Aso e Gata Ai, o loo i ai le pule o le perisitua e faataunuua ai sauniga ia e mafai ona tatou ulu atu ai i feagaiga tumau ma lo tatou Tama Faalelagi i le suafa o Lona Alo Paia. . . . O le a tausia e le Atua Ana folafolaga ia te oe, pe a e faamamaluina au feagaiga ma Ia.”¹³

Ou te molimau atu ai i nei mea, i le suafa o Iesu Keriso, amene. ■

FAAMATALAGA

1. “O Le Aiga: O Se Folafolaga i le Lalolagi,” *O Le Liahona*, Nov. 2010, 129.
2. Tagai Moronae 4:3; 6:3.
3. *Aoaoga a Peresitene o le Ekalesia: Wilford Woodruff* (2004), 50–51.
4. M. Russell Ballard, “Let Us Think Straight” (Brigham Young University Education Week devotional, Aug. 20, 2013); speeches.byu.edu.
5. Mataupu Faavae ma Feagaiga 14:7; tagai foi Mataupu Faavae ma Feagaiga 131:1–4.
6. Russell M. Nelson, “Faafailleina o Faaipo-poga,” *O Le Liahona*, Me 2006, 37; po o le *O Afafine i Lou Malo: O Le Talafaasolopito ma le Galuega a le Aualofa* (2011), 144.
7. Delbert L. Stapley, i le Conference Report, Oct. 1965, 14; sii mai ia L. Tom Perry, “A o Tatou Fetagofie Atu Nei i le Faamanatuga,” *O Le Liahona*, Me 2006, 41; tagai foi *Aoaoga a Gordon B. Hinckley* (1997), 561; *Aoaoga a Spencer W. Kimball*, ed. Edward L. Kimball (1982), 220.
8. Tagai Mataupu Faavae ma Feagaiga 109:22.
9. Tagai M. Russell Ballard ma Rosemary M. Wixom, “O Faamanuiaga o le Perisitua i Aiga Uma,” i le *Faamalolosia o le Aiga ma le Ekalesia e ala i le Perisitua* (aoaoga a taitai i le lalolagi atoa, 2013); lds.org/broadcasts.
10. M. Russell Ballard, “Let Us Think Straight”; speeches.byu.edu.
11. Tagai foi Mataupu Faavae ma Feagaiga 46:9, 12.
12. Tagai Mataupu Faavae ma Feagaiga 84:38.
13. D. Todd Christofferson, “O Le Mana o Feagaiga,” *O Le Liahona*, Me 2009, 22.



Saunia e Elder Edward Dube

○ Le Fitugafulu

Tepa i Luma ma Talitonu

I le silafaga a le Alii, e le o le tele o mea ua tatou faia po o nofoaga ua tatou o i ai ae o le tele naua o mea ua tatou loto e o i ai.

A o ou tamaitiiti ma galue ai i le fanua ma lou tina, sa ia aoaoina au i se tasi o lesona taua o le olaga. Ua leva le taeao, sa i luga le la ma sa ou manatu o se taimi umi tele na ma vele vao ai. Sa ou tu ma tepa i tua i mea sa ma ausiaina ma faapea atu i lou tina, “Vaai i mea uma ia sa ta faia!” E le i tali mai tina. I le manatu ai na te le i lagonaina au, sa ou toe fai atu i sina leotele teisi atu. Sa le i tali mai lava o ia. Sa ou toe fai atu ma siisii i luga lou leo ina ia leotele atu. Mulimuli ane, sa ia liliu mai ia te au ma faapea mai, “Edward, aua nei e toe tepa i tua. Tepa i luma i mea na e tatau ona ta faia.”

Ou uso e ma tuafafine, o le fea-gaiga sa tatou osia ma le Alii ina ua papatisoina i tatou, “ia tutu o ni moli-mau a le Atua i taimi uma ma i mea uma, ma i nofoaga uma atonu [tatou] te i ai” (Mosaea 18:9), o se tautinoga o le olaga atoa. Sa fautua mai Peresitene Dieter F. Uchtdorf: “O i latou ua ulu ifo i le vai o le papatisoga ma mauaina le meaalofa o le Agaga Paia ua tutu o latou vae i luga o le ala o le ave ma soo ma ua poloaiina ai e mulimuli ma le mausali ma le atoatoa i tulagaaoo o lo tatou Faaola” (“O Le Au Paia Mo

Vaitau Uma,” *Liahona*, Sete. 2013, 5). E valaauina i tatou e le Alii e ala i Ana auauna i valaauga eseese, lea tatou te taliaina ma le tuuto atoa. Pe a tuuina atu se faamalologa ma tuu atu se vala-auga i se isi tofiga ese, tatou te taliaina ma le olioli i le iloaina, e pei ona sa iloaina e o tatou augatama, e faapea “i le galuega a le Alii, e le o le tofiga e te auauna ai ae o le auala e te faia ai” (J. Reuben Clark Jr., i le Conference Report, Ape. 1951, 154).

O le mea lea pe a faamaloloina se peresitene o se siteki po o se epikopo, na te taliaina ma le olioli lona faa-malologa, ma pe a tuuina atu i ai se valaauga e galue ai i soo se auala ua silafia e le Alii, “e tatau” (Mosaea 3:19), e auala mai i Ana auauna, e le lofi-tuina o ia i ona aafiaga ua tuanai, pe tepa foi i tua ma manatu ua lava lana auaunaga. Na te “le faavaivai i le faia o mea lelei,” aua na te iloaina, ua ia “faa-taatiaina le faavae o se galuega tele” faatasi ma se vaaiga mamao manino o na taumafaiga e manuia ai olaga mo le faavavau. Ma “o mea iti e tutupu mai ai mea tetele” (MF&F 64:33).

E tatau ona tatou “auai ma le naunau-tai i se faamoemoega lelei, ma fai mea e

tele i lo [tatou] lava loto malie, ma aumai le amiotonu tele” (MF&F 58:27).

Sa fautua mai Elder Jeffrey R. Holland o le Korama a Aposetolo e Toasefululua: “O le tuanai e mo le aoaoina mai ai, ae le o le ola ai. Tatou te vaai i tua e pue mai mea silisili ona lelei mai aafiaga lelei ae le o aafiaga ua uma. Ma afai ua tatou aoaoina mea e manaomia ona tatou aoaoina ma ua tatou aumaia ma i tatou mea sili na tatou aafia ai, ona tatou vaavaai lea i luma ma manatua o le faatuatua e masani lava ona faasino atu i le lumanai” (“O Le a Oo Mai Le Mea Sili,” *Liahona*, Ian. 2010, 18).

E ui o le lesona a lou tina o le tepa i luma na faatatau e agai atu i vao na vaaia sa i ai i le fanua, o lena luitau na itiiti atu se faatusatusaga i mea na oo i ai le Au Paia anamua. Sa lelei tele le faamatalaina e Elder Joseph B. Wirthlin o lenei aafiaga: “I le 1846, e sili atu i le 10,000 tagata sa tuua le aai uluola sa latou fauina i auvai o le Vaitafe o Misisipi. Faatasi ma le faatuatua i taitai faaperofeta, sa tuua ai e na uluai tagata o le Ekalesia lo latou ‘Aai Matagofie’ ma o atu i le vao i tuaoi o Amerika i na taimi. Sa latou le iloa tonu po o fea o latou o i ai, a e pe fia tonu ni maila o i luma atu, a o le a le umi o le faigamalaga, ae pe o le a foi se lumanai o faatali mai mo i latou. Ae sa latou *iloa lava* sa taitaia i latou e le Alii ma Ana auauna” (“Faatuatua o o Tatou Tama,” *Ensign*, Iulai 1996, 38).

Sa latou iloaina le uiga o le tepa i luma ma talitonu. O le sefululima tausaga na muamua atu, na i ai nisi o nei au paia i le taimi na maua ai se faaaliga:

“Aua e moni Ou te fai atu ia te outou, amuia lava o ia o le e tausi i a’u poloaiga, pe i le olaga nei po o i le oti; ma o ia o le e faamaoni i puapuaga, ua sili atu le tele o le tau i lea lava tagata i totonu o le malo o le lagi.



“E le mafai ona outou vaaia i o outou mata faalenatura, i le taimi nei, le fuafuaga a lo outou Atua e faatatau i mea o le a oo mai pe a mavae le taimi nei, ma le mamalu e mulimuli mai pe a mavae puapuaga e tele” (MF&F 58:2–3).

E mafai foi ona tatou tepa i luma ma talitonu. E mafai ona tatou taliaina ma le atoatoa le valaaulia a lo tatou Alii, o le ua valaauliaina i tatou faatasi ai ma ona aao o loo faaloaloa mai:

“Ia outou o mai ia te au, o outou uma o e tigaina ma mafatia i avega, o a’u foi e malolo ai outou.

“Ia outou amoina la’u amo, ma ia outou faaa’oa’o ia te au; aua o a’u le agamalu ma le loto maulalo: ona maua lea e outou o le malologa mo outou agaga.

“Aua e avegofie la’u amo, o la’u avega foi e mama ia” (Mataio 11:28–30).

O la tatou perofeta pele, o Peresitene Thomas S. Monson; o ona fesoaosoini; ma le Korama a Aposetolo e Toasefululua ua tuuina mai se valaaulia mo i tatou uma ia auai i le galuega o le faaolataga. O tagata fou liliu mai, le autalavou, talavou matutua, o i

latou ua litaea mai a latou galuega, ma faifeautalai faamisiona e manaomia ona tau fai amo faatasi e faanatinatia le galuega o le faaolataga.

I se tasi taimi sa auai atu ai Peresitene Boyd K. Packer, o le Peresitene o le Korama a Aposetolo e Toasefululua i se tauvaga tosoga avega mamafa a povi, lea sa ia aoaoina mai ai se lesona. Sa ia saunoe e uiga i lea aafiaga: “O se taavale toso sa faamamafaina i poloka sima: sefulu afe pauna [4,535 kk]—lima tone le mamafa. . . . O le faamoemoega sa mo le pulu e faame’iina le taavale toso mo le tolu futu [91 sm]. . . . Sa ou matauina ai se paaga tutusa o manu lapopoa tetele, lanu fefiloi, lanumoana faefuefu . . . [o le] pulu tele lanumoana o vaitau ua tuanai.”

I le talanoaina o le taunuuga o le tauvaga, sa ia faapea mai ai: “O au sa taitasi ma aveesea. . . . O le pulu lapoa lanumoana e le’i i ai sona tulaga! O se soa o manu laiti ma faatauvaa, sa le i faatusalia le laiti o tino, sa faame’iina faatasi le taavale tosomani i taimi uma e tolu.”

Ona ia tuuina mai lea o se faamalalamalaga o le taunuuga ofoofogia: “Sa lapopoa atu ma malolosi atu ia povi lanumoana nai lo le isi au. Ae o povi laiti sa lelei atu lo la galulue faatasi o se au ma le faamaopoopoga. Sa la amoina faatasi. O manu uma e lua sa tau fai tuuoso uma i luma i le taimi e tasi ma toso ai i le malosiaga le avega” (“Equally Yoked Together,” lauga sa tuuina atu i le semina a sui lisone, Ape. 3, 1975; in *Teaching Seminary: Preservice Readings* [2004], 30).

A tatou tepa i luma ma talitonu, tatou te manaomia lenei lava galulue faatasi o se au i le faanatinatiina o le galuega o le faaolataga a o tatou valaaulia isi e o mai ia Keriso. I o tatou gafatia taitoatasi, e manaomia ona tatou mulimuli i le fautuaga a Peresitene Dieter F. Uchtdorf ia “tutu faatasi ma sii i luga mai le mea o loo tatou tutu ai” (“Faamaualuga Le Mea E Te Tu Ai,” *Liahona*, Nov. 2008, 56). E mafai ona tatou iloaina lo tatou gafatia atoa, e pei ona sa matauina e Elder L. Tom Perry o le Korama a Aposetolo e Toasefululua: “A ou malaga atu i le Ekalesia atoa ou

te maofa i mea lelei o loo tutupu. Peitai ou te lagonaina lava, i le avea ai ma se nuu, tatou te le o ola lava e tusa ma lo tatou gafatia moni. Ou te lagona tatou te le o galulue faatasi i taimi uma, o loo tatou fiafia tele i manaoga mo le mamalu ma le manuia faaletagata lava ia, ma faaalua sina fiafia teisi i sini autasi o le fausiaina o le malo o le Atua” (“United in Building the Kingdom of God,” *Ensign*, May 1987, 35).

Tau ina ia tatou tutu faatasi uma i se faamoemoega autasi “ia aumaia le tino ola pea ma le ola faavavau o le tagata” (Mose 1:39).

O lo tatou Faaola, o Iesu Keriso, o le Na te silasila mai le amataga e oo i le iuga, sa silafia lelei le auala o le a Ia savalia i Ketesemane ma Korokota ina ua Ia folafola mai, “O le tago lona lima i le suotosina, ma tepa i tua, e le tatau ia i le malo o le Atua” (Luka 9:62). I le silafaga a le Alii, e le o le tele o mea ua tatou faia po o nofoaga ua tatou o i ai ae o le tele naua o mea ua tatou loto e o i ai.

O a tatou mataupu faavae taiala sa aoaoina ai i tatou e le Perofeta o Iosefa Samita: “O mataupu faavae autu o lo tatou talitonuga o molimau a le au Aposetolo ma Perofeta, e faatatau ia Iesu Keriso, e faapea Ia maluu, ma tanumia, ma toetu mai i le aso tolu, ma afio ae i le lagi; ma o isi mea uma e faatatau i lo tatou talitonuga ua na o ni faaopoopoga i ai” (*Aoaoga a Peresitene o le Ekalesia: Iosefa Samita* [2007], 53).

Ou te molimau atu a tatou mulimuli i le faaitaiga a le Faaola, o Iesu Keriso, ma siiina o tatou lima i le sikuea faatasi ai ma le faatinoga i le lagolagoina o lo tatou perofeta pele, o Peresitene Thomas S. Monson, o le a tatou mauaina le filemu, mafanafana, ma le olioli, ma tatou “aia le lelei o le lauelele . . . i aso nei e gata ai” (MF&F 64:34). I le suafa o Iesu Keriso, amene. ■



Saunia e Elder David A. Bednar

○ Le Korama a Aposetolo e Toasefululua

○ Pupuni o le Lagi

E oo mai faamanuiaga faaleagaga ma faaletino i o tatou olaga pe a tatou ola i le tulafono o le sefuluui.

○ Ou te fia faamatala atu ni lesona taua se lua ua ou aoaoina e uiga i le tulafono o le sefuluui. O le lesona muamua o loo taulai atu i faamanuiaga e oo mai i tagata taitoatasi ma aiga pe a latou usiusitai ma le faamaoni i lenei poloaiga. O le lesona lona lua o loo faamamafa ai le taua o le sefuluui i le tuputupu ae o Le Ekalesia a Iesu Keriso o le Au Paia o Aso e Gata Ai i le lalolagi atoa. Ou te tatalo o le a faamautu mai e le Agaga Paia ia i tatou taitoatasi le moni aiai o mataupu faavae ua ou talanoaina.


Lesona Numera 1—O Faamanuiaga Lemafaamatalaina ae Tauga

O le tina o Sister Bednar o se tamaitai faamaoni ma o se tagata fatuiga musuia. Mai le popofou o lana faaipopoga, na ia tausua ai ma le faaeteete ni faamaumauga tautupe a le aiga. Mo le tele o tausaga na ia faamaumau maeaea ai ia tupe maua ma tupe faaalu a le aiga e faaoga ai ni api tausua faigofie lava. O faamatalaga na ia aoina i le aluga o tausaga sa atoatoa ma malamalama lelei.

A o tamaitai talavou ia Sister Bednar, sa faaoga e lona tina ia faamaumauga i api tausua faigofie ma faamamafa ai ni mataupu faavae autu o le ola faautauta ma le puleaina o le aiga ma le faaeteete. I se tasi aso ao la iloiloina

faatasi le tele o vaega o tupe faaalu, sa matauina ai e lona tina se mamalu mataina. O le tologi o asiasiga i fomai ma vailaau faafomai mo lo latou aiga na matua maualalo lava nai lo le mea na faamoemoeina. Sa ia faatatauina lenei mea na maua i le talalelei a Iesu Keriso ma faamalalama atu i lana tama se upumoni mamana: a tatou ola i le tulafono o le sefuluui, e tele lava ina tatou mauaina faamanuiaga lemafaamatalaina ae taua, ae e le o mea ia tatou te faamoemoeina i taimi uma lava ma faigofie ona le amanaiaina. Sa lei mauaina e le aiga ni tupe faaopoopo faafuasei pe iloga i tupe maua a le aiga. Ae, na foai atu e se Tama Faalelagi alofa ni faamanuiaga faigofie i ni auala masani ma iloagofie. Sa manatua pea e Sister Bednar lenei lesona taua mai lona tina e uiga i le fesoasoani lea e sau ia i tatou e auala i pupuni o le lagi, e pei ona folafolaina e Malaki i le Feagaiga Tuai (tagai Malaki 3:10).

E pei ona tatou aoao soo atu ma molimau atu e uiga i le tulafono o le sefuluui, tatou te faamamafa lava ia faamanuiaga faaletino tuusao, faaga-eetia, ma faigofie ona iloina ia tatou te mauaina. Ma e mautinoa lava o ia faamanuiaga o loo maua. Ae o nisi o ia faamanuiaga eseese tatou te maua pe a tatou usiusitai i lenei poloaiga e lemafaamatalaina ae taua. O ia



faamanuiaga e faatoa mafai ona tatou iloatinoina pe afai tatou te gauai atu i ai ma mataala faaleagaga (tagai 1 Korinoto 2:14).

O le vaaiga o faamalama po o “pupuni” o le lagi o loo faaoga e Malaki e matua aoga lava. E faataga e pupuni po o faamalama le malamalama faanatura ona ulufale atu i se fale. I se ala faapena, e faasalalau atu ai le malamalama ma le vaaiga faaleagaga e auala atu i faamalama po o pupuni o le lagi ma i o tatou olaga pe a tatou faamamaluina le tulafono o le sefuluai.

Mo se faataitaiga, o se faamanuiaga lemafaamatalaina ae taua tatou te mauaina o le meaalofa faaleagaga o le loto faafetai lea e mafai ai ona tatou talisapaia mea ua tatou maua e faafetaiaia ai manaoga mo mea tatou te mananao i ai e lei mauaina. O se tagata loto faafetai e faatumulia i le lotomalie. O se tagata e le loto faafetai e mafatia i le mativa o le eleele e le malie i vai ona o le matapeapea (tagai Luka 12:15).

E manaomia ona tatou tatalo mo se fesoasoani e saili ai se galuega talafeagai. Peitai, e manaomia ni mata ma ni taliga o le faatuatua (tagai Eteru 12:19), e iloa ai meaalofa faaleagaga o le iloaitino sili atu lea e mafai ona faamamanaina ai i tatou ia maua ni avanoa faigaluega lea e le amanaiaina e le toatele o isi tagata—po o le faamanuiaga o le faateleina o le naunautaiga

patino e saili malosi ma faaumiumi atu mo se galuega nai lo isi tagata atonu o loo mafai pe naunau e fai. Atonu tatou te mananao ma faamoemoe e tuulima atu se galuega, ae o le faamanuiaga lea e sau ia i tatou e ala i pupuni o le lagi, atonu e sili atu le gafatia e faatino ai ma suia ai o tatou lava tulaga nai lo le faamoemoeina o o tatou tulaga ina ia suia e se tasi po o se isi mea.

Atonu tatou te mananao ma le talafeagai ma galulue ina ia maua se siitaga o le totogi i a tatou galuega ina ia maua ai mea e manaomia o le olaga. Peitai, e manaomia mata ma taliga o le faatuatua tatou te iloaina ai e i tatou lava se faateleina o le faaleagaga ma le gafatia faaletino (tagai Luka 2:52) ina ia tele atu mea e fai i sina tupe itiiti, se tomai ua faaleleia e faatulaga ai mea e faamuamua ma ola i se olaga faigofie, ma se tomai faaleleia e taulimaina ai ma le faaeteete ia meatotino faitino ua uma ona tatou maua. Atonu tatou te mananao ma faamoemoeina se totogi telē atu, ae o le faamanuiaga e oo mai ia i tatou e ala i pupuni faalelagi atonu e tele atu lona gafatia e sui ai o tatou lava tulaga nai lo le faamoemoeina o o tatou tulaga ina ia suia e se tasi po o se isi mea.

Sa tatalo faatauanau ia fitafita talavou i le Tusi a Mamona (tagai Alema 53; 56–58) ia faamalosi i latou e le

Atua ma laveai i latou mai lima o o latou fili. O le mea e mataina ai, o tali i nei tatalo sa lei maua ai nisi auupega pe sa faateleina ai le aofai o le autau. Ae, na tuu atu e le Atua i nei fitafita faatuatua le faamautinoaga o le a Ia laveaiina i latou, le filemu i o latou agaga, ma le tele o le faatuatua ma le faamoemoe mo lo latou laveaiga ia te Ia (tagai Alema 58:11). O lea, sa lototetele ai atalii o Helamana, ma mausali i se naunautaiga e faatoilalo, ma o atu ma lo latou malosi atoa e tau faasaga ia sa Lamana (tagai Alema 58:12–13). O le faamautinoaga, filemu, faatuatua, ma le faamoemoe sa lei foliga mai i le amata o ni faamanuiaga ia sa mananao i ai fitafita i le taua, ae o faamanuiaga tonu lava ia sa manaomia e nei alii talavou totoa e fetaomi ai i luma ma manumalo ai faaletino ma faaleagaga.

O nisi taimi atonu tatou te ole atu i le Atua mo le manuia, ma Ia tuu mai ai ia i tatou le malosi faaletino ma faalemafaufau. Atonu tatou te ole atu mo le uluola, ae tatou mauaina le vaaiga faateleina ma le faateleina o le onosai, pe tatou te faatoga atu mo le tuputupu a’e ae faamanuiaina i tatou i le meaalofa o le alofatunoa. Atonu Na te foai mai ia i tatou le talitonuga maumaututu ma le mautinoa a o tatou tauivi e ausia ni sini agavaa. Ma a tatou augani atu mo se toomaga mai faigata faaletino, faalemafaufau ma faaleagaga, atonu Na te faateleina lo tatou naunautaiga ma le onosai.

Ou te folafola atu a tatou usiusitai ma tausia le tulafono o le sefuluai, e moni lava o le a toina pupuni o le lagi ma sasaa mai faamanuiaga faaleagaga ma faaletino ia o le a leai se avanoa e totoa e teu ai (tagai Malaki 3:10). O le a tatou manatua foi le tautinoga a le Alii:

“Aua o o’u manatu e le o outou manatu, o o’u ala e le o outou ala, ua fetalai mai ai Ieova.

“Aua e pei ona sili ona maualuga

o le lagi i le lalolagi, ua faapea ona sili ona maualuga o o'u ala i o outou ala, ma o'u manatu e sili i o outou manatu" (Isaia 55:8–9).

Ou te molimau atu a tatou gauai atu faaleagaga ma le toto'a, o le a faamanuiaina i tatou i mata e manino atili le vaai, o taliga e lelei atili le faalogo, ma loto e malamalama atoatoa atili i Ona ala, Ona manatu, ma Ana faamanuiaga lemafaamatalaina ma taua i o tatou olaga.

Lesona Numera 2—o le Faigofie o le Ala a le Alii

A o lei valaauina au e auauna atu o se uso o le Korama a le Toasefululua, sa ou faitau i le tele o taimi i le Mataupu Faavae ma Feagaiga e uiga i le aufono na tofia e vaavaaia ma tufatufa atu ia tupe paia o le sefuluai. O Le Aufono e Taulimaina le Sefuluai sa faavaeina e ala i faaaliga ma e i ai le Au Peresitene Sili, le Korama a Apose-tolo e Toasefululua, ma le Au Epikopo Pule Faamalumu (tagai i le MF&F 120). A o ou sauni ia Tesema o le 2004 e auai i lau fonotaga muamua o lenei aufono, sa ou mafaufau muamua lava ma le naunautai i se avanoa sili ona ofoofogia e aoao ai.

Ou te manatua pea ia mea na ou oo i ai ma lagonaina i lena aufono. Sa ou maua ai se talisapaia tele atu ma le migao mo tulafono a le Alii o mea tautupe mo tagata taitoatasi, mo aiga, ma mo Lana Ekalesia. O le polokalama tautupe autu a Le Ekalesia a Iesu Keriso o le Au Paia o Aso e Gata Ai—mo tupe maua ma tupe faamatuu atu—o loo faamatalaina i le vaega e 119 ma le 120 o le Mataupu Faavae ma Feagaiga. E lua faamatalaga o loo maua i nei faaaliga o loo tuu mai ai le faavae mo mataupu tautupe a le Ekalesia.

O loo taua manino i le vaega e 119 e faapea o tagata uma "ia totogi atu le tasi-vaesefulu o a latou mea



faaopoopo uma i tausaga taitasi; ma ia avea lenei ma tulafono tumau ia te i latou e faavavau, . . . ua fetalai mai ai le Alii" (fuaiupu e 4).

Ae e faatatau i le faamatuu atu o sefuluai ua faatagaina, na fetalai ai le Alii, "Ia taulimaina ia mea e se aufono, e aofia ai le Au Peresitene Sili o la'u Ekalesia, ma le epikopo ma lana aufono, ma la'u aufono maualuga; ma i lo'u lava leo ia te i latou, ua fetalai mai ai le Alii" (MF&F 120:1). O le "epikopo ma lana aufono" ma "la'u aufono maualuga" o loo faatatau i ai le mau i lenei faaaliga ua lauiloa i aso nei o le Au Epikopo Pulefaamalumu ma le Korama a Apose-tolo e Toasefululua. O nei tupe paia o loo faaaogaina i se ekalesia ua televave le tuputupu ae ina ia faamanuiaina ai faaleagaga tagata taitoatasi ma aiga e ala i le fausiaina ma le tausia o malumu ma fale tapuai, lagolagoina o le galuega faafaifeautalai, faaliliuina ma le lolomiina o tusitusiga paia, uunaiaina o sailiga o talafaasolopito o aiga, faatupeina o aoga ma aoaoga faalelotu, ma le faataunuuna o le tele o isi faamoemoga a le Ekalesia e pei ona taitaia ai e auauna faauuna a le Alii.

Ou te maofa i le manino ma le

pupuu o faaaliga nei e lua e faatusatusa i taiala tautupe lavelave ma faiga faavae faalepulega o loo faaaogaina i le tele o faalapotopotoga ma faigamalo i le lalolagi atoa. E mafai faapefea ona faagaoiio mataupu faaletino a se faalapotopotoga e tele e pei o le Ekalesia toefuataiina a Iesu Keriso i le lalolagi atoa e faaoga ai ia faatonuga pupuu? Ia te au lava ia o le tali e tuusao lava: o le galuega lenei a le Alii, e mafai ona Ia faia Lana lava galuega (tagai 2 Nifae 27:20), ma e musuia ma taitai e le Faaola Ana auauna a o latou faaaogaina Ana faatonuga ma galulue i Lana galuega.

I lena fonotaga muamua a le aufono sa faagaetia ai lava au i le faigofie o mataupu faavae o loo taialaina ai a tatou fuafuaga ma faaiuga. I faagaoiioiga tautupe a le Ekalesia, o loo matauina ai ni mataupu faavae se lua ma tumau. Muamua, e ola le Ekalesia e tusa ma mea ua ia maua ma na te le faaaluina ni tupe e sili atu ma mea ua ia mauaina. Lua, o se vaega o tupe maua i tausaga taitasi e tuuese, o se tupe faaleoleo lea mo ni mea faafuasei ma ni manaoga e lei mafafuina. Mo le tele o tausaga, ua aoao ai e le Ekalesia ona tagata e uiga i le

mataupu faavae o le tuuese o ni meaa faaopoopo, suauu, ma tupe e taulima ai ni faalavelave e ono tutupu faafua-sei. E mulimulitaia ma le faigofie e le Ekalesia o se faalapopotoga ia lava mataupu faavae e tasi o loo aoao soo atu i tagata.

A o faagasolo ai lea fonotaga, sa ou moomoo ai maimau pe ana mafai ona iloa uma e tagata o le Ekalesia le faigofie, le manino, ma le faatula-gaga tatau, le lotofoi, ma le mamana o le ala a le Alii lava Ia (tagai MF&F 104:16) mo le faatautaiga o mataupu faaletino a le Ekalesia. Ua tele nei tausaga o ou auai ai i le Aufono e Taulimaina le Sefuluai. E faatupulaia lava lou loto faafetai ma le migao mo le mamana a le Alii i tausaga taitasi, faapea ai ma lesona ua aoaoina ua faateleina le loloto.

Ua faatumulia lou loto i le alofa ma le faamemelo mo tagata faamaoni ma usiusitai o lenei Ekalesia mai malo uma, ituaiga, gagana, ma nuu. A o ou femalagaai ai i le lalolagi, ua ou iloa ai faamoemoega ma sini, o tulaga eseese o loo outou ola ai, ma o outou tauviga. Ua ou auai i sauniga a le Ekalesia faatasi ma outou ma asiasi i nisi o o outou aiga. Ua faamalosia e

lo outou faatuatua lo'u faatuatua. O lo outou tuuto ua atili ai ona ou tuuto. Ma o lo outou lelei ma le usiusitai ma le loto i ai i le tulafono o le sefuluai ua uunaia ai au e avea o se alii, tane, tamā, ma se taitai o le Ekalesia sili atu. Ou te mafaufau ma manatua outou i taimi uma ou te auai ai i le Aufono e Taulimaina le Sefuluai. Faafetai atu mo lo outou lelei ma le faamaoni a o outou faamamaluina a outou feagaiga.

E lagona e taitai o le Ekalesia toe-fuataiina a le Alii se tiutetauave maoae e tausaga ma le tatau ia taulaga faapaia-ina a tagata o le Ekalesia. O loo matou matua nofouta i le natura paia o tupe iti e lua a le fafine ua oti lana tane.

“Sa nofo Iesu e feagai ma le mea e teu ai tupe, ua silafia foi e ia le vao tagata o lafo tupe i le mea e teu ai tupe; e toatele foi o e mauoa, ua tele a latou ua lafo ai.

“Ua alu ane foi le tasi fafine mativa ua oti lana tane, ua lafo ane ai tupe iti e lua, o le kotane e tasi ia.

“Ona valaau atu lea o ia i ona soo, ua fetalai atu ia te i latou, E moni, ou te fai atu ia te outou, o mea a lena fafine mativa ua oti lana tane, ua lafo i le mea e teu ai tupe, ua sili ia i a latou uma na lafo i ai:

“Aua o i latou uma, ua latou lafo nisi mea mai a latou mea ua tele, a o ia ua mativa ua ia lafo ana mea uma sa ia te ia, o ana mea uma e ola ai” (Mareko 12:41–44).

Ou te iloa mai o'u lava ia aafiaga o le Aufono e Taulimaina le Sefuluai o loo faaeteete i le malupuipua o tupe iti e lua a le fafine ua oti lana tane. Ou te faailoa atu le lotofaafetai ia Peresitene Thomas S. Monson ma ona fesoasoani mo le taitaiga mataalia i le faamatuuina mai o lenei tiute paia o le tausimea. Ma ou te faamamaluina le siufofoga (tagai MF&F 120:1) ma le aao o le Alii o loo lagolagoina Ana auauna faauuina i le faataunuuina o le tiute e avea ma Ona sui.

O Se Valaaulia ma Se Molimau

O le totogiina ma le faamaoni o le sefuluai e sili atu lava nai lo se tiute; o se laasaga taua lea i le faagasologa o le faapaiaina faaletagata lava ia. Mo outou na e totogi a outou sefuluai, ou te faamalo atu.

Ae mo outou na e le o usitaia i le taimi nei le tulafono o le sefuluai, ou te valaaulia outou ia iloilo ou ala ma salamo. Ou te molimau atu e ala i lou usiusitai i lenei tulafono a le Alii, o le a matala mai ai pupuni o le lagi ia te outou. Faamolemole aua nei faatuai le aso o lo outou salamo.

Ou te molimau atu e oo mai faamanuiaga faaleagaga ma faaletino i o tatou olaga pe a tatou ola i le tulafono o le sefuluai. Ou te molimau atu o na faamanuiaga e lemafamatalaina ae taua. Ou te tautino atu foi o le faigofie o le ala a le Alii ua matua manino lava i mataupu faaletino a Lana Ekalesia ua maua ai mamana e mafai ona taiala ai i tatou taitoatasi ma aiga. Ou te tatalo ia tatou tau fai aoao uma ma manuia mai nei lesona taua, i le suafa paia o le Alii o Iesu Keriso, amene. ■





Saunia e Peresitene Dieter F. Uchtdorf
Fesoasoani Lua i le Au Peresitene Sili

Sau, Auai faatasi ma i Matou

Po o a lava ou tulaga, lou talafaasolopito patino, po o le malosi o lau molimau, o loo i ai lava se avanoa mo oe i lenei Ekalesia.

Sa i ai se alii sa fai sana miti e faapea sa i ai o ia i se fale faafiafia tele na potopoto ai uma ekalesia mai le lalolagi atoa. Sa ia iloaina o lotu taitasi na tele mea na i ai na foliga mai sa manaomia ma taua.

Sa ia feiloai atu i se ulugalii lelei sa fai ma sui o Le Ekalesia a Iesu Keriso o le Au Paia o Aso e Gata Ai ma fesili atu, “O a mea *tou te* manaomia mai o outou tagata?”

“*Matou te* le manaomia se mea mai ia i latou,” sa la tali atu ai. “Ae ua poloai mai le *Alii* ia matou faapaiaina mea uma.”

Sa faaaau ai le faamalamalama a le ulugalii e uiga i valaauga a le Ekalesia, faiaoga o aiga ma faiaoga asiati, misiona faamamaluina, afiafi faaleaiga i vaiaso taitasi, galuega faalemalumalu, uelefea ma auaunaga alofa, ma tofiga e faiaoga.

“E totogi tou tagata mo galuega uma latou te faia?” sa fesili ai le tagata.

“Oi e leai,” sa faamalamalama atu e le ulugalii. “Latou te ofo fua atu o latou taimi.”

“Ma le isi,” sa faaaau ai le ulugalii, “e tai ono masina, ma faaalu e tagata a lo matou Ekalesia se faaiuga o le

vaiaso e auai pe maimoa ai i le konafesi aoao mo le 10 itula.”

“Sefulu itula o tagata e lauga mai?” sa le talitonu le tagata.

“Ae ā tou sauniga lotu faalevaiaso? O le a le umi?”

“Tolu itula, i Aso Sa uma!”

“Oka,” sa fai mai ai le tagata. “E fai uma lava e tagata o la outou ekalesia mea ua e fai mai ai?”

“O mea na ma isi. Ma te lei tau atua talafaasolopito o aiga, toluapiga a le autalavou, faigalotu, suesuega o tusitusiga paia, aoaoga mo taitai, gaoioiga a le autalavou, seminare i vaveao, faamama fale o le Ekalesia, ia ma le tulafono a le Alii o le soifua maloloina, o le anapogi i masina taitasi e fesoasoani ai i e matitiva, ma le sefuluai.”

Sa fai mai le alii lea, “Ia ua ou le mautonu la. Aisea o le a fia auai ai se tasi i se ekalesia faapena?”

Sa ataata le ulugalii ma fai atu i ai, “Faapea ma’ua e te le fesili mai.”

Aisea O Le A Fia Auai ai se Tasi i se Ekalesia Faapena?

I se taimi ua feagai ai le tele o ekalesia i le lalolagi atoa ma le faaititia naua o le faitau aofai, o Le Ekalesia a

Iesu Keriso o le Au Paia o Aso e Gata Ai—e ui e laitiiti pe a faatusatusa atu i le tele o isi ekalesia—ae o se tasi lea o ekalesia aupito sili ona saosaoa le faatupulaia i le lalolagi. E oo mai ia Setema 2013 ua silia ma le 15 miliona tagata o le Ekalesia i le lalolagi.

E tele lava mafuaaga mo lenei mea, ae e mafai lava ona ou tuu atua na o ni nai mea?

O Le Ekalesia a le Faaola

Muamua, o lenei Ekalesia na toefuatai mai i o tatou aso e Iesu Keriso lava Ia. O iinei e te maua ai le pule e galue ai i Lona suafa—e papatiso ai mo le faamagaloina o agasala, e faaee atu ai le meaalofa o le Agaga Paia, ma faamau ai i le lalolagi ma i le lagi.¹

O i latou e auai i lenei Ekalesia e alolofa i le Faaola o Iesu Keriso ma naunau e mulimuli ia te Ia. Latou te olioli i le malamalama e faapea ua toe fetalai mai le Atua i tagata. A latou mauaina sauniga paia o le perisitua ma osi feagaiga ma le Atua, e mafai ona latou lagonaina Lona mana i o latou olaga.² A latou ulufale atu i le malumalu paia, latou te lagonaina o loo latou i ai i Lona afioaga. A latou faitau i tusitusiga paia³ ma ola i aoaoga a Ana perofeta, latou te ola latalata atili i le Faaola ua latou alolofa tele i ai.

O Se Faatuatua Ola

O se isi mafuaaga ona e maua i le Ekalesia ia avanoa e fai ai mea lelei.

O le talitonu i le Atua e tauleleia, ae o le tele lava o tagata e mananao e fai ni mea e sili atu nai lo le faalogo i lauga musuia po o le moemiti i o latou maota i le lagi.⁴ Latou te mananao e faatino lo latou faatuatua. Latou te mananao e afe i luga lima o o latou ofu ma punouai i lenei galuega tele.

Ma o le mea lena e tupu pe a latou auai faatasi ma i matou—e tele avanoa latou te mauaina e liliu ai a latou



Fesili e Lei Taliina

O nisi e tauivi lava ma ni fesili e lei taliina e uiga i mea na faia pe na tautalagia i le tuana'i. Tatou te faailoa atu ma le faamaoni e faapea i le latalata i le 200 tausaga o le talafaasolopito o le Ekalesia—faatasi ai ma se laina le mafaalavelaveina o mea musuia, mamalu, ma mea paia na tutupu—o loo i ai nisi o mea na tautalagia ma faia ua mafua ai le tuu fesili o tagata.

O nisi taimi e tulai mai ni fesili ona ua tatou le mauaina faamatalaga uma ma ua tatou manaomia ai tau lava o sina onosai teisi. Pe a iu ina iloina le upumoni atoa, o mea sa tatou lei malamalama muamua i ai o le a tala-feuga ma lo tatou lotu malie.

O nisi taimi o loo i ai se eseese o manatu po o le ā tonu le uiga o “mea moni”. O se fesili e fatu ai le masalosalo i nisi tagata, pe a uma se sailiiliga totoa, e mafai ona fausia ai le faatua-tua o isi.

O Mea Sese a Tagata Le Atoatoa

Ma, ina ia faamaoni atoatoa, e i ai taimi e faia ai e tagata po o taitai i le Ekalesia ni mea sese faigofie. Atonu na i ai ni upu po o ni mea na faia ua le ogatusa ma o tatou tulaga faataua-ina, mataupu faavae, po o le aoaoga faavae.

Ou te manatu e na o le pau le mea e atoatoa ai le Ekalesia pe ana faapea e taitaia e ni tagata atoatoa. E atoatoa le Atua, ma e mama Lana aoaoga faavae. Ae e galue o Ia ia i tatou—O Lana fanau le atoatoa—ma tagata le atoatoa e faia mea sese.

I le itulau autu o le Tusi a Mamona tatou te faitau ai, “O lenei foi, afai o i ai ni sese, o sese ia o tagata; o le mea lea, aua le ta’uleagaina mea a le Atua, ina ia maua outou i le pona i le nofoa faamasino o Keriso.”⁶

O le auala lava lea e i ai i taimi

taleni, agaalofa, ma taimi i ni galuega lelei. Ona e talu ai e leai ni a matou faifeau totogi i a matou faalapotopotoga i le lalolagi atoa, o lea e faatino ai e o matou tagata lava ia le galuega o le auuina atu. E valaauina i latou e ala i musumusuga. O nisi taimi matou te ofo fua atu; o isi taimi e *talosagaina* i matou e “galulue fua.” Matou te le vaai i tofiga o ni avega ae o ni avanoa e faataunuu ai feagaiga ua matou osia ma le fiafia e auuina atu i le Atua ma Ana fanau.

O Faamanuiaga Silisili

O se mafuaaga lona tolu i le mea e ala ai ona auai tagata i le Ekalesia ona o le savali ai i le ala o le avega ma soo e taitai atu ai i faamanuiaga silisili.

Matou te vaai atu i papatisoga o le vaega amata lea i la matou malaga i le avega ai ma soo. O la matou savaliga i aso taitasi ma Iesu Keriso e taitai atu i le filemu ma faamoemoega i lenei olaga ma le olioli loloto atoa ai ma le faaolataga e faavavau i le lalolagi a sau.

O i latou e mulimuli i lenei ala ma le faamaoni e aloese mai le tele o mea lamatia, faanoanoaga, ma mea sese o le olaga.

O e lotomauualalo ma faamaoni i le lotu latou te mauaina oa sili o le malamalama iinei.

O e mafatia pe faavavau latou te mauaina le faamalologa iinei.

O e ua pologa i le agasala latou te

mauaina le faamagaloga, saolotoga, ma le malolaga.

Ia i Latou o E ua O Ese

O le sailiga mo le upumoni ua taitai atu ai le faitau miliona o tagata i le Ekalesia a Iesu Keriso o le Au Paia o Aso e Gata Ai. Peitai, ua i ai nisi ua tuua le Ekalesia sa pele ia i latou.

Atonu e fesili se tasi, “Afai e matagofie tele le talalelei, aisea la o le a alu ese ai se tasi?”

O nisi taimi tatou te manatu ai ona ua faamanuialaina o latou lotu po o le paie, po o le agasala. Ae, e le o se mea faigofie. O le mea moni, e le na o se tasi se mafuaaga e faatatau i le tele o tulaga eseese.

O nisi o o tatou tagata pele o loo tauivi mo le tele o tausaga ma le fesili, pe tatau ona vavaeese i latou lava mai le Ekalesia.

I lenei Ekalesia lea e matua malosi ai le faamamaluina o le faitalia o le tagata lava ia lea na toefuatai mai e se alii talavou na fesiligina ni fesili ma saili ai ni tali, tatou te faaaloaloga i latou o loo saili atu ma le faamaoni mo le upumoni. Atonu e ono nutimomoia o tatou lotu pe a aveesea i latou mai le Ekalesia tatou te alolofa i ai ma le upumoni ua tatou mauaina, ae tatou te faamamaluina a latou aia tatau e tapuai ai i le Atua Silisili Ese e tusa ai ma o latou lava lotu fuatiaifo, e pei lava ona tatou mauaina lena lava avanoa mo i tatou lava.⁵

uma ma o le a i ai pea seia oo i le aso atoatoa pe a nofotupu ai Keriso lava Ia i le lalolagi.

O le mea e faanoanoa ai o nisi ua tautevateva ona o mea sese e faia e tagata. Ae e ui lava i lenei mea, o le upumoni e faavavau o le talalelei toefuataiina o loo maua i Le Ekalesia a Iesu Keriso o le Au Paia o Aso e Gata Ai e le sese, pe faaititia, pe faaumatiaina.

I le avea ai ma se Aposetolo a le Alii o Iesu Keriso ma i le avea ai ma se tasi e vaai tino i aufono ma taualumaga a lenei Ekalesia, ou te tuu atu ai se moli-mau paia e leai se faaiuga taua o aafia ai lenei Ekalesia po o ona tagata ua faia e aunoa ma le naunautai i le sailiga o musumusuga, taiala, ma le faamaoniga a lo tatou Tama Faavavau. O le Ekalesia lenei a Iesu Keriso. O le a le faatagaina e le Atua Lana Ekalesia e see ese mai ona ala atofaina pe toilalo e faataunuu lona taunuuga paia.

O Loo I Ai se Avanoa mo Oe

Ia i latou ua vavaeeseina i latou lava mai le Ekalesia, ou te faapea atu, au uo pele, o loo i ai lava se nofoaga mo outou iinei.

O mai ma faaopoopo mai a outou taleni, meaalofa, ma malosi ia i matou. O le a tatou lelei uma atili i se taunuuga.

Atonu e fesili nisi, “Ae faafefea ou masalosaloga?”

O se mea masani le i ai o fesili—o sina fatu itiiti o le fesili faamaoni ua tele lava ina tupu ae ma avea ma se laau mafalā o le malamalama. O loo i ai ni nai tagata o le Ekalesia o e, po o le a lava le taimi, e lei tauivi lava ma ni fesili matuia pe maaleale. O se tasi o faamoemoega o le Ekalesia o le faafaiilele lea ma atiae le fatu o le faatuatua—e oo lava i nisi o taimi i eleele matutu o le masalosalo ma le le ma-tonu. O le faatuatua o le faamoemoe lea mo mea e le vaaia ae ua moni.⁷



Aai o Kuatemala, Kuatemala

O le mea lea, ou uso e ma tuafafine pele—au uo pele—faamolemole, ia muamua e masalosalo i ou masalosaloga ae e te lei masalosalo i lou faatuatua.⁸ Ia le tatau lava ona tatou faatagaina le masalosalo e faapagotaina i tatou ma taofia ai i tatou mai le alofa paia, filemu, ma meaalofa ia e oo mai e ala i le faatuatua i le Alii o Iesu Keriso.

Atonu e fai mai nisi, “E le tala-faagai au ma o outou tagata i le Ekalesia.”

Ana mafai ona e vaai i o matou loto, masalo o le a e iloaina e te fetauilelei e sili atu i mea ua e mafaufauina. Atonu e faateia oe i le iloaina e i ai foi o matou manaoga ma faigata faapea ma faamoemoega e tali tutusa ma oe. O lou talaaga po o lou tuputupu ae atonu e foliga mai e ese mai mea e te vaaia i le tele o tagata o le Au Paia o Aso e Gata Ai, ae e mafai ona avea ma se faamanuiaga. Uso e ma tuafafine, uo pele, matou te manaomia a outou taleni ma manatu tulagaese. O le eseese o tagata taitoatasi ma tagata e toatele i le salafa o le kelope, o le malosiaga lea o lenei Ekalesia.

Atonu e fai mai nisi, “Ou te manatu e le mafai ona ou ola i o outou tulaga faatonuina.”

E anoanoai isi mafuaaga e oo mai.

Ua mamanuina le Ekalesia e faafaiilele tagata le atoatoa, ē o tauivi, ma ē o vaivai. Ua faatumulia i tagata ua *naunau* ma o latou loto atoa e tausi ia poloaiga, e tusa lava pe latou te lei *malamalama* atoatoa i ai.

Atonu e fai mai nisi, “Ou te iloa se tagata o la outou Ekalesia e ese le pepelo. E matua le mafai lava ona ou auai i se lotu o loo i ai se tagata faapena.”

Afai e te faauigaina le *pepelo* o se tagata ua toilalo e ola ma le atoatoa i mea ua ia talitonu i ai, o lona uiga la o tatou uma o tagata pepelo. E leai ma se tasi o i tatou e matuai pei o Keriso e pei ona tatou iloa e tatau ona avea ai i tatou. Ae tatou te mananao ma le naunautai ia faatoilalo o tatou sese ma le tuinanau e fai le agasala. Faatasi ai ma o tatou loto ma agaga tatou te naunau ai ia lelei atili i le fesoasoani a le Togiola a Iesu Keriso.

Afai o ou faanaunautaiga nei, e tusa lava la po o a ou tulaga, lou talaaga patino, po o le malosi o lau molimau, o loo i ai lava se avanoa mo oe i lenei Ekalesia. Sau, auai faatasi ma i matou!

Sau, Auai faatasi ma i Matou!

E ui i o tatou faaletonu faaletagata, ae ou te mautinoa o le a e iloaina i

tagata o lenei Ekalesia le tele o agaga sili ona lelei e maua i lenei lalolagi. O le Ekalesia a Iesu Keriso e foliga mai ua tosina i ai ē agalelei ma agaalofa, o ē faamaoni ma ē filiga.

Afai e te faamoemoe e maua iinei ni tagata atoatoa, o le a e le fiafia la. Ae afai e te saili i le aoaoga faavae mama a Keriso, le afioga a le Atua “lea e faamalolo ai le agaga ua manualia,”⁹ faapea ai ma le unaiga faapaiaina a le Agaga Paia, o iinei la o le a e maua ai i latou. I lenei vaitau o le faaitiitia o le

faatuatua—i lenei vaitau ua anoanoai ai i latou ua mamao ese mai le alofa o le Atua—o iinei o le a e maua ai se nuu e naunau ia iloa ma faalatalata atili atu i lo latou Faaola e ala i le auauna atu i le Atua ma uso a tagata, e pei foi o oe. Sau, auai faatasi ma i matou!

Pe Tou Te Fia O Ese Foi?

Ou te manatua se taimi i le soifuaga o le Faaola ina ua toatele ē na lafoaia o Ia.¹⁰ Na fesili atu Iesu i Ona soo e toasefululua:



“Pe tou te fia o ese foi?”

“Ona tali mai lea o Simona Peteru ia te ia, Le Alii e, a matou o ea ia te ai? o ia te oe upu o le ola e faavavau.”¹¹

E i ai taimi e ao ona tatou taliina ai lea lava fesili e tasi. Pe tatou te fia o ese foi? Pe o le a tatou piimau i upu o le ola e faavavau, e pei o Peteru?

Afai e te sailia le upumoni, le uiga, ma se ala e liua ai le faatuatua i faatinoga; afai o loo e saili mo se nofoaga e taliaina oe: Sau, auai faatasi ma i matou!

Afai ua e tuua le faatuatua sa e taliaina muamua: Toe sau. Auai faatasi ma i matou!

Afai o loo faasoosoina oe ia faavaivai: Toe nofo teisi lava. O loo i ai se avanoa mo oe iinei.

Ou te augani atu i tagata uma e faalogoina pe faitauina nei upu: Sau, auai faatasi ma i matou. Sau ma faalogo i le valaau a le Keriso agamalu. Ave lou satauro ma mulimuli ia te Ia.¹²

Sau, auai faatasi ma i matou! Aua o iinei o le a e maua ai le maa taua le mafaatauina.

Ou te molimau atu o iinei o le a e maua ai upu o le ola e faavavau, le folafolaga o le togiola faamanuiaiina, ma le ala o le filemu ma le fiafia.

Ou te tatalo ai ma le faatauanau ina ia avea lau lava sailiga mo le upumoni e vane ai i lou loto le naunautaiga e te sau ma auai faatasi ma i matou. I le suafa paia o Iesu Keriso, amene. ■

FAAMATALAGA

1. Tagai Mataio 16:18–19; Helamana 10:7.
2. Tagai Mataupu Faavae ma Feagaiga 84:20.
3. Tagai 2 Nifae 33:10.
4. Tagai “Ua Ou Faia Ea se Lelei?” Viiga, nu. 136.
5. Tagai Mataupu Faavae o le Faatuatua 1:11.
6. Itulau autu o le Tusi a Mamona; tagai Mamona 8:17.
7. Tagai Eperu 11:1; Alema 32:21.
8. Tagai F. F. Bosworth, *Christ the Healer* (1924), 23.
9. Iakopo 2:8.
10. Tagai Ioane 6:66.
11. Ioane 6:67–68.
12. Tagai Mataio 16:24.



Fofogaina e Peresitene Henry B. Eyring
Fesoasoani Muamua i le Au Peresitene Sili

O Le Lagolagoina o Taitai o le Ekalesia

Etuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma le Peresitene o Le Ekalesia a Iesu Keriso o le Au Paia o Aso e Gata Ai; Henry Bennion Eyring o le Fesoasoani Muamua i le Au Peresitene Sili; ma Dieter Friedrich Uchtdorf o le Fesoasoani Lua i le Au Peresitene Sili.

O e finagalo i ai ia faailoa mai.

O i latou e au ese ai pe afai e i ai, faailoa mai.

E tuuina atu ia tatou lagolagoina Boyd Kenneth Packer o le Peresitene o le Korama a Aposetolo e Toasefululua ma uso nei o lena korama: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, ma Neil L. Andersen.

O e finagalo i ai, faamolemole ia faailoa mai.

A i ai se faatuiese ia faailoa mai.

E tuuina atu ia tatou lagolagoina ia fesoasoani i le Au Peresitene Sili ma Aposetolo e Toasefululua o ni perofeta, tagatavaai, ma talifaaaliga.

O e uma e finagalo i ai, faailoa mai.

O e faatuiese, pe afai o i ai, i le faailoga lava lea.

E tuuina atu ina ia faamalolo mai ia Elders John B. Dickson, Paul E. Koelliker, ma F. Michael Watson o ni uso o le Korama Muamua a Fitugafulu ma aloaia i latou o ni Pulega Aoa o ua faamaloloina ma le mamalu.

E tuuina atu ina ia faamalolo mai ia Elder Kent D. Watson o se uso o le Korama Lona Lua a Fitugafulu.

E faapena foi ona faamamalu ma faailoa atu le faafetai ia Elders César H. Hooker ma Craig T. Wright ua faamaloloina mai le la tautua

o ni Fitugafulu Eria.

O i latou e fia aufaatasi ma i matou e tuu atu le agaga faafetai i nei Uso mo la latou tautua maoae, faamolemole ia faailoa mai.

E tuuina atu ina ia tatou lagolagoina uso fou nei o ni Fitugafulu Eria: Julio A. Angulo, Peter F. Evans, ma Gennady N. Podvodov.

O e uma e finagalo ai, faamolemole faailoa mai.

O e au ese ai, pe afai e i ai.

E tuuina atu ina ia tatou lagolagoina ia Randall L. Ridd e avea ma fesoasoani lua i le au peresitene aoao o Alii Talavou.

O e finagalo i ai ia faailoa mai.

O e auese ai, ia faailoa mai.

E tuuina atu ia tatou lagolagoina isi Au Pulega Aoa, Fitugafulu Eria, ma au peresitene aoao o ausilali e pei ona i ai nei.

O e finagalo ai, ia faailoa mai.

A i ai se faatuiese ia faailoa mai.

Faafetai atu, uso e ma tuafafine, mo la outou palota lagolago ma mo lo outou faatuatua ma tatalo faifai pea mo i matou. ■





Saunia e Peresitene Boyd K. Packer
Peresitene o le Korama a Aposetolo e Toasefululua

O Le Ki i le Puipuiga Faaleagaga

E mafai ona oo mai le toafilemu i loto o tagata taitoatasi o e liliu atu i tusitusiga paia ma tatalaina folafolaga o le puipuiga ma le togiola.

I se taimi e le'i mamao atu, sa ou faamauina ai se ulugalii talavou i le malumalu. O lenei ulugalii sa tausisia lo laua agavaa ina ia taunu atu i le aso matagofie lea e tuua ai e se atalii ma se afafine aiga o lo latou talavou ae avea ma tane ma ava. I lenei sauniga paia, sa paia ma mama i la'ua. I le aluga o le taimi, o le a amata ona laua tausia ni a laua lava fanau, e ogatasi ma le mamanu ua faavaeina e lo tatou Tama oi le Lagi. O lo laua fiafia, ma le fiafia o augatupulaga i le lumanai, e faalagolago lea i le ola ai i na tulaga faatonuina ua faatulagaina e le Faola ma faamalalama mai i Ana tusitusiga paia.

Ua mafaufau mātua i aso nei pe o i ai se nofoaga saogalemu e tausi ai le fanau. O loo *i ai* se nofoaga saogalemu. O loo i ai i totonu o se aiga e faaogatonu i le talalelei. Tatou te taulai atu i le aiga i le Ekalesia, ma tatou te fautuaina mātua i soo se mea ia tausi a latou fanau i le amiotonu.

Na vavalu ma lapatai mai le Aposetolo o Paulo e faapea “o ona aso e gata ai e oo mai ai aso faigata.

“Aua e avea tagata ma e alolofa i latou ia i latou, o e mananao i tupe,

o e loto vii, o e faamaualuga, o e upu leaga, o e le faalogo i matua, o e le faafetai, o e amio leaga,

“O e lotoaiga, o e tuumavaega, o e faatuaupua, o e le taofi manao o le tino, o e faasaua, o e le alolofa i tagata amio lelei,

“O e faalata, o e soona fai, o e ua faafefeteina, o e ua tele le manao i mea faafiafia a e leai se manao i le Atua;

“O e ua peiseai ua amio Atua, a o le mana ua i lea mea ua latou teena: ia e alo ese lava i tagata faapena.”¹

Na valoia foi e Paulo, “A o tagata amio leaga ma e taupelopelo, e alualu pea lava lo latou leaga, o loo faasese atu, ua faaseseina foi i latou.”²

O nei fuaiupu ua avea o se lapa-taiga, ua faaalua ai ia mamanu ia alo ese mai ai. E tatau ona tatou matuai mataala ma filiga. E mafai ona tatou iloilo ina taitasi nei valoaga ma tuu i ai se faailoga faasa'o i autafa e faailoa ai ua i ai i le taimi nei ma o se popolega i le lalolagi i aso nei:

Taimi faigata—ua i ai. Ua tatou ola i taimi ua sili ona matautia.

O e mananao i tupe, o e loto vii, o e faamaualuga—ua i ai uma ma o loo i ai ia i tatou.

O e upuleaga, o e le faalogo i matua, o e le faafetai, o e amio leaga, o e le loto aiga—o nei mea uma ua taatele.

O e tuumavaega, o e faatuaupua, ma isi mea faapena—o ia mea uma e mafai ona faailoga faasa'o ua i ai e fua i faamaoniga uma ua siomia ai i tatou.

Sa saunoa foi Moronae i le amioleaga o o tatou aso ina ua ia lapatai mai:

“Pe a outou vaai ua oo mai nei mea i totonu ia te outou . . . o le a outou feala mai i se lagona o lo outou tulaga leaga matautia. . . .

“O le mea lea, na poloiina ai a'u, o Moronae, ia ou tusia nei mea, ina ia aveesea le leaga, ma ina ia oo mai ai le taimi e le mafai ai e Satani ona toe maua se mana i loto o le fanauga a tagata, ae ina ia mafai ona faatau-anauina o i latou ia latou faia le lelei e le aunoa, ina ia mafai ona latou o mai i le puna o le amiotonu uma ma faaolaina i latou.”³

O faamatalaga ua tuuina mai e Paulo ma Moronae e uiga i o tatou aso e matuai sa'o lava e le mafai ai ona le amanaiaina. Mo le toatele atonu e fai si atuatuvaale, ma faavaivailoto. E ui i lea, a ou mafaufau i le lumanai, e faagaetia a'u i lagona o le mautinoa o le a lelei mea uma.

I le faaaliga a Paulo, e faaopoopo atu i le lisi o luitau ma faafitauli, ua ia ta'u mai foi ia i tatou mea e mafai ona tatou faia e puipuia ai i tatou lava:

“A o oe ia e tumau i mea ua aoaoina ai oe, ma ua mautinoa ia te oe, ina ua e iloa o ia na aoaoina ai ia te oe;

“Talu foi ina o e tama itiiti ua e iloa Tusi Paia, e mafaia ona faapoto ai ia te oe e iu ai i le ola i le faatuatua ua ia Keriso Iesu.”⁴

O tusitusiga paia o loo i ai ki i le puipuiga faaleagaga. O loo i ai aoaoga faavae ma tulafono ma sauniga o le a

faapea ona aumaia ai fanau taitoatasi a le Atua i se molimau ia Iesu Keriso o le Faaola ma le Togiola.

Faatasi ai ma le tele o tausaga o tapenapenaga, sa i ai se taumafaiga tele ina ia maua tusitusiga paia i gagana uma, faatasi ai ma vaefaamatalaga ma mau e faasino i ai. Matou te taumafai ia maua e i latou uma o e mananao ia aoaoina. E aoao mai ia i tatou po o fea e o i ai ae o a foi mea e fai. Latou te tuuina mai le faamoemoe ma le malamalama.

I tausaga ua mavae, sa aoao mai ia te a'u e Elder S. Dilworth Young o le Fitugafulu se lesona e uiga i le faitauina o tusitusiga paia. Sa tauivi se siteki ma feteenaiga ma faigata i ona tagata auai, ma sa manaomia ona tuuina atu i ai se fautuaga.

Sa ou fesili atu ia Peresitene Young, "O le a sa'u tala e tatau ona fai atu?"

Na pau lava lana tali, "Ta'u atu ia i latou e faitau tusitusiga paia."

Sa ou fesili, "O le fea tusitusiga paia?"

Na fai mai o ia, "E le afaina tele. Ta'u atu ia i latou e susue i le Tusi a Mamona, mo se faataitaiga, ma amata ona faitau. O le a le pine ae oo mai lagona o le toafilemu ma musumu-suga, ma o le a oo mai ai lava se tali."

Ia fai le faitauina o tusitusiga paia ma se vaega o lau fuafuaga masani, ma o le a mulimuli mai ai faamanuiaga. O loo i ai i totonu o tusitusiga paia se leo o le lapataiga, ae o loo i ai foi le tele o faamalosiaga.

Afai o le taimi muamua e foliga mai ia te oe e ese lava le gagana a tusitusiga paia, ia faitau pea. O le a le pine ae e iloa le matagofie ma le mana e maua i na itulau.

Fai mai Paulo, "O Tusi Paia uma lava e mai le Agaga o le Atua ia, e aoga foi ia e aoao ai, e aoai ai, e faatonu ai, e faapoto ai foi i le amiotonu."⁵



E mafai ona e tofotofoina lenei folafolaga mo oe lava.

Ua tatou ola i taimi faigata; ae ui i lea, e mafai ona tatou maua le faamoemoe ma le filemu mo i tatou lava ma mo o tatou aiga. O i latou o e nonofo i le faanoanoa, lagona o le leai o se faamoemoe i le avanoa e laveai mai ai fanau mai le mea ua ave atu i ai e le lalolagi i latou, e le tatau ona fiu. "Aua e te mata'u, tau lava ina e faatuatua."⁶ O le amiotonu e sili atu le malosai nai lo o le amioleaga.

O fanau e vave aoaoina i le olaga i se malamalamaaga o tusitusiga paia, o le a oo ina iloa le ala e tatau ona latou savavali ai ma o le a matele le lilifa atu ia tumau i lena ala. O i latou e se ese o le a i ai le gafatia e toe foi mai ai ma, faatasi ai ma le fesoasoani, e mafai ai ona latou toe maua lo latou ala e foi mai ai.

Sa tau faasaga atalii o Mosaea i le Ekalesia mo se taimi, ae na mulimuli ane salamo ma uia se suiga tele. I le Alema tatou te faitau ai, "O atalii nei o Mosaea . . . sa latou matua malolosi i le malamalama o le upumoni; ona o i latou o ni alii mafaufau lelei ma sa latou suesue i tusitusiga paia ma le filiga, ina ia latou iloa le afitoga a le Atua."⁷

O le Peresitene o Iosefa F. Samita sa lima ona tausaga i le taimi na fasiotia ai lona tuua o Ailama, i le Falepuipui i Karefaasi. Mulimuli ane, na sopoaia ai e Iosefa laufanua valevalenoa faatasi ma

lona tina ua maluu lana tane.

I le 15 o ona tausaga sa valaauina ai o ia i se misiona i Hawaii. Sa ia lagona le le mautonu ma le tuua toatasi ma faapea mai: "Sa matuai ou popole lava. . . . Sa ou lagonaina sa pei na matuai faalumaina a'u i lo'u tulaga o le mativa, leai o se atamai ma se poto, ae ua na o se taulealea, ua tau le mafai ona ou tilotilo sa'o i foliga o [soo se tasi]."

A o mafaufau loloto i se tasi po i ona tulaga faigata, sa fai ai se miti a Iosefa e faapea, sa alu o ia i se malaga, sa nanati solo i le vave sa na mafaia. Sa ia feaveaia se affi laitiiti. Mulimuli ane, na tau atu ai o ia i se maota matagofie, lea sa avea ma ona taunuuga. A o latalata atu i ai o ia, sa ia vaaia ai se faailo na faitauina, "Faamālū." Sa telea'i o ia i totonu e faamālū. Sa ia tatalaina lana affi laitiiti ma maua ai, ni laei papae. "o se mea," na ia fai mai ai, "ou te le'i vaaia mo se taimi umi lava." Sa ia faamauina ma nanati atu loa i le faitotoa o le maota.

"Sa ou tuitui i ai," o lana tala lea, "ma na tatala mai le faitotoa, ma o le tagata sa tu ai iina o le Perofeta o Iosefa Samita. Sa tagai mai o ia ia te a'u ma si aoaiga, ma o upu muamua lava sa ia saunoa mai ai [o le]: 'Iosefa, ua e tuai.' Ae sa ou fai atu ma le to'a:

"'Ioe, ae ua ou mamā—ua ou mamā!'"⁸

Ma e mafai foi ona faapena mo i tatou taitoatasi.



Aai o Panama, Panama

Afai o e malaga i se ala o le faatua-tua ma malosi i le Ekalesia, ia tumau i le ala ma tausi au feagaiga. Ia agai pea i luma seia oo i le taimi o le a oo atu ai faamanuiaga a le Alii ia te oe, ma o le Agaga Paia o le a faaali atu o se malosiaga faatosina i lou olaga.

Afai o loo e i ai nei i se ala e agai ese mai le ala ua faatulagaina i tusitusiga paia, ou te faamautinoa atu ia te oe, o loo i ai se auala e toe foi mai ai.

Ua tuuina mai e Iesu Keriso se auala e sili ona manino mo i tatou ia salamo ma maua ai le faamalologa i o tatou olaga. O le fofō mo le tele o measese e mafai ona maua e ala i le sailia o le faamagaloga e ala i tatalo faaletagata lava ia. Ae peitai, o loo i ai ni gasegase faaleagaga ua mautinoa, ae maise lava e faatatau i le solia o tulafono o le ola mama, lea e matuai manaomia ai le fesoasoani ma togafitiga a se fomai agavaa faaleagaga.

I tausaga ua mavae sa oo mai ai i lo'u ofisa se tamaitai talavou ma lona tamā ua matua. Sa ia aumaia o ia i ni maila se tele e su'e se fofō o le lagona ta'usalaina sa ia lagonaina. A o avea ma se alii talavou, sa ia solia ai se measese ogaoga, ma i lona soifua matua, sa ia toe manatua ai le mea na tupu. Sa le mafai ona ia aveesea le lagona o le tausala. Sa le mafai ona toe foi i tua e toe faalelei na o ia

le faafitauli o lona talavou, ae sa mafai ona ia amata atu i le mea sa i ai o ia ma, faatasi ai ma le fesoasoani, sa aveeseina ai le lagona tausala lea sa taumulimuli ia te ia i na tausaga uma.

Sa ou faafetai ona e ala i le aoaoina o ia i mataupu faavae mai le Tusi a Mamona, sa pei ai na aveesea se avega tele mai ona tauau. Ina ua la toe foi ma lona afafine i le fale i na maila e tele, sa tuua ai e le toaina le tausala ina o soligatulafono ua mavae.

Afai tou te “feala mai i se lagona o lo outou tulaga leaga matautia”⁹ ma manao e toe foi i le maloloina atoatoa faaleagaga, vaai lou epikopo. O loo ia umiaina ki ma e mafai ona fesoasoani ia te oe i le ala o le salamo.

O le salamo e mo tagata taitoatasi, e faapena foi i le faamagaloga. E pau le mea e finagalo i ai le Alii, ia liliu ese mai se toatasi mai ana agasala, ma o le a “[Ia] faamagaloga i a latou amio leaga, ma . . . le toe manatua a latou agasala.”¹⁰

A maea le faagasologa o le salamo, o le a oo ina e malamalama i le uiga o le folafolaga a Isaia e faatatau i le Togiola: “O loo faapea mai Ieova, o mai ia, ina tatou filifili ia: e ui lava ina pei o ofu mūmū a outou agasala, e sisina ia e pei o le kiona; e ui lava ina mūmū ia e pei o le ie ulaula, e avea e pei o fulufulu mamoe.”¹¹

E pei lava ona mafai ona aveese le sioka mai se laupapa uliuli, faatasi ai ma le salamo faamaoni, e mafai ai ona soloesea taunuuga o o tatou soligatulafono, e ala i le Togiola a Iesu Keriso. O lena folafolaga e faatatau i tulaga uma lava.

E aoao mai e le talalelei i tatou ia fiafia, ia faatuatua nai lo o le mata'u, ia maua le faamoemoe ae faatoilalo le faanoanoa, ia tuua le pouliuli ae liliu atu i le malamalama o le talalelei e faavavau.

Na lapatai mai Paulo ma isi e uiga i tofotofoga o o tatou taimi ma aso o le a oo mai. Peitai e mafai ona oo mai le toafilemu i loto o tagata taitoatasi o e liliu atu i tusitusiga paia ma tatalaina folafolaga o le puipuiga ma le togiola o loo aoaoina ai iina. Matou te valaaulia tagata uma ia liliu atu i le Faaola o Iesu Keriso, i Ana aoaoga e pei ona maua i le Feagaiga Tuai, le Feagaiga Fou, le Tusi a Mamona, le Mataupu Faavae ma Feagaiga, ma le Penina Tau Tele.

E tuuina atu la'u molimau mautinoa e uiga i tusitusiga paia o se ki i lo tatou puipuiga faaleagaga. Ou te molimau atu foi i le mana faamalolo o le Togiola a Iesu Keriso, “ia mafai ona faaolaina e ala ia te ia i latou uma”¹² o e o le a laveaiina. Ua toe faatuina le Ekalesia a le Alii i le lalolagi. Ou te molimau atu i le moni ai ai o le talalelei. O a'u o se molimau ia te Ia. I le suafa o Iesu Keriso, amene. ■

FAAMATALAGA

1. 2 Timoteo 3:1–5.
2. 2 Timoteo 3:13.
3. Eteru 8:24, 26.
4. 2 Timoteo 3:14–15.
5. 2 Timoteo 3:16.
6. Mareko 5:36.
7. Alema 17:2.
8. Joseph F. Smith, *Gospel Doctrine*, 5th ed. (1939), 542.
9. Eteru 8:24.
10. Ieremia 31:34.
11. Isaia 1:18.
12. Mataupu Faavae ma Feagaiga 76:42.



Saunia e Elder D. Todd Christofferson

○ Le Korama a Aposetolo e Toasefululua

○ Le Malosiaga Amiotonu o Tamaitai

O lou malamalama o le faia lea o mea lelei ma ia amio lelei, ma a o e mulimuli i le Agaga Paia, o le a tuputupu a'e lou gafatia ma faatosinaga mama.

Mo se taimi umi lava, na faalagolago ai tagata i faatosinaga amiotonu o tamaitai. E ui e mautinoa lava e le na o le pau lea o faatosinaga amiotonu na faia i le lalolagi, o le faavae talafeagai sa tuuina atu e tamaitai ua faamaonia le tulaga ese o le aoga i le manuia o tagata uma. Masalo, ona o se tulaga aoao, e tele lava ina le talisapaiaina ai lenei são o tamaitai. Ou te fia faailoa atu le agaga faafetai mo faatosinaga a tamaitai lelei, faailoa atu nisi o filosofia ma faiga e tau faamata'uina ai le malosiaga ma le tulaga o tamaitai, ma faaleo atu se fanoga i tamaitai ia atiina ae le mana amiotonu o i totonu o i latou.

E aumaia e tamaitai faatasi ma i latou i le lalolagi se uiga auuumama faapitoa, se meaalofo faalelagi lea latou te atamamai ai i le faaosofia o na uiga e pei o le faatuatua, lototele, malamalama i lagona o isi, ma faaleleiga atili o mafutaga ma aganuu. Ina ua ia viia le “faatuatua faamaoni” na ia maua ia Timoteo, na tu'ua ai e Paulo o lenei faatuatua “sa muai i ai ia Loi o le tina o lou tina, atoa ma Eunike lou tina.”¹

I tausaga ua mavae a o [o'u] nofo ai i Mekisiko, sa ou mataua ai le uiga o

le faamatalaga a Paulo. Ou te manatua se tina talavou faapitoa, o se tasi o le toatele o tamaitai o le Ekalesia i Mekisiko, o lona faatuatua i le Atua na iloagofie lelei ai lava o latou olaga, ae sa foliga mai sa latou tau le iloaina lava. O lenei tamaitai tamalii na faaalai se taitaiga amiotonu na afua mai i le amio mama lea na faapea ona faatosinaina ai mo le lelei i latou uma na siomia o ia. Faatasi ai ma lona toalua, sa ia ositaulagaina se vaega o mea e fiafia i ai ma meatotino mo mea e sili ona ave i ai lana faamuamua, na foliga mai e leai ma se faalotolotolua. O lona gafatia e faatino galuega o le fesiitai, punou, ma le faapaleniina o lana fanau, na latalata atu i se tagata e mamana le malosi. Sa tele naua ona tiutetauave, ma o ana galuega sa tele ina fai soo ma e fai i aso uma, ae sa i ai pea e le aunoa se toafilemu matagofie, se lagona o le faia o le galuega a le Atua. E pei foi o le Faaoala, sa faamamaluina o ia e ala i le faamanuiaina o isi e ala i auunaga ma osigataulaga. Sa avea o ia ma faataitaiga o le alofa.

Ua faamanuiaina tele a'u i faatosinaga amiotonu a tamaitai, ae maise lava o lo'u tina ma lo'u toalua. Faatasi

ai ma isi tamaitai ou te vaavaai atu i ai ma le loto faafetai o Anna Daines. O Anna ma lana tane ia Henry, ma le la fanau e toafa o nisi ia o paionia o le Ekalesia i New Jersey i le Iunaite Setete. Sa amata mai i le vaitaimi o le 1930, a o aotau ai Henry mo lona faailoga o le fomai i le Iunivesite o Rutgers, sa galulue malosi ai i laua ma Anna i faalapotopotoga i le aoga ma le lotoifale i Metuchen, lea sa latou aumau ai, ina ia faatoilaloina le malosi o le taliaina o le faailoga tagata na faasaga i Mamona, ma sa ia faia ai lea nuu o se nofoaga sili atu ona lelei mo matua uma e tausia ai a latou fanau.

O Anna, mo se faataitaiga, sa avea ma se volenitia i le Metuchen YMCA ma avea ai o ia ma se tagata taua. I totonu o se tausaga na tofia ai o ia e avea ma peresitene o le Ausilali a Tina ona sosoo ai lea ma le talosagaina o ia e tauva mo le tasi o tulaga e tolu o tamaitai i le pulega o le fono faatonu a le YMCA. Sa manumalo o ia e aunoa ma se faalavelave, ma faapea ona auai ai i le aufono tonu lava lea sa na o ni nai tausaga na muamua atu, na latou teena ai le faatagaina o le Au Paia e potopoto i totonu o le latou fale!²

Sa siitia atu lo matou aiga i le Uarota a New Brunswick a o ou talavou. Sa matauina au e Sister Daines ma faailoa soo mai lona talitonuga i ou tomai ma gafatia, lea sa musuia ai au e aapa maualuga—maualuga atu nai lo mea ou te oo i ai pe ana le seanoa lona faamalosi. E faatasi, ona o se lapataiga atamai ma le talafeagai mai ia te ia, sa ou alofia ai se tulaga semanu e mautinoa lava ou te oo ai i se faanoanoaga. E ui e le o toe i ai o ia iinei, ae o faatosinaga a Anna Daines o loo faaauau pea ona lagonaina ma atagia i olaga o e ua tupuga mai ia te ia atoa ai ma le anoanoai o isi tagata, e aofia ai ma au.

Na aoaoina a'u e lo'u tinamatua



o Adena Warnick Swenson ina ia ou magafagafa i auaunaga o le perisitua. Sa ia uunaia a'u e tauloto le faamanu-iaina o le falaoa ma le vai o le faa-manatuga, ma faamalalama mai e faapea, o le faiga lenei e mafai ai ona ou faia ma se malamalamaaga ma se lagona e sili atu. I le matauina o le ala na ia lagolagoina ai lo'u tamamatua, o se peteriaka o le siteki, na faaosofia ai a'u i se faaaloalo mo mea paia. Sa lei iloa lava e Tinamatua Swenson ave se taavale, ae sa ia silafia le auala e fesoasoani ai i tamaiti e avea ai ma ni alii o le perisitua.

O faatosinaga amiotonu a se tamaitai e leai se isi mea e sili atu ona lagona ai le mamana pe sili atu ona lelei le faaaogaina ai, nai lo o totonu o le aiga. E leai se isi nofoaga e sili atu ona lelei mo le tausiga o le tupulaga faia'e nai lo o le aiga masani, lea e galulue faatasi ai se tamā ma se tina e tuuina atu mea e manaomia, aoao ma faafaipea le la fanau. O nofoaga e le maua ai lenei faatulagaga amiotonu o le aiga, e taumafai ai tagata e faataitai ona aafiaga i le mea sili latou te mafaia i o latou tulaga faapitoa.

E tusa lava po o le a le tulaga, e mafai e se tina ona faaoga se faatosinaga e le mafai ona faatusalia e se isi lava tagata i isi lava sootaga. E ala i le

mana o ana faataitaiga ma aoaoga, na aoao ai lana fanau tama e faaaloalo i le tulaga faatamaitai ma ia faaaofia le amio pulea ma tulaga faatonuina mauululuga o amioga mama i o latou lava olaga. Ua aoao e lana fanau teine ia atiae lo latou lava mama ma ia tutu atu mo le mea sa'o, i taimi uma, po o le a lava le le lauiloa. O le alofa o se tina ma ona faamoemoega mauululuga e taitai atu ai lana fanau ia faatino ma le manatu tonu i ai e aunoa ma ni 'alofaga, ia manatu mamafa i aoaoga ma atinaega patino, ma ia faia ni saofaga faifaipea i le manuia o tagata uma o siomiaina i latou. Na fesili Elder Neal A. Maxwell i se tasi o taimi: "Pe a faaalua atoa mai le talaaga moni o le tagata, mata o le a faaalua ai siuleo o le pāpā o fana, po o leo musuia o pese faamoe pepe? O taofiga maoae na faia e alii o le militeli po o le faatupuina o le filemu e tamaitai i aiga ma pitonuu? Mata o mea e tutupu i moega pepe ma umukuka e faamaonia ai le sili atu ona malolosi o aafiaga nai lo o mea e tutupu i faigamalo?"³

E sili atu le paia o le matafaioi a se tamaitai i le foafoaina o le ola. Ua tatou iloa o o tatou tino faaletino e i ai se afuaga paia⁴ ma e tatau ona tatou oo uma i se fanau mai faaletino ma se toe fanauina faaleagaga ina ia oo atu ai i

malo aupito mauululuga i le malo selesitila o le Atua.⁵ O lea la, o tamaitai ua i ai se vaega taua (o nisi taimi e lamatia ai o latou lava soifua) i le galuega ma le mamalu o le Atua "ia aumaia le tino ola pea ma le ola faavavau o le tagata."⁶ I le avea ai ma tinamatutua, tina, ma tagata e faataitai i ai, ua avea ai tamaitai ma i latou e puipuia le punavai o le ola, aoaoina o augatupulaga taitasi i le taua o le mamā i feusuaiga—o le legavia a o le'i faaiipoipo ma le faamaoni a'ia'i i faaiipoipoga. O le auala lenei, ua avea ai i latou ma faatosinaga amiotonu ma lelei i malo; ua latou aumaia ai i fafo uiga sili ona lelei o alii; ua latou faasaoina siosiomaga lelei lea e mafai ona tausua ai ni fanau malupuipua ma maloloina.

Tuafafine, ou te le manao e soona vivii outou e pei ona matou faia i nisi o taimi i tautalaga i Aso o Tina ia tou te tau le toamalie ai. E le faapea e tatau ona outou atoatoa;⁷ Ou te le tautino atu tou te atoatoa (ae vagana ai se tasi o loo alala latalata mai i le taimi lenei). O le uiga o la'u faamatalaga e faapea, po o e nofofua pe faaiipoipo, pe ua e fanau maia ni fanau pe leai, pe ua e matua pe talavou pe feololo, o lau taitaiga amiotonu e taua, ma atonu ua amata ona matou le amanaiaina le taua o outou ma a outou faatosinaga. E mautinoa lava ua i ai faiga ma ni malosiaiga ua faagaioia, o le a faavaivaia ai ma iu ai ina aveesea a outou faatosinaga, ae e matuai afaina ai tagata taitoatasi, aiga ma tagata lautele. Se'i o'u ta'ua ni vaega se tolu e avea ma se faaeteetega ma se lapataiga.

O se filosofia matautia e faavaivaia ai faatosinaga amiotonu a tamaitai o le ta'u faatauvaaina lea o le faaiipoipoga ma le tulaga faaletino ma le faatausi-aiga i le avea ma se matātā. Ua vaai atu nisi i le faatausiaiga ma le inoino tuusa'o, ma finau mai e faalumaina ai tamaitai, ma o manaoga faifaipea o le

tausiga o fanau o se ituaiga o faiga le talafeagai.⁸ Latou te tauemu i le mea latou te ta'ua “o le auala i le faaletina” i le avefa ai ma se matātā. E le fetau pe sa'o lenei mea. Tatou te le faaititia le taua o mea e ausia e tamaitai po o alii, i soo se taumafaiga tauaogaina po o matātā—tatou te manuia uma mai na faamanuiaa—ae faailoa atu pea e leai se manuia e maualuga atu nai lo o le tulaga faaletina ma le faaletama i le faaipoipoga. E leai se matātā e maualuga atu, ma e leai se aofaiga o se tupe, pule, po o viiga mai tagata lautele e mafai ona sili atu i tau silisili o le aiga. Po o a lava isi mea e mafai ona ausia e se tamaitai, o ona faatosinaga amiotonu e leai se isi mea e sili atu ona faaaogaina lelei ai nai lo iinei.

O uiga faaalua e faatatau i tulaga o feusuaiga o tagata ua lamatia ai le taitaiga amiotonu a tamaitai i le tele o itu. O le faapa'u pepe ina ia talafeagai ma manaoga patino po o tulaga lautele ua osofaia ai le fatu o mana e sili ona paia o se tamaitai ma faatamaia ai lana taitaiga amiotonu. E faapena foi le moni e faatatau i feusuaiga le mama ma laei le talafeagai [fufusi, valavala, puupu] lea e le gata e faalumaina ai tamaitai ae faamalosaia ai foi le pepelo e faapea o le tulaga faalefeusui o le tamaitai o le uiga atoa lea o lona taua.

Ua leva ona i ai se aga masani o tulaga faatonuina itu lua lea e faamoemoe ai e faasāsā feusuaiga a tamaitai ae faataga amioga le mama a alii. O le le fetau o lea ituaiga o tulaga faatonuina itu lua ua iloa lelei lava, ma ua tatau lava le faitioina ma le teenaina. I lena teenaina, e faamoemoe ai se tagata o le a tula'i ae alii i le tulaga faatonuina maualuga atu e tasi, ae peitai ua alia'e ai le faafeagai—o le taimi nei ua uunaia tamaitai ma teine ia ola soonafai e pei lava o le “tulaga faatonuina itu lua” ua faamoemoeina alii e fai. O le mea sa avefa muamua

ai le manaomia e tulaga faatonuina maualuluga o tamaitai o le tautinoga ma le tiutetauave mai alii, ua avefa nei ma sootaga feusui e aunoa ma le mama pe talafeagai, aiga ua leai ni tamā, ma le faateleina o le mativa. O le avanoa tutusa i le ola soonafai ua na ona faoa ai mai tamaitai o le latou faatosinaga amiotonu ma faaleagaina ai tagata uma.⁹ I lenei fetuunaiga lē aoga, o alii ia ua “saoloto” lava i a latou mea e fai, ae o tamaitai ma fanau ua sili ona mafatia ai.

O le vaega lona tolu o popolega e sau mai ia i latou o e, ona o le upu faiga tutusa, ua mananao ai e tafiese uma eseese i le va o alii ma tamaitai. E masani ona faaaoga e lenei tulaga le uunaia o tamaitai e faaaoga le tele o amioga a alii—ia atili sauā, maa'a, ma finauvale. Ua taatele i le taimi nei i tifaga ma taaloga vitio le vaaia o tamaitai i tiute e tele i sauaga, ma tuua ai tino oti ma faatamaia ona o a latou amioga. E faatamaia loto le vaaia o alii i matafaioi faapena, ma e mautinoa lava e le faaititia, pe afai o tamaitai o i latou ia e faatinoina ma mafatia i sauaga.

Na aoa mai le sa avefa muamua ma peresitene aoa o Tamaitai Talavou o Margaret D. Nadauld: “Ua lava tamaitai o le lalolagi ua maaa; ua tatou manaomia ni tamaitai o e agavaivai. Ua lava tamaitai amio pa'aā; ua tatou manaomia ni tamaitai o e agalelei. Ua lava tamaitai amio le mafaufau; ua tatou manaomia ni tamaitai o e tauagafau. Ua lava tamaitai lauiloa ma mauoloa; ua tatou manaomia ni tamaitai se toatele e faatuatua. Ua lava le matape'ape'a; ua tatou manaomia le tele o le amio lelei. Ua lava le faamaualuga; ua tatou manaomia le amio mama atili. Ua lava le tautaua; ua tatou manaomia le tele o le mamā.”¹⁰ O le faanenefuina o eseese o tamaitai ma alii, ua tatou le iloa ai meaalofa manino, ma tutusa lelei

a tamaitai ma alii ia e fatuina faatasi ai se mea atoa maoae atu.

O la'u augani i tamaitai ma teineiti i le asō, ia puipui ma atiina ae le malosiaga amiotonu o loo i totonu ia te outou. Ia faasaosao lena uiga o le amio mama ma le meaalofa tulagaese ua outou aumaia faatasi ma outou i le lalolagi. O lou malamalama o le faia lea o mea lelei ma ia amio lelei, ma a o e mulimuli i le Agaga Paia, o le a tuputupu a'e lou gafatia ma faatosinaga mama. I tamaitai talavou ou te faapea atu, aua ne'i aveesea lena malosiaga amiotonu e tusa lava pe e te le'i atiaeina atoa. Ia tausisi lelei ia mama lau gagana, ae le masoā; o ou laei ia atagia ai le tauagafau, ae le o le faamaualuga; ma o lau amio ia faaalua ai le mama, ae le o le ola soonafai. E le mafai ona e siia lima tasi se isi i le mama, pe afai o loo e faafiafiaina le tiapolo i le isi.

Tuafafine, i au fegalegaleaiga uma lava, o lou sootaga ma le Atua, lou





Tama Faalelagi, o le o le punavai o lou malosiaga amiotonu, e tatau ona e faamuamua i taimi uma o lou olaga. Ia manatua o le mana o Iesu na oo mai e ala i le tuuto atu o Lona loto i le finagalo o le Tama. Sa le'i tuua e Ia le mea na faafiafiaina ai Lona Tama.¹¹ Ia taumafai ia avea ma le ituaiga soo faapena o le Tama ma le Alo, ma o le a le mafai ai lava ona galo au faatosinaga.

Ma aua le fefe e faaoga lena faatosinaga e aunoa ma le mata'u pe faatoese ai. "Ia saunia pea lava outou e tali atu i [alii, tamaitai, ma tamaiti] uma o e fesili mai ia te outou i le uiga o le faamoemoe o loo ia te outou."¹² "Tala'i atu le upu; ia e faamalosi i ona aso e taugalemu ai, ma ona aso e le taugalemu ai; ia e faatonu atu, ia e aoai atu, ia e apoapoai atu ma le onosai uma atoa ma le aoao atu."¹³ "Ia tausi a'e a outou fanau i le malamalama ma le upumoni."¹⁴ "Aoaoina i [latou] ia tatalo, ma savavali tonu i luma o le Alii."¹⁵

O nei apoapoai e tamaitai, ia aua ne'i i ai se tasi e malamalama sese ma le loto i ai. O le viia ma le uunaia o le malosiaga amiotonu i tamaitai, ou te le o faapea atu ai o alii ma tamaiti ua faamatuu ese mai o latou lava tiute ia tutu mo le upumoni ma le amiotonu, pe faapea o o latou tiutetauave

e auuuna atu, ositaulaga, ma taitai, ua itiiti ifo nai lo o tiutetauave o tamaitai, pe mafai foi ona lafoai atu i tamaitai. Uso e, ia tatou tutu faatasi ma tamaitai, tausoa a latou avega, ma atiae taitaiga amiotonu a o tatou lava soa.

Tuafafine pele, matou te faalagolago i le malosiaga amiotonu ua outou aumaia i le lalolagi, i faaiipoipoga, i le aiga, ma i le Ekalesia. Matou te faalagolago i faamanuiaga tou te aumaia mai le lagi e ala i a outou tatalo ma le faatuatua. Matou te tatalo mo lo outou puipuiga, tulaga manuia ma le fiafia, atoa ai ma la outou uunaiga ia faatumauina. I le suafa o Iesu Keriso, amene. ■

FAAMATALAGA

1. 2 Timoteo 1:5.
2. Orson Scott Card, "Neighborliness: Daines Style," *Ensign*, Ape. 1977, 19.
3. Neal A. Maxwell, "The Women of God," *Ensign*, Me 1978, 10–11.
4. Tagai Mose 2:27.
5. Tagai Mose 6:57–60.
6. Mose 1:39.
7. "I se seneturi ua mavae sa maua ai e se tagata atamai i mea tau sootaga o John Bowlby e faapea o le sootaga e fatuina e ala i fegalegaleaiga alofa le mafaitaulia i le va o se tina ma sana tama o le faavae taua lea mo le atinaega faalelagona o agafesootai. . . . Ma o se tamaitai atamai mo tulaga faatamaitai o Sara Ruddick sa faailoaina o se 'alofa gauai' o se tina o le ute lea o le tulaga faamatua mataalia. E ala atu i 'mata onosai

o le alofa,' e atiae ai e tina se poto faapitoa i a latou fanau—o se poto latou te maua ai se malamalamaaga i mea e tatau ona i ai ia 'faatinoga masani' moni mo tamaiti taitasi" (Jenet Jacob Erickson, "Love, Not Perfection, Root of Good Mothering," *Deseret News*, May 12, 2013, G3).

8. E moni lava e toatele tamaitai i le tele o augatupulaga ua faaogaina faatautala pe mafatia i avega le talafeagai i totonu o le aiga ma fale faigaluega, ae o le le manatu faapito ma le ositaulaga e le manaomia ma e le tatau ona faatautalaina pe soona fai. Sa matauina e Elder Bruce C. Haven e faapea: "Afa'i o le 'le manatu faapito' o lona uiga e tatau i se tamaitai ona lafoai lona lava ia faasinomaga tupito ma le tuputupu ae patino, o lena la malamalama o le le manatu faapito e sese. . . . Ae o le mamanu o le laveaiga i aso nei e matua mamao lava i le isi itu, o tamaitai faigofie e matua *tutoatasi* lava mai o latou aiga. O se vaai sili atu ona moni e faapea o tane ma ava e *felagolagomai* le tasi ma le isi. . . . O faitioga ua siitia ai tina mai le ola faalagolago i isi i le tutoatasi ua faamisi ai le elelee lauusiusi tutotonu o le felagolagomai. O e siitiaina tina mai le le manatu faapito i le manatu faapito ua faamisia le elelee lauusiusi tutotonu o auunaga e filifili e le tagata lava ia lea e saofaga atu i le tuputupu ae patino o se tamaitai. Ae paga lea, ona o le anoanoai o nei mea, o finauga e uiga i le taua o le faatina ua mafua ai ona le amanaiaina e sosaiete lautele e le gata o tina ae o tamaitai foi i le tulaga aoao" ("Motherhood and the Moral Influence of Women" [remarks to the World Congress of Families II, Geneva, Plenary Session IV, Nov. 16, 1999], http://worldcongress.org/wcf2_spkrs/wcf2_hafen.htm).
9. Sa ta'ua e se tasi o tina i se tusiga i le *Wall Street Journal*: "With the exception of some Mormons, evangelicals, and Orthodox Jews, scads of us don't know how to teach our own sons and daughters not to give away their bodies so readily. . . . Still, in my own circle of girlfriends, the desire to push back is strong. I don't know one of them who doesn't have feelings of lingering discomfort regarding her own sexual past. And not one woman I've ever asked about the subject has said that she wishes she'd 'experimented' more" (Jennifer Moses, "Why Do We Let Them Dress Like That?" *Wall Street Journal*, Mar. 19, 2011, C3).
10. Margaret D. Nadauld, "O Le Olioli i le Tulaga Faatamaitai," *Liahona*, Ian. 2001, 17.
11. Tagai Ioane 8:29.
12. 1 Peteru 3:15.
13. 2 Timoteo 4:2.
14. Mataupu Faavae ma Feaiga 93:40.
15. Mataupu Faavae ma Feaiga 68:25, 28.



Saunia e Elder S. Gifford Nielsen

○ Le Fitugafulu

Faanatinatiina o le Fuafuaga o le Taaloga a le Alii!

E tatau ia i tatou taitoatasi ona atiina ae la tatou lava fuafuaga patino o le taaloga ina ia galulue soosootauau ma le naunautai ma faifeautalai faamisiona.

I le tele o tausaga ua mavae sa manao-mia ai ona ou talanoa i le faletua o se tasi o epikopo i la matou siteki, ma o lea sa ou valaau atu i ai i le latou fale. Sa tali mai e le la atalii laitiiti le telefoni. Sa ou fai atu, “Talofa. O iina lou tina?”

O lana tali, “Ioe, lea e iinei. O le a ou alu e aumai. O ai lea?”

Na ou tali atu: “Fai i ai o Peresitene Nielsen.”

Sa i ai sina filemu teisi, ona sosoo lea ma se leo malosi na ou lagona atu, “Tina, o Peresitene *Hinckley* lea e i le telefoni!”

Ou te le iloa po o le a se mea na ia mafaufau i ai. Masalo o le savali sili lea ona umi sa na faia i le telefoni. Na oo mai se manatu i lou mafaufau: “Pe ou te fai ea i ai [o au o *Hinckley*]?” Ou te lei faia ae sa ma talie ai. Ia ona o lea ua ou mafaufau i ai, atonu sa matua le fiafia o ia i le iloa o au o loo talanoa i ai.

O le a sau mea e fai pe afai e valaau moni atu lava le perofeta a

le Alii ia te oe? Ia, sa valaau atu! Ua valaau mai Peresitene Thomas S. Monson, e pei ona ia toe faia i lenei taeao, ua ia valaauina i tatou taitoatasi i se galuega matua taua lava. Na Ia saunoa mai, “O le taimi lenei mo tagata o le ekalesia ma faifeautalai e o mai faatasi ai, e galulue faatasi, e galueaiina le tovine a le alii ma aumai agaga ia te Ia” (“Faatuatua i le Galuega o le Faaolataga,” [faasalalauga o le aoaoga mo taitai i le lalolagi atoa, 23 Iuni, 2013]; lds.org/broadcasts).

Na tatou faalogo ea?

Ua aafia le lalolagi atoa, siteki, itu, ma misiona i se tulaga fou o le malosi, ao faataunuuina le folafolaga a le Faaola ia Iosefa Samita i le 1832: “Faauta, o le a Ou faanatinatiina la’u galuega i lona taimi” (MF&F 88:73).

Uso e ma tuafafine, o le taimi *lenei!* Ua ou lagonaina ma ou te mautinoa ua faapea foi outou.

Sa ou manao e faatino lou fiafia ma lou faatuatua ia Iesu Keriso. Ao ou taalo lakapi faaAmerika, sa ou

mafaufau i tulaga o fuafuaga o le taaloga. E le fesiligia lava le o atu i se taaloga pe afai ua lava tapena le matou au e faia ni faatinoga sao, o le a matou malo. Peitai, sa ma talanoa talu ai nei ma le faiaoga logologoa a BYU, o LaVell Edwards e uiga ia matou fuafuaga o le taaloga, ae na ia fai mai, “Ou te le popole po o le a le faatinoga e te valaauina pau lava le mea ia sikoa!” I le aveai ai ma se tasi o ana tama autu i le laina i tua, sa ou mafaufau ai e sili atu ona faigata nai lo lena tulaga, ae atonu o lana filosofa faigofie o le mafuaaga lea ua faaigoa ai se malaetaalo ia te ia.

Talu ai ona ua tatou i ai uma i le au a le Alii, faamata ua tofu i tatou ma sa tatou lava fuafuaga o le taaloga? Ua tatou saunia ea e taaalo? Afai tatou te alolofa moni i o tatou aiga, uo, ma paaga, i le aveai ai ma ni tagata o le ekalesia, faamata tatou te le o manao ea e faasoa atu a tatou molimau e uiga i le talalelei toefuataiina ia i latou?

I le semina mo peresitene fou o le misiona na faia ia Iuni, na mauaina ai e se faamaumauga maoae o peresitene fou e 173 ma o latou faletua ni aoaoga faaii ao lei amataina a latou auunaga. Na saunoa uma ia sui e toa 15 o le Au Peresitene Sili ma le Korama a Aposetolo e Toasefulua i lenei vaega faapitoa.

Na tuuina mai e Elder L. Tom Perry ni manatu faaopoopo, “O se vaitau sili ona ofoofogia lenei i le talafaasolopito o le Ekalesia. Ua tutusa lenei mea ma mea maoae na tutupu i le talafaasolopito ua mavae, e pei o le Uluai Faaaliga, le meaalofo o le Tusi a Mamona, e pei o le Toefuataiga o le talalelei, e pei o mea uma ia na fausia lena faavae mo i tatou ina ia agai ai i luma ma aoao atu i le malo o lo tatou Tama oi le Lagi” (“Saunoaga Faaii” [saunoaga na tuuina atu mo peresitene fou o misiona i le aso, 26 Iuni,



2013], 1, Church History Library, Salt Lake City).

Ua tataua ia i tatou ona matuai auai ma le naunautai ia tutusa ma le nau-nautaiga o o tatou taitai ma le tuuto o o tatou faifeautalā faamisiona. O le a le mafai ona alualu i luma lenei galu-ega i le ala o faamoemoe i ai le Alii pe a aunoa ma outou! E pei ona saunoa Peresitene Henry B. Eyring, “Po o le a lava lo tatou matutua, malosī, valaauga i le Ekalesia, po o nofoaga, ua tasi i tatou o e ua valaauina i le galuega e fesoasoani ia te Ia i Lana selesalega o agaga” (“E Tasi Lava i Tatou,” *Liahona*, Me 2013, 62).

Mata e mafai ona ou faasoa atu ia te outou se fuafuaga o le taaloga ua ou lagona le uunaiga e faatulaga ina ua uma ona tatalo, faitauina le mata-upu e 13 o le *Talai Lau Talalelei*, ma mafaufau loloto i aafiaga ua mavave? Ou te valaauliaina outou e mafaufau i nei manatu e tolu ao outou mafaufau ia outou lava fuafuaga.

Muamua, fai se tatalo faapitoa ina ia aumai faalatalata atili se tasi i le Faaola ma Lana talalelei i aso uma. E mafai ona outou faia lenei mea e ala i le tagai atu i tagata uma o ni atalii ma afafine o le Atua o loo fesoasoani i le tasi ma le isi i la latou malaga o le toe foi i le aiga. Mafaufau i ni uo fou o le a e maua.

Lua, tatalo mo faifeautalā o loo galulue i la outou eria ma a latou tagata sailiili e ala i igoa i aso uma. Pau lava le auāla e faia ai lenei mea o le faafeiloai ia i latou, tagai ia latou

pine, valaau atu i o latou igoa, ma fesili i ai po o ai o loo latou aoaoina. O se saofaga atamai lenei mai ia Elder Russell M. Nelson, “Seiiloga ua e silafia le igoa ma foliga o se tagata, e le mafai ona fesoasoani le Alii ia te outou ia silafia lona loto.”

Sa ou auai i le papatisoga o se tamaitai lelei lea sa faasoa mai lana molimau. Ou te manatua pea e faavavau lona faapea mai, “Ou te lei mauaina lava muamua se toatele o ni tagata o tatalo mo au ma lagonaina le matua alofagia! Ou te iloa e moni lenei galuega!”

Tolu, valaaulia se uo i se gaoioga i lou fale po o se isi nofoaga. Po o fea lava tou te o i ai po o le a le mea tou te faia, mafaufau po o ai o le a fiafia i le gaoioga ona faalogo lea i le Agaga ao Ia taitaia outou.

Na aoa mai e le Faaola ia te au se lesona faigofie i lau aoaoga patino o le talalelei lea ou te talitonu, e faatatau ma le matagofie i “le faanatinatiina.” Pe a uunaia au faalelagona e uiga i se mea, e faaalā i lau tusitusi ma e masani lava ona faaiuina i le faailoga ofo lea e faailoa mai i le faauigaga o se “lagona malosī [po o se] faailoga o le matua taua tele” (*Merriam-Webster’s Collegiate Dictionary*, 11th ed. [2003], “exclamation point”).

Sa lofituina au i le amata ona oso ae o mau e uiga ‘i le faapotopotoina,” lea na faaiu i le faailoga ofo, e pei o le aioi faamomoloto a Alema: “E, pe ana o au o se agelu, ma mafai ona ou maua le moomooga o lou loto, ina ia

mafai ona ou alu atu ma tautala atu ma le pu a le Atua, ma i se leo e luluina ai le eleele, ma alaga atu le salamo i tagata uma!” (Alema 29:1).

O au sailiiliga ua iloa ai e 65 fuaitau, o loo faaalā mai ai lenei ituaiga o malosī o lagona faafaifeautalā, e aofia ai mea nei:

“Ua matua tele lava lona olioli i le agaga e salamo! . . .

“Ma afai e faapea lua te galulue i o oulūa aso uma i le alagaina o le salamo i lenei nuu, ma aumai, nao se agaga e toatasi ia te a’u, e matua tele lava lo oulūa olioli faatasi ma ia i le malo o lo’u Tama!

“Ma o lenei, afai o le a tele lo oulūa olioli faatasi ma se agaga e toatasi na oulūa aumai ia te a’u i le malo o lo’u Tama, e matua tele atu lo oulūa olioli pe afai lua te aumai ni agaga e toatele ia te a’u!” (MF&F 18:13, 15–16).

O le fagua o au i nei mau tulagaese na faia ai se matafaioi taua i lou tofiga muamua o se Fitugafulu Eria. Sa fai si ou tamai popole i le avea ma se soa o le Aposetolo, o Elder Quentin L. Cook, i se konafesi faalesiteki. Ao ou savali atu i le ofisa o le peresitene o le siteki mo le uluai fonotaga o le faaiuga o lena vaiaso, sa ou matauina se pea seevae lanu auro foliga masaesae i luga o le kapineta i tua o lana kesi ma o loo i ai se mau e faaiuina i le faailoga ofo. Ao ou faitauina, sa ou lagona ua silafia e le Alii au suesuega, ua taliina au tatalo ma na Ia silafia lelei le mea sa ou manaomia e faatoafilemu ai lou loto popole.

Sa ou fesili atu i le peresitene o le siteki e faamatala mai ia te au le tala i seevae.

Sa ia fai mai:

“O seevae nei o se talavou na liliu mai i le Ekalesia e matitiva lona aiga, ae sa ia naunau lava e auauna atu i se misiona faamanuaina ma sa ia faataunuina i Kuatēmala. I lona toe

foi mai sa ma feiloai ai e tuuina atu se faamalologa faamamaluina ma ou iloa ai ona seevae ua matua masaesae lava. Na tuuina atu e lenei alii talavou mea uma na ia maua i le Alii, e aunoa ma se tele o se lagolago mai lona aiga, pe afai na i ai.

“Sa ia iloa lou sioa atu i ona seevae ma sa ia fesili mai, ‘Peresitene o i ai se mea o sese?’

“Na ou tali atu, ‘Leai, Faifeautalai, o loo lelei mea uma! E mafai ona ave ma au seevae na?’”

Na faaauau pea le peresitene o le siteki: “Sa lofituina au i le faaaloalo ma le alofa mo lenei faifeautalai ua toe foi mai! Na ou manao e faamamaluina lena aafiaga, ma o lea ua ou faa lanu auroina ona seevae. O se faamanatu ia te au pe a ou savali mai i totonu o lenei ofisa e uiga i taumafaiga e tatau ona tatou faia e tusa lava po o a o tatou tulaga. O le mau e mai ia Isaia: ‘E matua matagofie i luga o mauga o vae o le ua fai mai le tala lelei, o le logologo mai le manuia; ua tala mai le tala lelei, ua faailoa mai le olataga; ua fai mai ia Siona, O loo pule lou Atua!’ (Isaia 52:7).”

Ou uso e ma tuafafine, atonu e lei mafaufau le faletua o le epikopo pe aisea ua valaau mai ai le perofeta ia te ia. Ou te molimau atu e le tatau ona toe mafaufau atili o ia po o i tatou i le—FAAILOGA OFO!

Ou te iloa e tatau ia i tatou taitoatasi ona atiina ae a tatou lava fuafuaga patino o le taaloga ina ia galulue soosootauau ma le naunautai ma faifeautalai faamisiona i le—FAAILOGA OFO!

Ou te faaopoopo atu lau molimau i le molimau a le Perofeta o Iosefa Samita: “Ma o lenei, ina ua mavae le tele o molimau ua tuuina mai e uiga ia te ia, o le molimau mulimuli lenei, i molimau uma, ua tuu atu e uiga ia te ia: O loo soifua o ia!” (MF&F 76:22). I le suafa paia o Iesu Keriso, amene. ■



Saunia e Elder Arnulfo Valenzuela

○ Le Fitugafulu

○ Mea Laiti ma Faatauvaa

Ia tatou aapa atu i isi ma le faatuatua ma le alofa.

Ou uso e ma tuafafine pele, i nai vaiaso talu ai sa ou i ai i le nofoaga autu e aoao ai faifeautalai i le Aai o Mekisiko e faasoa atu se savali i faifeautalai. Sa ma taunuu ma lou toalua ma le iloaina o nai itula ua ma vave ai. A o ma matamata ai i togalaau matagofie ma auala mama ma tausia lelei o le NAF, sa faigofie lo ma iloaina o le fiafia sa faaalua i fofoga o le faitau selau o alii ma tamaitai faifeautalai talavou, a o taulai atu faifeautalai taitoatasi i le mauaina o tomai o gagana fou ma aoaoina ia talisapaia atili ona faamoemoega o se faifeautalai.

A o ou faaaluina se taimi e matauina lelei ai lenei vaaiga matagofie, sa ou mafaufau i upu a Alema ina ua ia poloaiina lona atalii o Helamana ia tausia se talafaasolopito a ona tagata e avea ma vaega o faamaumauga lea sa atofa atu ia te ia ma tausia nei faamaumauga uma i le paia ina ia i ai se aso o le a latou o atu ai i atunuu, ma ituaiga, ma gagana, ma nuu uma.

Ona tau atu lea e Alema ia te ia:

“O lenei atonu e te manatu ua ou vaea i lenei mea; ae faauta ou te fai atu ia te oe, o mea laiti ma faatauvaa e faataunuu ai mea tetele; ma o auala laiti i le tele o taimi, e faamaasiasia ai e popoto.

“Ma e galue le Alii le Atua i auala e faataunuu ai ona faamoemoega tetele ma faavavau; ma o auala laiti lava e faamaasiasia ai e le Alii e popoto, ma aumai ai le olataga o agaga e toatele” (Alema 37:6–7).

O le taumamaina ma le talavou o o tatou faifeautalai ua avea ma faataitiga lelei o le ala a le Alii—ma o i latou o e lotomauualalo e mafai ona “valaulia isi e o mai ia Iesu Keriso e ala i le fesoasoani atu ia i latou ia maua le talalelei toefuataiina e ala i le faatuatua ia Iesu Keriso ma Lana Togiola, salamo, papatisoga, mauaina o le meaalofa o le Agaga Paia, ma tumau e oo i le iuga” (*Tala’i La’u Talalelei: O Se Taiala mo le Galuega Faafaiifeautalai* [2004], 1).

I le avea ai ma tagata o le Ekalesia, ua mafai e i tatou, e ala i mea laiti ma faatauvaa, ona “[faatalitoni] le toatele i le sese o o latou ala” ma fesoasoani e aumai “i latou i le malamalama o lo latou Atua mo le olataga o o latou agaga” (Alema 37:8).

I se tasi taimi sa matou o ai ma se peresitene o se siteki ma le epikopo e asiasi i se tagata ua le o toe toaga mai. Sa matou aoaoina o ia, i se auala faigofie lava, e uiga i faamanuiga o le Aso Sapatati. Sa matou faailoa atu ia te



ia lo matou alolofa faamaoni. Sa ia tali mai, “Pau lava le mea sa ou manaomia o le i ai o se tasi e sau ma tuu mai ia te au se *abrazo*,” po o se opo. Sa vave ona ou tu i luga ma opoina o ia. O le aso na sosoo ai o le Aso Sa. Sa malaga mai le uso lea i le sauniga faamanagera ma lona aiga atoa.

A o faia se asiasiga faafaiaoga asiasi, sa tau atu e Mareta, o se tasi o la matou uarota, i lo’u toalua ma lana soa ia aua lava nei toe foi atu. Sa ia filifili e le toe sau i le lotu. Sa fai atu se tasi o faiaoga asiasi ia Mareta pe mafai ona latou lagiina faatasi se viiga i lona asiasiga mo le taimi mulimuli, ma sa ia malie i ai. A o latou pepese, sa tupu se mea faapitoa. Sa faasolosolo ona amata faatumulia le potu i le Agaga. Sa latou taufai lagonaina uma. Sa amata ona faamalulūina le lotu o Mareta. Faatasi ai ma ona fofoga sa faatumulia i loimata, sa ia faailoa atu ai i ana faiaoga asiasi lagona o lona lotu. I lona taimi, sa ia iloa ai e moni le talalelei. Ua ia faafetai nei i ana faiaoga

asiasi ma faailoaina se manao ia la toe foi atu. E amata mai i lona aso, na te talileleia lava i laua ma le olioli.

Sa amata ona auai atu ia Mareta ma lana tama teine laitiiti i le lotu. Mo le tele o tausaga sa la auai ai e le aunoa, faatasi ai ma le aveesea o le faamoe-moe o Mareta ia mafai e lona toalua i se taimi ona filifili e faatasi ma i laua. Mulimuli ane sa oo mai le aso na pai atu ai le Alii i lona lotu, ma sa amata ai ona ia auai atu ma i laua, e lei pine ae vave foi ona faia faapena e le isi o la afafine. Sa amata ona lagonaina e lenei aiga le olioli moni e oo mai mai le i ai o faamanuiaga o le talalelei i lo latou aiga. Talu mai lona taimi sa galue ai ma le faamaoni Mareta o le peresitene o le Aualofa i la matou uarota, ma sa au-auna lelei lona toalua i nisi o valaauga i le siteki. Sa amata nei mea uma i le usuina o se viiga, o se mea laitiiti ma faatauvaa sa ootia ai le lotu o Mareta.

O Naamanu o se taitaiu o le autau a le tupu o Suria, o se alii faamamaluina, o se alii malosi ma lototoa, ae o ia

foi o se lepela (tagai 2 Tupu 5:1). Ina ua maea taumafaiga le faamanuiaina i le mauaina o se fofoga mai le tupu o Isaraelu mo lona lepela, sa alu atu loa Naamanu i le fale o Elisaia, le perofeta. Sa auina atu e Elisaia se avefeau ia te ia, ua faapea atu:

“Ina alu ia ina taele faafitu i Ioritana, ona toe foi mai ai lea o lou tino tuai ia te oe, ona e mama ai lea.

“Ona ita lava lea o Naamanu ma alu ese, ua faapea ane, Faauta, na ou faapea, e sau lava ia i fafo, ma tu mai, ma valaau i le suafa o Ieova lona Atua, ma talo lona lima i le mea ua i ai le ma’i e faatea ai i le lepela. . . .

“A ua faalatalata ane ana auauna, ua fai ane ia te ia, ua faapea ane, Sena e, ana fai atu e le perofeta se mea tele ia te oe, e te le faia ea? e te le faia ea ina ua ia fai atu ia te oe, E taele, e te mama ai?

“Ona alu ifo ai lea o ia, ua fufui faafitu i Ioritana, e tusa ma le upu a le tagata o le Atua: ona foi mai ai lea o lona tino tuai pei o le tino o le

tamaitiiti, ua mama foi ia” (2 Tupu 5:10–11, 13–14).

Ua valaauliaina i tatou e lo tatou perofeta, Peresitene Thomas S. Monson, ia o atu ma laveai mai o tatou uso ma tuafafine. Sa ia saunoa: “Ua manaomia e le lalolagi la outou fesoasoani. Ua i ai vae ia faamallosia, lima e uu mai, mafaufau e faalototeleina, loto e musuiaina ma agaga e laveai mai. O loo faatalitali mai faamanuiaga e faavavau mo outou” (“Ia Laveaiina,” *Liahona*, Iulai 2001, 57).

Ou te molimau atu o le toatele o i latou o e manaomia lo tatou fesoasoani o loo faatalitali mai mo i tatou. Ua latou sauni mai mo o latou uso ma tuafafine faatuatua e aapa atu ia i latou ma laveai i latou e ala i ni auala laiti ma le faatauvaa. Ua ou faaaluiina patino le tele o itula e asiiasi ai i tagata o le Ekalesia ua le o toe toaaga o o latou loto ua uma ona faamalulūina e le Alii, o e ua saunia nei e mauaina a tatou molimau ma o tatou faailoaga ma le faamaoni o le alofa. Pe a tatou aapa atu ma valaaulia i latou, o le a latou toe foi mai i le Ekalesia e aunoa ma le faatuai.

Ia tatou aapa atu i isi ma le faatuatua ma le alofa. Ia tatou manatua le folafolaga a le Alii:

“Ma afai e faapea lua te galulue i o oulua aso uma i le alagaina o le salamo i lenei nuu, ma aumai, nao se agaga e toatasi ia te a’u, e matua tele lava lo oulua olioli faatasi ma ia i le malo o lo’u Tama!

“Ma o lenei, afai o le a tele lo oulua olioli faatasi ma se agaga e toatasi na oulua aumai ia te a’u i le malo o lo’u Tama, e matua tele atu lo oulua olioli pe afai lua te aumai ni agaga e toatele ia te au!” (MF&F 18:15–16).

Ou te molimau atu i le alofa o le Alii i Ana fanau uma. Ou te iloa o loo Ia soifua ma o Ia o loo tatou Togiola. I le suafa o Iesu Keriso, amene. ■



Saunia e Elder Timothy J. Dyches
○ Le Fitugafulu

E Te Fia Malolo Ea?

A tatou salamo ma liua i le Alii, ua faamaloloina i tatou, ma o le a tafieseina lo tatou tausalaina.

I se vaitau o le tausamiga fiafia i Ierusalem, sa tuua ai e le Faaola le motu o tagata ae saili atu mo i latou o e sa sili ona manaomia le fesoasoani. Sa Ia maua i latou i Petesa, o le taelega e lima ona vaitaele e lata i le maketi o mamoe lea sa lauiloa mo le tosina atu i ai o e puapuagatia.

Ua tau mai e le Talalelei a Ioane ia i tatou e faapea o talaane o le taelega “sa taotoo ai tagata e toatele o e mama’i, o e tauaso, o e pipili, ma e ma’i tino vale, o faatalitali ai le gaepu o le vai.

“Aua a oo i ona aso, ua alu ifo ai le agelu i le taelega, ma faagaepu le vai, i le o le ua muamua ifo, ina o gaepu le vai, ua malolo ai o ia i le ma’i na ma’i ai o ia” (Ioane 5:3–4).

O le asiiasiga a le Faaola ua faaalua i se atavali matagofie na saunia e Carl Bloch ua faaautuina *Keriso o loo Faamaloloina e Mamai i Petesa*. Ua valiina e Bloch ia Iesu o ia susueina malie se faapaologa le tumau ma iloa atu ai “le na ma’i” (Ioane 5:7) o loo taoto latalata i le taelega, e faatalitali ai. O i, o le upu *ma’i* e faatatau i se tasi ua leai sona malosi ma faamamafaina ai le alofa mutimutivale ma le alofa tunoa a le Faaola, o le na afio filemu ane e auauna atu ia i latou o e e le mafai ona fesoasoani ia i latou lava.

I le atavali, o loo faapupuu le taulealea i luga o le fola i le paolo, ua

lelava ma lotovaivai ona ua mafatia i lona ma’i mo le 38 tausaga.

A o susue e le Faaola le pito o le ie i [Lona] aao e tasi, sa Ia faailoa atu i le isi [Ona aao] ma fetalai atu i se fesili ootia: “E te fia malolo ea?”

Na tali le taulealea, “Le Alii e, e leai lava se tagata na te tuuina ifo a’u i le taelega, pe a gaepu le vai: a alu ifo a’u e muamua ifo le tasi ia te a’u” (Ioane 5:6–7).

I le luitau e foliga mai e faigata i le taulealea, sa tuuina atu ai e Iesu se tali o’oo’o ma e le’i faamoemoeina:

“Ina tu ia i luga, ave ia lou moega, ma ia e savali.

“Ona malolo ai lea o le tagata, ua ave lona moega ma ua savali” (Ioane 5:8–9).

I se tasi vaaiga o le alofa, ua ta’u mai ai e Luka e faapea, a o maluu atu le Faaola i Ierusalem, sa feiloai ai i lepela e toa 10. Ona o loo latou gasegase, sa latou “tutu mamao mai” (Luka 17:12). Sa faatō i latou—eleelea ma le manaomia.

“Le Alii e, Iesu, ia e alofa mai ia te i matou,” sa latou tagi atu ai (Luka 17:13)—i se isi faaupuga, sa augani atu, “E leai lava *se mea* e mafai ona E faia mo i matou?”

O le Fomai Sili, e tumu i le aga-alofa, sa silafia lava e ao ona muamua le faatuatua i le vavega, ma faapea ona



fetalai atu ai ia i latou, “Ina o ia, ia faali atu outou i faitaulaga” (Luka 17:14).

A o latou o atu i le faatuatua, sa tupu le vavega. Mata e mafai ona outou tagai faalemafaufau i le olioli lofituina i laasaga taitasi a o latou molimauina i lena lava taimi le faamamaina, faamaloloina, ma toefuatai mai o o latou tino i o latou lava luma?

“O le tasi o i latou, ua na iloa ua faamaloloina ia, ona toe foi mai lea o ia, ua vivii atu i le Atua ma le leo tele,

“Ua faapau fao ia i vae [o le Matai], ua faafetai mai ia te Ia. . . .

“Ua fetalai atu [Iesu] ia te ia, Ina tulai ia, ina alu: ua e ola i lou faatuatua” (Luka 17:15–16, 19).

I la’u matata muamua o se fomai lautele ma fomai tipitipi, sa ou taulai atu i le fonofonoina ma le faasaoina o tulaga faaletino. O Iesu Keriso e faamaloloina le tino, mafaufau ma le agaga, ma e amata Lana faamalologa i le faatuatua.

E te manatua, ina ua tumu lou faatuatua ma le olioli i le taumasuasua? Manatua le taimi na e maua ai lau molimau po o le taimi na faamautu atu ai e le Atua ia te oe, o oe o Lona atalii po o le afafine ma e alofa tele o Ia ia te oe ma e lagona ai le malologa? Afai ua galo lena taimi, e mafai ona toe manatua.

Ua apoapoai mai le Faaola ia i tatou i auala ia malolo ai—ia atoatoa, pe amata ona maloloina ai:

“Ia outou o mai ia te a’u, o outou uma o e tigaina ma mafatia i avega,

o a’u foi e malolo ai outou.

“Ia outou amoina la’u amo, ma ia outou faaa’oa’o ia te a’u; aua o a’u le agamalu ma le lotomauualalo: ona maua lea e outou o le malologa mo outou agaga.

“Aua e avegofie la’u amo, o la’u avega foi e māmā ia” (Mataio 11:28–30).

“Mulimuli, mai ia te a’u” (Luka 18:22) ua valaauliaina i tatou e lafoai le olaga tuai ma tuinanau o le lalolagi ma ia avega ma tagata fou o e “ua mavae mea tuai [ae] ua faafouina mea uma” (2 Korinito 5:17), faatasi ai ma se loto faamaoni fou. Ma o le a toe faamalolo ai i tatou.

“Faalatalata mai ia te a’u ma o le a Ou faalatalata atu ai ia te outou; saili mai ia te a’u ma le filiga ma o le a outou maua ai a’u; ole mai, ma o le a outou maua ai; tu’itu’i mai, ma o le a tatala atu ai ia te outou” (MF&F 88:63).

A o tatou faalatalata atu ia te Ia, tatou te iloa ai o le olaga nei e tatau lava ona faigata ma o le i ai “o le faafeagai i mea uma” (2 Nifae 2:11) e le o se mea sese i le ata o le faaolataga. Ae o le faafeagai, o le elemene e le mavavaeeseina o le olaga faaletino ma e faamallosia ai lo tatou naunau ma faaleleia ai a tatou filifiliga. O tulaga fesuisui ai o le olaga e fesoasoani tatou te fatuina ai se mafutaga e faavavau ma le Atua—ma togitogia ai Ona foliga i o tatou mata pe a gauai atu o tatou loto ia te Ia (tagai Alema 5:19).

Ia “faia le mea nei e fai ma faamanatuga ia te a’u” (Luka 22:19) o le

finagalo lea o lo tatou Faaola ina ua Ia faatulagaina le mea ua tatou ta’ua o le faamanatuga. O lenei sauniga faatasi ai ma le areto ma le vai e faafouina ai feagaiga paia ua tatou osia ma le Atua ma valaauliaina le mana o le Togiola i o tatou olaga. Ua faamaloloina i tatou e ala i le lafoai o amioga masani ma sitaili o le olaga e faapea ona faamaaaina ai loto ma ua malōlō. Pe a tatou tuu i lalo o “auupega o lo [tatou] fouvale” (Alema 23:7), ua avega i tatou o “pule ia te i [tatou lava]” (MF&F 58:28), ua le toe faatauasoina i manatu taufaasese a Satani pe faalogonoaina e le soona malomaloā o le lalolagi faaletino.

A tatou salamo ma liua i le Alii, o le a faamaloloina i tatou, ma o le a tafieseina lo tatou tausala. Atonu tatou te manatunatu, e pei o Enosa, “Ua faapefea ea ona faia lenei mea?” Ma na tali mai le Alii: “Ona o lou faatuatua ia Keriso. . . . O le mea lea, ina alu ia, ua faamamaina oe i lou faatuatua” (Enosa 1:7, 8).

O Corrie ten Boom, o se tamaitai Kerisiano tuuto mai Take, sa ia maua se faamalologa faapena e ui lava na faapagotaina i toluapiga tetele i le taimi o le Taa Lona Lua o le Lalolagi. Sa matua puapugatia o ia, ae e le pei o si ona uso pele o Betsie, o lē na maliu i se tasi o toluapiga, sa faasaoina mai ai Corrie.

Ina ua mavae le taua, sa masani ona saunoa faalauaitetele o ia e uiga i ona aafiaga ma e uiga i le faamalologa ma le faamagaloga. I se tasi o taimi,

na alu atu ai ia te ia se tasi sa avea ma leoleo o le Nazi o le sa avea lava ma vaega na faafalepui ai ma le faalealofa ia Corrie i Ravensbrück, i Siamani, sa fiafia i lana savali o le faamagaloga ma le alofa o Keriso.

Sa ia faapea atu, “Ou te matuai faafetai lava i lau savali, *Fraulein*,’ Pe a mafaufau i lena mea, e pei ona e fai mai ai, ua Ia tafiese la a’u agasala!”

“Sa tuu mai lona lima e faatalofa mai ia te a’u,” o le faamatalaga lea a Corrie. “Ae o a’u, o lē sa faafia ona ou talai atu . . . le manaomia o le faamagaloga atu, sa tuu pea lo’u lima i lo’u autafa.

“E oo lava i mafaufauga ita ma le tauimasui sa pupuna a’e ia te a’u, sa ou vaaia ai o le agasala le tauimasui. . . . Le Alii e, Iesu, na ou tatalo ai, faamagaloga mai a’u ma fesoasoani mai ia ou faamagaloga ia te ia.

“Sa ou taumafai e ataata, [ae] sa faigata ona sii a’e lo’u lima. Sa ou le mafaia. E leai se mea na ou lagonaina, leai ma sina fasi lagona o le mafanafana po o le alofamama. Ma o lea na ou toe faia ai se tatalo le leoa. Iesu, e le mafai ona ou faamagaloga ia te ia. Aumai ia te a’u Lau faamagaloga.

“A o o’u tago atu i lona lima, sa faapea ona tupu se mea mataina lava. Mai lo’u tauau e faasolo atu i lo’u oga-lima ma oo atu i lo’u lima na pei o se uila na sosolo atu mai ia te a’u ia te ia, ae o totonu o lo’u loto na oso a’e ai se alofa mo lenei tagata ese lea na toetoe lava a lofituina ai a’u.

“Ma o lea na ou iloa ai, e le o toe faalagolago le faamaloloina o le lalolagi i la tatou faamagaloga po o lo tatou amirolelei, ae o loo faalagolago ia te Ia. A Ia fetalai mai ia i tatou ia alofola i o tatou fili, Na te aumaia, faatasi ma le poloaiga, le alofa lava ia.”¹

Sa faamaloloina Corrie ten Boom.

Ua saunoa mai Peresitene Thomas S. Monson, “E i ai le soifua e tasi e lagona ai i latou o e faanoanoa pe

lofituina i le faavauvau ma le tiga—o le Alii o Iesu Keriso lea.”²

Afai e te lagona le le mama, lē alofaina, lē fiafia, lē agavaa po o le lē faamaloloina, ia manatua “o mea uma e le talafeagai e uiga i le olaga e mafai ona faasa’oina e ala i le Togiola a Iesu Keriso.”³ Ia faatuatua ma onosai i le taimi ma faamoemoega o le Faaola mo oe. “Aua e te matau, tau lava ina e faatuatua” (Mareko 5:36).

Ia mautinoa o loo saili pea le Faaola e faaleleia o tatou agaga ma o tatou loto. O loo Ia faatali i le faitotoa ma tu’itu’i mai. Ia tatou tali atu e ala i le toe amata ona tatalo, salamo, faamagaloga, ma faagaloga. Ia tatou alofola atu i le Atua ma auauna atu i o tatou tuaoi ma tutu i nofoaga paia ma se olaga ua faamamaina. O le tamaloga ma’i i le taelega o Petesa, le lepela i le aluga o le malaga i Ierusalem, ma Corrie ten Boom sa faamaloloina. “E te fia malolo ea?” Tu ia i luga, ma ia

savali. O Lona “alofa tunoa e lava lea” (2 Korinito 12:9), ma o le a e le savali lava na o oe.

Ua ou iloa o loo soifua le Atua. Ua ou iloa o i tatou uma o Lana fanau ma e alofa o Ia ia i tatou, mo le ituaiga tagata o tatou i ai ma mo le ituaiga tagata e mafai ona avea ai i tatou. Ua ou iloa na Ia auina mai Lona Alo i le lalolagi e avea ma taulaga togiola mo tagata uma, ma o i latou o e talia Lana talalelei ma mulimuli ia te Ia o le a faamaloloina ma atoatoa “i lona lava taimi, ma i lana lava ala, ma e tusa ai ma lona lava finagalo” (MF&F 88:68), e ala i Lona alofa mutimutivale. O la’u molimau lenei ia te outou i le suafa o Iesu Keriso, amene. ■

FAAMATALAGA

1. Corrie ten Boom, *The Hiding Place* (1971), 215.
2. Thomas S. Monson, “Faafetaia’ia o Lu’i o le Olaga,” *Liahona*, Ian. 1994, 79.
3. *Tala’i La’u Talalelei: O Se Taiala mo le Galuega Faafaifeautalai* (2004), 52.





Saunia e Elder Jeffrey R. Holland

○ Le Korama a Aposetolo e Toasefululua

Peiseai o se Ipu ua Nutililii

E faapefea ona e tali atu i se tulaga silisili pe a e fetaiiai ma ni luitau faalemafaufau pe faalelagona po o i latou foi e te alofa i ai?

Sa tusia e le Aposetolo o Peteru e faapea o soo o Iesu Keriso e ao ona “fealofani”¹ o le tasi ma le isi. I lena agaga ou te fia talanoa atu ai ia i latou o loo mafatia mai nisi o ituaiga o gasegase faalemafaufau po o tulaga le atoatoa faalelagona, pe o na mafatiaga e itiiti pe ogaoga foi, pe mo sina taimi puupuu pe faifai pea i le aluga o le olaga. Tatou te maua se lagona o le faigata o ia tulaga pe a tatou faalogo i tagata tomai o talanoa e uiga i tulaga faaletonu o sina atuatuvaile itiiti ma gasegase ogaoga faalemafaufau, e uiga i faamai tuufaasolo ma le faavaivaia o kolomosone [po o le vaega o sela o le tino o le tagata], e uiga i le manaolasi, fesuisui ai o le naunau ma le faanoanoa, masalosalovale i isi, ma le faaletonu tuga o le mafaufau. Ae po o le a lava le fenumi ai ua i ai nei mea uma, o nei mafatiaga o nisi ia o mea moni o le olaga faaletino, ma e le tataua ona i ai se maasiasi atili i le faailoaina o ia mea nai lo le faailoaina o se tauiviga ma le toto maualuga po o le aliaie faafuasei ane o se kanesa.

I le tauivi ai mo sina filemu ma le malamalama i nei tulaga faigata, e taua tele le manatuaina o loo tatou ola—ma

filifili e ola—i se lalolagi pa’ū lea e tusa ai ma faamoemoega paia o le a toe tofotofoina ai ma faaosoosoina ai pea lava pea i tatou i la tatou sailiga o le faaleatua. E tusa ai ma le faamautinoaga silisili i le fuafuaga a le Atua, o lea sa folafola mai ai se Faaola, o se Togiola lea e ala i lo tatou faatuatua ia te Ia, o le a sii ae ai i tatou ma le manumalo i luga a’e o na faaosoosoga ma tofotofoga, e ui o le tau mo le faia o lena mea e lemafutiaina mo le Tama o lē na auina maia o Ia atoa ma le Alo lea na afio mai. Ua na o le talisapaia lava o le alofa paia lenei o le a muamua ai ona lavātia o tatou lava puapuaga ia e itiiti ifo i lo [ō Laua puapuaga], ona sosoo ai lea ma le malamalama i ai, ma mulimuli ai togiolaina.

Ia taatia la ia faamai ogaoga ia na ou ta’ua ae taulai atu i le MDD—“major depressive disorder (faaletonu tuga o le faanoanoa)”—po o le, mea ua taatele o le, “faanoanoa.” Pe a ou talanoa e uiga i lenei faigata, ou te le o talanoa atu i ni aso ua le lelei ai mea e fai, aso ua faagata ai lafoga, po o isi taimi faalotovaivai ua tatou oo uma i ai. O le a popole pe atuatuvaile tagata uma mai lea taimi i lea taimi. O loo

faapea mai le Tusi a Mamona sa faanoanoa Amona ma ona uso i se taimi sa sili ona faigata,² ma e mafai foi ona oo i ai le toatele o tatou. Ae o le asō ou te talanoaina ai se mea e sili atu ona ogaoga, o se mafatiaga e matua ogaoga lava lea e matua faatapulaa ai lava le tomai o se tagata e galue atoatoa ai, o se vaega pogisa o le mafaufau e matua loloto lava lea e le mafai e se tasi ona fautua tonu atu o le a maunitino e alu ese pe afai e tau na ona tutu sao i luga na tagata ua afaina ma mafaufau atili i tulaga lelei—e ui ou te matua fautuaina atu le tutu sao i luga ma mafaufau i tulaga lelei!

Leai, o lenei tulaga faanoanoa o le mafaufau ma le agaga e sili atu nai lo le na o se lotovaivai. Na ou vaaia le oo atu o lena mea i se alii matuā faaleatua lava ina ua maliu si ona toalua pele o le 50 tausaga. Ua ou vaaia i tina fou i le mea ua ta’ua o le “faanoanoa pe a uma ona fanau se pepe.” Ua ou vaaia i tamaiti aoga matua atuatuvaile lava, tagata ua litaea mai le militeli, ma tinamatutua e popole i le tulaga manuia o a latou fanau matutua.

Ma ua ou vaaia foi i tama talavou o loo taumafai e tausi o latou aiga. I lena tulaga sa i ai se taimi na ou vaaia ai ma le mata’u ia te au lava ia. I se taimi i lo ma olaga faaipoipo ina ua fetaiiai popolega o mea tautupe ma le tele o le lelava, sa oo ia te au se luitau faalelagona lea sa lei mafaufauina o se mea moni. Faatasi ai ma le alofatunoa o le Atua ma le alofa o lo’u aiga, sa ou gaoioi ma galue pea, ae e ui foi lava ina ua mavae nei mau tausaga e tele ae o loo ou lagonaina pea se tigoalofa tele mo isi o loo faaauau pea ma ua sili atu ona aafia i ia ituaiga o faanoanoaga i lo a’u. I soo se tulaga lava tatou te maua le lototele mai ia i latou o e, i upu a le Perofeta o Iosefa Samita, na “saili atu . . . ma fefulisai le lualoto aupito pogisa”³ ma onosai ai—o nisi o tagata maoae

e pei o Abraham Lincoln, Winston Churchill, ma Elder Siaso Alapati Samita, o se tasi o tamalii sili ona agamalu ma faaKeriso o la tatou tisipenisione, o le na tauivi ma faanoanoaga mo ni tausaga a o lei avea mulimuli ane ma perofeta pele ma Peresitene lona valu o Le Ekalesia a Iesu Keriso o le Au Paia o Aso e Gata Ai.

E faapefea ona e tali atu i se tulaga silisili pe a e fetai ai ma ni luitau faalemafaufau pe faalelagona po o i latou foi e te alofa i ai? E sili atu i lo mea uma, ia aua lava nei lafoaia le faatuatua i lou Tama i le Lagi, o le e alofa ia te oe e sili atu nai lo le mea e te malamalama i ai. E pei ona fai atu ma le musuia tele ia Peresitene Monson i tuafafine o le Aualofa i le afiafi o le Aso Toonai ua mavae: “E le o suia lava lona alofa. . . . Ua i ai iina mo oe pe a e faanoanoa, pe fiafia, lotovaivai, pe tumu i le faamoemoe. O le alofa o le Atua ia i ai iina mo oe e tusa lava pe e te manaomiaina pe leai. O loo i ai pea iina i taimi uma.”⁴ Aua lava nei e masalosalo i lona alofa, ma aua nei faamaaaina lou loto. Ia saili atu ma le faamaoni i faiga masani paia i taimi tofotofoina lea e aumai ai le Agaga o le Alii i lou olaga. Saili atu i le fautuaga a i latou o loo umiaina ki mo lou tulaga manuia faaleagaga. Talosaga atu ma faapelepele i faamanuiaga faaleperisitua. Taumafa i le faamanatuga i vaiaso uma, ma piimau i folafolaga o le Togiola a Iesu Keriso mo le faaatoatoaina. Talitonu i vavega. Ua ou vaaia i le tele o na vavega ua oo mai a o faapea mai isi faailoga uma ua leai se faamoemoe. E lei *leiloa* lava le faamoemoe. Afai e le oo vave mai na vavega pe le atoatoa pe foliga mai ua leai lava, manatua le faaitaiga o mafatiaga o le Faaola lava ia: pe afai e le teenaina le ipu oona⁴, inu i ai ma malosi ai, faalagolago i aso sili atu ona fiafia o i luma atu.⁵



I le puipuia o faamai i soo se taimi e mafaia ai, ia nofouta mo ni faailoilo o le atuavale ia te oe lava ia ma i isi e mafai ona e fesoasoani i ai. E pei lava o lau taavale, ia nofouta i le siisii o le vevela, soona saosaoa, po o le lava o le penisini i le tane. A e fetai ai ma se “faanoanoaga ona o le lelava,” ia faia ni fetuunaiga talafeagai—. O le lelava o le fili taatele lea o i tatou uma—o lea la, ia faalemu, faamalolo le mafaufau, toe faafou ma toe faatumu le malosi. Ua folafola mai e fomai ia i tatou afai tatou te le faaalua se taimi ia maua ai le malosi, o le a mautinoa lava lo tatou faaalua o se taimi mulimuli ane e ma’i ai.

Afai e faaauau pea ona faalotovaivaia oe e ni mea, saili se fautuaga a ni tagata tomai o i ai ni aoaoga faamaoniaina, tomai faalematata, ma ni tulaga faatauaaina lelei. Ia faamaoni ia i latou e uiga i lou talafaasolopito ma ou luitau. Mafaufau ma le agaga tatalo ma le manatu tonu i le fautuaga latou te tuu atu ma tali latou te fautuaina. Afai e afaina lou pitogaau, o le a faamoemoeina oe e le Atua e te saili atu i se faamanuiaga faaleperisitua *ma* saili ia maua se togafitiga sili faafomai. E faapena foi ni faaletonu faalelagona. Ua faamoemoeina i tatou e lo tatou Tama i le Lagi ia faaoga ia meaalofo

ofoofogia *uma* ua Ia saunia i lenei tisipenisione mamalu.

Afai o oe lea ua mafatia po o se tausia se tasi o mafatia, taumafai ia aua nei lofituina oe i le mamafatu o lau galuega. Aua e te mafaufau e mafai ona e faia mea uma. Ia fai na o mea e te mafaia. Afai o na mea ua na o ni nai mea iti ua manumalo ai, ia lotofaafetai mo na mea, ma ia onosai. E faatele ona tau mai i tusitusiga paia, le poloaiina e le Alii o se tagata ia “tumau pea” pe “ia filemu”—ma faatali.⁶ O le tumau i le onosaia o nisi o mea o le vaega lona o lo tatou aoaoina faaletino.

Mo tagata o loo tausia isi, ia outou taumafaiga tuuto e fesoasoani atu i le soifua maloloina o le isi tagata, aua nei e faatamaia ai lou oe lava ia soifua maloloina. I nei mea uma ia atamai ai. Aua nei e tamoe e sili atu i lou malosi.⁷ Po o le a lava se mea e mafai pe le mafai foi ona e tuuina atu, e mafai lava ona e ofoina atu au tatalo ma le “alofa faamaoni.”⁸ “O le alofa mama e loa ona tali-tiga, ma e agalelei; . . . e talia mea uma, . . . e faamoemoe i mea uma, e onosai i mea uma. E le *uma* le alofa.”⁹

Ia tatou manatua foi e ala i soo se faamai po o se luitau faigata, o loo i ai pea le tele o mea i le olaga e faamoemoe i ai ma lotofaafetai ai. Ua manino



lo tatou sili atu nai lo o tatou faatapu-laa po o mafatiaga! O Stephanie Clark Nielson ma lona aiga ua silia ma le 30 tausaga o avea ma a matou uo. I le aso 16 Aokuso, 2008, sa lavevea ai Stephanie ma lona toalua i le vaalele na pa'u ma na matua mu uma ai o ia i le afi lea sa na o ona atigivae na valina na iloa ai o ia e lona aiga ina ua o mai e saili e na aafia. Sa toetoe lava a leai se avanoa e ola ai Stephanie. Ina ua mavae le tolu masina na moe ai i le koma, sa ia ala a'e ma vaaia o ia lava. O lona mea na oo mai ai manuaga faalelagona ma faanoanoaga matautia. O le i ai o se fanau e i lalo ifo ma le fitu tausaga, sa le manao ai Stephanie ia latou toe vaai ia te ia. Sa ia lagona e sili atu mo ia le oti. "Sa manatu e faigofie atu," sa tau mai ai e Stephanie ia te au i se tasi taimi i lou ofisa, "pe a latou faagalo ia te au ma ou mou malie ese atu ai ma o latou olaga."

Ae i lona faamamaluina e faavavau, ma e faatasi ai ma tatalo a lona toalua, aiga, uo, le fanau lelei e toafa, atoai ma le pepe lona lima na fanauina e le au Nielsons i le 18 masina talu ai, sa

tauivi ai Stephanie ma finau lona toe foi mai mai le pogisa o le faafanoga faaletagata lava ia ma avea ai ma se tasi o "mommy bloggers" (itulau i luga o le initoneti) e aupito sili ona lauiloa i le malo, ma tautino atu ma le toa i le fa miliona o e o loo mulimulitai i lana poloka [blog] e faapea o lona "faamoemoega paia" i le olaga o le avea lea ma se tina, ma faatau *aso uma* ua ia maua i lenei lalolagi matagofie.

Po o a lava ou luitau o'u uso e ma tuafafine—faalemafaufau pe faalelagona pe faaletino po o le a lava—aua e te filifili e faasaga i le taua tele o le ola e ala i le faamutaina! Faalagolago i le Atua. Taofimau i Lona alofa. Ia iloa o le a i ai le aso e susulu mai ai se malamalama ma mou atu ai le pogisa o tiga faaletino. E ui lava atonu tatou te lagonaina "peiseai [o i tatou o] se ipu ua nutililii," e pei ona fai mai ai le fai Salamo,¹⁰ ae e tatau ona tatou manatua, o lona ipu o loo i ai i aao o le tufuga faalelagi. O mafaufau mafatia e mafai ona faamaloloina i le ala lava e faamalolo ai ivi gausia ma loto nutimomoia. A o galue le Atua i na

galuega faaleleia, e mafai e le toatele o i tatou ona fesoasoani atu e ala i le alofa mutimutivale, ia lē faamasino atu, ma ia agalelei.

Ou te molimau atu e uiga i le Toefuataiga paia, lona meaalofo lemafaamatalaina o le maatulimanu i le Togiola a le Alii o Iesu Keriso! Faatasi ai ma le Aposetolo o Paulo, ou te molimau atu i le mea na luluina ma le mataga o le a toe faatuina i se aso i le matagofie ma o le mea na luluina i le vaivai o le a mulimuli ane toe faatuina i le mana.¹¹ Ou te molimau atu i lona aso o le a tutu ai e pele tatou te iloina na i ai ni faaletono o le tino i le olaga nei i o tatou luma i le mamalu ma le ofoofogia, ma maofa i le atoatoa o le tino ma le mafaufau. Oka se taimi ina a faagaetia o le a oo i ai! Ou te leiloa pe o le a sili atu lo tatou fiafia mo i tatou lava ona o lo tatou molimauina o se vavega faapea, pe sili atu le fiafia mo i latou ona ua latou matua atoatoa ma ua iu ina "saoloto mulimuli ane."¹² Ae ao lei oo i lona itula pe a faaali mai le meaalofo atoatoa o Keriso ia i tatou uma, tau ina ia tatou ola i le faatuatua, pipiimau i le faamoemoe, ma faaalua le "fealofani" o le tasi i le isi,¹³ ou te tatalo atu ai, i le suafa o Iesu Keriso, amene. ■

FAAMATALAGA

1. 1 Peteru 3:8.
2. Tagai Alema 26:27; tagai foi Alema 56:16.
3. *Aoaoga a Peresitene o le Ekalesia: Iosefa Samita* (2007), 267.
4. Thomas S. Monson, "E Le Tuua Lava Na o i Tatou," *Liahona*, Nov. 2013, 123, 124.
5. Tagai Mataio 26:39.
6. Tagai, mo se faaitaiga, Salamo 4:4; Mataupu Faavae ma Feagaiga 101:16.
7. Tagai Mosaea 4:27.
8. Mataupu Faavae ma Feagaiga 121:41.
9. 1 Korinito 13:4, 7–8; faapoopo le faamamafa; tagai foi Moronae 7:45–46.
10. Salamo 31:12.
11. Tagai 1 Korinito 15:42–43.
12. "Free at Last," in John W. Work, comp., *American Negro Songs: 230 Folk Songs and Spirituals, Religious and Secular* (1998), 197.
13. 1 Peteru 3:8.



Saunia e Elder M. Russell Ballard

○ Le Korama a Aposetolo e Toasefululua

Ia Outou Faalagolago i le Alii

Ia auai i le faia o mea e mafai ona e faia i le faasoaina atu o le savali maoae o le Toefuataiga o le talalelei a Iesu Keriso.

Na faatoa ma foi mai talu ai nei ma Sister Ballard mai se tofiga i ni atunuu se lima i Europa. O iina na ma maua ai le avanoa e feiloai ai ma le toatele o a tatou faifeautalai, masalo o o outou atalii ma afafine. Talu mai le faasilasilaga a Peresitene Thomas S. Monson o le tuuina i lalo o le matutua o tausaga o o tatou alii ma tamaitai talavou e auauna atu ai, ua ou maua le avanoa e feiloai ai i le silia ma le 3,000 o i latou. Ua susulu mai le Malamalama o Keriso i o latou foliga, ma ua latou naunau lava e tulei i luma le galuega—ia su'e ma aoao, ia papatiso, ia toe faatoaga, ma ia faamalolosia ma atiina ae le malo o le Atua. Ae peitai, o le feiloai ai ma i latou e vave lava ona iloa ai e se tagata, e le mafai ona latou faia na o i latou lenei galuega. O le asō ou te fia talanoa atu i tagata uma o le Ekalesia, ona o loo i ai se faananati mo i tatou taitasi ina ia punouai i le faasoaina atu o le talalelei.

E pei ona ta'uaina i le tele o taimi, na folafola mai e le Perofeta o Iosefa Samita e faapea “i le uma ai o faamatalaga uma lava ua faia, o le tiute silisili ma matua taua o le talaiina o le Talalelei” (*Aoaoga a Peresitene o le Ekalesia: Iosefa Samita* [2007], 330).

I le 1974 na saunoa mai ai Peresitene Spencer W. Kimball i le faamatalaga lenei: “Atonu o le mafuaaga silisili lava mo le galuega faafaifeautalai, o le tuu atu lea i le lalolagi o lona avanoa e faalogo ai ma talia le talalelei. Ua tumu tusitusiga paia i poloaiga ma folafolaga ma valaauga ma tau mo le aoaoina atu o le talalelei. Ua ou faaogaina ma le iloa lelei le upu *poloai* aua e foliga mai o se faatonuga faifaipea lea e le mafai ona tatou sao mai ai taitoatasi pe sao uma mai ai” (“When the World Will Be Converted,” *Ensign*, Oct. 1974, 4).

O Iulai o lena lava tausaga, sa matou malaga atu ai ma Sister Ballard ma le ma fanau, ina ia pulefaamalmalu i le Misiona a Kanata Toronto. Sa tatagi pea i o'u taliga le saunoaga a Peresitene Kimball, ae maise lava ina ua ia saunoa mai, “O'u uso e, ou te mafaufau pe o tatou faia ea mea uma tatou te mafaia. Pe ua faamalieleina i tatou i la tatou auala e aoao ai le lalolagi atoa? Ua 144 nei tausaga talu ona tatou talai atu. Pe ua tatou saunia ea e faalautele a tatou laa? Pe faamamao la tatou vaai?” (*Ensign*, Oct. 1974, 5).

Sa ia saunoa mai foi ia i matou e faateleai a matou laa, galulue faatasi e

atiina ae le Ekalesia ma le malo o le Atua.

Ia Iuni na te'a atu nei, sa alagaina ai foi e Peresitene Thomas S. Monson lenei lava savali e tasi i tagata uma o le Ekalesia. Na saunoa le Peresitene: “O le taimi lenei mo tagata o le Ekalesia ma faifeautalai ia o mai faatasi . . . [e] galulue i le tovine a le Alii, e aumai agaga ia te Ia. Ua Ia saunia auala mo i tatou e faasoa atu ai le talalelei i le tele o auala, ma o le a Ia fesoasoani i a tatou galuega pe afai o le a tatou galulue i le faatuatua e faataunuu Lana galuega” (“Faith in the Work of Salvation” [saunoaga na fofogaina i se faasalalau faapitoa, 23 Iuni, 2013]; [lds.org/broadcasts](https://www.lds.org/broadcasts)).

Uso e ma tuafafine, e lelei le mafaufau loloto i aoaoga a perofeta mai le taimi o Iosefa Samita seia oo mai i aso nei. Ua latou uunaia ma valaau mai i taitai ma tagata o le Ekalesia ina ia auai ma le naunautai i le auina atu o le savali o le Toefuataiga o le talalelei i fanau uma a le Tama Faalelagi i le lalolagi atoa.

O la'u savali i le aoauli nei e faapea *ua* faanatinatiina e le Alii Lana galuega. I o tatou aso, na pau le ala e mafai ona faia ai lenei mea, pe afai lea e aapa atu tagata uma o le Ekalesia ma le alofa e faasoa atu upumoni o le talalelei toefuataiina a Iesu Keriso. E manaomia ona tatou galulue faatasi faapaaga ma a tatou faifeautalai e 80,000 o loo auauna atu i le taimi nei. O faamatalaga e uiga i lenei galuega maoae, ae maise lava o tofiga mo taitai o aufono a le siteki ma uarota, ua ototo atu ma le manino i luga o le LDS.org i le uepisaite ua ta'ua “Faanatinatiina o le Galuega o le Faalolaga.”

Ua matou iloa mai a tatou suesuega, o le toatele o tagata malolosi o le Ekalesia e mananao i faamanuiaga o le talalelei ia avea o se vaega o olaga o isi o e latou te alolofa i ai, e oo lava ia i latou o e latou te le'i feiloai i ai. Ae

ua matou iloa foi o le toatele o tagata o le Ekalesia e mumusu e fai le galuega faafaifeautalai ma faasoa atu le talalelei mo ni mafuaaga autu se lua.

- O le mea muamua o le fefe. O le toatele o le au paia e le tatalo mo ni avanoa e faasoa atu ai le talalelei, ona o le fefefe ina ne'i o latou maua ni uunaiga faalelagi e fai se mea latou te manatu latou te le gafatia ona faia.
- O le mafuaaga lona lua o le le malamalama i le uiga o le galuega faafaifeautalai.

Ua tatou iloa a tulai se tagata e fai se tautalaga i le sauniga faamanatuga ma faapea mai, “O le asō o le a ou talanoa ai e uiga i le galuega faafaifeautalai,” ia pe atonu foi e tulai Elder Ballard i se konafesi aoao ma fai mai foi lena lava mea e tasi, atonu e mafaufau nisi o outou o loo faafofoga mai, “Oi leai, ua toe fai mai foi; na tatou faalogo muamua foi i ai.”

Ia, ua tatou iloa e leai se tasi e fia lagonaina le tausalaina. Atonu e te lagona e ono talosagaina oe e fai ni mea e le mo'i i a outou mafutaga ma uo po o tuaoi. Faatasi ai ma le fesoa-soani a le Alii, se'i o'u aveeseina soo se fefe o loo ia te oe po o soo se tasi o o tatou faifeautalai faamisiona i le faasoaina atu o le talalelei i isi.

Ia fai le filifiliga e fai mea ua fetalai mai ia Iesu Keriso tatou te faia. Na fetalai mai le Faaola:

“Ia ole atu, ona foaiina mai ai lea ia te outou; ia outou saili, ona outou maua ai lea; ia outou tu'itu'i atu, ona toina ai lea ia te outou:

“Aua ai se ole atu, e maua e ia; o le saili foi, e iloa e ia; e toina foi i le tu'itu'i atu.

“O ai foi se tagata o outou pe a ole mai lona atalii se areto, na te avane ea ia te ia se maa?

“A ole mai foi se i'a, na te avane ea ia te ia se gata?

“. . . Afai ua iloa e outou ona avatu o mea lelei ma a outou fanau, e le sili ea ona foaiina mai e lo outou Tama oi le lagi o mea lelei i e ole atu ai ia te ia?” (Mataio 7:7–11).

Uso e ma tuafafine, o le fefe o le a suia i le faatuatua ma le mautinoa pe a tootutuli le au paia ma faifeautalai faamisiona i le tatalo ma ole atu i le Alii e faamanuia i latou i ni avanoa faafaifeautalai. Ona, tatau lea ia i tatou ona faaali atu lo tatou faatuatua ma vaavaai mo ni avanoa e faailoa atu ai le talalelei a Iesu Keriso i fanau a lo tatou Tama Faalelagi, ma e mautinoa lava o le a oo mai na avanoa. O nei avanoa o le a le manaomia ai lava se tali e fai faamalosi po o se tali e le loto i ai. O le a oo mai o se taunuuga masani o lo tatou alolofa mo o tatou uso ma tuafafine. Tau lava o le talitonu o le a lelei mea uma, ma o le a lagona e i latou e te talanoa i ai lou alofa. O le a le galo lava ia i latou lena lagona e ui atonu e le o le taimi tonu lea latou te taliaina ai le talalelei. O lena foi mea e ono suia i le lumanai pe a suia o latou malamalamaaga.

E faigata mo i tatou ona toilalo pe a tatou faia le mea sili tatou te mafaia pe a tatou i ai i le feau a le Alii. E ui o le iuga o se taunuuga lea o le faaogaina o le faitalia o le tagata, ae o le faasoaina atu o le talalelei o la tatou tiutetauave lea.

Ia faalagolago i le Alii. O Ia o le Leoleo Mamoe Lelei. Na te silafia Ana mamoe, ma e iloa e Ana Mamoe Lona siufofoga; ma o le asō, o le siufofoga o le Leoleo Mamoe Lelei o lou leo ma lo'u leo lea. Ma afai tatou te le auai [i le galuega], o le toatele o e o le a faalogo i le savali o le Toefuataiga o le a misia. I se faaupuga faigofie, o se mataupu o le faatuatua ma faatinoga i la tatou vaega. E faigofie lava ia mataupu

faavae—tatalo, faaletagata lava ia ma i lou aiga, mo ni avanoa faafaifeautalai. Ua fetalai mai le Alii i le Mataupu Faavae ma Feagaiga, e toatele tagata ua nao na taofia mai le upumoni, “ona ua latou le iloa le mea e maua ai” (MF&F 123:12).

E le faapea e tatau ona avea oe ma se tagata e fiafia i fegalegaleaiga po o se faiaoga gutu potu ma faatauanau. Afai o i ai sou alofa e le femoumoua'i ma le faamoemoe i totonu ia te oe, ua folafola mai e le Alii, afai e “sii a'e o oulua leo i lenei nuu; [ma] tautala atu mafaufauga o le a [Ia] tuu i o oulua loto, . . . o le a le faafememeaiina oulua i luma o tagata.

“[Ma] o le a tuu atu ia te oulua . . . i le minute tonu lava, mea e te lua fai atu ai” (MF&F 100:5–6).

Ua faamanatu mai e le *Tala'i La'u Talalelei* ia i tatou uma e faapea “e leai se mea e tupu i le galuega faafaifeautalai sei vagana [tatou] te maua se tagata e aoao. Talanoa atu i le toatele o tagata e mafai ona e talanoa i ai i aso uma. O le mea masani lava le i ai o sina popole e talanoa atu i tagata, ae e mafai ona e tatalo mo le faatuatua ma le malosi ina ia e atili toa ai e tautala atu e folafola atu le talalelei toefuataiina” ([2004], 156–57). O outou faifeautalai faamisiona, afai tou te mananao e aoao atu atili, e tatau ona outou talanoa atu i ni tagata se toatele i aso uma. O le mea lava lena na auina atu ai e le Alii ia faifeautalai e fai.

E silafia i tatou e le Alii. Ua Ia silafia o loo i ai o tatou luitau. Ua ou iloa o nisi o outou o loo lagonaina le mamafatu o avega, ae ou te tatalo ia leai se tasi o outou e lagonaina o le aapa atu i auala masani ma lelei e faasoa atu ai le talalelei, o le a avea ma se avega. Ae, o se faamanuiaga! E leai se fiafia e sili atu i le olaga nai lo o le auai ma le naunautai i le galuega a le Alii.

O le ki lava o le musuia o oe e le Atua, ia e ole atu ia te Ia mo le

taitaiga, ona alu loa lea e fai e pei ona uunaia ai oe e le Agaga. A manatu le au paia i le galuega o le faaolataga o se tiutetauave e mo na o i latou, e mafai ona avea ma se mea taufaamata'u. Ae a latou manatu i ai o se valaaulia ia mulimuli i le Alii i le aumaiga o agaga ia te Ia ina ia aoaoina e alii ma tamaitai faifeautalai, o le a musuia, faaosofia, ma faagaetia.

Matou te le o talosagaina tagata uma ia fai mea uma. Ua matou talosagaina ia tagata uma o le ekalesia ia tatalo, ma le iloina afai o le a aapa atu tagata uma o le ekalesia, talavou ma matutua, i le tau lava o se [tagata] se "toatasi" i le va o le taimi nei ma le Kerisimasi, o le a faapea ona lagona e le faitau miliona le alofa o le Alii o Iesu Keriso. Ma o se meaalofo ina a matagofie lena mo le Faaola.

O le ono vaiaso talu ai na ou maua ai se tusi mai se aiga faamisiona faamanuiaina o le au paia, o le aiga o

Munn i Florida. Sa latou tusi mai:

"Lau Susuga Elder Ballard, i le 30 minute talu ona uma le faasalalauga i le lalolagi atoa e faatatau i le faanatinatiina o le galuega o le faaolataga, sa fai ai le fono faafaifeautalai a le matou aiga. Sa matuai o ma fiafia lava i le iloa, sa fia auai ai foi le fanau talavou a le ma fanau. Matou te fiafia lava e lipoti atu, talu mai le matou fonotaga, ua faateleina le aofai o tagata e aoao e lo matou aiga i le 200 pasene.

"Na i ai fanau a le ma fanau na aumai a latou uo i le lotu, sa matou fiafia i sauniga faamanatuga ma nisi o a matou uo ua tau le malolosi i le lotu, ma na i ai foi nisi o a matou tagata faafesootai fou ua tautino e faalogo i lesona a faifeautalai. O se tasi o o matou tuafafine sa le toaga ua le gata ina toe foi mai i le lotu ae na sau foi ma aumai ni tagata sailiili fou.

"E leai se tasi na teenaina le valaaulia e faalogologo i lesona a faifeautalai.

Oka se taimi ina a faafiafaina e avea ai ma se tagata o lenei Ekalesia" (tusi patino, 15 Aok., 2013).

Faalogo i uunaiga a le Agaga. Faatoga atu i le Alii i le tatalo faatauanau. Ia auai i le faia o mea e mafai ona e faia i le faasoaina atu o le savali maoae o le Toefuataiga o le talalelei a Iesu Keriso.

Ou te sii maia se isi tagata faamisiona faamanuiaina o le au paia, o Clayton Christensen: "O taimi uma lava e te fesoasoani ai i se tagata ma faailoa atu o ia ia Iesu Keriso, o le a e lagona le loloto o le alofa o lo tatou Faaola ia te oe ma lou alofa i le tagata o loo e uuina lona lima" (*The Power of Everyday Missionaries: The What and How of Sharing the Gospel* [2013], 1).

Ia faamanuia le Atua ia te outou, uso e ma tuafafine, ia maua le olioli tele lea e oo mai mai le mauaina o vavega e ala i lou faatuatua. E pei ona aoaoina i tatou i le Moronae mataupu e 7:

"Ma ua fetalai mai Keriso: Afai tou te faatuatua mai ia te a'u o le a outou maua le mana e fai ai soo se mea e tatau ai ia te a'u. . . .

". . . Ona o le faatuatua e faia ai vavega; ma o le faatuatua e afifio mai ai agelu ma auauna mai i tagata; o le mea lea, afai ua taofia nei mea oi talofa i le fanauga a tagata, ona o le le talitonu ua taofia ai, ma ua le aoga ai mea uma" (Moronae 7:33, 37).

Mai i o'u lava aafiaga ua mafai ai ona ou molimau atu ia te outou, o le a faafogaina e le Alii a outou tatalo ma o le a outou mauaina le tele o avanoa i le taimi nei ma tausaga o le a oo mai e faailoa atu ai le talalelei a Iesu Keriso i fanau faapelepele a lo tatou Tama Faalelagi. Peresitene Monson ua matou faalogo atu. O le a matou saili ia maua le tasi. Ou te tatalo ina ia mafai ona lagona e i tatou uma le olioli tele lea e sau mai le galuega faafaifeautalai, i le suafa o Iesu Keriso, amene. ■





Saunia e Elder L. Tom Perry

○ Le Korama a Aposetolo e Toasefululua

O Aoaoga Faavae ma Mataupu Faavae o Loo i Ai i Mataupu Faavae o le Faatuatua

O mataupu faavae taitasi o le faatuatua e faaopoopoina se taua tulaga ese i lo tatou malamalamaaga o le talalelei a Iesu Keriso.

na ua tuuina mai ia te a'u le tofiga e lauga i le sauniga perisitua o le konafesi aoao, sa vave ona ou mafaufau i se faiaoga lelei lava o le Peraimeri. O lona faanaunauga sili lava ia saunia i matou ia agavaa i le mauaina o le perisitua. Sa tele na ia suesueina i matou i tulaga e manaomia i lena taimi mo le faauu mai i le Peraimeri—o le taulotoina o suafa o le Korama a Aposetolo e Toasefululua ma Mataupu Faavae o le Faatuatua. Sa ia faia foi se folafolaga ia i matou—a mafai e i matou uma ona tauloto ia Mataupu Faavae o le Faatuatua e sefulutolu, e mafai ona matou filifilia se nofoaga ma alu i ai se matou tafaoga mo le matou vasega mulimuli.

Sa matou filifilia se nofoaga faapitoa matou te fiafia e savavali sopo ai i auala gaoa e i luga ae tonu lava o le punivai muamua i le amataga o le

Logan Canyon, i matu o Iuta. Sa i ai se nofoaga laitiiti, e laugatasi i totonu o nei tofē papa na i ai se magalafu faanatura lea e mafai ona faavela ai sosisi ma lagilagi ai masimelo. Ae ina ua matou filifilia le nofoaga, sa matou le mafaufau i le matou faiaoga, o lē sa fai si matua ma mautinoa lava e le o se ituaiga tagata e aumalosi. Ana faapea matou te mafaufau totoa i ai, atonu matou te iloaina o se taimi faigata ia te ia ona savali sopo. Sa noatia o ia i lana folafolaga, peitai, sa mulimuli mai o ia ma le lototele ia i matou.

Muamua, sa matou fe'a'ei i luga o si mauga laitiiti. I o matou vaitaimi sa leai ni laina eletise e taofia ai le sopo iina. Faatasi ai ma se fesoasoani sa mafai ai ona oo atu le matou faiaoga i luga o le mauga. O le taimi lava na matou taunuu ai i le tumutumu sa

matou toe faaifo i lalo i se itu gaoa i se nofoaga sa matou ta'ua o le “Patua Laumei.”

Ina ua matou taunuu, sa manaomia e le matou faiaoga se taimi teisi e to ai lona sela. E oo ane i le taimi e matou te saofafai ai i lalo ma aai, ua lava lona malosi e aoao mai ai le matou lesona mulimuli. Sa ia ta'u mai ia i matou lona fiafia e aoao i matou i le Peraimeri mo tausaga e lua mulimuli. Sa ia faamalo mai ia i matou i lo matou iloaina o Mataupu Faavae o le Faatuatua. Sa mafai ona ia valaau mai soo se numera o mataupu faavae, ae matou taulotoina atu ia te ia. Ona ia fai mai lea o le a leai se uiga tele o le taulotoina o Mataupu Faavae o le Faatuatua ma le mau upu vagana ua matou malamalama i aoaoga faavae ma mataupu faavae o loo i ai. Sa ia uunaia i matou e suesue i le aoaoga faavae o le talalelei o loo aoaoina mai i Mataupu Faavae taitasi o le Faatuatua. Sa ia faamalalama mai o le aoaoga faavae o loo maua i Mataupu Faavae o le Faatuatua sa vaevaeina i ni vaega.

I. O Le Aiga Atua ma le Aoaoga Faavae Autu a Keriso

Tatou te aoao mai le mataupu faavae muamua o le faatuatua, o le Aiga Atua o ni tagata se toatolu: o le Atua le Tama, o Iesu le Keriso, ma le Agaga Paia.

O le mataupu faavae lona lua o loo aoao mai ai e nafa lava i tatou ma a tatou lava faatinoga i le lalolagi.

O le lona tolu o loo tuuina mai ai se faaaliga o le misiona a le Faaola mo le faaolataga o le fanau a le Tama oi le Lagi.

O le lona fa o loo aoao mai ai le taua o mataupu faavae autu ma sauniga.

O le mana o upu a le matou faiaoga na avea ma se punavai o musumusuga ia te a'u ona o le faamamafa

sa ia tuuina i le suesueina o le talalelei. O tusitusiga paia e taitaiina i tatou i se tulaga o le upumoni lea e mafai ona tatou faamasinoina ai le malamalama o loo tatou maua, pe sa’o pe sese. O aoaoga faavae moni e sau mai i le Atua, o le puna ma le faavae o upumoni uma. O aoaoga ma manatu faavae o aoaoga faavae moni o loo maua i le talalelei a lo tatou Alii ma le Faaola. O aoaoga sese e sau mai ia Satani, o le tamā o pepelo uma. O lona manao ia faasese, sui, ma faapiopio upumoni ua faaalua mai. E manao o ia e faasese i tatou ina ia se ese nisi o i tatou i la tatou malaga toe foi atu i lo tatou aiga faalelagi.

Ua aoao mai tusitusiga paia i auala tatou te aloese ai mai aoaoga sese. Mo se faataitaiga, i le tusi a Paulo ia Timoteo, tatou te faitau ai:

“O tusi paia uma lava e mai le Agaga o le Atua ia, e aoga foi ia e aoao ai, e aoai ai, e faatonu ai, e faapoto ai foi i le amiotonu:

“Ina ia atoatoa ona lelei ai o le tagata o le Atua, ia saunia lava ia i galuega lelei uma” (2 Timoteo 3:16–17).

O lenei aoaoga faavae i le Ekalesia e pei lava o se maa i se telefoni feaveai. A e aveesea le maa mai lau telefoni feaveai, o le a leai se aoga. O se ekalesia ua le toe aoaoina ai aoaoga faavae moni e tutusa lava le leai o se aogā. E le mafai ona toe taitaiina atu ai i tatou i lo tatou Tama Faalelagi ma lo tatou aiga e faavavau.

II. Faatulagaga ma le Faasologa o le Perisitua

A maea ona tatou amata malamalama i le aoaoga faavae autu a Keriso, o mataupu faavae o le faatuatua lona limama le onoua aoao mai ai ia i tatou e uiga i le faatulagaga ma le faasologa o le perisitua. I lalo o le taitaiga a le Alii, na faatulagaina ai e Iosefa Samita le Ekalesia a le Faaola e faaoga ai le



pule o le perisitua—le mana o le Atua. O le Ekalesia a Iesu Keriso o le Au Paia o Aso e Gata Ai, o le faatulagaga lava e tasi na faatulaga ma taitaia ai e Keriso a o i ai o Ia i le fogaeleele.

O se aso fiafia tele ia Iosefa Samita ma Oliva Kaotui ia Me 1829 ina ua laua o atu i le vao e tatalo ai e uiga i le papatisoga mo le faamagaloina o agasala lea sa laua faitau i ai a o faaliliuina le Tusi a Mamona. Sa tele aoaoga e uiga i le papatisoga sa aoaoina e lotu eseese i le amataga o le vaitau 1800, ma sa iloa e Iosefa ma Oliva e le mafai ona moni uma nei aoaoga. Sa la fia iloa le faiga sa’o o le papatisoga ma o ai foi na i ai le pule e papatiso ai.

O le tali i le la faatoga i le Alii, na faaali ifo ai se avefeau mai le lagi, o Ioane le Papatiso ia i la’ua. Sa Ia tuu atu ona aao i luga o o laua ulu ma faaee atu ia i la’ua le pule e papatiso ai i upu nei: “I luga o oulua o’u uso a auuuna e, i le suafa o le Mesia, ou te faaee atu i ai le Perisitua o Arona” (MF&F 13:1).

O se aso ofoofogia i le talafaasolopito o le lalolagi! Na toefuatai mai ai le perisitua i le lalolagi.

A tatou maua le perisitua, tatou te maua le pule e galue ai i le suafa o le Atua, ma taitai ai i ala o le upumoni ma le amiotonu. O lenei pule o se punavai taua o le mana amiotonu ma le faatosinaga mo le manuia o le fanua a le Atua i le fogaeleele, ma o le a oo i tala atu o le veli. Sa alagataau ona toefuataiina le perisitua a o le’i faatulagaina le Ekalesia a Iesu Keriso. O le lesona taua lenei tatou te aoao mai

mataupu faavae o le faatuatua lona lima ma le ono.

III. Punaoa e Faavavau i se Malaga i le Olaga Faaletino

O isi mataupu faavae o le faatuatua e tolu e sosoo ai—o le fitu, valu, ma le iva—ua faailoa mai ai punaoa o loo maua e aoao ai i tatou i la tatou malaga i le olaga faaletino. Ua tuuina mai ia i tatou ni meaalofo faaleagaga e taiala ai i tatou a o tatou mulimuli i aoaoga a le Alii ma puipuia ai i tatou mai le tiapolo. O tusitusiga paia o le isi lea taiala—afai tatou te faitauina ma le faaeteete afioga a le Atua, o le a Ia faaali mai lo tatou ala e toe foi ai i le ola e faavavau.

O le mataupu faavae o le faatuatua lona iva ua aoao mai ia i tatou, ua faaali mai e le Atua, e faaali mai, ma o le a faaali mai i le lumanai, le tele o upumoni silisili ma le taua i Ana perofeta, tagatavaai, ma talifaaaliga. Ua tatou iloa e faaopoopo atu i le faalogo i le leo mālū ma itiiti o le Agaga ma le faitauina o tusitusiga paia, o le isi punavai o le taitaiga o o tatou taitai o le Ekalesia, o e ua filifilia, valaauina, ma vaetofia e faamanuia o tatou olaga e ala mai i lesona latou te aoao mai.

IV. Faifeautalai a le Au Paia

O mataupu faavae o le faatuatua lona sefulu, sefulutasi, ma le sefululua ua aoao mai ai i tatou i auala e faatino ai le galuega faafaifeautalai ma faasoa atu le talalelei i se lalolagi o malō e tele ma tulafono eseese. Tatou te aoao ai e uiga i le faapotopotoina o Isaraelu



e sauniuni ai mo le Afio Mai Faalua o le Faaola. Ua aoaoina i tatou e faapea o alii ma tamaitai e pule ia i latou lava, ma e mafai ona latou talia pe teena le afioga a le Atua e tusa ai ma o latou lava lotofuataiaifo. Ma le mea mulimuli, tatou te aoao a o tatou faasalalau atu le talalelei a Iesu Keriso i tulimanu e fa o le lalolagi, e tatau ona tatou faaalalo i faigamalo o atunuu taitasi tatou te ulufale i ai. E moni, tatou te talitonu i le ususitai, faamamalu, ma lagolago ina o le tulafono o atunuu taitasi.

V. O Uiga e Taumafai ia Maua

O le mataupu faavae o le faatuatua lona sefulutolu ua tuuina mai ai se vaaiga faapitoa i auala e tatau ona tatou ola ai ma fegalegalea'i ai ma isi. E faitauina: “Matou te talitonu i le faamaoni, amiotonu, nofomama, agalelei, amiomama, ma le faia o mea lelei i tagata uma; e moni, e mafai ona matou faapea atu, ua matou mulimuli i le apoapoaiga a Paulo—Matou te talitonu i mea uma, matou te faamoemoe i mea uma, ua uma ona matou onosai i mea e tele, ma ua faamoemoe o le a mafai ona matou onosai i mea uma.

Afai o i ai nisi mea mama, matagofie, pe logoleleia pe tauleleia, matou te saili atu i nei mea uma.”

E tatau ia i tatou uma ona saili ia maua nei uiga ma ola i olaga e fai ai tatou ma ni faataitaiga o ia uiga. O upumoni o loo aoaoina i Mataupu Faavae o le Faatuatua e atiina ae i luga o le tasi ma le isi e pei o le galulue faatasi o vaega eseese o se telefoni feaveai e lagolagoina le tasi. E pei o le faagasologa auilili o le gaosiga lea e faaopopo ai vaega i se telefoni feaveai, o Mataupu Faavae o le Faatuatua e tuuina mai ia i tatou aoaoga faavae autu o le Toefuataiga. O mataupu faavae taitasi o le faatuatua e faaopoopoina se taua tulaga ese i lo tatou malamalama o le talalelei a Iesu Keriso.

Na totoina e lo'u faiaoga Peraimeri i totonu ia te a'u se naunautaiga e suesue i aoaoga faavae o le malo. Sa ia aoaoina a'u ia saili uiga loloto o loo i ai i nei Mataupu Faavae faigofie o le Faatuatua. Sa ia folafola mai ia te a'u, afai o le a ou faia se taumafaiga e aoao i nei upumoni paia, o le malamalama ou te maua o le a suia ai lo'u olaga mo le lelei sili atu, ma ou te molimau atu ia

te outou ua tupu [lena mea].

Ina ua uma le lesona matagofie a lo'u faiaoga i luga o lena mauga i Logan Canyon, sa matou matauina na umi atu ona matou nonofo ai nai lo le mea na matou fuafuaina. Sa faasolo ina faaiu le afiafi, ma na matou iloa ai na i ai se faafitauli.

Sa tauivi lo matou faiaoga ina ia tauuu atu i le matou nofoaga faapitoa, ae o le toe foi i le fale na vaaia ai foi se isi luitau tele mo i matou. O lenei mea na atili faaopopo ai le lelei o le filifiliga o le nofoaga mo le matou tafaoga. Sa faigata ia i matou le toe fe'a'ei e toe foi i le fale, ae na sili atu ona faigata mo se tagata o lona matua.

A o matou tauivi e fesoasoani i lona toe foi atu i luga o le mauga, sa tutu mai ni alii leoleo se toalua. Sa auina mai i la'ua e le peresitene o le Peraimeri e su'e i matou, sa popole 'ai ua matou leiloloa. O aafiaga faalelagona o le mea na tupu ma lesona na aoaoina ai, na avea ai ma se aafiaga e le mafaagaloina i lo'u olaga.

Outou alii talavou—ou te uunaia outou e faaoga o outou mafaufau atamamai e suesue ma aoao ai Mataupu Faavae o le Faatuatua ma aoaoga faavae o loo aoao mai ai. O nisi ia o faamatalaga o aoaoga faavae e sili ona taua ma e mautinoa lava e sili ona pupuu i le Ekalesia. Afai o le a outou faaogaina e fai ma taiala e taitai ai au suesuega o le talalelei a Iesu Keriso, o le a e iloa ai lou saunia e tautino atu lau molimau e uiga i le upumoni toefuataiina i le lalolagi. O le a mafai ona outou tautino atu i auala faigofie, tuusa'o, ma o'oo'o ia talitonuga autu e pele ia te oe, i le avea ai ma se tagata o Le Ekalesia a Iesu Keriso o le Au Paia o Aso e Gata Ai.

E faaopopo atu la'u molimau i le moni a'ia'i o Mataupu Faavae o le Faatuatua e sefulutolu, i le suafa o lo tatou Alii ma le Faaola, o Iesu Keriso, amene. ■



Saunia e Bishop Gérald Caussé

Fesoasoani Muamua i le Au Epikopo Pulefaamalumalu

E Le O Toe Tagata Ese Outou

I lenei Ekalesia, e leai ni tagata ese ma e leai ni tagata ua faate'a ese.

O le toatele o i tatou sa i ai se taimi na oo ai i se tulaga lea sa fou ia i tatou, ma tatou lagona ai le le masani ma le le mautonu. Na tupu lenei mea i lo matou aiga pe a ma le lima tausaga ua mavae ina ua uma ona valaauina au e Peresitene Thomas S. Monson e galue o se Pulega Aoao i le Ekalesia. Na manao-mia e lenei valaauga le siitia ese atu o lo matou aiga mai se nofoaga matagofie na matou fialia i ai mo le silia i le luasefulu tausaga. Ma te manatuaina ma lou toalua ia le tali vave mai a le ma fanau ina ua latou iloa le suiga. Na alaga mai lo ma atalii e 16 tausaga, “E le o se faafitauli. Ō outou; ou te nofo!”

Ae na vave lava ona ia filifili matou te o ma opogi ma le faamaoni lenei avanoa fou i lona olaga. O le ola ai i ni siosiomaga fou i le aluga o ni nai tausaga ua mavae ua avea o se aafiaga o le aoaoina fialia mo lo matou aiga, aemaise lava ona o le mafanafana o le taliaina ma le agalelei e tagata o le Au Paia o Aso e Gata Ai. A o matou nonofo ai i atunuu eseese, ua matou talisapaia ai le lotogatasi o tagata o le Atua i le lalolagi atoa ma o se mea moni ma mautinoa.

O lou valaauga ua ou oo ai i le tele

o atunuu ma ua ou maua ai le avanoa taua e pulefaamalumalu ai i le tele o sauniga. A o ou tagai atu i aulotu eseese, e tele ina ou vaaia tagata o le ekalesia o fai ma sui o le tele o atunuu, gagana ma aganuu. O se tasi o vaaiga ofoofogia o la tatou tisipenisione o le talalelei o le tulaga lea e le faatapulaaina i se vaega o faataatiaga faafaafanua po o ni vaega o malo. E faavaomalo ma o se tulaga aoao. O le sauniuniga lea mo le toe afio mai ma le mamalu o le Alo o le Atua e faapotopoto “ana fanau mai itu e fa o le lalolagi.”¹

E ui ua faateleina ia tagata auai o le Ekalesia i vaega eseese, ae o lo tatou tofi paia e maualuga atu i lo o tatou eseese. I le avea ai ma tagata o le Ekalesia, ua faatagaina i tatou e avea ma vaega o le aiga o Isaraelu. Ua avea i tatou ma uso ma tuafafine, o suli uma e aia tutusa i lena lava gafa faaleagaga. Na folafola atu e le Atua ia Aperaaomo “o le toatele e taliaina lenei Talalelei o le a taua i [lona] igoa, ma o le a faitauina o [ana] fanau, ma o le a tutu ae ma faamanuia ia te [ia], o lo latou tama.”²

Ua uma ona tuuina mai se folafolaga i tagata uma o e ua avea ma tagata o le Ekalesia: “O lenei, e le toe tagata ese outou, po o e ua aumau, a

ua nuu faatasi ma le au paia, o le aiga foi o le Atua.”³

O le upu *tagata ese* e sau mai le upu Latina *extraneus*, o lona uiga “fao” po o le “sau mai fao.” E masani lava ona faailoga ai se tagata e “sau mai fao” mo ni mafuaaga eseese, a le o le tupuaga, aganuu, manatu, po o le tapuaiga. I le avea ai ma soo o Iesu Keriso o e taumafai ina ia i ai i le lalolagi ae le o ni o o le lalolagi, tatou te lagona ai i nisi taimi le pei o ni tagata ese. Tatou te iloa, e sili atu nai lo le toatele, e mafai ona matala faitotoa faapitoa ia i latou o e ua manatu i ai o ni tagata ese.

I le gasologa o tausaga, na poloaina ai le nuu o le Atua e tausi ia tagata taitoatasi uma o e o tagata ese po o e e ono vaaia e ese. I aso anamua, sa faamanuiaina se tagata ese mai le tiute o le tausiga lea sa tuuina atu i se fafine ua oti lana tane po o tamaiti ua matuaoti. Faapei o i latou, o le tagata ese o loo i ai i se tulaga vaivai tele, ma o loo faalagolago lona ola i le puipuiga na

Aai o Panama, Panama





Santiago, Chile

te maua mai i tagata o le lotoifale. Na maua e tagata Isaraelu ni faatonuga faapitoa e uiga i lenei mataupu: “O le tagata ese o loo aumau ia te outou, ia tusa lava ia ia te outou ma le tama a le elele, e te alofa atu ia te ia e pei o oe lava ia te oe, aua sa aumau outou i le nuu o Aikupito.”⁴

I le taimi o lana galuega faaletino, sa avea Iesu ma faaitaiga o se tasi na sili atu mea na ia faia nai lo le tiute faigofie o le agalelei ma le faapalepale. O i latou o e na tutulieseina mai nuu, o i latou o e na teena e tagata faafiaamiotonu ma manatu i ai o ni tagata le mama, na tuu atu i ai Lona agaalofo ma le faaaloalo. Na latou mauaina se vaega tutusa o Ana aoaoga ma auunaga.

Mo se faaitaiga, na le taliaina e le Faaola se tu masani o Lona vaitaimi ina ua ia fetalai atu i le fafine Samaria, ao talosaga atu mo sina vai. Sa latou saofafai faatasi e taumamafa ma le au telona ma ao lafoga. E lei faatuai ona ia agai atu i le lepela, pai atu ia te ia ma faamalolo ia te ia. Faamemelo atu i le faatuatua o le taitai Roma o le toaselau, ma na Ia fetalai atu i le motu o tagata, “E moni, ou te fai atu ia te outou, ou te lei iloa ia Isaraelu lava se faatuatua e faapena ona tele.”⁵

Na fetalai mai Iesu ia i tatou ia tausia le tulafono o le alofa atoatoa,

o se meaalofo mo tagata uma ma le faatuaoia. Na Ia fetalai mai:

“Aua afai tou te alofofa atu i e ua alofofa mai ia te outou, se a ea se tau i tou te maua ai? E le faia ea e le au telona o lea lava mea?

“Pe afai tou te faapito lo outou fealofani o outou uso, se a se mea sili ua tou faia? E le faapea ea ona faia e le au telona?

“O lenei, ia atoatoa ona lelei o la outou amio, e pei o lo outou tama o i le lagi e atoatoa ona lelei o ia.”⁶

I lenei Ekalesia, e leai ni tagata ese ma e leai ni tagata ua faate’a ese. Ua na o uso ma tuafafine. O le iloa o loo i ai se Tama Faavavau, o le a fesoasoani lea ia i tatou ina ia nofouta atili ai i le usoga faaAlii ma usoga faaTamaitai lea e tatau ona i ai i alii ma tamaitai uma i luga o le fogaelele.

Na faaalua mai i se fuaitau mai le tusi o le *Les misérables* le ala e mafai ai e alii e umiaina le perisitua ona taulimaina i latou o e ua manatu i ai o ni tagata ese. O Jean Valjean e lei leva ona tatala mai le falepuipui. I le lelava mai se malaga umi ma ua galala ai i le fia inu ma le fia ai, ua ia taunuu i se tamai aai e saili se nofoaga e maua ai se meaai ma se malutaga mo le po. Ina ua aave atu tala o lona taunuu, na taitasi ma tapunia e tagata uma o

le nuu ia faitotoa ia te ia. Sa leai se faletalimalo, leai se falemautotogi, e oo lava i le falepuipui e taliaina o ia i totonu. Ua teenaina o ia, tuliese, ma faateaese. Mulimuli ane, ina ua leai sona malosi o totoe, ua ia lafotu ai i luma o le faitotoa o le fale o le faifeau o le nuu.

Ua silafia lava e le faifeau lelei ia le talaaga o Valjean, peitai sa ia valaauliaina le tagata aisi i totonu o lona fale faatasi ai ma nei upu agaalofo:

“E le o so’u fale lenei; o le fale o Iesu Keriso. E le fesiligia e lenei faitotoa se tasi e ulufale mai po o ai sona igoa, ae pe o ia te ia se faanoanoaga. Ua e mafatia, ua e matelaina ma galala; e talia oe. . . . O le a se mea e ala ai fua ona ou iloa lou igoa? Ae e te lei tau maia ia te au [lou igoa], e i ai lou igoa e tasi ua leva ona ou iloa.’

“Na faataupupula atu ma le ofo tele ia [Valjean].

“E moi? Na e iloa lou igoa?”

“‘Ioe,’ o le tali mai lea a le Faifeau, ‘e ta’ua oe o lou uso.’”⁷

I lenei Ekalesia, o a tatou uarota ma a tatou korama e le o tatou e anaina. E ā Iesu Keriso ia. Po o ai lava e ulufale mai i o tatou falelotu e tatau ona lagonaina le taliaina. O le tiutetauave e faafeiloai tagata uma ua faatupulaia le taua. O le lalolagi o tatou ola ai nei ua i ai i se vaitaimi o fevesiaiga tele. Ona o le faateleina o avanoa o femalagaiga, saosaoa o fesoataiga, ma le faalaugatasia o tamaoaga i le lalolagi atoa, ua avea ai le lalolagi ma se nuu tele e tasi lea e feiloai ai, fesoatai, ma feofeoi faatasi ai ia tagata ma malo i se tulaga e lei i ai muamua lava.

O nei suiga tetele i le lalolagi atoa ua ausia ai ia mamana a le Atua Silisiliese. O le faapotopotoina o Lana au filifilia mai tulimanu e fa o le lalolagi ua amatalia e ala i le auina atu o faifeautalai i atunuu mamao ae ua faapea foi i le taunuu mai o tagata mai isi eria



i totonu o tatou lava aai ma alalafaga. O le toatele, e aunoa ma le iloaina, ua taitaiina e le Alii i nofoaga lea e mafai ona latou faalogo ai i le talalelei ma o mai ai i Lana lafu.

Masalo o le isi tagata o le a liliu mai i le talalelei i lau uarota o se tagata e le sau mai lau li'o masani o uo po o tagata masani. Atonu e te matauina lenei mea e ala i ona foliga vaaia, gagana, tulaga o ona lavalava, po o le lanu o lona pau. Atonu o lenei tagata na ola ae i se isi lotu, ma e ese le sio-siomaga pe ese foi le olaga sa ola ai.

O le faaaumea o se tiutetauave taua lea a le perisitua. E tatau i korama a le Perisitua Arona ma le Mekisateko ona galulue soosootauau ma tuafafine i lalo o le taitaiga a le epikopo ina ia mautinoa ua faafeiloai ia tagata taitoatasi i le alofa ma le agalelei. Ia mataala ia faiaoga o aiga ma faiaoga asiasi e faamautinoa e le o i ai se tasi ua faagaloina pe ua le amanaiaina.

E manaomia lo tatou galulue uma faatasi e fausia le logotasi faaleagaga i totonu o o tatou uarota ma paranesi. O se faaitaiga o le lotogatasi atoatoa na tupu i le nuu o le Atua ina ua mavae le asiasiga a Keriso i Amerika. Na faamaumauina faapea sa leai ni "sa Lamana, po o soo se ituaiga o -tagata; ae sa tasi i latou, o le fanau a Keriso, ma o suli i le malo o le Atua."⁸

E le ausiaina le lotogatasi e ala i le le amanaiaina ma le faaesea o tagata o e foliga mai o ni tagata ese pe vai-vai, ae na o le faifaimea faatasi ma e tatou te fiafia i ai. I le isi itu, e maua le lotogatasi e ala i le talileleia ma le auauna atu ia i latou o e fou ma e o i ai manaoga faapitoa. O nei tagata o se faamanuiaga lea i le Ekalesia ma e aumaia ai ia i tatou ni avanoa e auauna atu ai i o tatou tuaoi ma o lea, e faamama ai o tatou lava lotu.

O lea la, ou uso e, o lou tiute le aapa atu i soo se tasi ua oo mai i faitotoa o o outou faletatalo o le Ekalesia. Talia i latou ma le agaga faafetai ma ia aunoa ma se faailogalanu. Afai e sava- vali atu ni tagata i totonu o a outou sauniga, ia faafeiloai ma le alofa i latou ma valaaulia i latou e tou te nonofo faatasi. Faamolemole ia muamua ona e faia se faatinoga e fesoasoani ai ia i latou ia lagona le taliaina ma le alofa-ina nai lo le faatalitali mo i latou e o mai ia te oe.

A maea lau faafeiloaiga muamua, mafaufau i ni auala e mafai ai ona faaauau lau auunaga ia i latou. Sa ou faalogo i se tasi taimi i se uarota, ina ua uma le papatisoga a ni tuafafine logonoa se toalua, na filifili ni tamaitai lelei se toalua o le Aualofa e aoao se gagana fai faailoga ina ia mafai ai ona latou fesootai lelei ma nei tagata fou

liliu mai. O se faaitaiga matagofie lea o le alofa mo le usoga o alii ma tamaitai i le talalelei!

Ou te molimau atu e leai ni tagata ese i lo tatou Tama Faalelagi. E leai se tagata e le taua lona agaga ia te Ia. Ou te molimau atu faatasi ma Peteru "E le faailoga tagata le Atua: a e peitai o le matau ia te ia i nuu uma lava, ma fai le amiotonu ua talia i latou e ia."⁹

Ou te tatalo a oo i le taimi e faapopototo ai e le Alii Ana mamoe i le aso mulimuli, atonu o le a Ia fetalai mai ia i tatou taitoatasi, "Sa fai au ma tagata ese, ona outou talia lea o au."

Ona tatou faapea atu lea ia te Ia, "O anafea foi na matou iloa ai oe o le tagata ese, ma matou talia oe?"

Ma o le a Ia tali mai, "E moni, ou te fai atu ia te outou, aua na faia e outou i le tasi o e aupito itiiti o ou uso nei, o au lea na outou faia i ai."¹⁰

I le suafa o Iesu Keriso, amene. ■

FAAMATALAGA

1. 1 Nifae 22:25.
2. Aperaamo 2:10; faapoopo le faamamafa.
3. Efeso 2:19.
4. Levitiko 19:34.
5. Mataio 8:10; tagai foi Mataio 8:2-3; Mareko 1:40-42; 2:15; Ioane 4:7-9.
6. Mataio 5:46-48.
7. Victor Hugo, *Les misérables*, trans. Isabel F. Hapgood, 5 vols. (1887), 1:73.
8. 4 Nifae 1:17.
9. Galuega 10:34-35.
10. Mataio 25:35, 38, 40.



Saunia e Elder Randy D. Funk
○ Le Fitugafulu

Ua Ia Valaau Mai e Folafola Atu Lana Afioga

Afai tou te lotomauualalo ma usiustai ma faafofoga i le leo o le Agaga, o le a outou maua le fiafiaga sili i a outou auaunaga o se faifeautalai.

I na ua lagolagoina au o se Pulega Aoa o ia Aperila ua tuanai atu, sa ou auauna atu o se peresitene o le misiona i Initia. Sa ou matauina mo au lava se mea sa tau mai ia te au e se isi peresitene o le misiona na muamua atu: “E ese le ofoofogia o faifeautalai o lenei Ekalesia.”¹

O se tasi o le toatele o faifeautalai mataina sa matou galulue faatasi ai ma Sister Funk, o Elder Pokhrel mai Nepal. E na o le lua tausaga talu ona avea o ia ma se tagata o le Ekalesia, ae valaauina o ia e talai i le Misiona a Bangalore Initia, o se misiona faaPeretania. Na te tau atu ia te oe sa lei saunia lelei o ia. O se mea sa malamalama i ai. Sa le i vaai lava o ia i se faifeautalai seia oo ina avea o ia ma se faifeautalai, aua sa lei ni faifeautalai talavou e auauna atu i Nepal. Sa le lelei lana faitau i le faaPeretania ina ia malamalama ai i faatonuga sa i ai i lona valaauga. Ina ua taunuu atu i le nofoaga autu mo le aoaoina o faifeautalai, nai lo le aumaia o ofuvae mananaia, ofutino papae, ma

fusiua, sa ia teuina i lana ato, ma i ana lava upu, “e lima pea o ofuvae li, o nai mitiafu, ma le tele o fagu teu ulu (gel).”²

E oo lava ina ua ia maua laei tala-feagai mulimuli ane, sa ia faapea mai na ia lagona le le atoatoa i aso uma i nai uluai vaiaso. Sa ia faamatalaina lena taimi o lana misiona: “Sa le gata na faigata le Igilisi, ae sa luitauina foi le galuega. . . . O le faatumutumuga o nei faigata uma, sa ou fiaai, lelava, ma ma’i manatu i le aiga. . . . E ui lava sa faigata ia tulaga, ae sa ou naunau pea. Sa ou lagona le vaivai ma le le atoatoa. Sa ou tatalo i na taimi mo le Tama Faalelagi ia fesoasoani mai ia te au. E aunoa ma le toilalo, o taimi uma sa ou tatalo ai, na ou lagona lava le mafanafana.”³

E ui lava sa fou ma luitauina le galuega faafaifeautalai mo Elder Pokhrel, ae sa ia auauna atu ma le faatuatua maoae ma le faamaoni, i le saili atu ia malamalama ma mulimuli i mea sa ia aoaoina mai i tusitusiga

paia, *Tala’i La’u Talalelei*, ma ona taitai misiona. Sa avea o ia ma se faiaoga mamana o le talalelei—i le gagana faaPeretania—ma se taitai sili ona lelei. Ina ua maea lana misiona ma nai taimi i Nepal, sa ia toe foi atu i Initia e faaauau lana aoga. Talu mai Ianuari, o loo ia auauna atu o se peresitene o le paranesi i New Delhi. Ona o le tuputupuae moni sa ia aafia ai o se faifeautalai, ua ia faaauau pea ona saofaga atu i le tuputupuae moni o le Ekalesia i Initia.

Sa faapefea e se alii talavou o le sa le i vaai lava i se faifeautalai muamua ona avea ma se tasi o faifeautalai e i ai sea malosiaga faaleagaga? O le a faapefea ona e mauaina mana faaleagaga o se faifeautalai e matala ai faitotoa, faaaoga imeli, ma tatala loto o i latou i le misiona o le a e galue ai? E pei ona masani ai, o loo maua tali i tusitusiga paia ma saunoaga a perofeta ma apo-setolo soifua.

Ina ua faatoa talaiina le talalelei i Egelani ia Iulai 1837, sa faaali mai e le Alii, “Soo se tasi tou te auina atu i lo’u igoa, e ala i le leo o outou uso, o le Toasefululua, ua fautuaina mai i le ala tatau ma tuuina atu i ai e outou le pule, o le a i ai le mana e tatala ai le faitotoa o lo’u malo i soo se atunuu i soo se mea tou te auina atu i ai i latou.”⁴

Po o fea lava e auina atu i ai oe, po o le a le misiona e tofia i ai oe, ia silafia sa fautuaina lena tofiga e se sui o le Toasefululua ma ua valaauina oe e le perofeta a le Alii. Ua valaauina oe e “ala i valoaga, ma ala i le faaeega o lima.”⁵

Ona tuuina mai lea e le Alii tuutuuga ina ia faataunuuna ai lenei folafolaga. Sa Ia fetalai, “O le tulaga e oo i ai le [o lona uiga o le a faataunuuna le folafolaga *pe afai*] latou [te] [o lona uiga o faifeautalai o e ua auina atu] [1] faamaualalalo o i latou lava i o’u luma, ma [2] tumau i la’u upu, ma [3] faalogo i le leo o lo’u Agaga.”⁶

Ua manino lava folafolaga a le Alii. Ina ia mafai ona mauaina le mana faaleagaga e moomia e tatala ai le faitotoa o le malo o le Atua i atunuu ua auina atu i ai outou, e tatau ona outou lotomauualalalo, ma usiusitai, ma maua le gafatia e faalogo ai ma mulimuli i le Agaga.

O uiga nei e tolu o loo fesootai lelei faatasi. Afai e te lotomauualalo, o le a e manao e te usiusitai. Afai e te usiusitai, o le a e lagonaina le Agaga. E taua le Agaga, aua, sa aoao mai Peresitene Ezra Taft Benson e faapea, “A aunoa ma le Agaga, e le mafai lava ona e manuia e *tusa lava* po o a au taleni ma tomai.”⁷

A o avea ai ma se peresitene o le misiona, sa ou faatalatalanoaina e le aunoa faifeautalai o e sa feagai ma faigata i le galuega, aua sa le i agavaa atoatoa i latou. Sa latou soifua i tulaga mauualalo o o latou gafatia faaleagaga. Po o le a lava le malosi sa latou galulue ai po o le a le tele o mea lelei sa latou faia, sa le mafai lava ona latou lagonaina le filemu ma olioli i le mafutaga a le Agaga Paia, seia oo ina faalotomauualaloina i latou lava, salamo atoatoa, ma tofo ai i le alofa mutimutivale ma le alofa tunoa o le Faaola.

Sa faatonuina e le Alii Ana auauna ia lotomauualalo, ona o le faagasologa o le faaatoatoaina faaleagaga e amata i se loto momomo. Mafaufau i le lelei e oo mai mai mea ua nutimomoia: E sua le palapala e toto ai le saito. E olo le saito e gaosi ai le falaoa. E vaevaeina le falaoa ia avea ma faatusa o le faamanatuga. Pe a taumafa se tagata ua salamo i le faamanatuga ma se loto momomo ma se agaga salamo, o le a faamamaina o ia.⁸ A tatou salamo ma faamamaina e ala i le Togiola a Iesu Keriso, e tele atu mea ua tatou ofoina atu i le Faaola a o tatou auauna atu ia te Ia. “Joe, o mai ia te ia, ma tuu atu o outou agaga atoa e fai ma taulaga ia te ia.”⁹



Afai ua mafatia i le agasala ma ua manaomia ona salamo, faamolemole ia faia loa. A o faamalolo e le Faaola i latou sa puapuagatia, sa Ia valaaulia soo i latou e le aunoa ia tutulai i luga. Ua faamauina i tusitusiga paia sa latou faia i le taimi lava lena.¹⁰ Ina ia faamaloloina ou mafatiaga faaleagaga, faamolemole talia Lana valaaulia e tutulai i luga. E aunoa ma le faatuai, talanoa i lau epikopo, peresitene o le paranesi, po o le peresitene o le misiona ma amata nei lava le faagasologa o le salamo.

O le mana faamalolo o le Togiola na te aumaia le filemu i lou agaga ma mafai ai ona e lagonaina le Agaga Paia. O le taulaga a le Faaola e le mafutiaina, ae o a tatou agasala, e ui e anoanoai ma ogaoga, ae e mafai ona faitauina ma tautau atu, lafoai ma faamagaloina. “Ma ua matua tele lava lona olioli i le agaga salamo!”¹¹

O lenei folafolaga i le Mataupu Faaavae ma Feagaiga e mamana: “Ia tuu le amiomama e teuteuina ai ou mafau-fauga e le aunoa; ona solo malosi ai lea o lou lototele i luma o le Atua.”¹² A o e soifua i se olaga mama, o le a e lagonaina se faamautinoaga filemu i lou agavaa ai i luma o le Atua ma o le a e mauaina le mana o le Agaga e faatasi ma oe.¹³

O nisi o e sa avea ma tagata sili ona fou o le Ekalesia, po o e sa toe foi mai talu ai nei i le faatoagaina atoatoa, atonu e faapea mai, “Ua ou agavaa nei ma maua se manao e auauna atu, ae ou te le iloa pe o lava mea ua ou

iloaina.” Ia Aperila, sa aoao ai i tatou e Peresitene Thomas S. Monson, “O le iloa o le upumoni ma tali i a tatou fesili silisili e oo mai ia i tatou pe a tatou usiusitai i poloaiga a le Atua.”¹⁴ Ua toe faamautinoa mai mo lo tatou iloaina e ala i lo tatou usiusitai tatou te maua ai le malamalama.

O nisi atonu latou te lagona le faa-tapulaa o taleni, tomai, po o le pote masani e tuuina atu. Afai ua ia te oe na popolega, manatua le aafiaga o Elder Pokhrel. Ia saunia lelei i le mea e te mafaia ma iloa o le a faalautele e lo tatou Tama Faalelagi au taumafaiga faamaualalo ma le usiusitai. Sa ofoina mai e Elder Richard G. Scott leni fautuaga faamalosiua: “A tatou usitai i poloaiga a le Alii ma auauna atu i Ana fanau ma le le manatu faapito, o le taunuuga masani lava o le mana mai le Atua—o le mana e fai ai mea e tele atu nai lo o mea e mafai ona tatou faia na o i tatou lava. O o tatou manatu, a tatou taleni, o tatou tomai o le a faalauteleina ona ua tatou maua le malosi ma le mana mai le Alii.”¹⁵

A e faalagolago i le Alii ma Lona agalelei, o le a faamanuia e le Atua Silisiliese Ana fanau e ala ia te oe.¹⁶ Sa aoaoina e Elder Hollings mai Nevada lena mea i le amataga o lana misiona. O le aso na sosoo ma le aso na taunuu ai i Initia, sa ia malaga ai faatasi ma i maua ma Sister Funk i Rajahmundry, o lana eria muamua. O lena aoauli sa asiiasi ai Elder Hollings ma Elder Ganaparam i se tagata o le Ekalesia

ma lona tina. Sa manao le tina ia aoao e uiga i le Ekalesia, aua sa ia vaaia le faamanuiaina o le olaga o lana tama teine. Sa faatasi atu Sister Funk ia i latou e tuuina atu le faaumea. Ona o le a aoaoina le lesona i le faaPeretania ma na o le gagana Telugu e tautala ai le tina, sa i ai iina se uso o le paranesi e faaliliuina mea sa aoaoina.

O le tofiga a Elder Hollings i lana aoaoga muamua lava o le aoao atu lea o le Muai Faaaliga, e faaaoaga ai upu a le Perofeta o Iosefa. I lena taimi o le lesona sa ia liliu atu ai ia Sister Funk ma fesili, “E tatau ea ona ou tau atu ia upu uma taitasi?” ma le iloaina o le a faaliliuina.

Sa ia tali atu, “Tau atu ia upu uma taitasi ina ia mafai ona molimau atu le Agaga i mea uma e te fai atu ai.”

A o aoaoina ma le faamaoni e lenei faifeautalai fou le Muai Faaaliga,

ma faaaogaina upu a le Perofeta, sa suia foliga vaaia o lena tuafafine pele. Sa i ai loimata. A o faamaeaina e Elder Hollings lena savali mamalu, ma a o le i faaliliuina mea sa ia saunoa atu ai, sa fesili mai le tina ma ona loimata i lana lava gagana, “E mafai ona ou papatiso? Ma e mafai ona e aoaoina lou atalii?”

O’u uso e auauna talavou, ua tatalaina faitotoa ma loto i aso uma i le savali o le talalelei—o se savali e aumai ai le faamoemoe, ma le filemu, ma le olioli i fanau a le Atua i le lalolagi atoa. Afai tou te lotomaulalo ma usi-usitai ma faafofoga i le leo o le Agaga, o le a outou maua le fiafiaga sili i a outou auaunaga o se faifeautalai.¹⁷ O se vaitau matagofie le avea ai ma faifeautalai—o se taimi ua faanatinatiina ai e le Alii Lana galuega!

Ou te molimau atu i lo tatou

Faaoala, o Iesu Keriso ma Lana “polo-aiga paia”¹⁸ ia “outou o atu e fai nuu uma lava ma soo.”¹⁹ O Lana Ekalesia lenei. O loo ia taitaiina e ala i perofeta soifua ma aposetolo. I le isi itula e sosoo ai, o le a aoaoina i tatou e le Au Peresitene Sili. Ia tatou “vave ona matau,”²⁰ e pei o Mamona, ina ia oo mai le valaau, ua tatou agavaa ma mafai ona folafola atu ma le mana o le Agaga: “Faauta, o au o se soo o Iesu Keriso, le Alo o le Atua. Ua ia valaauina au e talai atu lana afioga i totonu o ona tagata, ina ia mafai ona latou maua le ola tumau-faavavau.”²¹ I le suafa o Iesu Keriso, amene. ■

FAAMATALAGA

1. Talatalanoaga patino ma Dennis C. Brimhall, peresitene o le Misiona a Kentucky Louisville, 2005–8.
2. Ashish Pokhrel, “My Name Is Ashish Pokhrel and This Is My Story” Talaaga Patino e lei lolomiina ma faasalalauina, Sete. 2011).
3. Pokhrel, “My Name Is Ashish Pokhrel.”
4. Mataupu Faavae ma Feagaiga 112:21.
5. Mataupu Faavae o le Faatuatua.
6. Mataupu Faavae ma Feagaiga 112:22.
7. Ezra Taft Benson, i le *Tala’i La’u Talalelei: O Se Taitala mo le Galuega Faafai-feautalai* (2004), 190.
8. Manatu na aumai mai le saunoaga sa laugaina e Elder Jeffrey R. Holland i le konafesi a le Siteki a Bountiful Utah North, Iuni 8–9, 2013.
9. Ominae 1:26.
10. Tagai Mareko 5:41–42; Ioane 5:8–9.
11. Mataupu Faavae ma Feagaiga 18:13.
12. Mataupu Faavae ma Feagaiga 121:45.
13. Tagai Mataupu Faavae ma Feagaiga 121:46.
14. Thomas S. Monson, “O Le Usi-usitai e Aumaia ai Faamanuiaga,” *Liahona*, Me 2013, 89.
15. Richard G. Scott, “Mo Le Filemu i le Aiga,” *Liahona*, Me 2013, 30.
16. I le faamatalaina o mea o le a faia e le toatele o faifeautalai fou, saunoa mai Elder Russell M. Nelson: “O le a latou faia lava le mea latou te faia i taimi uma. O le a latou talai atu le talalelei! O le a latou faamanuiaina fanau a le Atua Silisiliese!” (“Pu’e le Galu,” *Liahona*, Me 2013, 45).
17. Tagai *Tala’i La’u Talalelei*, v.
18. Thomas S. Monson, “O Mai, Alo o le Atua,” *Liahona*, Me 2013, 66.
19. Mataio 28:19.
20. Mamona 1:2.
21. 3 Nifae 5:13.





Saunia e Peresitene Dieter F. Uchtdorf
Fesoasoani Lua i le Au Peresitene Sili

E Mafai Ona E Faia Nei Lava!

Ae a tatou naunau lava e tulai ae i luga ma faaauau i luga o le ala . . . e mafai ona tatou aoaoina se mea mai le toilalo ma atili lelei ma fiafia atili ai.

Ao ou laitiiti, e foliga mai sa mafai lava ona vave tu i luga pe a pa'ū i lalo. Peitai, i le aluga o tausaga, ua ou iloa ai ua le toe tutusa aso ona o le matua—ua le toe mafai ona vave tu i luga pe a ou pa'ū.

E lei leva atu na ma faasee ai i luga o le aisa ma le atalii o lo'u atalii e 12 tausaga le matua. Sa ma fiafia lava i le ma taimi sa faatasi ai seia oo ina ou see i se vaega aisā ma ou patatū ai ma le mataina i lalo i se tifatō.

Sa ou taumafaia togafiti uma e tu ai i luga ae sa ou le mafai—sa ou pa'ū, ma sa le mafai lava ona ou tu i luga.

Sa ou lagona lava le lelei faaletino, ae sa fai si faamanualia o ou lagona. O lea sa taumafai ai ia mautinoa o loo mau lelei lo'u pulou ma le matatioata ona e sili atu ia te au le aua nei iloaia au e isi tagata faasee. Sa mafai ona ou mafaufauina lou saofai iina ma le leai o se faamoemoe ao latou pasi ane, ma faamalo mai ma le fiafia, “Talofa Uso Uchtdorf!”

Sa amata ona ou tomanatu po o le a se mea e fai e laveai ai au. O le taimi na na oo mai ai le atalii o lou atalii i ou talaane. Sa ou faamatala i ai le mea na tupu, ae sa foliga mai sa ia le naunau

mai i lau faamalamalamaga i le mafua-aga na le mafai ai ona ou tu i luga. Sa ia pulatoa mai i ou mata, aapa mai, uu lou lima, ma i se leo mausali, “Tamamata, e mafai ona e faia nei lava!”

Sa vave ona ou tu i luga.

Sa ou gatete pea i lena mea. O le mea sa foliga mai na faigata mo na o sina taimi a o lei vave ona avea ma se mea moni, ona o se tamaitiiti e 12 tausaga le matua na aapa mai ia te au ma fai mai, “E mafai ona e faia nei lava!” Ia te au lava ia sa faateleina ai le mautinoa, naunautaiga, ma le malosi.

Uso, e i ai taimi i o tatou olaga e foliga mai ai ua le gafatia e lo tatou malosi ona tutulai ae ma faaauau ai pea. Sa ou aoaoina se mea i lena aso i luga o se tifato sa lilofia i le kiona. E tusa lava pe tatou te manatu ua le mafai ona tatou tulai ae i luga—ae o loo i ai pea se faamoemoe. Ma o nisi taimi ua na ona tatou manaomia o se tasi e pulatoa mai ia i tatou i mata, uu o tatou lima, ma fai mai, “E mafai ona e faia nei lava!”

O Le Manatu Sese o le Malosi

Atonu tatou te manatu e sili atu ona maua e tamaitai ni lagona o le le

atoatoa ma le toilalo nai lo alii—lea e aafia tele ai i latou i nei lagona nai lo i tatou. Ou te le mautinoa e moni lenei mea. E lagona e alii ia aafiaga o le tausalaina, faanoanoa, ma le toilalo. Atonu tatou te faafoliga ai e le o mamafa ia lagona ia i tatou, ae e mamafa. E mafai ona tatou lagonaina le mamafatu ona o lo tatou toilalo ma le le atoatoa lea e amata ai ona tatou manatu o le a le mafai lava ona tatou manumalo. E mafai foi lava ona tatou mafaufau ona e talu ai na tatou pā'ū'ū muamua, o le pa'ū lava la lo tatou taunuuga. E pei ona tusia ai e se tasi tusitala, “Tatou te faaauau pea, e pei o vaa e taia i peau malolosi, ia e toe lafo ai lava i tua i mea na o mai ai.”¹

Ua ou vaai i alii e faatumulia i le gafatia ma le alofatunua ua le toe auai i le galuega luitauina o le fausiaina o le malo o le Atua ona ua faatasi pe faalua foi ona latou toilalo. O alii nei o le folafolaga o se semanu o ni tagata e umiaina ma le tulagaese le perisitua ma o ni auauna a le Atua. Ae ona sa latou tautevateva ma oo ai ina faaloto-vaivaia, na latou o ese ai mai tautinoga o le perisitua ma saili atu ai i isi taumafaiga ae itiiti se aoga.

Ma o lea, ua latou faaauau ai, ma ausiaina na o sina vaega itiiti o mea e mafai ona latou ausiaina, ua le tutulai ae i le gafatia e fitoitonu i lo latou tofi. E pei ona faailoa ai le faanoanoa o le tusitala, o nisi nei o i latou o agaga ua le faamanuiaina o e e “feoti lava e lei ausiaina mea latou te gafatiaina.”²

E leai se tasi e fia toilalo. Ma e tatou te le fiafia patino lava i ai pe a vaaia e isi—aemaise lava i latou tatou te alolofa i ai—lo tatou toilalo. Tatou te mananao uma ina ia faaaloalogaia i tatou, ma faamamaluina. Tatou te fia mananao e avea ma ni siamupini. Ae o tatou o tagata soifua e le avea ma ni siamupini e aunoa ma se taumafaiga



ma se loto pulea pe aunoa ma le faia o ni mea sese.

Uso e, o lo tatou taunuuga e le fuafuaina i le aofai o taimi tatou te tau-tevateva ai ae o le aofai o taimi tatou te tutulai ae ai, tafi ese le pefu mai ia i tatou, ma agai i luma.

Tiga e Tusa i le Atua

Ua tatou iloa o lenei olaga faaletino o se tofotofoga. Ae ona e alofa lo tatou Tama Faalelagi ia i tatou i se alofa atoatoa, ua Ia faaalua mai ia i tatou le mea e maua ai tali. Ua Ia tuuina mai ia i tatou le faafanua e faatagaina ai i tatou e sopoia ia laufanua le mautonu ma alasavali e lei faamoemoeina ia e fetai ai ma i tatou taitoatasi. O upu a perofeta o vaega ia o lenei faafanua.

Pe a tatou se ese—pe a tatou pauu pe o ese mai le ala a lo tatou Tama Faalelagi—e tau mai e upu a perofeta ia i tatou le auala e tutulai ae ai i luga ma toe foi ai i luga o lona ala.

Mai mataupu faavae uma na aoaoina e perofeta i le aluga o seneturi, o le tasi ua faamamafa pea lava pea o le savali faamalosiua o loo i ai se faamoemoe e faapea e mafai ona salamo tagata, suia auala, ma toe foi atu i luga o le ala moni o le avea ma soo.

E le faapea la e tatau ai ona tatou maua le toafimalie i o tatou vaivaiga, mea sese, po o agasala. Ae o loo i ai se eseese taua i le va o le faanoanoa

mo agasala lea e taitai atu i le salamo ma le faanoanoa lea e taitai atu i le pagatia.

Sa aoa mai le Aposetolo o Paulo e faapea “o le *tiga e tusa i le Atua* e tupu ai le salamo e oo i le ola . . . a o le *tiga faalelalolagi* e tupu ai le oti.”³ O le *tiga e tusa i le Atua* e musuiaina suiga ma faamoemoe e ala i le Togiola a Iesu Keriso. O le *tiga faalelalolagi* e toso i tatou i lalo, aveesea ai le faamoemoe, ma faatosinaina i tatou ia lolo atu atili i faaososoga.

O le *tiga e tusa i le Atua* e taitai atu i le liua⁴ ma se suiga o le loto.⁵ Na te uunaia i tatou ia inoino i le agasala ae fiafia i le lelei.⁶ Na te uunaia i tatou ia tutu i luga ma savavali i le malamalama o le alofa o Keriso. O le salamo moni e faatatau i le suiga, ae le o tiga ma mafatiaga. Ioe, o le faanoanoa faamaoni ma le loto momomo moni mo le le usiusitai e tele lava ina tiga ma o ni laasaga taua ia i le faagasologa paia o le salamo. Ae a oo atu le tausala ina i le musuā o le tagata lava ia po o le taofia o i tatou mai le toe tutulai ae i luga, o le a faatuai ai nai lo le uunaia o lo tatou salamo.

Uso e, o loo i ai se ala sili atu. Ia tatou tutulai ae i luga ma avea ma tagata o le Atua. O loo i ai sa tatou siamupini, o se Faaola, na savalia le vanu o le ata o le oti mo i tatou. Na Ia foai mai o Ia lava e maliu e totogi ai

a tatou agasala. E leai lava se isi alofa e sili atu i lo lenei alofa—Na faataatia ma le loto i ai e Iesu Keriso, le Tamai Mamoe e aunoa ma se pona, o ia lava i luga o le fata faitaulaga ma totogi le tau o a tatou agasala “i tupe uma lava.”⁷ Na Ia tauave i Ona luga o tatou mafatiaga. Na Ia ave a tatou avega, ma lo tatou tausala ina i Ona tauau. Au uo pele, a tatou filifili e o mai ia te Ia, ma ave i o tatou luga Lona suafa, ma savavali ma le lototoa i le ala o le avea ma soo, ma e auala mai i le Togiola ua folafola mai ai ia i tatou e le gata o le fiafia ma le “filemu i lenei lalolagi” ae faapena foi le “ola e faavavau i le lalolagi a sau.”⁸

A tatou faia ni mea sese, a tatou agasala ma pauu, ia tatou mafaufau i le uiga moni o le salamo faamaoni. O lona uiga o le liliu atu o o tatou loto ma le tuuto i le Atua ma le lafoaia o le agasala. O le lagonaina o le salamo moni e aumaia faatasi ai le faamautinoaga faalelagi lea e mafai ai ona “tatou faia nei lava.”

O Ai Oe?

O se tasi o metotia a le tiapolo e taofia ai i tatou mai le alualu i luma o le faafememeaiina lea o i tatou e uiga i lo tatou tagata moni lava ma mea tatou te mananao moni ai lava.

Tatou te mananao e faaalu se taimi ma a tatou fanau, ae tatou te mananao foi ia auai i a tatou mea e fiafia i ai faatamatane. Tatou te mananao ia lusi ia pauna, ae tatou te mananao foi ia aai i meaai tatou te faananau i ai. Tatou te mananao ia faapei o Keriso, ae tatou te mananao foi ia faasa’o le tagata lea sa tau lavea ai le tatou taavale i le auala.

O le faamoemoe o Satani ia faaososo i tatou e faafesui ai penina tautele o le fiafia sili ma tulaga faataua ina paia e faavavau mo maataua e leai se aoga lea e na o se manatu sese ma se faafoliga o le fiafia ma le olioli.

O le isi metotia o loo faaaoga e le fili e faalotovaivai ai i tatou mai le tutulai ae i luga o le faaosoina o i tatou e vaai atu i poloaiga o ni mea ua fai faamalosi i tatou e fai. Ou te manatu o le natura faaletagata le tetee atu i soo se mea e le o foliga mai i le taimi muamua o ni o tatou lava manatu.

Afai tatou te vaai atu i le taumafa i meaai maloloina ma le faamalositino o se mea ua na ona faamoemoeina i tatou e fomai e fai, atonu la o le a tatou toilalo ai. Afai tatou te vaai i nei filifiliga i lo tatou lava tulaga ma po o ai tatou te mananao e avea ai i tatou, o le a tele atu so tatou avanoa o le tumau i luga o le ala ma faamanuainaina ai.

Afai tatou te vaai i faiaoga o aiga ua na o se sini a le peresitene o le siteki, o le a le mafai la ona tatou faatauaina lona faataunuaina. Afai tatou te vaai i ai o sa tatou sini—o se mea tatou te mananao e fai ina ia mafai ai ona avea atili e faapei o Keriso ma auauna atu ai i isi—e le gata o le a tatou faataunuaina la tatou tautinoga ae o le a ausia ai foi i se ala lea e manuia ai aiga tatou te asia faapea ai ma i tatou lava.

O le tele lava o taimi, o i tatou lava ia o loo fesoasoani i ai a tatou uo po o aiga e faatulai ae i luga. Ae afai tatou te tilotilo solo ma mata naunautai ma le faamoemoega o se loto popole, o le a tatou iloa ai o avanoa ua tuuina e le Alii i o tatou luma e fesoasoani ai i isi ina ia tutulai ae i luga ma agai i luma i o latou gafatia moni. Ua tauina mai e tusitusiga paia, “O mea uma lava tou te faia, ia faia ma le loto, . . . i le Alii, a e le o tagata.”⁹

O se puna maoae o le mana faaleagaga le ola i ni olaga o le amiosao ma le amiotonu ma lo tatou taulai atu i mea tatou te mananao e nonofo ai i le faavavau. E tusa lava pe na o mata o le faatuatua e mafai ona tatou iloa atu ai lenei taunuuga paia, o le a fesoasoani ia i tatou ina ia tumau ai i le ala.



Pe a taulai atoa atu lo tatou gauai i mea tatou te manumalo ai pe toilalo ai foi i aso taitasi, e mafai ona tatou leiloloa i le ala, fesetetai, ma pauu. O le faatumauina o la tatou vaai i ni sini mauululuga atu, o le a fesoasoani lea ia i tatou ina ia avea ma ni atalii, ma uso sili atu ona lelei, tamā agalelei ma ni tane sili atu le alolofa.

E oo lava ia i latou o ē tuu o latou loto i sini paia atonu e i ai lava taimi e tautevateva ai, ae o le a le faatoilaloina i latou. Latou te faatuatua ma faalagolago i folafolaga a le Atua. O le a latou toe tutulai ae i luga ma se faamoemoe ola i se Atua amiotonu atoa ai ma le vaai mamao musuia i se lumanai sili. Latou te iloa e mafai ona latou faia nei lava.

E Mafai Ona E Faia Nei Lava

O tagata uma, talavou pe matutua, ua i ai sona lava ia aafiaga patino i le pa’ū. O le pa’ū o le mea lea e oo i ai i tatou o tagata soifua. Ae a tatou naunau lava e toe tutulai ae i luga ma faaauau i luga o le ala e agai atu i sini faaleagaga ua tuu mai e le Atua ia i tatou, e mafai lava ona tatou aoaoina se mea mai le toilalo ma atili lelei ai ma fiafia atili ai i se taunuuga.

Ou uso pele, au uo pele, o le a i ai taimi pe a e *mafaufau* ai ua le mafai

ona e tu i luga pe faaauau. Ia faatuatua i le Faaola ma Lona alofa. Faatasi ai ma le faatuatua i le Alii o Iesu Keriso, ma le mana ma le faamoemoe o le talalelei toefuataiina, o le a mafai ai ona e savali mauuluga ma faaauau pea.

Uso e, matou te alolofa ia te outou. O loo matou tatalo mo outou. Ou te moomoo maimau pe ana mafai ona outou faafofoga ao tatalo ia Peresitene Monson mo outou. Pe o oe o se tama talavou, o se toeaina matua o loo umiaina le perisitua, po o se tiakono fou faatoa faauuina, o loo matou manatu atu ia te outou. O loo manatu mai foi le Alii ia te outou!

Matou te iloa o nisi taimi e faigata ai o outou ala. Ae ou te tuu atu ia te outou lenei folafolaga i le suafa o le Alii: tutulai ae ma mulimuli i tulagaaao o loo tatou Togiola ma le Faaola, o le a i ai se aso e te tepa ai i tua ma faatumulia i le loto faafetai e faavavau ona sa e filifili e faalagolago i le Togiola ma lona mana e sii ae oe ma faamalosisia oe.

Au uo ma uso pele, e tusa lava pe faafia ona e see pe pa’ū, tulai ae! O lou taunuuga o se taunuuga mamalu! Tu i luga ma savali i le malamalama o le talalelei toefuataiina a Iesu Keriso! E te malosi atu nai lo le mea e te iloina. E sili atu lou gafatia nai lo le mea e mafai ona e mafaufauina. E mafai ona e faia nei lava! O nei mea ou te moli-mau atu ai i le suafa paia o loo tatou Matai ma le Togiola, o Iesu Keriso, amene. ■

FAAMATALAGA

1. F. Scott Fitzgerald, *The Great Gatsby* (1925), 180.
2. “The Voiceless,” i le *The Complete Poetical Works of Oliver Wendell Holmes* (1908), 99.
3. 2 Korinito 7:10; faaopoopo le faamamafa.
4. Tagai Galuega 3:19.
5. Tagai Esekielu 36:26; 2 Korinito 5:17; Mosaea 3:19.
6. Tagai Mosaea 5:2.
7. Mataio 5:26.
8. Mataupu Faavae ma Feagaiga 59:23.
9. Kolose 3:23.



Saunia e Peresitene Henry B. Eyring
Fesoasoani Muamua i le Au Peresitene Sili

Fusi i o Latou Manua

Ou te tatalo ina ia mafai ona tatou saunia i tatou lava e tuu atu soo se auaunaga faaleperisitua e ono tuu mai e le Alii ia i tatou i la tatou malaga faaletino.

Ua faamanuiaina i tatou uma i se tiutetauave e tausi i isi. O le umiaina o le perisitua a le Atua o lo tatou tali atu lea i le Atua e tusa ma le ola e faavavau o Lana fanau. E moni lena mea, e ofoofogia foi, ma e i ai taimi e mafai ona lagona ai le lofituina.

O loo i ai peresitene o korama a toeaina o loo faafofoga mai i le po nei o e e iloaina le uiga o la'u tala. O se mea lenei na tupu i se tasi o outou. Masalo ua tupu foi i le toatele o outou ma e sili atu foi ma le faatasi. Atonu e eseese ni faamatalaga ae e tutusa lava ia tulaga.

O se toeaina e te le masani lelei i ai na talosaga atu mo lau fesoasoani. Ua ia faatoa iloaina ua tatau ona ia siitia atu lona toalua ma le la pepe tama i le aso nei mai le fale sa mautotogi ai i se isi fale o lata ane.

Ua uma ona la talosagaina ma lona toalua se uo pe mafai ona la faaaogaina se loli mo le aso atoa e siitia ai lo la aiga ma la'u ai a la meatotino. Sa faamatuu atu i ai e le uo le loli. Na amata ona uta e le tamā talavou mea uma i totonu o le loli, ae i ni nai uluai minute, na mapuna lona tua. Sa pisi tele le uo talavou lea e ana le loli ua le mafai ai ona fesoasoani atu i ai. Sa lagona le atuavale o le tamā talavou. Na ia mafaufau ia te oe, o lana

peresitene o le korama a toeaina.

E oo ifo i le taimi na ia talosaga ai mo se fesoasoani, ua oo i le aoauli. O le aso lea o se fonotaga a le Ekalesia i le afiafi. Ua uma ona e folafola atu e fesoasoani i lou toalua i galuega a le aiga i lena aso. Na fai atu foi lau fanau ia te oe e fai se mea faatasi ma i latou, ae e te lei maua lava se taimi e fai ai.

Sa e iloaina foi o uso o lau korama, aemaise lava i latou e sili ona faamaoni, i latou ia e masani lava ona e valaau i ai e fesoasoani atu, masalo o loo tutusa tulaga faigata o loo outou i ai i le taimi lea.

Sa silafia e le Alii o le a e oo i ni aso faigata faapea ina ua Ia valaauina oe i lenei tofiga, o lea na Ia tuu atu ai ia te oe se tala e faamalosiua ai oe. O se faataoto mo e umiaina le perisitua ua pisi tele. O nisi taimi tatou te faatautu i ai o le tala i le Samaria agalelei. Ae o le tala moni lava mo se tagata maoae e umiaina le perisitua, i nei aso pisi, faigata e gata ai.

O le tala e talafeagai lelei ma se auauna perisitua ua mamafatu i avega. Tau ina ia e manatua o oe o le Samaria agalelei ae le o le ositulaga po o le sa Levi lea na pasia le tagata na fasia.

Atonu e te lei mafaufau i lena tala ina ua e fetai ai ma ni luitau faapena. Ae ou te tatalo ia e mafaufau i ai pe

a toe oo atu na aso faapena, aua e mautinoa lava o le a oo atu.

E le o tauina mai ia i tatou i tusitusiga paia pe aisea na malaga ai le Samaria i le auala lea mai Ierusalemia i Ieriko. Masalo sa lei savali na o ia ona e tatau ona ia iloaina sa faatalitali le au faomea mo tagata le faaeteete. Sa i ai o ia i se malaga tugā, ma e pei o le tu ma le masani, sa i ai ia te ia se manu ave avega faapea ai ma se suauu ma se uaina.

I upu a le Alii fai mai sa tu le Samaria, ina ua ia vaaia le tagata na fasia, ona sa “mutimutivale . . . lona alofa.”

Sa sili atu nai lo le na o le lagonaina o le alofa mutimutivale, na ia faatino. Ia manatua i taimi uma vaega patino o le tala:

“Ua alu atu [o ia], ma nonoa i ona manua, ua liligi foi i ai le suauu ma le uaina; ua faatietie ia te ia i lana lava manu, ma taitai ia te ia i le fale e tali ai malo, ma tausi ia te ia.

“O le taeao o le a alu ia, ona to ae lea o tenari e lua, ma avatu i le matai e ona le fale, ua fai atu ia te ia, Ina e tausi ia te ia; ai se mea e te toe faatau ai, ou te tau ai ia te oe pe a ou toe sau.”¹

O oe ma ē umiaina le perisitua ua valaauina e taitai, e mafai ona maua e le ititii ifo ma le tolu ia faamautinoaga. Muamua, o le a tuu atu e le Alii ia te oe, pe afai e te ole atu ai, ia lagona o le alofa mutimutivale ia Na te lagonaina mo i latou e mafatia. Lua, o le a ia saunia isi, e pei o le matai o le faletalimalo, ia auai faatasi ma oe i lau auaunaga. Ma le lona tolu, o le a toe tau ai e le Alii, e pei o le Samaria agalelei, i latou uma e auai i le tuuina atu o fesoasoaniga ia i latou o mafatia.

O outou peresitene o korama masalo ua sili atu ma le faatasi ona outou faatinoina na faamautinoaga. Na outou talosagaina isi o le perisitua a le Alii e fesoasoani atu, ma le mautinoa o le a latou tali atu ma le alofa

mutimutivale. Tou te lei fefefe lava e talosaga i latou e tele ina tali soo atu i taimi ua tuanai ona ua outou iloina e faigofie ona latou lagonaina le alofa mutimutivale. Na outou talosagaina i latou ma le iloa sa latou lagona i taimi ua mavae le agalelei a le Alii pe a latou filifili e fesoasoani. Na outou talosagaina nisi o loo i ai lava ni avega mamafa, ma le iloina o le tele o le ositaulaga, o le faateleina foi lena o le tau i o le a latou mauaina mai le Alii. O i latou ua fesoasoani atu i se taimi ua tuanai na lagonaina le taumasuasua o le agaga faafetai o le Faaola.

Atonu foi na musuia lelei oe ia aua nei talosagaina se tasi e fesoasoani atu e uta i luga ona toe la'u ese lea o uta mai lena loli. I le avega ai ma se taitai ua e silafia lelei tagata o lau korama ma o latou aiga. E silafia atoa i latou e le Alii.

Na te silafia le avā na toetoe lava a lofituina ona sa le mafai e lana tane ona maua se taimi e faia ai mea sa ia manaomia e tausua ai ona manaoga. Ua Ia silafia po o ai tamaiti e faamanuiaina e ala i le vaai i lo latou tama ua toe alu atu tasi lava e fesoasoani atu i isi pe afai foi ua manaomia ona lagonaina e le fanau e lava lo latou taua i lo latou tama e faaalu ai se taimi faatasi ma i latou i lena aso. Ae Na te silafia foi le e manaomiaina le valaaulia e auauna atu ae atonu e foliga mai e le o le tagata tonu lea e ao pe naunau foi e fesoasoani atu.

E le mafai ona e iloina lelei ma le atoatoa ia uso uma o lau korama, ae e silafia e le Atua. O lea, e pei ona e faia i le tele o taimi, na e tatalo ai ia iloa po o ai e talosagaina ia fesoasoani e auauna atu i isi. Ua silafia e le Alii po o ai o le a faamanuiaina e ala i le talosagaina e fesoasoani atu ma po o ai le aiga o le a faamanuiaina e ala i le le talosagaina. O le faaaliga lena e mafai ona e faamoemoeina e oo atu ia te oe a o e taitai ai i le perisitua.



Sa ou vaai o tupu lena mea a o avega au ma se alii talavou. Sa avega au ma fesoasoani muamua i se korama a ositaulaga. Na valaau mai le epikopo ia te au i se tasi aso i lo'u fale. Sa ia fai mai e mana'o ia te au ia ma o faatasi ma ia e asiasi i se tina ua maliu lana tane o loo matua mafatia lava. Sa ia fai mai e na te manaomia au.

A o ou faatali mo ia e piki au mai lo'u fale, sa ou atuavale. Sa ou iloa o loo i ai i le epikopo ni fesoasoani malolosi ma atamamai. O le tasi o se faamasino lauiloa. O le isi e fai sana kamupani tele ma o le a mulimuli ane avega ma se Pulega Aoa. O le epikopo lava ia o le a i ai se aso e auauna ai o se Pulega Aoa. Aisea na fai mai ai le epikopo i se ositaulaga e le o i ai se poto masani, "Ou te manaomia lau fesoasoani?"

Ia, ua ou iloa lelei nei le mea semanu na te tau mai ia te au: "E manaomia e le Alii ona faamanuia ia te oe." I le fale o le tina ua oti lana tane, na ou vaaia, i lou maofa, o ia tau atu i le tina lea e le mafai ona ia mauaina lava se fesoasoani mai le Ekalesia seiloga na te faatumuina le fomu o le paketi na ia tuu atu ia te ia i se taimi na muamua atu. A o ma toe foi atu i le fale, sa ia ata ao ia vaaia le mea na ou te'i ai ma fai mai, "Hal, a mafai ona ia puleaina ana tupe faaalu o le a mafai ona ia fesoasoani atu i isi."

I se isi taimi, sa ave au e lou

epikopo faatasi ma ia i le fale o ni matua inu ava malosi ia na la auina maia ni teineiti laiti fefefe se toalua e faafeiloai i maua i le faitotoa. Ina ua uma ona matou talanoa ma teineiti e toalua, na ma liliu ma o ese ae ia fai mai ia te au, "E le mafai ona ta suia le faaletonu o o latou olaga i le taimi nei, ae e mafai ona latou lagonaina e alofa le Alii ia i latou."

I se isi afiafi sa ia ave au i le fale o se alii ua autausagā e lei toe sau i le lotu. Na tau atu e le epikopo ia te ia le tele o lona alofa ia te ia ma le tele o le manaomiaina o ia e le uarota. Sa lei foliga mai na i ai se aafiaga tele o lea mea i le alii lea. Ae i lena taimi, ma taimi uma sa ave ai au e le epikopo faatasi ma ia, sa i ai lava se aafiaga tele ia te au.

E leai ma se auala e mafai ai ona ou iloa ai pe na tatalo le epikopo ia iloa po o ai le ositaulaga o le a faamanuiaina e ala i le malaga faatasi ma ia i na asiasiga. Sa mafai lelei ona ia ave isi ositaulaga faatasi ma ia i le tele o taimi. Ae sa silafia e le Alii o le a i ai se aso e ave ai au ma se epikopo e valaaulia i latou ua faavaivaia lo latou faatuatua ina ia toe foi mai i le mafanafana o le talalelei. Sa silafia e le Alii o le a i ai se aso o le a tuu mai ai ia te au le tiutetauave faaleperisitua mo le faitau selau e oo lava i le faitau afe o fanau a le Tama Faalelagi o e o loo i ai ni manaoga vave faaletino.

O outou alii talavou e le mafai ona outou iloa po o a faatinoga o auau-naga faaleperisitua ua saunia e le Alii mo outou e tuu atu. Ae o le luitau tele atu mo e uma e umia le perisitua o le tuu atu lea o le fesoasoaniga faaleagaga. Ua i ai ia i tatou uma lenei tiute. E oo mai faatasi ma le avea ai ma se uso o se korama. E oo mai faatasi ma le avea ai ma se tasi o le aiga. Afai ua osofaia e Satani le faatuatua o soo se tasi i lau korama po o lou aiga, o le a e lagonaina le alofa mutimutivale. E pei lava o le auau-naga ma le alofa mutimutivale na tuu atu e le Samaria, o le a e auau-naga atu foi ia i latou i le suauu faamalolo mo o latou manua i taimi o o latou mafatiaga.

I lau auau-naga o se faifeautalai faamisiona, o le a e alu atu ai i le faitau afe o tagata o loo matua manaomia le faaleagaga. O le a le iloina e le toatele, sei vagana ua e aoaoina i latou, o loo ia i latou ni manuaga faaleagaga, ua tuua e lē togafitia, o le a aumaia ai le faanoanoa tumau. O le a e alu atu i le feau a le Alii ia laveai i latou. Ua na o le Alii lava e mafai ona fusifusi i o latou manua faaleagaga pe a latou taliaina sauniga ia e taitai atu ai i le ola e faavavau.

I le avea ai ma se uso o le korama, se faiaoga o aiga, ma se faifeautalai, e le mafai ona e fesoasoani i tagata e toe faaleleia ni mea ua faaleagaina faaleagaga sei vagana o loo malosilou lava oe faatuatua. O lona uiga e sili atu nai lo le na ona faitau soo o tusitusiga paia ma tatalo e uiga i ai. O le tatalo vave ma le tau na ona faitau o sina mea mai tusitusiga paia ua le lava lea e sauniuni ai. O le faamautinoaga o mea o le a e manaomiaina e sau mai le fautuaga lenei mai le vaega 84 o le Mataupu Faavae ma Feagaiga: “Pe tou te mafaufau muamua foi po o a tou te fai atu; ae ia teu i o outou mafaufau e le aunoa afioga o le ola, ma o le a tuu

atu ia te outou i lea lava itula le vaega lona o le a fua atu i tagata taitoatasi.”²

E faatoa mafai ona maua lona folafolaga pe afai tatou te “teuina” ia upu o le ola e faavavau ma ia faifai soo. O le vaega o le teuina o lona mau ua i ai lava sona uiga ia te au o se mataupu o le lagonaina o se mea e uiga i upu. Mo se faataitaiga, a ou alu e taumafai e fesoasoani i se tagata ua femoumouai lona faatuatua e uiga i le valaauga paia o le Perofeta o Iosefa Samita, e toe oo mai ni lagona ia te au.

E le o na o upu mai le Tusi a Mamona. O se lagona o le faamautinoaga o le upumoni lea e sau mai soo se taimi ou te faitau ai i ni laina fou mai le Tusi a Mamona. E le mafai ona ou folafola atu o le a oo atu i tagata uma ua aafia i le masalosalo e uiga i le Perofeta o Iosefa po o le Tusi a Mamona. Peitai, ou te iloa o Iosefa Samita o le Perofeta o le Toefuataiga. Ou te iloa o le Tusi a Mamona o le

afioga a le Atua ona ua pele ia te au.

Ua ou iloa mai aafiaga e mafai ona e mauaina le faamautinoaga o le upumoni mai le Agaga ona ua oo mai ia te au. E tatau ia te oe ma au ona i ai lona faamautinoaga a o lei tuuina i tatou e le Alii i le ala o se tagata malaga tatou te alolofa i ai o lē ua faamanualiaina e fili o le upumoni.

O loo i ai foi se isi sauniuniga e tatau ona tatou faia. O se uiga faaletagata ina ia faamausaliina i tiga o isi. O le tasi lona o mafuaaga na ala ai ona faia e le Faaola le tele naua o mea e faamatala ai Lana Togiola ma Lona tauaveina i Ona lava luga o tiga ma faanoanoaga o fanau uma a lo tatou Tama Faalelagi ina ia Ona iloina le auala e fesoasoani ai ia i latou.

E oo lava i e sili ona umiaina le perisitua a le Tama Faalelagi i la le tino, e le faigofie ona latou mauaina lona fuaataga o le alofa mutimutivale. O lo tatou faanaunaga faaletagata o



le onosai lea i le tagata e le o mafai ona vaaia le upumoni lea e matua faigofie lava ona tatou vaaia. E tatau ona tatou faaeteete ina nei faauigaina lo tatou lē onosai i le tausalaga po o le teenaina.

A tatou saunia e tuu atu se fesoa-soaniga mo le Alii ma Ana auauna i le perisitua, o loo i ai se mau e taiala ai i tatou. O loo i ai se meaalofa o le a tatou manaomiaina mo la tatou malaga, po o fea lava o le a auina atu i ai i tatou e le Alii. Sa i ai i le Samaria agalelei lena meaalofa. O le a tatou manaomiaina, ma ua tau mai e le Alii ia i tatou le auala e mafai ai ona tatou mauaina:

“O le mea lea, ou uso pele e, afai e le ia te outou le alofa mama o ni mea noa outou, ona e le uma le alofa mama. O le mea lea, ia outou fusi ai i le alofa mama, le mea ua silisili lea i mea uma, ona e iu mea uma—

“Ae o le alofa mama o le alofa le pona lea o Keriso, ma e tumau e faava-vau; ma o soo se tasi e maua ua i ai ia te ia i le aso gataaga, o le a lelei ia te ia.

“O le mea lea, ou uso pele e, ia outou tatalo atu i le Tama ma le malosi atoa o le loto, ina ia faatumulia outou i lenei alofa, lea ua ia faaee mai i luga oi latou uma o e o soo moni o lona Alo, o Iesu Keriso; ina ia mafai ona avea o outou ma atalii o le Atua; a oo ai ina afio mai o ia o le a tatou faapei o ia, ona o le a tatou vaai ia te ia e pei ona i ai o ia, tau ina ia tatou maua lenei faamoe-moe, tau ina ia mafai ona faamamaina i tatou e pei lava ona mama o ia.”³

Ou te tatalo ina ia mafai ona tatou saunia i tatou lava e tuu atu soo se auaunaga faaleperisitua e ono tuu mai e le Alii ia i tatou i la tatou malaga faaletino. I le suafa paia o Iesu Keriso, amene. ■

FAAMATALAGA

1. Luka 10:33–35.
2. Mataupu Faavae ma Feagaiga 84:85.
3. Moronae 7:46–48.



Saunia e Peresitene Thomas S. Monson

O Leoleo Mamoe Moni

E taliina e faiaoga o aiga le tele o tatalo ma faatagaina i tatou e vaaitino i suiga ia e mafai ona tutupu i olaga o tagata.

O le po nei i le Nofoga Autu mo Konafesi i le Aai o Sate Leki faapea ai ma nofoaga mamao ma lata mai ua potopoto ai i latou o loo umiaina le perisitua a le Atua. E moni lava o outou “o se au perisitua tautupu”—o “se tupulaga filifilia,” e pei ona tautino mai e le Aposetolo o Peteru.¹ Ua faamamaluina lava au e maua le avanoa e lauga atu ai ia te outou.

A o ou tuputupu ae, o taumafanafana uma lava e malaga ai lo matou aiga i le Provo Canyon, pe tusa ma le 45 maila (72 km) i saute ma faasasasasa teisi i sasae o le Aai o Sate Leki, lea matou te nonofo ai i le tamai fale o le matou aiga mo ni nai vaiaso. Sa naunau lava matou o tama e o e fagogota i le vaitafe pe o e aa, ma e matou te taumafai lava e faaoso lo matou tama e faasaoasaoa teisi le taavale. I na aso, o le taavale lea sa ave e lo’u tama o se taavale tuai o le 1928. Afai e sili atu ma le 35 maila (56 km) i le itula, e fai i ai lo’u tina, “Faalemu! Faalemu!” Ae ou te fai i ai, “Oomi tele le vae penisini, Tama! Oomi tele!”

E ave lava e Tama le taavale pe tusa ma le 35 maila i le itula i le malaga atoa e tau i Provo Canyon pe seiloga foi matou te tau atu i se pi’oga o le au-ala, ma pe taofia foi le matou malaga e se lafu mamoe. Matou te matamata a

o solo ane le faitau selau o mamoe i o matou luma, e foliga mai e aunoa ma se leoleo mamoe, ni nai taifau o loo ou atu ia i latou a o latou solo atu. I le pito lava i tua sa mafai ona matou iloa atu ai le leoleo mamoe i luga o lana solofanua—e leai se faagutu ae sa na o se maea na nonoa i lona gutu. Sa ia nofo faano’uno’u pei e tautulemoe i lona nofoa, ona e talu ai sa iloa e le solofanua le ala e alu i ai ma o loo faia e taifau na ou le galuega [o le taiialaina o mamoe].

E ese mai la pe a faatusatusa atu i le vaaiga lea na ou vaaia i Munich, Siamani, i le tele o tausaga ua mavae. O se taeao o se Aso Sa, sa matou malaga atu i se konafesi a faifeautalai. A o ou vaavaai atu i fafo o le faamalama o le taavale a le peresitene o le misiona, sa ou vaaia ai se leoleo mamoe ma se too-too i lona lima, o *taitaiina* ia mamoe. Sa latou mulimuli ia te ia po o fea lava e alu i ai. Afai e agai i le agavale, latou te mulimuli ia te ia i le agavale. Afai e agai o ia i le taumata, latou te mulimuli ia te ia i lona itu. Sa ou faia se faatusatusaga i le va o le leoleo mamoe moni sa taitaia ana mamoe ma le leoleo mamoe sa tietie faasamasamanoa atu i tua o ana mamoe.

Sa fetalai Iesu, “O au nei o le leoleo mamoe lelei, ua ou iloa au mamoe.”² Ua Ia tuuina mai ia i tatou le



faaitaiga atoatoa o le uiga o se leoleo mamoe moni e tatau ona i ai.

Uso e, i le avea ai ma au perisitua a le Atua, ua i ai ia i tatou se tiutetauave faaleoleo mamoe. O le poto o le Alii ua saunia ai ni taiala ia e mafai ona avea ai i tatou ma ni leoleo mamoe i aiga o le Ekalesia, lea e mafai ona tatou auauna atu i ai, mafai ona tatou aapa atu i ai, ma mafai ona tatou molimau atu ia te i latou. O lea tiute ua ta'ua o faiaoga o aiga, ma e faatatau i le vaega lenei lea ou te fia talanoa atu ai ia te outou i le po nei.

E faafoeina e epikopo i uarota taitasi i le Ekalesia le tofaina o i latou e umia le perisitua e avea ma faiaoga o aiga e asiasi atu i aiga o tagata o le Ekalesia i masina taitasi. Latou te o atu i paga. I nofoaga e mafai ai, o se alii

talavou lea e ositaulaga po o se aoao i le Perisitua Arona e soa ma se tagata matua o loo umiaina le Perisitua Meki-sateko. Pe a la o atu i aiga o i latou ua atofa atu ia te i laua, o lē o umiaina le Perisitua Arona e tatau ona auai i le aoaoga o loo faia. O se tofiga faapena o le a fesoasoani lea e saunia nei alii talavou mo misiona faapea ai foi ma auaunaga faaleperisitua i le olaga atoa.

O le polokalama o faiaoga o aiga o se tali lea i faaaliga o aso nei ua faatagaina ai i latou ua faauuina i le perisitua “e aoao atu, faamalalalama atu, apoapoai atu, papatiso atu, . . . ma asiasi atu i fale o tagata taitoatasi o le ekalesia, ma apoapoai atu ia te i latou ia tatalo atu ma le leo ma i le mea lilo ma faasaga atu i tiute uma faaleaiga, . . . leoleo . . . i luga o le ekalesia e le aunoa, ma faatasi ma faamalosi i latou; ma vaai ia leai se amioletonu i totonu o le ekalesia, po o se faitagai ma le tasi, po o se pepelo, faatuaupua, po o se tautala leaga.”³

Sa apoapoai mai Peresitene Tavita O. MaKei: “O faiaoga o aiga o se tasi lea o o tatou avanoa sili ona manaomia ma sili ona tauia e faafai-lele ma musuia ai, e fautua ma taitai ai le fanau a lo tatou Tama. . . [O se] auaunaga paia, o se valaauga paia. O lo tatou tiute o ni Faiaoga o Aiga o le molioo atu lea o le . . . agaga i aiga ma loto uma. O le fiafia i lenei galuega ma le faia o le mea sili tatou te mafaia o le a aumaia ai le filemu lemafuaiaina, olioli ma le faamalieina i [se faiaoga malualii] ma tuuto o fanau a le Atua.”⁴

Mai le Tusi a Mamona tatou te faitau ai e faapea “sa faauu [e Alema] o latou faitaulaga uma ma o latou aoao uma; ma sa leai ni isi na faauuina vagana ai o i latou o ni tagata amiotonu.

“O lea, sa latou leoleo [ai] i luga o lo latou nuu, ma fafaga i latou i mea tau le amiotonu.”⁵

I le faatinoina o o tatou tiutetauave o faiaoga o aiga, tatou te atamamai pe afai tatou te iloaina ma malamalama i luitau o tagata o aiga taitasi, ina ia mafai ai ona tatou mataalia i le aoao atu ma le tuuina atu o fesoasoaniga manaomia.

E atili faamanuiaina foi se asiasiga a faiaoga o aiga pe afai e logo mamao [i aiga] se asiasiga. Ina ia faamanino lenei manatu, sei ou faasoa atu lava ia te outou se aafiaga na ou maua i nai tausaga ua mavae. O le taimi lena sa i ai i le Komiti Faatonu a Faifeautalaila Spencer W. Kimball, Gordon B. Hinckley, ma Thomas S. Monson. O se tasi afiafi sa talimalo ai Brother ma Sister Hinckley i se ‘aiga o le afiafi i lo la maota mo sui o le komiti ma o latou faletua. Faatoa maea lava se taumafataga matagofie ae tuitui mai le faitotoa. Sa tatala e Peresitene Hinckley le faitotoa ma maua ai se tasi o ana faiaoga o aiga o loo tu ai iina. Sa fai mai le faiaoga o aiga, “Ou te iloa ou te lei faia se taimi atofaina ou te sau ai, ma e ma te le o o mai faatasi foi ma la'u soa, ae ua ou lagona ua tatau ona ou sau i le po nei. Ou te leiloaina o le a e talimalo i ni au malo asiasi.”

Sa valaaulia ma le agalelei e Peresitene Hinckley le faiaoga o aiga e susu mai i totonu ma nofo i lalo ma aoao ia Aposetolo e toatolu ma o latou faletua e faatatau i lo tatou tiute o ni tagata o le ekalesia. Faatasi ai ma sina atuatuvaletu teisi, sa faia ai e le faiaoga o aiga le mea sili na ia mafaia. Sa faafetai i ai Peresitene Hinckley mo lona susu mai, ae ina ua maea na tele'a'i atu o ia i fafo.

Ou te fia ta'ua se tasi foi faaitaiga o le ala le sa'o o loo faataunuu ai asiasiga a faiaoga o aiga. Sa masani ona faamatala e Peresitene Marion G. Romney, lea sa avea ma se fesoasoani i le Au Peresitene Sili i nai tausaga ua mavae, le tala e uiga i lana faiaoga o



Au Pulega Aooa o Le Ekalesia a Iesu Keriso o le Au Paia o Aso e Gata Ai

O LE AU PERESITENE SILI



Henry B. Eyring
Fesoasoani Muamua



Thomas S. Monson
Peresitene



Dieter F. Uchtdorf
Fesoasoani Lua

O LE KORAMA A APOSETOLO E TOASEFULULUA



Boyd K. Packer



L. Tom Perry



Russell M. Nelson



Dallin H. Oaks



M. Russell Ballard



Richard G. Scott



Robert D. Hales



Jeffrey R. Holland



David A. Bednar



Quentin L. Cook



D. Todd Christofferson



Neil L. Andersen

O LE AU PERESITENE O FITUGAFULU



Ronald A. Rasband



L. Whitney Clayton



Donald L. Hallstrom



Tod R. Callister



Richard J. Maynes



Craig C. Christensen



Ulisses Soares

O LE KORAMA MUAMUA A FITUGAFULU

(i le faasologa faaalafapeta)



Marcos A. Adlakonis



Jose L. Alonso



Carlos H. Amado



Ion S. Ardem



Mervyn B. Arnold



David S. Baxter



Shyne M. Bowen



Craig A. Cardon



Yoon Hwan Choi



Don R. Clarke



Carl B. Cook



Lawrence E. Condrige



Claudio R. M. Costa



Leonard R. Curtis Jr.



Benjamin De Hoyos



Edward Dube



Kevin R. Durcan



Larry J. Echo Hawk



Stanley G. Ellis



David L. Evans



Enrique R. Fabbello



Eduardo Gavarret



Robert C. Gny



Carlos A. Gobby



Christoffel Golden



Gerrit W. Gong



Walter F. Gonzalez



C. Scott Grow



James J. Hamula



Daniel L. Johnson



Paul V. Johnson



Patrick Keenan



Erich W. Kopischke



Marcus B. Nash



S. Gifford Nielsen



Brent H. Nielson



Allan F. Packer



Kevin W. Pearson



Anthony D. Perkins



Paul B. Pieper



Rafael E. Pino



Bruce D. Poner



Dale G. Reilund



Michael T. Ringwood



Lynn G. Robbins




Joseph W. Sitrati



Steven E. Snow



Michael John U. Teh



Jose A. Teixeira



Juan A. Uceda



Wilford W. Andersen



Koichi Aoyagi



Randall K. Bennett



J. Devin Cornish



Timothy J. Dyches



Bradley D. Foster



O. Vincent Hildeck



Kevin S. Hamilton



Larry R. Lawrence



James B. Martino



Jaro Mazzagari



Adrian Ochoa



Gregory A. Schwitzer



Terence M. Vinson



Larry Y. Wilson



Arnulfo Valenzuela



Francisco J. Vinas



W. Christopher Wardell



William R. Walker



Scott D. Whiting



Kazuhiko Yamashita



Jorge F. Zeballos



Claudio D. Zvic



W. Craig Zwick

O LE KORAMA LUA A FITUGAFULU

(i le faasologa faaalafapeta)



Bruce A. Carlson



Per G. Malm



Kent F. Richards



Gary E. Stevenson



Bern M. Davies



Fesosoani Luu

**O LE AU EPIKOPO
PULEFAAMALUMALU**



Gerald Causse



Epikopo Pulefaamalumalu



Fesosoani Luu



Faasalalauga o le konafesi aoao, i upu a Peresitene Thomas S. Monson, ua oo atu i le "salafa o konetineta i tagata i soo se mea." Ata na pueina mai le agavale pito i luga e faasolo i le taumatau, o tagata o le ekalesia ma faifeautalai i Roma, Italia; Cavite, Filipaina; Lima, Peru; Colleyville, Texas; Foz do Iguaçu, Pasila; Lonetona, Egelani; Arraiján, Panama; ma Lyon, Farani.




aiga lea sa i ai se taimi na alu atu ai i le maota o Romney i se po malulu lava. Sa ia uuina lava lona pulou ma sa popole lava ina ua valaaulia e alala i lalo ma tuu atu lana savali. A o ia tu ai lava, sa ia fai atu, “Ia, ou te faapea atu Brother Romney, ua malulu lava fafo, ma o loo faaolaola pea lau taavale ina ne’i te’i ua pe. Sa na ona ou afe mai ina ia mafai ai ona ou ta’u atu i le epikopo ua uma ona fai la’u asiasiga.”⁶

Ona saunua mai lea o Peresitene Ezra Taft Benson, ina ua uma ona faamatala mai le aafiaga o Peresitene Romney i se fonotaga a le au perisitua, “E mafai ona tatou faia e sili atu i lo lena, uso e—matua sili atu lava!”⁷ Ou te ioe foi i ai.

O asiasiga a faiaoga o aiga e sili atu nai lo le tau na ona faataunuu o se asiasiga e faatasi i le masina. O la tatou tiutetauave o le aoao atu, ia musuia, ia uunaia, ma i nofoaga o loo tatou asia ai i latou e le toaaga mai, ia aumai i le Lotu ma, i le faaeaga mulimuli o atalii ma afafine o le Atua.

Ina ia fesoasoani i a tatou taumafaiga, ou te faasoa atu ai lenei fautuaga atamai lea e mautinoa lava e faatatau i faiaoga o aiga. E aumai ia Abraham Lincoln, le sa fai mai: “Afai e te manao e auai mai se tagata i le mea e te i ai, ia faatalitonu muamua lava o ia o oe o lana uo moni.”⁸ Sa augani mai Peresitene Ezra Taft Benson: “E sili atu i lo mea uma, ia avea oe ma se uo moni i tagata ma aiga e te aoaoina. . . . O se uo, na te faia e sili atu nai lo se asiasiga faaletiute i masina taitasi. O se uo, e sili atu ona atugalua e fesoasoani i tagata nai lo le makaina ua uma lana asiasiga. O se uo, e popole. O se uo, e [faaali atu le alofa]. O se uo, e faalogo, ma o se uo, e aapa atu.”⁹

E taliina e faiaoga o aiga le tele o tatalo ma faatagaina i tatou e vaaitino i suiga ia e mafai ona tutupu i olaga o tagata.



O se faaitaiga o lenei mea o Dick Hammer, o le na sau i Iuta ma le polokalama o le Faasao ma Atina’e a le Malo i le taimi o le Pa’u Tele o le Tamaoaiga. Sa feiloai o ia ma faaipopo atu i se tamaitai talavou o le Au Paia o Aso e Gata Ai. Sa ia tatalaina le Dick’s Café i St. George, Iuta, lea sa avea ma se nofoaga lauiloa e feiloai ai.

Sa tofia e avea ma faiaoga o aiga mo le Aiga o Hammer ia Willard Milne, o sa’u uo. Talu ai ou te iloina foi ia Dick Hammer, ona ou te lolomiina lisi o meaai mo lana faleaiga, ou te fesili ai lava i la’u uo o Uso Milne pe a ou asiasi atu i St. George, “O a

mai le ta uo o Dick Hammer?”

O le tali masani lava, “O loo agai lava i luma, ae lemu.”

A asiasi atu ia Willard Milne ma lana soa i le aiga o Hammer i masina taitasi, la te tuu atu lava i taimi uma se savali o le talalelei ma faasoa atu a la molimau ia Dick ma lona aiga.

Sa mou atu tausaga, ona oo lea i se tasi aso, sa telefoni mai Willard ia te au e tau mai se tala fiafia. “Brother Monson,” na ia amata ta’u mai, “Ua liua ia Dick Hammer ma o le a papatisoina. Ua i ai o ia i lona vaiatau 90 tausaga, ma sa ma faauo i lo ma olaga atoa o ni tagata matutua. Ua mafanafana lava



lo'u loto i lana faaiuga. Ua avea au ma ana faiaoga o aiga mo le tele o tausaga." Sa taumelo tagi mai Willard a o ia faamatala mai lana savali fiafia.

Sa papatiso moni lava ia Uso Hammer ma i se tausaga mulimuli ane na ulufale atu ai i le Malumalu matagofie o St. George ma maua ai iina ona faaeega paia ma faamanuiaga o le faamauga.

Sa ou fesili atu ia Willard, "Pe sa e lotovaivai ea i le avea ai ma ona faiaoga o aiga mo se taimi umi?"

Sa ia tali mai, "Leai, sa tauia ia taumafaiga uma lava. Ao ou molimauina le olioli lea ua oo mai i tagata o le aiga o Hammer, ua faatumulia lava lou loto i le faafetai mo faamanuiaga o le talalelei ua oo mai i o latou olaga ma le avanoa ua ou maua e fesoasoani atu ai i nisi auala. Ua ou fiafia lava."

Uso e, o le a avea ma o tatou faamanuiaga i le gasologa o tausaga le asiasi atu ma aoao le toatele o tagata—i latou o e e le toaaga mai faapea ai foi ma i latou ua tuuto atoatoa. Afai tatou te magafagafa totoa i la tatou valaaua, o le a tatou maua le tele o avanoa e faamanuiaina ia ia olaga. O a tatou asiasiga ia i latou o e ua faataumamao i latou lava mai le toaaga i le Lotu e mafai ona avea ma ki lea o le a mulimuli ane matala ai le faitotoa mo lo latou toe foi mai.

Faatasi ai ma le manatuaina o lenei

mea, sei o tatou aapa atu ia ia i latou ia e nafa ma i tatou ma aumai i latou i le la'oai o le Alii ina ia taumamafa i Lana afiga ma olioli i le mafutaga a Lona Agaga, ma ia "le toe [avea ai ma] tagata ese po o e ua aumau, a ua nuu faatasi ma le au paia, o le aiga foi o le Atua."¹⁰

Afai o i ai nisi o outou ua faaleano ma lē mamafa ia te outou ia asiasiga a faiaoga o aiga, ou te faapea atu, e leai se isi taimi e pei o le taimi lenei e toe tuuto atu ai oe lava ia e faataunuu ou tiute o se faiaoga o aiga. Ia filifili nei e faia soo se taumafaiga talafeagai e aapa atu ai ia i latou ua tuu atu le tiutetauave ia te oe e vaai. E i ai taimi atonu e manaomia ai foi sina uunai teisi faaopoopo, e fesoasoani ai i lau soa o faiaoga o aiga ia maua se taimi lua te o faatasi ai, ae afai o loo e nau-nautai, o le a faamanuiaina oe.

Uso e, o a tatou taumafaiga o faiaoga o aiga e faifai pea. O le a le muta lava le galuega seiloga e fetalai lo tatou Alii ma le Matai, "Ua lava." O loo i ai ni olaga e fia faaleleia. O loo i ai ni loto e fia pā'ia. O loo i ai ni agaga e fia laveai mai. O lo tatou avanoa paia lenei e faaleleia, ia pa'i atu, ma ia laveai mai i latou o agaga faapelepele ua faatuatua ina i tatou e vaai. E tatau ona tatou faia ma le faamaoni faatasi ai ma loto e faatumulia i le fiafia.

I le faaiuga, ou te liliu atu ai i se

faataitaiga patino e faamatala ai le itu-aiga o faiaoga o aiga e tatau ona avea ai i tatou. O loo i ai se Faiaoga e silisili Lona soifua nai lo tagata uma. Sa Ia aoao mai le ola ma le oti, le tiute ma le taunuuga. Sa Ia soifua ina ia le tautua-ina ae ia auuuna atu, ia le maua mai ae ia foai atu, ia le faasoina Lona ola ae ia ositaulagaina mo isi. Sa Ia faamatalaina se alofa e sili atu ona matagofie nai lo le tuinanau, se mativa e mauoa atu i lo oa. Sa faamatalaina lenei Faiaoga e faapea na Ia aoao atu ma le pule ae le pei ona faia e le au tusiupu.¹¹ O Ana tulafono sa lei vaneina i luga o maa ae o luga o loto o tagata.

Ou te talanoa atu e uiga i le Faiaoga Sili, o Iesu Keriso, le Alo o le Atua, le Faaola ma le Togiola o tagata uma. O le tala faatusi paia e uiga ia te Ia, o Ia "sa femaliuiai ma agalelei."¹² Ia te Ia i le avea ai ma o tatou taiala lemafaatoilaloina ma faataitaiga, o le a tatou agavaa ai mo Lana fesoasoani paia i a tatou asiasiga a faiaoga o aiga. O le a faamanuiaina ia olaga. O le a faamafanafanaina ia loto. O le a laveai-ina ia agaga. O le a avea i tatou ma ni leoleo mamoe moni. Tau ina ia tatou faia faapea, ou te tatalo ai i le suafa o lena Leoleo Mamoe sili, o Iesu Keriso, amene. ■

FAAMATALAGA

1. 1 Peteru 2:9.
2. Ioane 10:14.
3. Mataupu Faavae ma Feagaiga 20:42, 47, 53–54.
4. Tavita O. MaKei, i le *Priesthood Home Teaching Handbook*, rev. ed. (1967), ii, iii.
5. Mosaea 23:17–18.
6. Siina mai ia Marion G. Romney, lauga na tuu atu i se Semina a le Au Perisitua mo Faiaoga o Aiga, Aok. 9, 1963.
7. Ezra Taft Benson, "I Faiaoga o Aiga o le Ekalesia," *Liahona*, Iul. 1987, 50.
8. Abraham Lincoln, in David Decamp Thompson, *Abraham Lincoln, the First American* (1895), 226.
9. Ezra Taft Benson, *Ensign*, May 1987, 50.
10. Efeso 2:19.
11. Tagai Mataio 7:28–29.
12. Galuega 10:38.



Saunia e Peresitene Henry B. Eyring
Fesoasoani Muamua i le Au Peresitene Sili

I Fanau a La'u Fanau

E i ai se poloaiga aoao e tasi o le a fesoasoani ia i tatou e faafetaiaia ai luitau ma taitai atu ai i le fatu o se olaga fiafia faaleaiga.

O le tausaga lenei o le a faaiipoipo ai le toalua muamua o le fanau o le ma fanau. I totonu o nai tausaga pe a ma le toa 10 o o laua tausoga e masalo o le a oo foi i se taimi o o latou olaga o le a latou mulimuli atu i le lalolagi matagofie o le atiina ae o ni aiga.

O lena vaaiga matagofie ua mafua ai ona ou mafaufau loloto ina ua latou fesili mai ia te a'u mo ni fautuaga. O le mea moni lava sa latou fesili mai, "O a filifiliga e mafai ona ou faia o le a taitai atu ai a'u i le fiafia?" Ae o le isi itu, "O a filifiliga e ono taitai atu ai a'u i le le fiafia?"

Ua faia e le Tama Faalelagi i tatou taitoatasi ia tulaga ese. E leai ni tagata se toalua o i tatou e tutusa lelei aafiaga. E leai ni aiga se lua e tutusa lelei. E le o se mea la e faateia ai le faapea, o fautuaga i auala e filifili ai le fiafia i le olaga faaleaiga e faigata ona tuuina atu. Ae ua faatulagaina e se Tama Faalelagi alofa le alāfua e tasi e tau atu i le fiafia mo Ana fanau uma. Po o a lava o tatou tulaga patino po o a foi o tatou aafiaga, ua na o le tasi lava le fuafuaga o le fiafia. O lena fuafuaga o le mulimuli lea i poloaiga uma a le Atua.

Mo i tatou uma, e aofia ai le fanau a la'u fanau o loo mafaufau e faaiipoipo, e i ai se poloaiga aoao e tasi o le a fesoasoani ia i tatou e faafetaiaia ai luitau ma taitai atu ai i le fatu o se olaga fiafia faaleaiga. E faatatau i mafutaga uma e tusa lava po o a tulaga. Ua faafia ona ta'uina mai i tusitusiga paia ma i aoaoga a perofeta o o tatou aso. O le faaupuina lenei e le Tusi Paia o le fautuaga a le Alii ia i latou uma o e mananao e nonofo faatasi e faavavau i le alofa ma le fiafia:

"Ona fesili faatofotofo mai ai lea ia te ia o so latou, o le aoao tulafono, ua faapea mai,

"Le aoao e, o le fea poloaiga o i le tulafono ua sili?

"Ona fetalai atu ai lea o Iesu ia te ia, E te alofa atu i le Alii lou Atua ma lou loto atoa, ma lou agaga atoa, ma lou manatu atoa.

"O le poloaiga muamua lena ma le sili.

"E faapena foi lona lua, E te alofa atu i le lua te tuaoi, ia pei o oe lava ia te oe.

"O na poloaiga e lua ua autu ai le tulafono uma ma le au perofeta."¹

Mai lena faamatalaga faatauvaa e le faigata ai ona aotele mea uma ua ou

aoaoina, po o a filifiliga e taitai atu ai i le fiafia i aiga. Ou te amata i le fesili, "O a filifiliga ua taitaiina atu ai a'u i le alofa i le Alii ma lo'u loto atoa ma lo'u agaga ma lo'u manatu atoa?" Mo a'u, o le filifili lea e tuu au lava i le tulaga lea na ou lagonaina ai le olioli i le faamagaloga e ala i le Togiola a le Alii.

I tausaga ua mavae sa ou papatisoina ai se alii talavou i Albuquerque, Niu Mekisiko, o le sa ma aoaoina ma la'u soa faifeautalai. Sa ou faatofuina le alii talavou i lalo o le vai ma toe faatu a'e i luga. Atonu sa toeitiiti a tutusa lelei o ma uumi, aua sa tautala tonu mai lava o ia i lo'u taliga. Faatasi ai ma vai mai le faatanoa ma loimata sa tafe ifo i ona foliga faapea ma le olioli i lona leo, sa ia fai mai ai, "Ua ou mamā, ua ou mamā."

Na ou vaaia foi na lava loimata o le fiafia i fofoga o se tasi na toe faamatalaina saunoaga a se Aposetolo a le Atua. Sa saunoa atu [le aposetolo] ia te ia, i le maea ai o se faatalanoaga agalelei ma le mae'ae'a, "Ou te faamagaloina oe i le suafa o le Alii. O le a Ia faamagaloina oe i Lana lava taimi ma i Lana lava ala." Ma sa Ia faia.

Ua ou iloa le mafuaaga e mafai ai e le Alii ona fetalai mai e faapea, a faamagaloina agasala na te le toe manatuaina lava. E ala i le mana o le Togiola, na faafouina ai tagata ou te iloa lelei, ma na soloi ese ai aafiaga o le agasala. Ua tumu lo'u loto i le alofa mo le Faaola ma le Tama aga-alofa na aumaia o Ia.

O lena faamanuiaga sili ua oo mai e ala i le uunaia o tagata ou te alofa i ai, ina ia o atu i le Faaola mo le toomaga mai tiga, o se toomaga lea ua na o Ia lava e mafai ona tuuina mai. O le pogai lena ou te manaomia ai i latou ou te alofa i ai e talia ma ia faalauteleina valaauga uma e tuuina atu ia i latou i le Ekalesia. O lena filifiliga o se tasi o ki maoae i le fiafia faaleaiga.

O atuatuvalega i tulaga uma o le olaga e mafai ona faaososoina ai i tatou e teena pe tiutamala i valaauga e auuauna atu i le Faaola. O lona mea e mafai ona tuu ai i tatou i le matautia faaleagaga mo i tatou lava, o tatou taitoalua, ma o tatou aiga. O nisi o na valaauga e pei e foliga mai e le taua, ae o *lou* olaga, ma lo'u aiga, na suia mo le lelei ona o lo'u taliaina o se valaauga e aoao se korama a le au tiakono. Sa ou lagonaina le alofa o na tiakono mo le Faaola ma Lona alofa mo i latou.

Ua ou vaai o tupu lona mea i le soi-fuaga o sē na avea muamua ma peresitene o se siteki ma peresitene o se misiona, i lona valaauga ia te ia e avea ma faufautua i se korama a le au aoao. Ou te iloa se isi sa avea ma se epikopo sosoo ai ma le avea ma se Fitugafulu Eria, sa faaaogaina e le Alii e fesoasoani i se tama i se korama o le au aoao, o le sa manu'a i se faalavelave. O vavega mai lona auuaunaga sa pai atu i le tele o

olaga, e aofia ai ma lou olaga, ma faateleina ai lo latou alolofa i le Faaola.

A o auuauna atu i isi, atonu tatou te augani atu mo le mafutaga a le Agaga Paia. O le faamanuiaina i le galuega a le Alii e maua ai i taimi uma vavega e sili atu nai lo o tatou lava malosi. O le mātua o loo feagai ma se tamaitiiti e matuai faalogogata lava ua iloa e moni lea mea, e pei o le faiaoga asiasi na talanoa atu i ai se tamaitai e saili se faamafanafanaga ina ua ta'u atu i ai e lana tane o le a ia tuua o ia. Ua faafetai nei auuauna e toalua ona sa la tatalo i lona taeao i le Alii ina ia auina mai le Agaga Paia e avea ma se soa.

E na o le mafutaga lava a le Agaga Paia e mafai ona tatou faamoemoe i ai ia tasi ai o se paaga tutusa i se faaipopoga e saoloto mai feeseeseaiga. Ua ou vaai le taua tele o lona mafutaga e maua ai le fiafia i se faaipopoga. O le vavega o le tasi [o le loto] e manaomia ai le fesoasoani a le lagi, ma e umi

se taimi e alu ai. O la tatou sini o le nonofo faatasi e faavavau i le afioaga o le Tama Faalelagi ma lo tatou Faaola.

O lo'u tama ma lo'u tina sa matuai eseese lava le tasi mai le isi. O lo'u tina o se tagata pese ma se tusiata. O lo'u tama sa fiafia i le kemisi. I se tasi taimi i se konaseti faamusika, sa faateia lo'u tina ina ua tulai lo'u tama ma amata ona tuumuli a o le'i amata ona patipati le aumaimoa. Sa fesili i ai lo'u tina po o fea a alu i ai. O lana tali sa mama atoatoa: "Ia ua uma, a ea?" Sa na o le faatosinaga malū a le Agaga Paia sa uunaia ai o ia e auai atu iina faatasi ma ia, ma toe avatu ai o ia i nisi taimi se tele mulimuli ane.

Sa nofo lo'u tina i New Jersey mo le 16 tausaga ina ia mafai ona tasi e lo'u tama le aiga e ala i le faiga o suesuega ma faiaoga i le kemisi. Mo ia, o se ositaulaga le nofo ese mai lona tina ua oti lana tane ma lona uso e le'i faaipopo, o le na tausia o ia i le fale tuai o le aiga i le faatoaga. Sa maliliu uma i la'ua a o nofo mamao Tina i New Jersey. Na o le pau na o taimi na ou vaai ai o tagi lo'u tina.

O tausaga mulimuli ane na ofoina atu ai i lo'u tama se galuega i Iuta. Sa ia toe fesili atu i lo'u tina, ma le mama atoatoa, "Mildred, e te manatu o le a le mea e tatau ona ou faia?"

Na fai atu o ia, "Henry, fai le mea e te manatu e sili ona lelei."

Sa ia teena le ofo. O le taeao na sosoo ai, sa ia tasi atu ai ia te ia se tasi lea maimau pe ana i ai pea ia te a'u. Ou te manatua sa ia tau atu ia te ia, "Aua e te tatalaina ii. Alu i le ofisa ma tatala ai iina." Sa amataina i se aoaiga. Sa ia folafola atu ia te ia i tausaga na muamua atu, afai na te mafaia, o le a ia aveina atu o ia ia latalata atu i lona aiga. Sa faateia o ia i le faaalua o le le fiafia [o lo'u tina]. Na te le'i manatuaina le faanaunaga o lona loto. Sa faavave ona ia auina atu se feau ia talia le ofo



mo le galuega.

Sa ia faapea atu, “Mildred, aisea na e le ta’ua mai ai ia te a’u?”

Na fai mai o ia, “Sa tatau ona e manatua.”

Sa masani ona ia ta’ua lona filifiliga e masii atu i Iuta, o lana lava filifiliga, ae le taitai faapea o se ositaulaga o lana matata faalegaluega. Sa la maua le vavega o le tasi [o le loto]. Semanu e lelei atu pe ana faamanatu ia Tama e le Agaga Paia le folafolaga sa ia faia i tausaga na muamua atu. Ae sa ia faatagaina le Agaga Paia e faamaluluina lona loto ina ia avea le filifiliga a [Tina] ma ana [filifiliga].

Ua i ai i le Tama Faalelagi le muai vaaiga atoatoa, silafia i tatou uma taitoatasi, ma silafia o tatou lumanai. Ua Ia silafia faafitauli o le a tatou uia. Na Ia auina mai Lona Alo e puapuagatia ina ia Ona silafia le ala e fesoasoani ai ia i tatou i o tatou tofotofoga uma.

Ua tatou iloa o loo i ai fanau agaga a le Tama Faalelagi i lenei lalolagi, o e o nisi taimi e filifili ai le agasala ma le le fiafia tele. O le pogai lona na Ia auina mai ai Lana Ulumatua e avea ma o tatou Togiola, o le faatinoga silisili o le alofa i le foafoaga uma. O le mafuaaga lona e ao ai ona tatou faamoemoeina o le a manaomia le fesoasoani a le Atua ma le taimi e faaleleia ai i tatou mo le ola e faavavau, e nonofo faatasi ma lo tatou Tama.

O le olaga i aiga o le a tofotofoina ai i tatou. O le tasi lona o faamoemoe o le Atua i le tuuina mai ia i tatou o le meaalofo o le olaga i le tino—ia faamalosi ai i tatou e ala i le ui atu i tofotofoga. O lona mea o le a faapitoa ona moni i le olaga faaleaiga, lea o le a tatou maua ai le olioli tele ma le faanoanoa tele ma luitau, lea atonu e i ai taimi e foliga mai e le mafai e lo tatou malosi ona onosaia.

Na saunoa mai Peresitene George Q. Cannon e uiga i le ala ua



saunia ai e le Atua oe ma a’u ma a tatou fanau mo tofotofoga o le a tatou fetaiai: “E leai se tasi o i tatou e le’i faasafuaina mai i ai le alofa o le Atua. E leai se tasi o i tatou Na te le’i tausia ma faapelepele i ai. E leai se tasi o i tatou e le’i finagalo o Ia e laveai, ma le’i fuafuaina se ala e laveai ai. E leai se tasi o i tatou e le’i tuuina mai i ai e Ia Ana agelu e vaaia. Atonu tatou te faatauvaa ma faaletonu i la tatou lava vaai, ma i le matau a isi, ae e tumau pea le mea moni e faapea, o i tatou o fanau a le Atua, ma ua Ia tuuina moni mai Ana agelu—o tagata e le vaaia e malolosi ma mamana—e nafa ma le vaaiga o i tatou, ma o loo latou vaaia i tatou ma puipua i tatou.”²

O le mea na aoao mai e Peresitene Cannon e moni. O le a outou manaomia lona fesoasoani, e pei ona ou manaomiaina ma faalagolago i ai.

Na ou tatalo ma le faatuatua ina ia saili ma lagona e se tasi ou te alofa i ai le mana o le Togiola. Na ou tatalo ma le faatuatua ina ia oo mai ni agelu tagata e fesoasoani ia i latou, ma sa latou oo mai.

O loo i ai i le Atua se auala ua fuafuaina e laveai ai Ana fanau taitoatasi. Mo le toatele, o lona mea e aofia ai le tuuina i se uso po o se tuafafine po o matua matutua o e alolofa ia i latou e tusa lava po o a mea latou te faia.

I tausaga ua mavae sa faamatalaina e sau uo lona tinamatua. Sa soifua o ia i se olaga amiotonu, sa faamaoni e le aunoa i le Alii ma Lana Ekalesia.

Ae o se tasi o atalii a sana tama sa filifilia se olaga solitulafono. Sa iu ina faafalepuipuiina o ia. Sa faamatala e la’u uo e faapea o lona tinamatua, a o alu atu lana taavale i le alatanu e asi le tama a lana tama i le falepuipui, sa maligi ona loimata a o tatalo o ia ma le tiga, “Sa ou taumafai e ola i se olaga lelei. Aisea, aisea ua ou maua ai lenei tamaitiiti faigata o lē e foliga mai ua faaleagaina lona olaga?”

Na oo mai le tali i lona mafaufau i upu nei: “Sa ou tuuina atu o ia ia te oe ona e mafai ma o le a e alofa ia te ia e tusa lava po o a mea na ia faia.”

E i ai se lesone matagofie mo i tatou uma. O le ala mo matua agalelei ma matua matutua ma auuuna uma a le Atua, o le a le faigofie i se lalolagi ua faateteleina le amioleaga. E le mafai ona tatou faamalosi fanau a le Atua e filifili le ala i le fiafia. E le mafai e le Atua ona fai lona mea ona o le faitalia ua Ia tuuina mai ia i tatou.

E alolofa le Tama Faalelagi ma Lona Alo Pele i fanau uma a le Atua e tusa lava po o a mea latou te filifili e fai po o a foi ituaiga tagata e avea ai i latou. Na totogi e le Faaola le tau o agasala uma, e tusa lava pe o le a le inosia. E ui lava e ao ona i ai le faamasino tonu, ae ua faasafua mai le avanoa mo le alofa mutimutivale lea o le a le faoa ai le faamasino tonu.

Na ta’u atu e Alema lona faamoemoe i lona atalii o Korianetona i upu nei: “O lea, e tusa ma le faamasino tonu, e le mafai ona faaunuuna o

le fuafuaga o le togiola, ua nao tulaga lava o le salamo o tagata i lenei olaga vaavaaia e mafai ai, ioe, lenei olaga vaavaaia; ona vagana ai nei tulaga, e le mafai ona aoga le alofa mutimutivale vagana ai ua ia faaumatiaina le galuega a le faamasino tonu. O lenei e le mafai ona faaumatiaina le galuega a le faamasino tonu; a faapea, po ua le toe avea le Atua ma Atua.”³

O la’u savali la i le fanau a la’u fanau, ma ia i tatou uma o loo tau-mafai e fatu ni aiga e faavavau, e faapea e mautinoa e i ai le olioli mo e faamaoni. Mai lava i le taimi a o le’i i ai le lalolagi, sa galulue se Tama oi le Lagi agaalofa ma Lona Alo Pele faatasi ma i latou o e na La’ua silafia o le a se ese. O le a alofa le Atua ia i latou e faavavau.

Ua ia te outou lena itu lelei o le iloaina na latou aoaoina le ata o le faaolataga mai aoaoga na latou maua i le lalolagi o agaga. Sa lava lo latou ma lo outou faamaoni e faatagaina ai lo outou o mai i le lalolagi lea na toatele isi sa le faatagaina.

Faatasi ai ma le fesoasoani a le Agaga Paia, o le a aumaia ai upumoni uma i lo outou manatua. E le mafai ona tatou fai faamalosi lena mea i isi, ae e mafai ona tatou faataga i latou e vaaia i o tatou olaga. E mafai ona tatou maua le lototetele mai le faa-mautinoaga e faapea, sa i ai se taimi sa tatou lagonaina uma ai le olioli o le faatasia i le avea ai ma se tasi o le aiga pele a lo tatou Tama Faalelagi. Faatasi ma le fesoasoani a le Atua e mafai ai e i tatou uma ona toe lagona lena faamoemoe ma lena olioli. Ou te tatalo ia faapena mo i tatou uma, i le suafa o le Alii, o Iesu Keriso, amene. ■

FAAMATALAGA

1. Mataio 22:35–40.
2. George Q. Cannon, “Our Pre-existence and Present Probation,” *Contributor*, Oct. 1890, 476.
3. Alema 42:13.



Saunia e Elder Dallin H. Oaks

○ Le Korama a Aposetolo e Toasefululua

Leai Ni Atua Ese

Pe o tatou auauna ea i mea ua faamuamua po o atua ese nai lo le Atua ua tatou tautino atu e tapuai i ai?

O Poloai e Sefulu o se vaega taua o faatuatuga faaKerisiano ma faalutaia. Na tuuina atu e le Atua i le fanauga a Isaraelu e ala i le perofeta o Mose, o tulafono muamua e lua e taitaia ai la tatou tapuaiga ma mea tatou te faamuamua. I le poloai muamua, ua poloai mai le Alii, “Aua nei e fai mo oe ni atua ese i ou luma” (Esoto 20:3). I seneturi mulimuli ane, ina ua fesiligia Iesu, “O le fea poloai o i le tulafono ua sili?” Na Ia fetalai mai, “E te alofa atu i le Alii lou Atua ma lou loto atoa, ma lou agaga atoa, ma lou manatu atoa” (Mataio 22:36–37).

O le lona lua o Poloai e Sefulu o loo auiliili mai ai le faatonuga ina ia aua nei i ai ni atua ese ma faailoa mai le mea e sili ona taua e tatau ona faamuamua i o tatou olaga i le avea ai ma fanau a le Atua. “Aua e te fai mo oe se tupua ua ta, po o se faatusa lava” i le lagi po o le lalolagi (Esoto 20:4). Ona toe faaopoopo mai lea i le poloai, “Aua e te ifo i ai, aua foi e te auauna i ai” (Esoto 20:5). O se tulaga e sili atu nai lo le na o le faasaina o tupua faaletino, ua tau mai ai e lenei mea le tatau ai ona faamuamua i taimi uma. Ua faamalalama mai e Ieova, “Aua o au o Ieova lou Atua, o le Atua fua, . . . ou te alofa i . . . e alofa mai ia te au, ma tausi mai i au poloai”

(Esoto 20:5–6). O le uiga o le *fua* ua manino. O lona uiga autu faaEperu “o le i ai o ni lagona maaleale ma loloto” (Esoto 20:5, vaefaamatalaga *e*). Tatou te faatiga i le Atua pe a tatou “ifo” pe “auna” i atua ese—pe a i ai foi nisi mea tatou te faamuamua.¹

I.

O a nisi mea o loo faamuamua e tagata o loo “ifo i ai” pe o “auna i ai” ua sili atu i lo le Atua—e oo lava i tagata faalelotu—i o tatou aso? Mafau-fau i filifiliga nei, e tutusa uma lava i lo tatou lalolagi:

- Tu ma aga faaleaganuu ma faaleaiga
- Faasaoga faaupufai
- Siitaga i galuega
- Meatotino faalelalogi
- Sailiga o mea faafiafia
- Pule, tautaua, ma le mamalu

Afai e e leai ma se tasi o nei faaitaitaiga e foliga mai e faatatau i soo se tasi o i tatou, masalo e mafai ona tatou fautuaina mai nisi o faaitaitaiga e faatatau ia i tatou. E sili atu le taua o le mataupu faavae nai lo faaitaitaiga a tagata taitoatasi. O le mataupu faavae e le o faapea mai pe ua i ai nisi mea ua tatou faamuamua. O le fesili o loo tuuina mai e le poloai lona

lua o le “O le a se mea *silisili* o tatou faamuamuaina?” Pe o tatou auauna ea i mea ua faamuamua po o atua ese nai lo le Atua ua tatou tautino atu e tapuai i ai? Pe ua tatou faagaloina ea le Faaola o le na aoao mai afai tatou te alolofa ia te Ia, o le a tatou tausi i Ana poloaiga? (tagai Ioane 14:15). Afai o lea, o lona uiga ua sese mea ua tatou faamuamua ona ua lei so tatou popole mo le faaleagaga, faapea ai ma manaoga le taupulea ia ua taatele i lo tatou vaitaimi.

II.

Mo le Au Paia o Aso e Gata Ai, o poloaiga a le Atua e faavae ma e le mavavaeseina mai le fuafuaga a le Atua mo Lana fanau—o le ata sili o le faaolataga. O lenei fuafuaga, e ta’ua i nisi taimi o le “fuafuaga sili o le fiafia” (Alema 42:8), ma o loo faamatalaina ai lo tatou tupuaga ma le taunuuga o ni fanau a le Atua—le mea sa tatou o mai ai, aisea ua tatou i ai iinei, ma po o fea o loo tatou o i ai. O loo faamalalama ai le faamoemoega o le foafoaga ma tulaga o le olaga faaletino, e aofia ai ia poloaiga a le Atua, le manaomia o se Faaola, ma le matafaioi taua o aiga faaletino ma aiga e faavavau. Afai o tatou o le Au Paia o Aso e Gata Ai, o e ua tuuina mai i ai lenei malamalama, ae tatou te le faatulagaina a tatou mea e faamuamua e tusa ai ma lenei fuafuaga, ua lamatia ia i tatou i le auauna atu i atua ese.

O le malamalama i le fuafuaga a le Atua mo Ana fanau ua maua ai e le Au Paia o Aso e Gata Ai se vaaiga tulagaese e uiga i le faaipoipoga ma le aiga. Ua iloa lelei i tatou o se ekalesia e faamuamua le aiga. O la tatou mataupu faalelotu e amata i matua faalelagi, ma o lo tatou faamoemoega sili o le mauaina o le atoaga o le faaeaga e faavavau, lea ua tatou iloa ua na o le sootaga po o mafutaga



faaleaiga lava ua mafai ai. Ua tatou iloa o le faaipoipoga o se alii ma se tamaitai e manaomia mo le faataunuuina o le fuafuaga a le Atua. Ua na o le pau lenei o le ituaiga faaipoipoga e maua ai se faatulagaga faatagaina mo le fanau mai faaletino ma le sauniaina o tagata o le aiga mo le ola e faavavau. Tatou te vaavaai atu i le faaipoipoga ma le fanauina ma le tausiaina o fanau o se vaega o le fuafuaga a le Atua ma o se tiute paia a i latou o e ua tuuina atu i ai le avanoa e faia ai. Ua tatou talitonu o oa silisili o le lalolagi ma le lagi o a tatou fanau ma e tutupu mai ia i tatou i le lumanai.

III.

Ona o mea ua tatou malamalama i ai e uiga i le matafaioi tonu e faavavau o le aiga, ua tatou faanoanoa ai i le televave o le faaitiitia o pepe e fananau mai ma faaipoipoga i le tele o atunuu i Sisifo o a latou aganuu faasolopito e faaKerisiano ma faalutaia. O ni lipoti nei mai ni puna faamoemoaina:

- O le Iunaitet Setete i le taimi nei ua sili atu le maualalo o le aofaiga o pepe fananau mai i lona talafaasolopito,² ma i le tele o malo o le

Iuni a Europa ma isi malo mautu o le aofai o pepe fananau mai ua i lalo ifo o le tulaga e tatau ai ina ia faatumauina ai pea lo latou faitau aofai o tagata.³ O lenei tulaga ua lamatia ai le saogalemu o aganuu e oo lava i malo.

- I Amerika, o le pasene o talavou matutua mai le vaitausaga o le 18 i le 29 o e ua faaipoipo ua pau mai le 59 pasene i le 1960 i le 20 pasene i le 2010.⁴ O le vaitausaga masani lea ua i ai nei mo tagata faatoa faaipoipo ma o se tulaga sili ona maualuga i le talafaasolopito: o le 26 mo tamaitai ma le lata i le 29 mo alii.⁵
- I le tele o atunuu ma aganuu (1) o se aiga masani e i ai se tina ma se tama ua faaipoipo faatasi ma le fanau ua avea ma se tuusaunoaga nai lo le tulafono, (2) o le sailia o se galuega nai lo le faaipoipoga ma le fanauina o se fanau o se filifiliga ua faateleina a le toatele o tamaitai talavou, ma le (3) o le tuutiitia o le matafaioi ma le manaomia moni o tama.

I le lotolotoi o nei faiga ua faapopoleina ai i tatou, ua tatou malamalama i le fuafuaga a le Atua e mo Ana fanau uma ma e alofa le Atua i Ana fanau uma, i soo se mea.⁶ Ua tautino mai i le

mataupu muamua o le Tusi a Mamona e faapea “o [le] mana [o le Atua], ma [lona] agalelei, ma [lona] alofa mutimutivale ua i ai i luga o e uma o nonofo i le lalolagi” (1 Nifae 1:14). Na toe tautino mai i se isi mataupu e faapea “ua foaifua mai e ia lana olataga mo tagata uma” ma o “tagata uma o le tasi e pei o le tasi, ma ua leai se tasi ua faasaina” (2 Nifae 26:27–28). O le mea lea, ua aoao mai ai tusitusiga paia e tatau ona tatou agaalofa ma agalelei atu i tagata uma (tagai 1 Tesalonia 3:12; 1 Ioane 3:17; MF&F 121:45).

IV.

Tatou te faaaloalo foi i talitonuga faalelotu a tagata uma e oo lava ia i latou ua faateleina le faitau aofai o e ua tautino mai e le talitonu i le Atua. Ua tatou iloa e ala i le mana o le fili-filiga ua tuuina mai e le Atua, e toatele o le a i ai ni talitonuga e ese mai ia i tatou, ae tatou te faamoemoe o le a latou tuuina mai lea lava faaaloalo e tasi ia tatou talitonuga faalelotu ma ia malamalama o o tatou talitonuga e manaomia ai lo tatou faia o nisi o fili-filiga ma amioga e ese mai ia i latou. Mo se faataitaiga, tatou te talitonu, o se vaega taua o Lana ata o le faaolataga, ua faatulaga ai e le Atua se tulaga faatonuina e faavavau e faapea o le sootaga faalefeusuaiga ua na o le va

lava o se alii ma se tamaitai ua uma ona faaiipoipo e tatau ona faatino ai.

O le mana e foafoa ai le ola faaletino o se mana sili lea ona faaeaina na tuuina mai e le Atua i Ana fanau. O lona faaaogaina o loo faatonu mai i le poloaiga muamua a le Atua ia Atamu ma Eva (tagai Kenese 1:28), ae o isi poloaiga taua na tuuina mai e faasa ai lona faaaogaina sese (tagai Esoto 20:14; 1 Tesalonia 4:3). O le faamamafa ua tatou tuuina i le tulafono o le legavia ua faamalamalama mai e ala i lo tatou malamalamaaga i le faamoemoega o o tatou mana foafoa i le faataunuuina o le fuafuaga a le Atua. O le faaaogaina o o tatou mana foafoa i fafo atu o noataga o le faaiipoipoga i le va o se alii ma se tamaitai, o se agasala ma o le tetee lea i le fuafuaga a le Atua mo le faaeaga o Ana fanau.

O le faamamafa lea tatou te faapipii atu i le tulafono o le legavia ua faamatala ai lo tatou tautinoga i le mamanu o le faaiipoipoga lea na amatalia e Atamu ma Eva ma o loo faaaauu pea i le talafaasolopito e avefa ma mamanu a le Atua mo le sootaga o mana foafoa i le va o Ona atalii ma afafine ma mo le faafaileleina o Ana fanau. O le mea e lelei ai, o le toatele o tagata e fesootai ma isi tapuaiga po o faalapotopotoga latou te ioe faatasi ma i tatou i le natura ma le taua o le faaiipoipoga, o nisi e ioe

i le faavae o aoaoga faalelotu ae o isi o faavae o mea latou te manatu ua sili ona lelei mo nuu ma malo.

O lo tatou malamalama i le fuafuaga a le Atua mo Ana fanau⁷ ua faamatalaina ai le mafuaaga ua tatou atuatuvaale ai i le faateleina o le aofai o tamaiti o loo fananau mai i fafo atu o le faaiipoipoga—i le taimi nei o le 41 pasene o pepe uma o loo fananau i totonu o le Iunaite Setete⁸—ma o le aofai o ulugalii o loo nonofo faatasi e lei faaiipoipo ua matua faateleina i le afa seneturi ua mavae. O le 50 tausaga ua mavae, sa na o sina pasene itiiti lava o ulugalii na muamua nonofo faapouliuli ona faaiipoipo mulimuli ai lea. I le taimi nei e 60 pasene ua sili ai ulugalii faapouliuli i lo ulugalii faaiipoipo.⁹ Ma ua faateleina le taliaina o lenei mea, aemaise lava i talavou. Na maua i ni faamaumauga o ni saili-iliga lata mai pe a ma le 50 pasene o talavou na ta’ua e faapea o le fanauina o pepe ae lei faaiipoipo o se “ituaiga olaga talafeagai.”¹⁰

V.

E tele ia faafitauli faaupufai ma faaagafesootai mo suiga faaletulafono ma aiaiga faavae e faatulagaina ai ni amioga e feteenai ma tulafono a le Atua e uiga i amioga feusuaia ma le natura ma faamoemoega e faavavau o le faaiipoipoga ma le fanauina o fanau. O nei faafitauli ua leva ona faatagaina ai ia faaiipoipoga i le va o itupa e tasi i le tele o setete ma malo. O isi faafitauli o le a faafenuniaia ai itupa pe suia ai na eseese ina ia tutusa i le va o alii ma tamaitai ia e taua i le faataunuuina o le fuafuaga sili o le fiafia a le Atua.

O lo tatou malamalamaaga i le fuafuaga a le Atua ma Lana aoaoga faavae ua aumaia ai ia i tatou se vaiga e faavavau e le faataga ai i tatou ia laaloa le vaai i ia ituaiga amioga po o le saili o ni faamaoniga mai tulafono e



faataga ai na amioga. Ma, e ese mai la i isi faalapopotoga lea e mafai ona suia a latou aiaiga faavae ma e oo lava ia latou aoaoga faavae, o a tatou aiaiga faavae e fuafuaina i upumoni a le Atua ua folafola mai e le masuia.

O la tatou mataupu faavae o le faatuatua e sefululua o loo ta'ua ai lo tatou talitonuga i le usiusitai i pulega o malo ma le “usiusitai, faamamaluina, ma le lagolagoina o le tulafono.” Ae e le mafai e tulafono faaletagata ona taumamaina ni amioga ia ua tautino mai e le Atua e le mama. O le tuuto atu i le mea e aupito sili ona faamuamua—ia alofa ma auauna atu i le Atua—e manaomia ai lo tatou faalagolago atu i Lana tulafono mo lo tatou tulaga faatonuina o le amio. Mo se faaitaiga, ua tatou tumau i lalo o le poloaiga paia e aua le mulilua pe faitaaga e tusa lava po o na amioga ua le o toe avea ma se solitulafono i lalo o tulafono a setete po o atunuu o loo tatou aumau ai. E faapena foi i tulafono ua faatagaina ai le “faaipopoga o itupa e tasi” e le suia ai lava le tulafono a le Atua o le faaipopoga po o Ana poloaiga ma a tatou tulaga faatonuina e faatatau i ai. Tatou te tumau pea i lalo o le feagaiga ia alolofa i le Atua ma tausii Ana poloaiga ma ia aloese mai le ifo pe auauna atu i atua ese ma isi mea e faamuamua—e oo lava i mea ia ua amata ona lauiloa i o tatou vaitaumi ma nofoaga patino.

I lenei naunautaiga, atonu o loo malamalama sese ai [nisi] ia i tatou, ma e ono oo mai ai ia i tatou ni tuuaiga o le manatu faapito, mafatia ai i le faailo-galanu, po o le onosaia o le aiaina o loo tatou saolotoga e tapuai ai faalelotu. Afai o lea, ou te manatu e tatau ona tatou manatua ia mea tatou te faamua-mua—ia auauna atu i le Atua—ma, faapei o tatou augatama paionia, ia onosaia o tatou tofotofoga patino i le malosi lava e tasi sa latou faaalai.

E i ai se aoaoga a Peresitene



Thomas S. Monson e faatatau i le tulaga lenei. I lenei konafesi i le 27 tausaga ua mavae, sa ia tautino mai ma le lototoa: “Ia tatou maua le lototoa e tetee atu ai i taiga, le lototoa e tutu ai mo mataupu faavae. O le lototoa, ae le o le palaai, e aumai ai le fiafia i le faamaoniga a le Atua. E avea le lototoa ma uiga mama olaola ma faatosina pe a manatu i ai e le gata o le loto ia oti ma le mamalu, ae o le naunautaiga foi ia ola faamamaluina. O le tagata palaai o le tagata lea e fefe e fai le mea ua ia iloa e sao ona o le a le fiafia pe talie i ai isi tagata. Ia manatua e tofu lava tagata uma ma mea e fefefe i ai, ae o i latou e faafeagai ma mea e fefefe ai ma le mamalu ua ia i latou foi le lototoa.”¹¹

Ou te tatalo ina ia aua nei o tatou tuu atu i luitau le tumau o le olaga faaletino mafua ai ona tatou faagaloina poloaiga sili ma mea e faamuamua ua tuuina mai e loo tatou Fofoa ma loo tatou Faaola. E le tatau ona pupu o tatou loto i mea o le lalolagi ma saili i viiga a tagata (tagai MF&F 121:35) nei o tatou le iloa atu loo tatou taunuuga e

faavavau. Ua tatou iloa le fuafuaga a le Atua mo Ana fanau—o i tatou ua uma ona osifeagaiga i lea fuafuaga—ua i ai se tiutetauave manino. E le tatau lava ona galo ia i tatou loo tatou faanau-nautaiga silisili, o le ausia lea o le ola e faavavau.¹² E le tatau ona tatou tuu-ititia mea tatou te faamuamua—ia aua nei i ai ni atua ese ma aua nei auauna i nisi mea e faamuamua nai lo le Atua le Tama ma Lona Alo, loo tatou Faaola, o Iesu Keriso.

Tau ina ia fesoasoani mai le Atua ia i tatou ina ia malamalama i lenei mea e faamuamua ma ia malamalama foi i ai isi a o tatou saili atu e tulituli-matagauina i se auala atamai ma le alofa, ou te tatalo ai i le suafa o Iesu Keriso, amene. ■

FAAMATALAGA

1. Tagai, mo se faaitaiga, Mataupu Faavae ma Feagaiga 124:84.
2. Tagai Joyce A. Martin ma isi, “Births: Final Data for 2011,” *National Vital Statistics Reports*, vol. 62, no. 1 (June 28, 2013), 4; Gloria Goodale, “Behind a Looming Baby Bust,” *Christian Science Monitor Weekly*, Feb. 4, 2013, 21, 23.
3. Tagai Population Reference Bureau, “2012 World Population Data Sheet,” www.prb.org/Publications/Datasheets/2012/world-population-data-sheet/data-sheet.aspx.
4. Tagai D’Vera Cohn and others, “Barely Half of U.S. Adults Are Married—a Record Low,” Pew Research Center, Social and Demographic Trends, Dec. 14, 2011, available at www.pewsocialtrends.org/2011/12/14/barely-half-of-u-s-adults-are-married-a-record-low/; “Rash Retreat from Marriage,” *Christian Science Monitor*, Jan. 2 and 9, 2012, 34.
5. U.S. Census Bureau, “Estimated Median Age at First Marriage, by Sex: 1890 to the Present,” o loo maua i le www.census.gov/population/socdemo/hh-fam/ms2.xls.
6. Tagai Dallin H. Oaks, “O Tagata Uma i Nofoaga Uma,” *Liahona*, Me 2006, 77–80.
7. Tagai Dallin H. Oaks, “O Le Fuafuaga o le Fiafia,” *Liahona*, Ian. 1994, 95–97.
8. Tagai Martin, “Births: Final Data for 2011,” 4.
9. Tagai *The State of Our Unions: Marriage in America, 2012* (2012), 76.
10. Tagai *The State of Our Unions*, 101, 102.
11. Thomas S. Monson, “Courage Counts,” *Ensign*, Nov. 1986, 41.
12. Tagai Dallin H. Oaks, “Manao,” *Liahona*, Me 2011, 42–45.



Saunia e Bonnie L. Oscarson
Peresitene Aoao o Tamaitai Talavou

Ia Outou Liua

E tupu le liua moni ao faaauau pea ona outou galulue i aoaoga faavae tou te iloa e moni ma tausī poloaiga, i lea aso ma lea aso, i lea masina ma lea masina.

Uso e ma tuagane, o se aafiaga faamaualalo le tu atu i lenei pulelaa lea na tutu ai le toatele o toa o lo'u olaga. Ou te fia faasoa atu ia te outou nisi o lagona o lo'u loto ma tuu sao atu aemaise lava i le autalavou.

O se tasi o toa maoae mai le Feagaiga Tuai o le perofeta-fitafta o Iosua. Na ia tuuina atu lenei valaaulia i le fanauga a Isaraelu, lea na ia taitaia: “Ina filifili ia o outou i le aso nei, po o ai tou te auauna i ai; . . . a o au nei ma lou aiga, matou te auauna ia Ieova.”¹ O le tautinoga a Iosua o se faaaliga lea o le liua moni i le talalelei. Mo Iosua ma i tatou uma, e oo mai le liua i mataupu faavae o le talalelei e ala i le ola amiotonu i mataupu faavae o le talalelei ma faamaoni i a tatou feagaiga ma le Alii.

Ou te fia faasoa atu se tala o le liua mai le talafaasolopito o lou aiga e uiga i se isi a'u toa. O lona igoa o Agnes Hoggan, ma sa la liliu mai ma lona toalua i le Ekalesia i Sikotilani i le 1861. O le mafatia ai i le tele o sauaga i le latou atunuu, na la malaga mai ai i Amerika ma le la fanau. I le tele o tausaga mulimuli ane, na maliu ai le tane a Agnes ma nofo toatasi ai ma le fanau e tovalu e tausī ma sa galue malosi e fafaga ma faalavalava i latou.

Sa faamanuiaina lana tama teine e 12 tausaga le matua o Isapela, e faigaluega tavini i se aiga mauoa e lē o ni tagata o le Ekalesia.

Sa nofo Isapela i le latou fale tele ma fesoasoani i le tausiga o le la fanau laiti. I se tauī mo lana auaunaga, sa totogi ai i lona tina se tupe itiiti i vaiaso taitasi. E lei umi ae taliaina Isapela o se tasi o le aiga ma amata ona mauaina le tele o faamanuiaga lava e tasi, e pei o le faia o lesona siva, ofu i ofu mananaia, ma auai atu i tifaga. Na faaauau lenei maliliega mo le fa tausaga, seia oo ina ua siitia ese atu le aiga lea na galue ai Isapela i se isi setete. Sa faatupulaia lo la alolofa tele ia Isapela ma sa la talanoa atu i lona tina, o Agnes ma talosaga mo se faatagaga e vaetamaina ai o ia faaletulafono. Na la folafola atu o le a faaa'ogaina o ia i ni aoga lelei, vaai ia faaipoipo lelei, ma avea o ia o se tasi o suli e mauaina se vaega o a laua oa faatasi ai ma le la fanau moi. O le a faapena foi ona faaauau pea ona totogiina se tupe ia Agnes.

Sa faigata le filifiliga e fai a lenei tina mativa ua oti lana tane, ae sa lei faatuai lona tali mai. Faalogo i upu a le tama teine a lana tama, na tusia i le tele o tausaga mulimuli ane: “Afai e lei faamallosia o [ia] e lona alofa e fai atu leai, sa i ai la sana mafuaaga sili atu—sa ia

malaga mamao mai Sikotilani ma sa oo i faigata ma faaosoosoga mo le Talalelei, ma na te le o faamoemoe, pe afai e talafeagai faaletagata, e faataga se tasi o ana fanau ina ia leiloa le mea sa ia sau mamao ina ia maua.”² Sa faaaoga e le aiga mauoa soo se auala na mafai ona finau mai ai, ma sa oo lava ia Isapela sa tagiaue ma aioi mai ina ia faataga o ia e alu, ae sa tumau mausali pea ia Agnes. Atonu tou te mafaufau, i se lagona o Isapela e 16 tausaga faapea ua faaleagaina lona olaga.

O Isapela Hoggan o le tina matua lea o lou tina, ma ou te matuai faafetai mo le molimau ma le talitonuga lea na matua mu susulu i le loto o lona tina, lea sa lei faatagaina ai o ia e faafesuiai le auai o lana tama teine i le Ekalesia mo folafolaga faalelalo. I le aso, e faitau selau i latou na tupuga mai ia te ia o loo olioli i faamanuiaga o le auai o Agnes i le Ekalesia ma o ni suli o le faatuatua maua'a ma le liua i le talalelei.

Uo talavou e, ua tatou ola i taimi faigata, ma o faaiuga ua tuuina atu tou te faia i aso taitasi, e oo lava i itula, e i ai ni taunuuga faavavau. O faaiuga tou te faia i o outou olaga i aso taitasi e fuafua i ai le mea o le a tupu ia te outou mulimuli ane. Afai e le o maua sau molimau maua'a ma ma mausali ma se talitonuga maumaututu o Le Ekalesia a Iesu Keriso o le Au Paia o Aso e Gata Ai o le malo lea o le Atua i le lalolagi, o le taimi la lenei ua tatau ai ona faia soo se mea ina ia maua ai lona talitonuga maumaututu. O le faatuai ona faia o lona taumafaiga lea e manaomia ina ia maua ai lona ituaiga talitonuga maumaututu e ono lamatia ai lou agaga.

O le liua moni e sili atu nai lo le mauaina o se malamalama i mataupu faavae o le talalelei ma ua sili atu foi nai lo le mauaina o se molimau i na mataupu faavae. E mafai ona maua

se molimau o le talalelei e aunoa ma le ola ai. O le liua moni o lona uiga o le tatou faatinoa lea o mea ua tatou talitonu i ai ma faatagaina e fai ai “se liuga tele i totonu o i [tatou], po o i totonu o o [tatou] loto.”³ I le tamaitusi o le *Faamaoni i le Faatuatua*, tatou te aoao ai faapea “o le liua o se faagasologa, e le o se mea e tupu i se taimi e tasi. E te liua ona o se taunuuga o au taumafaiga amiotonu e mulimuli i le Faaola.”⁴ E alu ai se taimi, taumafaiga, ma galuega. Sa malosi le talitonuga maumaututu a le tina matua o lou tina faapea na sili atu le taua o le talalelei mo ana fanau nai lo mea uma e ofoina atu e le lalolagi i oa ma le manuia ona sa ia ositaulaga, onosaia, ma ola ai i le talalelei. Na tupu lona liua i le ola ai i mataupu faavae o le talalelei ma le ositaulagaina mo na mataupu faavae.

E tatau ona tatou oo i lona lava faagasologa e tasi pe afai tatou te mananao i lona lava ituaiga o tautinoga. Na aoao mai le Faaola, “Ai se tasi e fia fai lona finagalo, e iloa ai e ia le mataupu, pe mai le Atua pe ou te tautala fua lava au.”⁵ O nisi taimi tatou te taumafai ai e fai agai i tua. Mo se faataitaiga, atonu tatou te faia le auala lenesi: O le a ou fiafia e ola i le tulafono o le sefuluai, ae e tatau ona ou iloa muamua pe moni. Atonu foi tatou te tatalo ina ia maua se molimau i le tulafono o le sefuluai ma faamoemoe o le a faamanuia i tatou e le Alii i lona molimau ae tatou te lei faatumuina lava se lisiti o le sefuluai. E le faapena le auala e fai ai. O loo faamoemoe le Alii ia i tatou ina ia faatino le faatuatua. E tatau ona tatou totogi ma le faamaoni e le aunoa se sefuluai atoa ina ia maua ai se molimau i le sefuluai. E faatatau lenesi lava mamanu e tasi i mataupu faavae uma o le talalelei, pe o le tulafono o le legavia, o le mataupu faavae o le tauagafau, o le Upu o le Poto, po o le tulafono o le anapogi.



Ou te fia faasoa atu se faataitaiga o le ala e fesoasoani ai ia i tatou le ola ai i se mataupu faavae ina ia liua i lona mataupu faavae. Sa avea au o se tamaitai talavou i le vaitau o le 60 ma e na o au le teineitiiti lotu i lau aoga mauuluga. Sa avea lea ma se vaitaimi o fetuaiga na iloga i le teenaina o uiga mama masani, faaaogaina o fualaau oona, ma le mafaufau faapea “fai soo se mea e te loto i ai”. O le toatele o au uo o ni tagata lelei ae sa faigofie ona gauai atu i faafiafiaga o lenesi uiga fou, lea sa avea lava o se uiga le mama tuai. Na faamamafa mai ia te au e ou matua ma faiaoga i le lotu le taua o le taulimaina ma le faaaloalo o lou tino, tausia o se mafaufau mama, ma le mea sili o na mea uma, o le aoao e faalagolago i le poloaiga a le Alii. Sa ou faia se faaiuga o le a ou aloese mai mea sa ou iloa o le a i ai ni pia ma tapaa ma fualaau oona. O lona uiga ou te le auai i ni pati, ma e seasea ou tafao faamasani. O le faaaogaina o fualaau oona na avea ma se mea taatele i tagata talavou, sa leiloa tele le tulaga lamatia i na taimi e pei o le vaitaimi lenesi. O le toatele o au uo na mulimuli ane pagatia i aafiaga tumau mai

fualaau oona ia na faaletonu ai mafaufau po o le saisaitia i vaisu ogaoga. Sa ou faafetai i le aoaoina i lou aiga ina ia ola i le Upu o le Poto, ma sa ou maua se molimau loloto i lona mataupu faavae o le talalelei ao ou faatinoa le faatuatua ma ola ai. O le lagona lelei lea na oo mai ia te au mai le ola ai i se mataupu faavae moni o le talalelei, o le Agaga o le Agaga Paia na faamaonia mai ia te au e moni lona mataupu faavae. O le taimi lena e amata ai ona tupu le liua moni.

Na aoao mai e le perofeta o Moronae i le Tusi a Mamona, “Ou te fia faaali atu i le lalolagi o le faatuatua o mea ia ua faamoemoe i ai ae ua le vaai; o le mea lea, aua tou te masalosalo ona ua outou le vaai; auā tou te le maua se molimau seia uma ona tofotofoina o lo outou faatuatua.”⁶ I se lalolagi lea e avea le vave faamalieina ma ona faamoemoega, ua tele lava ina tausalaina soo i tatou i le faamoemoe i se tau e aunoa ma le galue mo lena mea. Ou te talitonu o loo tau mai e Moronae ia i tatou e tatau ona tatou faia muamua le galuega ma faatino le faatuatua e ala i le ola ai i le talalelei, ona tatou maua lea o le molimau i le



moni o lēna mea. E tupu le liua moni ao faaauau pea ona outou galulue i aoaoga faavae tou te iloa e moni ma tausī poloaiga, i lea aso ma lea aso, i lea masina ma lea masina.

O se taimi faamamaluina lenēi e aveā ai ma talavou i le Ekalesia. O outou tagata ua muamua auai i le mataupu aoaoina a le autalavou o le *Sau, Mulimuli Mai ia te Au*, lea o se tasi o ona faamoemoega autu lo outou liua i le talalelei a Iesu Keriso. Ia manatua lelei e tusa lava po o le a le tulaga musuia o i ai o outou matua ma taitai o le autalavou, “o loo ia te outou [le] matafaioi patino mo lou lava liua. E leai se tasi e mafai ona liua mo oe, ma e leai foi se tasi e faamalosia oe ia liua.”⁷ E tupu le liua pe a tatou filiga i le faia o a tatou tatalo, suesueina o a tatou tusitusiga paia, auai i le lotu, ma ia agavaa e auai i sauniga o le malumalu. E oo mai le liua ao tatou faatinoa ia mataupu faavae amiotonu na tatou aoaoina i totonu o tatou aiga ma le potuaoga. E oo mai le liua ao

tatou ola i ni olaga mama ma paia ma fiafia i le mafutaga a le Agaga Paia. E oo mai le liua ao tatou malamalama i le Togiola a Iesu Keriso, talia o Ia o lo tatou Faaola ma Togiola, ma faaoga ina le Togiola i o tatou olaga.

O le a fesoasoani lou liua patino ia te oe ao e sauni e osi feagaiga i le malumalu, auauna atu i se misiona, ma faatulaga lou lava aiga i le lumanai. A liuaina oe, o le a maua se mana o faasoa atu i isi mea ua e aoaoina, ma o le a faateleina lou mautinoa ma le tomā e molimau atu ai i isi faatasi ma se talitonuga maumaututu ma le mana. O lenēi mana o faasoa atu le talalelei i isi ma le mautinoa e molimau atu ma le lototoa o ni taunuuga masani ia o le liua moni. Na aoao atu e le Faaola ia Peteru, “Pe a liua mai oe, ona e faamalosia ai lea i ou uso.”⁸

Manatua Iosua, le perofeta-fitafita? Sa le gata ina liua o ia lava, ae na ia galue ma le le faavaivai e oo i le iuga o lona olaga e aumai le fanauga a Isaraelu i le Atua. Tatou te faitau i le

Feagaiga Tuai: “Ua auauna Isaraelu ia Ieova i aso uma o Iosua.”⁹ O se tagata ua liua moni e aumaia le mana o le Togiola ma maua le faaolataga mo lona lava agaga ona aapa atu lea e faaogaina se uunaiga malosī i luga o i latou e iloaina o ia.

O le ola i le talalelei ma tutu i nofoaga paia e le o se mea faigofie pe toafilemu i taimi uma, ae ou te molimau atu e tauia! Na fautuaina e le Alii Ema Samita ina ia “tuu ese mea o lenēi lalolagi, ma saili mo mea o se lalolagi sili atu ona lelei.”¹⁰ Ou te masalo e le mafai ona tatou amata vaai faalemafaufau atu i le ofoofogia o na “mea o se [lalolagi] sili atu ona lelei!

Ou te molimau atu e i ai so tatou Tama Faalelagi alofa o ona faanaunautaga silisili o le fesoasoani ma faamanuia mai ia i tatou ia tatou taumafaiga ina ia ola ai i le talalelei ma ia liuaina. Na manino lava Lana fetalaiga faapea o Lana taulaiga ma le galuega autu o lo tatou “tino ola pea ma le ola faavavau.”¹¹ Ua Ia finagalo e toe avatu i tatou i le aiga i Lona afioaga. Ou te molimau atu a tatou faatinoina ia aoaoga faavae o le talalelei ma faatinoina i aso uma, o le a tatou liua ma o le a aveā ma auala e ausiaina ai le tele o le lelei i o tatou aiga ma le lalolagi. O lau tatalo ia faamanuiaina i tatou ia tatou taumafaiga i aso uma ina ia ausia lena sini, i le suafa o Iesu Keriso, amene. ■

FAAMATALAGA

1. Iosua 24:15.
2. Fuschia Stringham, “O Se Ootootoga e Lei Lolomiina ma Faasalalauina o le Olaga o Isabelle Hunter Hoggan Stringham” (tala-faasolopito patino e lei lolomiina, 1934), 4.
3. Mosaea 5:2.
4. *Faamaoni i le Faatuatua: O Se Tusitaiāla o le Ekalesia* (2004), 95.
5. Ioane 7:17.
6. Eteru 12:6.
7. *Faamaoni i le Faatuatua*, 97.
8. Luka 22:32.
9. Iosua 24:31.
10. Mataupu Faavae ma Feagaiga 25:10.
11. Mose 1:39.



Saunia e Elder Richard J. Maynes

○ Le Au Peresitene o Fitugafulu

○ Le Malosi e Tutumau Ai

*O lo tatou gafatia e tumau seia oo i le iuga i le amiotonu,
o le a faatatau tonu lava i le malosi o a tatou molimau ma
le loloto o lo tatou liua.*

○ taeo uma pe a tatou alausu a'e, tatou te feagai ai ma se aso fou e tumu i luitau o le olaga. O nei luitau e tele ituaiga e oo mai ai: luitau faaletino, faigata o mea tautupe, faafitauli i mafutaga, tofotofoga faalelagona, faapea foi ma tauiviga ma le faatuatua o se tagata.

O le tele o luitau tatou te feagai i le olaga e mafai ona foiaina ma faatoilaloina; ae peitai, o isi e ono faigata ona malamalama i ai ma e le faigofie ona faatoilalo, ma o le a i ai pea ia i tatou seia oo ina tatou laasia le isi olaga. A o tatou onosaia mo se taimi le tumau ia luitau e mafai ona tatou foiaina, ma a o faaauau ona tatou onosaia luitau e le mafai ona tatou foiaina, e taua ona manatua, o le malosiaga faaleagaga tatou te atiaeina, o le a fesoasoani ia i tatou e onosaia ai ma le manuia ia luitau uma tatou te feagai ai i le olaga.

Uso e ma tuafafine, ua i ai so tatou Tama Faalelagi agaalofa, o lē ua mamauina lo tatou ola ai i le lalolagi, ina ia mafai e i tatou taitoatasi ona aoaoina lesone e manaomia ona tatou aoaoina ia agavaa ai mo le ola e faavavau i Lona afoaga.

O se tala mai le soifuaga o le Perofeta o Iosefa Samita, ua faaalua ai lenei mataupu faavae. Na faafalepuiiina le Perofeta ma nisi o ana soa i Lipe-rate, Misuri, mo ni masina. A o mafatia ai i le falepuii, sa aoi atu le Perofeta o Iosefa i le Alii i le tatalo faamaualaloina ia mafai ona faamafanafanaina le Au Paia mai o latou puapuaga sa i ai i le taimi lea. Sa tali mai le Alii e ala i le aoaoina o le Perofeta o Iosefa, ma i tatou uma lava, e faapea, o luitau tatou te feagai, afai e onosaia lelei, o le a mo lo tatou lava manuia atali. O le tali lenei a le Alii i le aioiga a Iosefa:

“Lo'u atalii e, ia filemu lou agaga; o lou tiga ma ou puapuaga o le a nao sina minute laitiiti;

“Ma ona oo lea, afai e te talitalia lelei, o le a faaeaina oe e le Atua i luga.”¹

Ua fuafuaina e le Tama Faalelagi la tatou malaga i le olaga ia avea o se su-ega o o tatou uiga faaletagata. Tatou te oo uma i aafiaga lelei ma aafiaga leaga ma ua faapea foi ona tuuina mai le faitalia e filifili ai mo i tatou lava po o le fea le ala o le a tatou uia. E pei ona aoao mai le perofeta anamua o le Tusi a Mamona o Samuelu, “Ua outou saoloto; ua faatagaina outou tou te fai mo

outou lava; aua faauta, ua tuuina mai e le Atua ia te outou se malamalama ma ua ia faia outou ia outou saoloto.”²

Ua silafia lelei foi e le Tama Faalelagi ona o lo tatou olaga i la le tino, o le a tatou le faia ai i taimi uma ni filifiliga sa'o pe amiotonu. Ona tatou te le atoatoa ma ona tatou te faia mea sese, tatou te manaomia ai le fesoasoani i le toe foi atu i Lona afoaga. O le fesoasoani e alagataua ua tuuina mai e ala i aoaoga, faataitaiga, ma le taulaga togiola a Iesu Keriso. O le taulaga togiola a le Faaola e mafai ai ona faaolaina ma faaeaina i tatou i le lumanai e ala i le mataupu faavae o le salamo. Afai tatou te salamo moni ma faamaoni, e mafai ona fesoasoani le Togiola ia i tatou ia mama, sui o tatou natura, ma onosaia ai ma le manuia o tatou luitau.

O le tutumau o se mataupu faavae taua e maua i totonu o le aoaoga faavae a Iesu Keriso. E taua ona o le tulaga lelei o lo tatou lumanai e faavavau e faatatau lea i lo tatou gafatia e tutumau ai i le amiotonu.

I le 2 Nifae 31 o loo aoao mai ai i tatou e le perofeta o Nifae e faapea, a uma ona tatou maua ia sauniga faaola o le papatisoga lea foi na maua e Iesu Keriso, ona maua lea o le meaalofa o le Agaga Paia, e tatau ona tatou “fetaomi atu i luma, ma taumamafa fiafia i le afoaga a Keriso, ma tumau e oo i le iuga, [ma] faauta, ua faapea ona fetalai mai o le Tama: O le a [tatou] maua le ola e faavavau.”³

O le mea lea, ina ia maua le meaalofa silisili o meaalofa uma a lo tatou Tama Faalelagi, o le ola e faavavau lea, e tatau ona tatou faamaeaina ia galuega talafeagai mo sauniga ona faaauau pea lea ona tausia feagaiga e faatatau i ai. I se isi faaupuga e tatau ona tatou tutumau lelei.

O lo tatou gafatia e tumau seia oo i le iuga i le amiotonu, o le a faatatau



faamalolosi a tatou molimau i le na o le matamata i le konafesi aoao i luga o le televise. E manaomia ona tatou suesue ma aoao mataupu faavae autu o le talalelei a Iesu Keriso, ona tataua lea ona tatou faia le mea sili tatou te mafaia e ola ai. O le ala lena e avea ai i tatou ma soo o Iesu Keriso, ma o le ala lena tatou te fausia ai se molimau mausali.

A tatou feagai ma faigata i le olaga, ma o lo tatou manao ia faataitai i uiga o Iesu Keriso, e taua la le saunia faaleagaga. O le saunia faaleagaga o lona uiga ua tatou atiaeina le malosiaga po o le malosi faaleagaga—o le a tatou tino malolosi faaleagaga. O le a tatou matuai au malolosi faaleagaga ma o le a tatou filifili ai e le aunoa le mea sa'o. O le a tatou le masii ese i lo tatou naunau ma le gafatia e ola i le talalelei. E pei ona ta'ua e se tasi o tusitala e le mailoa, "E tatau ona avea oe ma papa e le mafai e le vaitafe ona tafisea."

Ona tatou te feagai ma luitau i aso uma, o lea e taua ai ona tatou galulue i lo tatou malosiaga faaleagaga i aso uma. A tatou atiina ae le malosiaga faaleagaga, o uputuu sese a le lalolagi, faapea ai foi ma o tatou luitau patino i aso uma, o le a itiiti so latou aafiaga le lelei i lo tatou gafatia e tutumau ai i le amiotonu.

tonu lava i le malosi o a tatou molimau ma le loloto o lo tatou liua. A malolosi a tatou molimau ma tatou liua moni i le talalelei a Iesu Keriso, o le a musuia a tatou filifiliga e le Agaga Paia, o le a totonugalemu ia Keriso, ma o le a latou lagolagoina lo tatou naunau e tutumau i le amiotonu. Afai e vaivai a tatou molimau ma papa'u lo tatou liua, o le a sili atu le tulaga lamatia o le a faatosinaina ai i tatou e faiga masani sese a le lalolagi e fai ni filifiliga le lelei.

Ou te fia faasoa atu se aafiaga e faailoa ai le taumafaiga e manaomia ina ia tutumau ai faaletino ona faatusatusa lea i le taumafaiga e manaomia e tutumau ai faaleagaga. I lo'u foi mai mai la'u misiona, sa ou maua le avanoa e taalo pasiketipolo ai mo se faiaoga ma se tusitala faaaloaloga i se kolisi i Kalefonia. O le faiaoga lena sa matuai naunau lava i ana tama taaalo ia malolosi faaletino a o le'i amataina le vaitau o le pasiketipolo. O se tasi o mea e muai manaomia a o le'i mafai e se tasi o i matou ona papai i se polo pasiketi i luga o le malae e koloni ai, o le tamoe malosi lea i se auala tamoe e i tua i mauga e latalata i le aoga ia itiiti ifo ma le taimi patino faatapulaaia. Ou te manatua la'u uluai taumafaiga e tamoe i lena auala tamoe i tua, ae faatoa ou foi mai lava mai le galuega faamisiona: Sa ou faapea lava o le a ou oti.

E tele ni vaiaso o toleniga malolosi ina ia mafai ona maua ai le taimi na faatulagaina e le faiaoga e fai ma sini.

Sa o se lagona maoae e le gata o le mafai ona tamoe i le auala ae faapea foi ona saosasoa atili a o latalata atu i le tini.

Ina ia faamanuaina i le taalo pasiketipolo, e manaomia ona e maua le malosi lelei faaletino. O le maua o le malosi lelei faaletino e i ai ma lona tau, ma o lena tau o le tuuto, onosai, ma le loto pulea o le tagata lava ia. O le malosi faaleagaga e i ai foi lona tau. O le tau lava lena e tasi: tuuto, onosai, ma le loto pulea o le tagata lava ia.

O se molimau, e pei foi o lou tino, e manaomia foi ona malosi pe afai e te manao ia tutumau. E faapefea la ona tatou faatumauina le malosi o a tatou molimau? E le mafai ona maua e o tatou tino le malosi lelei e taalo pasiketipolo ai e ala i le na o le matamata pasiketipolo i luga o le televise. E faapena foi, e le mafai ona tatou



Joseph Watson Maynes (taumatau) ma lana soa, o Gilpin S. Woolley.



O faataitaiga maoae o malosiaga faaleagaga e sau mai i o tatou lava tala-faasolopito faaleaiga. Faatasi ai ma le tele o tala mai i o tatou augatuaa, o le a mafai ai ona tatou maua ni faataitaiga e faaalua ai uiga lelei o le tutumau.

O se tala mai le talafaasolopito o lo'u lava aiga ua faaalua ai lenei mataupu faavae. O le tamā o lo'u tamamata o Joseph Watson Maynes sa soifua i le 1856 i Hull, Yorkshire, Egelani. Na auai lona aiga i le Ekalesia i Egelani, ona latou agai mai ai lea i le Aai o Sate Leki. Sa faaipoipo o ia ia Emily Keep i le 1883, ma na avea i laua o ni matua o se fanau e toavalu. Sa valaauina Joseph e faia se misiona ia luni o le 1910, a o 53 ona tausaga. Faatasi ai ma le lago-lago a lona faletua ma le fanau e toavalu, sa toe foi atu ai o ia i lona atunuu o Egelani e auauna ai i lana misiona.

Ina ua maea ona auauna ma le faamaoni pe a ma le lua tausaga, sa vili atu a la'ua uila ma lana soa i sauniga o le Aoga Sa i Gloucester, Egelani, ae pa ai le pa'u o lana uila. Sa oso ese o ia mai le uila e siaki po o le a se tele o le leaga. Ina ua ia vaia sa leaga tele ma o le a fai si umi e toe fai ai, sa ia faapea atu i lana soa, e muamua o ia e amata le sauniga o le Aso Sa, ae o le a le umi ona alu atu lea. E fetui lava le uma atu o lana tala, ae solovi ifo loa i lalo i le eleele. Sa maliu ai lava i le taimi lena ina ua pe faafuasei lona fatu.

Sa le'i toe vaai Joseph Watson Maynes i lana ava ma lana fanau e toavalu i lenei olaga. Sa mafai ona latou toe aumaia lona tino i le Aai o Sate Leki ma faia ai le sauniga o lona falelauasiga i le faletele tuai o le Waterloo Assembly Hall. O se faamatalaga na fofogaina i lona sauniga maliu na saunia e Elder Anthony W. Ivins o le Korama a Aposetolo e Toasefululua ua aoaoina ai i tatou i se lesona taua e uiga i le ola, oti, ma le tumau: "O le mea leni e aumai e le talalelei ia i tatou—e le o le puipuiga

mo le oti, ae o le manumalo ai e ala i le faamoemoe ua tatou maua i se toetutu fiafia. . . . E faatatau ia [Joseph Maynes]. . . . O se fiafiaga, ma o se lotomalie ma le olioli i le iloa ua ofo atu e tamalii o latou soifua i le amiotonu, i le faatuatua, e faamaoni ai i le faatuatua."⁴

O leni tala faaleaiga ua musuia ai a'u ia ou taumafai i le mea sili ou te mafaia e mulimuli ai i le faataitaiga o le tutumau ma le malosi faaleagaga na faaalua e le tamā o lo'u tamamata. E faapena foi ona musuia a'u i le faatuatua o lona faletua, o Emily, o lē o lona soifuaga i le mavae ai o le maliu o lana tane o Iosefa sa mautinoa lava sa o se avega mamafatu na tauaveina. O lana molimau sa malosi ma lona liua sa atoatoa a o ia faaalua lona olaga atoa na totoe i le faatuatua a o ia tausaga na o ia lana fanau e toavalu.

Sa ta'ua e le Aposetolo o Paulo, "Ina tatou tuu ese ia o mea mamafa uma, atoa ma le agasala e faalavelavegofie ai i tatou, ia tatou taufetuli ma le onosai i le ala tanu o i o tatou luma."⁵ O le taufetuliga ua tuu mai i o tatou luma i leni lalolagi o se taufetuliga o le tutumau, e tumu i mea faalavefau. O mea faalavefau i leni taufetuliga o luitau ia tatou te fetaii i taeao uma tatou te feala ae ai. Ua tatou iinei i le lalolagi e tamomoe i le taufetuliga, ia faaogaga lo tatou faitalia, ma ia filifili i le va o le

sa'o ma le sese. Ina ia mafai ona tini taunuu ma le mamalu ma faamanuia le taufetuliga ma toe foi atu i lo tatou Tama Faalelagi, o le a manaomia ona tatou totogi le tau o le tuuto, tutumau, ma le lotopulea o le tagata lava ia. E tatau ona tatou malolosi faaleagaga. E manaomia ona tatou atiina ae le malosiaga faaleagaga. Tatou te manaomia ni molimau malolosi o le a faapea ona taitai atu ai i le liua moni, ma o le taunuuga o le a tatou maua ai i totonu o i tatou lava le filemu o le loto ma le malosiaga e manaomia e tutumau ai po o a lava luitau tatou te ono fetaii.

O lea la, po o a lava luitau e te ala a'e i ai i taeao uma, ia manatua—faatasi ai ma le malosi faaleagaga e te atiaeina, faatasi ma le fesoasoani a le Alii, i le iuga o le taufetuliga, o le a mafai ona e olioli i le mautinoa na ta'u mai e le Aposetolo o Paulo ina ua ia saunoa:

"Aua o a'u ua faamaligiina nei lo'u toto, ua lata ona po ou te alu ai.

"Ua ou tau le taua lelei, ua iu ia te au le tausinioga, ua ou taofi i le upu o le faatuatua:

"O leni, ua teuina mo a'u le pale o le amiotonu, e foaiina mai ia te a'u i lea lava aso o le Alii le faamasino amiotonu."⁶

Ou te tuu atu ia te outou la'u molimau ma la'u tautinoga i le moni o se Tama Faalelagi agaalofa ma Lana fuafuaga sili ma faavavau o le fiafia, lea ua aumaia ai i tatou i leni lalolagi i leni vaitaimi. Talosia ia musuia i tatou uma e le Agaga o le Alii ia atiina ae i totonu o i tatou lava le malosiaga e tutumau ai, i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 121:7–8.

2. Helamana 14:30.

3. 2 Nifae 31:20.

4. Anthony W. Ivins, saunoaga i le sauniga maliu mo Joseph Watson Maynes (faamau-mauga patino a le aiga o Maynes).

5. Eperu 12:1.

6. 2 Timoteo 4:6–8.



Saunia e Elder Richard G. Scott

○ Le Korama a Aposetolo e Toasefululua

Malosi Patino e ala i le Togiola a Iesu Keriso

E ala i le Togiola a Iesu Keriso, e mafai ai e i tatou taitoatasi ona mama ma aveesea ai le avega o lo tatou fouvale.

Talu ai nei, sa faamanuiaina au e feiloai ma se vaega o autalavou sili ona faagaetiaina mai le setete o Idaho. Sa fesili mai se tasi o tamaitai talavou amio mama pe o le a sou lagona o le a le mea aupito sili ona taua e tatau ona latou faia i o latou olaga i le taimi nei. Sa ou fautou atu i ai ia latou aoao e iloa le mana o le Togiola a Iesu Keriso i o latou olaga. O le aso, o le a ou faamalalama atu ai se vaega se tasi o lena mana, le malosi patino lea e mafai ona tatou mauaina e ala i le Togiola a Iesu Keriso.

I le Tusi a Mamona tatou te faitau ai ia Amona ma ona uso a o latou aoao atu le talalelei a Iesu Keriso i se nuu o ni “tagata aivao, ma lotomaaa ma feai.”¹ O le toatele o tagata sa liuaina ma filifili e lafoai ese a latou amioga agasala. Sa matua atoatoa lo latou liua lea na latou tanumia ai a latou auupega ma osifeagaiga ai ma le Alii o le a latou le toe faaogaina lava.²

Mulimuli ane, o le toatele o o latou uso sa lei liuaina na osofaia i latou ma amata ona fasioti ia i latou. Sa filifili tagata nei ua faatuatua ia latou oti lava i le pelu nai lo le lamatia o o latou olaga faaleagaga i le toe aapa atu i

auupega mo lo latou puipuiga. O la latou faataitaiga amiotonu na fesoa-soani i isi tagata ina ia liua ma lafoai a latou auupega o le fouvale.³

Na auala mai ia Amona, na taitai atu ai i latou e le Alii e sulufai atu ia sa Nifae, ma lauiloa ai i latou o le nuu o Amona.⁴ Sa puipua e sa Nifae i latou mo le tele o tausaga, ae mulimuli ane na amata ona vaivai le autau a sa Nifae, ma sa matua manaomia ai se autau.⁵

Sa i ai le nuu o Amona i se taimi taua tele o o latou olaga faaleagaga. Sa latou faamaoni i a latou feagaiga ia aua lava nei fetagofi i auupega. Ae na latou malamalama foi o le tiute o tamā o le puipui lea o o latou aiga.⁶ O lena manaoga na foliga mai ua lava lena e faamaonia ai le iloiloina o le solia o le latou feagaiga.⁷

O lo latou taitai perisitua atamai, o Helamana, sa iloaina o le solia o se feagaiga ma le Alii e le mafai lava ona faamaoniaina. Sa ia ofo atu se isi auala musuia. Na ia faamanatu atu ia i latou e faapea sa lei tausala lava o latou atalii i agasala lava ia e tasi ma o lea sa le manaomia ai ona latou osia lea lava feagaiga e tasi.⁸ E ui sa talavou tele nei atalii, ae sa matua malolosi faaletino ma, o le mea sa sili ona taua, o i latou

o e mama ma paia. Sa faamalositia nei atalii i le faatuatua o o latou tina.⁹ I lalo o le taitaiga a lo latou taitai ma le perofeta, na suitulaga ai nei alii talavou i o latou tama i le puipuiga o o latou aiga ma auaiga.¹⁰

O mea na tutupu o loo siomia ai lenei faaiuga taua ua faaalua ai le auala e aumai ai e le Togiola a Iesu Keriso le malosi patino i olaga o fanau a le Atua. Mafaufau i lagona agamalu o na tamā. Mata na faapefea o latou lagona i le iloaina o amioga fouvale o lo latou tuanai na taofia ai i latou mai le puipua o a latou ava ma fanau i lena taimi o mafatiaga? O le iloaina patino o tulaga lamatia o le a fetaiiai nei ma o latou atalii, atonu sa latou fetagisi faalilolilo. O tamā, ae le o le fanau, e tatau ona puipua o latou aiga!¹¹ Masalo sa matuai matuitui o latou faanoanoaga.

Aisea na matatau ai o latou taitai perisitua e iloilo le toe aumaia o a latou auupega, “nei maumau o latou agaga?”¹² Na tautino mai e le Alii, “Faa-uta, o ia o le ua salamo i ana agasala, o ia lava lea ua faamagaloina, ma o A’u, o le Alii, e le toe manatuaina lava i latou.”¹³ O nei tama faamaoni ua leva ona salamo mai ia latou agasala ma ua mama e ala i le Togiola a Iesu Keriso, o lea la, aisea na fautuaina ai i latou ia aua nei puipua o latou aiga?

O se upumoni autu e faapea e ala i le Togiola a Iesu Keriso, e mafai ai ona faamamaina i tatou. E mafai ona tatou mama ma paia. Peitai, o nisi taimi o a tatou filifiliga le lelei e tuua ai i tatou i ni taunuuga faifai umi. O se tasi o laasaga taua e faaatoa ai le salamo o le onosaia lea o taunuuga mo taimi pupuu ma taimi faifai umi o a tatou agasala ua mavae. O a latou filifiliga i le tuanai na oo ai nei tamā sa Amonā i se manaoga faaletino lea sa ono mafai ona toe avega ma se vaivaiga e taumafai Satani e faaoga mo ona faamoemoega.

O le a taumafai Satani e faaaoga o tatou manatuaga o soo se tausalaina ua mavae e mailei ai i tatou e toe foi i tua i ana faatosinaga. Na faapea foi le tulaga o tuua o le nuu faamaoni o Amona. Na oo lava ina ua mavae tausaga o le ola faamaoni, sa manao-mia le puipuia mai o i latou lava faaleagaga mai soo se faatosinaga o manatuaga o agasala ua mavae.

I va o taua e tele, na faatonutonu ai e Kapeteni Moronae le puipuiga o aai sili ona vaivai. “Sa ia faatonuina e tatau ona latou fausia se pa laau tetele i luga o le itu i totonu o le utu; ma sa latou lafo ae i luga palapala mai le utu e tatao i le pa laau tetele . . . seia oo ina latou siomia le aai . . . i se pa malosi o laau ma le eleele, i se maualuga tele lava.”¹⁴ Sa malamalama Kapeteni

Moronae i le taua o le faamalosiaina o vaega vaivai ina ia fatu ai le malosi.¹⁵

O nei tamā sa Amona sa tele lava mea na tutusa ai. Sa latou manao-miaina se puipuiga tele faaleagaga e tuueseese ai o latou olaga faatuatua mai amioga eleelea o lo latou tuanai. O o latou atalii, o e na faamanuiaina i uputuu amiotonu, sa lei vaivai i ia lava faaosoosoga e tasi. Sa mafai ona latou puipuia o latou aiga ma le faamaoni e aunoa ma le fetuunaia o o latou tulaga manuia faaleagaga.

O le tala fiafia mo soo se tasi e manao ina ia aveese ia taunuuga o filifiliga le lelei o le tuanai e faapea, e ese le silasila a le Alii i vaivaiga nai lo Lana silasila i le fouvale. O lea e lapatai mai le Alii e faapea o le fouvale e aunoa ma le salamo o le a aumaia ai

faasalaga,¹⁶ ae pe a fetalai le Alii e uiga i vaivaiga, o taimi uma lava e fetalai mai ma le alofa mutimutivale.¹⁷

E mautinoa lava, o loo i ai sina agalelei ona sa aoaoina tamā sa Amona i uputuu sese a o latou matua, ae o fanau uma a le Tama i le Lagi e o mai i le olaga faitino ma se Malamalama o Keriso. E tusa lava la po o le a le mafuaaga o a latou amioga agasala, o o latou aafiaga o fua ia o se vaivaiga faaleagaga na taumafai ia Satani e faaaoga.

Sa aoaoina i latou ma le alofa mutimutivale i le talalelei, na salamo, ma na ala atu i le Togiola a Iesu Keriso na matua malolosi atu ai faaleagaga nai lo faatosinaga a Satani. E foliga mai latou te lei lagonaina le faaosoosoga e toefoi atu i o latou tuanai leaga, ae o lo latou mulimuli i le perofeta ma le taitai, sa latou lei tuua ai se avanoa ia Satani e “[olegia] o latou agaga ma [ia taitai] lemu ese atu i latou i lalo i seoli.”¹⁸

O le Togiola a le Faaola sa le gata na faamamaina ai i latou mai le agasala, ae ona o lo latou usiusitai i le fautuaga a lo latou taitai perisitua, na mafai ai e le Faaola ona puipuia i latou ma o latou vaivaiga ma faamalosi i latou. O la latou tautinoga lotomauualalo i le olaga atoa e lafoai a latou agasala, na tele atu mea na fai ai e puipuia ai o latou aiga nai lo se isi lava mea na mafai ona latou faia i luga o le malae o le taua. O lo latou usiusitai na maua ai o latou faamanuiaga. Sa faamalosi ma faamanuiaina ai i latou ma faamanuiaina ai foi ia tupulaga i le lumanai.

O le faaiuga o le tala ua manino ai le auala e faia ai e le alofa mutimutivale o le Alii ia “mea vaivai ia avea ma mea malolosi.”¹⁹ O nei tamā faatuatua na auina atua o latou atalii i le taua i lalo o le taitaiga a Helamana. E ui na tau atalii i taua leaga tele lea sa tofu uma ai ma se manua, ae e leai ma se ola na maua.²⁰ Na avea alii talavou ma puna o le malosiaga i le autau vaivai a





sa Nifae. Sa latou faamaoni ma malolosi atu faaleagaga ina ua latou toe foi mai i le aiga. Na faamanuiaina, puipuia, ma faamalosi o latou aiga.²¹ I o tatou aso, e le mafaitaulia tamaiti aoga o le Tusi a Mamona ua faagaetia i le faataitaiga a nei atalii mama ma amiotonu.

Ua tofu i tatou taitoatasi ma se taimi i o tatou olaga ua faia ai ni filifiliga le lelei. Ua tatou matua manaomia lava le mana faaola o le Togiola a Iesu Keriso. E tatau ona salamo i tatou uma mai soo se mea o fouvale ai. “Ona o A’u o le Alii e le mafai ona Ou vaai i luga o le agasala ma sina tikeri itiiti o le faatagaina.”²² E le mafai ona Ia faatagaina ona Na te silafia mea e fai ina ia avea ai e faapei o Ia.

O le toatele o i tatou ua faatagaina vaivaiga e atiae i o tatou uiga faaletagata. E ala i le Togiola a Iesu Keriso, e pei o sa Amona, e mafai ona tatou fausia ni olo faaleagaga i o tatou va ma soo se mea sese ua tuanai lea o loo taumafai ia Satani e faaoga e faavaivaia ai tatou. O puipuiga faaleagaga ua fausia faataamilo i tamā sa Amona na faamanuiaina ma faamalosi ai i latou lava, o latou aiga, lo latou atunuu, ma tupulaga i le lumanai. E moni foi lena mea mo i tatou.

E faapefea la ona tatou fausiaina nei olo faaleagaga? O le laasaga muamua lava e tatau ona fai, o le salamo faamaoni, maeaea ma atoatoa. E ala i le Togiola a Iesu Keriso, e mafai ai e i

tatou taitoatasi ona mama ma aveesea ai le avega o lo tatou fouvale. Manatua, o le salamo e le o se faasalaga. O le ala lea ua tumu i le faamoemoe e tau atu i se lumanai sili ona mamalu.

Ua saunia e le Tama o i le Lagi mo i tatou ni meafaigaluega e fesoasoani ai e fausia ni olo i va o o tatou vaivaiga ma lo tatou faatuatua. Mafaufau i fautuaga nei:

- Osia ni feagaiga ma maua ia sauniga mo oe lava ia. Ona galue tumau lea ma le faifai pea e faia ia sauniga o le malumalu mo ou lava tuua.
- Faasoa atu le talalelei i tagata le lolotu po o tagata o le aiga ua le toe toaaga mai po o ni uo. O le faasoa ina atu o nei upumoni e aumaia ai se naunautaiga faafouina i lou olaga.
- Ia auauna atu ma le faamaoni i valaauga uma a le Ekalesia, aemaise i tofiga o faiaoga o aiga ma faiaoga asiasi. Aua nei tau na ona avea oe ma se faiaoga o aiga po o se faiaoga asiasi 15 minute i le masina. Ae, ia aapa atu i tagata taitoatasi o le aiga. Ia iloa patino i latou. Ia avea ma se uo moni. E ala i faatinoga o le agalelei, ia faaali atu i ai lou popole tele mo i latou taitoatasi.
- O le mea aupito sili ona taua, ia auauna atu i tagata o lou lava aiga. Ia avea le atinaega faaleagaga o lou toalua ma le fanau o se mea aupito

sili ona faamuamua. Ia e gauai atu i mea e mafai ona e faia e fesoasoani ai i tagata taitoatasi. Foai fua atu i ai lou taimi ma le naunautaiga.

I nei fautuaga taitasi, o loo i ai se autu e tutusa ai: faatumu lou olaga i auaunaga i isi. A faamaumau lou ola e auauna atu ai i fanau a le Tama i le Lagi,²³ o le a aveesea le mana o Satani mai lou olaga.

Talu ai ona e alofa tele lou Tama o i le Lagi ia te oe, ua mafai ai e le Togiola a Iesu Keriso ona tuu atu lena malosi. E le ofoofogia ea? E toatele outou ua lagonaina le mamafa o filifiliga le lelei, ma ua mafai e outou taitoatasi ona lagonaina le mana musuia o le faamagaloga a le Alii, alofa mutimutivale, ma le malosi. Ua ou lagonaina, ma ou te molimau atu o loo avanoa mo outou taitoatasi, i le suafa o Iesu Keriso, amene. ■

FAAMATALAGA

1. Alema 17:14; tagai foi Alema 17–27.
2. Tagai Alema 23:4–7; 24:5–19.
3. Tagai Alema 24:20–27.
4. Tagai Alema 27.
5. Tagai Alema 53:8–9; 56:10–17.
6. Tagai “O Le Aiga: O Se Folafulaga i le Lalolagi,” *Liahona*, Nov. 2010, 129.
7. Tagai Alema 53:10–13.
8. Tagai Alema 53:14–16.
9. Tagai Alema 56:48.
10. Tagai Alema 53:17–22; 56:3–10, 30–57.
11. Tagai *Liahona*, Nov. 2010, 129.
12. Alema 53:15.
13. Mataupu Faavae ma Feagaiga 58:42.
14. Alema 53:4.
15. Tagai Eteru 12:27.
16. Tagai 1 Samuelu 12:15; Isaia 1:20; 1 Nifae 2:23; Mosaea 15:26; Alema 9:24; Mataupu Faavae ma Feagaiga 76:25; Mose 4:3.
17. Tagai Faataoto 28:13; 1 Korinito 2:3; 15:43; 2 Korinito 13:4; Iakopo 3:17; 2 Nifae 3:13; Iakopo 4:7; Alema 34:17; 3 Nifae 22:8; Eteru 12:26–28; Mataupu Faavae ma Feagaiga 24:11; 35:17; 38:14; 62:1.
18. 2 Nifae 28:21.
19. Eteru 12:27.
20. Tagai Alema 57:25; 58:39.
21. Tagai Alema 58:40.
22. Mataupu Faavae ma Feagaiga 1:31.
23. Tagai Mataio 16:25; Mataupu Faavae ma Feagaiga 88:125.



Saunia e Peresitene Thomas S. Monson

“Ou Te Le Tuua Lava Oe, Ou Te le Tuulafoai Lava ia te Oe”

*O lo tatou Tama Faalelagi . . . ua Ia silafia foi tatou te
aoao ma tuputupu ae ma malosi atili ao tatou fetaii ma
manumalo mai tofotofoga ia e tatau ona tatou pasia.*

I lau api talaaga i lenei po, o le a ou
tusi ai, “O se tasi lenei o sauniga
aupito sili ona musuia o soo se
konafesi aoao ua ou auai. O mea uma
e faatatau i ai ua sili atu ma maoae le
natura faaleagaga.”

Uso e ma tuafafine, i le ono masina
talu ai ao tatou mafuta faatasi i la tatou
konafesi aoao, sa faataotolia ai si au
manamea pele, o Frances i le falemai,
na mafatia i se pa’ū matuia i nai aso
na muamua atu. Ia Me, i le mavae ai
o ni vaiaso o tauiviga ma le lototele e
faatoilalo ona manuaga, sa ia mou atu
ai i le faavavau. Ua matuai ou misia
lava o ia. Sa ma faaipoipo i le Malu-
malu o Sate Leki i le aso 7 o Oketopa,
1948. O taeao semanu e atoa i ai le 65
tausaga o le ma faaipoipoga. O ia o
lo’u ola atoa, o la’u soa faatuatuaina,
ma la’u uo mamae. I lo’u fai atu ai ua
ou misia lava o ia, e le o amata ai ona
ou faamatalaina le loloto o ou lagona.

O le konafesi lenei ua faailogaina ai
le 50 tausaga talu ona valaauina au i le
Korama a Aposetolo e Toasefululua e

Peresitene Tavita O. MaKei. I le aluga
o nei tausaga uma e leai lava se isi
mea na ou lagonaina ae ua na o le
lagolagosua atoatoa ma le faamalieina
a si a’u manamea pele. E le mafaitaulia
osigataulaga na ia faia ina ia mafai ai
ona ou faataunuaina lo’u valaauga.
Ou te lei faalogo lava i se upu faitio
mai ia te ia ao faatele ona ou faaaluina
ia aso ma o nisi taimi o vaiaso e tuua
ai na o ia ma le ma fanau. O ia moni
lava o se agelu.

Ou te fia faailoa atu lo’u faafetai,
faapea ai ma le faafetai a lo’u aiga,
mo le faailoaga silisili o le alofa lea
na oo mai ia i matou talu le maliu o
Frances. E faitau selau kata faamaisega
ma tusi na auina mai le lalolagi atoa e
faailoa mai ai le faamemelo mo ia ma
faamafanafanaga mo lo matou aiga. Sa
matou mauaina le anoanoai o teufuga-
laau matagofie. Matou te faafetai tele
mo saofaga na foai atu i lona igoa i le
Tupe mo Faifetautalau Lautele a le Eka-
lesia. E avea ai ma sui o i matou ua ia
tuua, ou te faailoa atu se agaga faafetai

tele mo lo outou agalelei ma faailoaga
ootia o le alofa.

O le faamafanafanaga sili ia te au i
lenei taimi faamomoloto o le valavala
ai, o la’u molimau o le talalelei a Iesu
Keriso ma le malamalama o ia te au o
loo ola pea la’u pele o Frances. Ou te
iloa o le ma valavala ai e le tumau. Sa
faamauina i maua i le maota o le Atua e
se tasi na umiaina le pule e fusifusia ai
mea i le lalolagi ma i le lagi. Ou te iloa
o le a toe faatasia i maua i se aso ma o
le a le toe valavala ai lava. O le mala-
malama lea o loo lagolagoina ai au.

Uso e ma tuafafine, atonu e manatu
ma le saogalemu e faapea e leai se tasi
ua ola e saoloto atoa mai puapuaga
ma faanoanoaga, po o se vaitaimi i le
talafaasolopito o tagata sa lei maua
ai sona vaega atoa o le vāvāō ma
faanoanoaga.

Pe a tatou oo i tulaga leaga o le
olaga, o loo i ai le faaosoosoga e fai
le fesili “Aisea ua oo ai ia te au?” E i ai
taimi e foliga mai ai ua leai se mutaaga
o o tatou puapuaga, ua leai se laveai i
o tatou tofotofoga. Ua tatou lagonaina
le siomia i le le fiafia ona o manaoga
le faamalieina ma le faanoanoa ona o
faamoemoega ua mou ese atu. Tatou
te auai i le faaleoina o le faatoga o i
le tusi paia, “E leai ea ni pulu pāsama
i Kiliata?”¹ Tatou te lagonaina le tuu-
lafoaiina, lotonutimomoia, ma le tuua
toatasi. Ua tatou masani lava i le tagai i
o tatou lava tulaga le manuia patino e
ala i se vaaiga faanenefu o le masalo-
salo. Tatou te oo ina le onosai mo se
vaifofo i o tatou faafitauli, ma faaga-
loina soo ai le manaomia pea o lena
amio mama faalelagi o le onosai.

O faigata ia e oo mai ia i tatou ua
tatou maua ai le tofotofoga moni o lo
tatou gafatia e tumau ai. E tumau pea
se fesili autu ia taliina e i tatou taitoa-
tasi: Pe o le a ou faavaivai ea, pe o le
a ou faamaeaina ea? O nisi e faavaivai
pe a latou iloina ua latou le mafai

ona faatoilaloina o latou faigata. O le faamaeaina e aofia ai le tumau e oo i le iuga o le olaga lava ia.

A o tatou mafaufau loloto i mea ia e mafai ona tutupu ia i tatou lava, e mafai ona tatou faapea faatasi ma Iopu o anamua, “Ua fanau mai le tagata ia tigaina.”² O Iopu o se tagata na “sa’o le amio . . . ma le amiotonu” o le na “mata’u foi . . . i le Atua ma ‘alo’alo ese i mea leaga.”³ Sa amiotonu ona uiga, uluola i lona tamaoaga, ae sa fetai ia Iopu ma se tofotofoga lea e mafai ona faaumatia ai soo se tasi. Sa aveesea ana meatotino, faatauemu i ai ana uo, mafatia i ona puapuaga, faavauvau i le tuua o ia e lona aiga, sa faatauana i lona o ia e “faifai . . . [i] le Atua, ma . . . oti ai.”⁴ Sa ia tetee atu i lenei faaososoga ma tautino atu i le taele o lona agaga malualii:

“Faauta, o i le lagi lē molimau ia te au, o i lugā foi lē ua i ai le mau ia te au.”⁵

“Ua ou iloa, o loo soifua lē na te togiolaina a’u.”⁶

Sa tumau Iopu i le faatuatua. Pe o le a tatou faia foi lea mea e tasi pe a tatou fetai ma o tatou luitau?

Soo se taimi lava e oo ai ia i tatou le lagona o le mamafatu o faigata o le olaga, ia tatou manatua na uia foi e isi lea lava ala e tasi, na onosaia, ma manumalo ai.

O le talafaasolopito o le Ekalesia i lenei tisipenisione o le atoaga o taimi, ua faatumulia i aafiaga a i latou na tauivi ma faigata ae na tumau pea ma le mausali ma le fiafia. O le a le mafuaaga? Aua ua latou avea le talalelei a Iesu Keriso ma taulaiga o o latou olaga. O le mea lea o le a tatou onosaia ai soo se faigata e oo mai. O le a tatou oo pea i luitau faigata, ae o le a mafai ona tatou taulimaina, faafetaia’ia ma le lototele, ma o ese mai ai ma le manumalo.

Mai tofaga o tiga, mai aluga o

loimata, e siitia i lugā i le lagi i tatou e lona famautinoaga ma le folafolaga taua: “Ou te le tuua lava oe, ou te le tuulafoai lava ia te oe.”⁷ O sea faamafanafanaga e lemafaatauina.

Ao ou faimalaga ai i le salafa o le lalolagi e faataunuu ia tiutetauave o lo’u valaauga, ua ou iloa ai le tele o mea—e aofia ai le mea moni e faapea e oo i tagata uma le faanoanoa ma mafatiaga. E le mafai ona ou amata fuatiaina ia lototiga uma ma faanoanoaga ua ou molimauina ao ou asiasi atu ia i latou o loo feagai ma faanoanoaga, aafia i gasegase, feagai ma le tatalaga o faaipoipoga, tauivi ma se atalii po o se afafine faalogogata, po o ua puapuagatia i taunuuga o agasala. E le uma le lisi, aua e le mafaitaulia ia faafitauli e mafai ona tatou oo i ai. Ina ia ta’ua na o se faafitauli faigata se tasi, ma soo se taimi lava ou te mafaufau ai i luitau, ou te manatua lava ia Uso Brems, o se tasi o ou faiaoga o le Aoga Sa a o ou tamaitiiti. O ia o se tagata faamaoni o le Ekalesia, o se tamalii e tumu i le alofa. O ia ma lona faletua, o Sadie, e toavalu le la fanau, o le toatele o i latou e tupulaga lava ma ē o lo matou aiga.

Ina ua uma le ma faaipoipoga ma Frances ma malaga ese mai le uarota, lea sa ma vaai ai ia Uso ma Tuafafine Brems ma tagata o lo latou aiga i faaipoipoga ma maliu, faapea ai ma faatasiga a le uarota.

I le 1968 na maliu ai le faletua o Uso Brems, o Sadie. A o alua’i tausaga sa maliliu foi le isi toalua o lana fanau e toavalu.

I se tasi aso toeitiiti atoa le 13 tausaga talu ai, sa telefoni mai ai le afafine ulumatua o se tasi o fanau a Uso Brem ia te au. Sa ia faamalalama mai o lona tamamatua ua atoa lona aso fanau lona 105. Sa ia fai mai, “O loo nofo o ia i se tamai fale e tautino ai tagata matutua ae e feiloai ma lona

aiga atoa i Aso Sa taitasi, lea na te faia ai se lesonea o le talalelei.” Sa ia faaaauu, “O le Aso Sa lea na tuana i atu na faasilasila mai ai e Tamamatua ia i matou, “Au pele, o le a ou oti i le vaiaso lenei. E mafai ona outou valaau atu ia Tommy Monson. O le a ia silafia le mea e fai.’”

Sa ou asiasi atu ia Uso Brems i le afiava lava na sosoo ai. Ua fai si umi ou te lei toe vaai ia te ia. Sa le mafai ona ou talanoa ia te ia, aua ua tutuli. Sa le mafai ona ou tusia se savali mo ia e faitau, ona ua tauaso o ia. Sa tau mai ia te au e talanoa atu le aiga ia te ia, i le tago o le tagata uu le tamailima o lona lima taumatau ma tusi ai i luga o lona alofilima agavale le igoa o le tagata o loo asiasi atu. Soo se feau lava e ao ona faia i lea lava ala e tasi. Sa ou mulimuli i le faiga lea i le uuina o lona tamailima ma sipela ai le “T-O-M-M-Y M-O-N-S-O-N,” le igoa lea sa ia iloina ai lava au. Sa amata ona fiafia ia Uso Brems ma, uu atu ou lima ma tuu i luga o lona ao. Sa ou iloina lona manao ia maua sona faamanuiaga faaleperisitua. O le avetaavale na avatua au i le nofoaga mo tagata matutua na ma auai faatasi a o tuu o ma lima i luga o le ao o Uso Brems ma tuu atu le faamanuiaga na manao-mia. Ina ua maea, na tafe ifo loimata mai ona fofoga tauaso. Sa ia uumauina o ma lima ma le agaga faafetai. E ui sa ia lei lagonaina le faamanuiaga na ma tuu atu ia te ia, ae sa malosi le Agaga, ma ou te talitonu na musuia o ia e iloa sa ma tuu atu le faamanuiaga na ia moomia. O lenei tamalii tausaaafia sa le mafai ona toe vaai. Sa le mafai ona ia toe faalogo. Sa taofia o ia i le po ma le ao i se tamai potu i se fale mo tagata matutua. Ae o le ‘ata’ata mai ona foliga ma upu na ia tautala ai na ootia ai lo’u loto. “Faafetai lava,” sa ia fai mai ai. “E ese le lelei o lo’u Tama Faalelagi ia te au.”

I totonu o le vaiaso, e pei ona sa muai faailoa mai e Uso Brems, na malii ai o ia. Sa lei mafaufau o ia i mea ua ia le mauaina; ae, sa ia matua lotofaafetai lava e le aunoa mo le tele o ona faamanuiaga.

O lo tatou Tama Faalelagi, o le o loo tuuina mai ia i tatou le tele o mea e fiafia ai, ua Ia silafia foi tatou te aoao ma tuputupu ae ma malosi atili ao tatou fetaii ma manumalo mai tofotofoga ia e tatau ona tatou pasia. Ua tatou iloa e i ai taimi o le a tatou lagoina ai le faanoanoa o le lotonutimoia, o taimi tatou te faavavau ai, ma taimi atonu o le a tofotofoina ai i tatou i le mea e gata ai. Peitai, o ia faigata e faatagaina ai i tatou ia suia mo le lelei sili atu, ia toe fausia o tatou olaga i le ala ua aoao ai i tatou e lo tatou Tama Faalelagi, ma ia avea ma se tagata e ese mai le tagata sa tatou avea ai—ia lelei atu nai lo le mea sa tatou i ai, sili atu ona malamalama nai lo le mea sa tatou i ai, sili atu ona tigaalofa nai lo le mea sa tatou i ai, faatasi ai ma ni molimau malolosi atu nai lo a tatou molimau sa i ai muamua.

E tatau ona avea lenei ma a tatou faamoemoega—e le gata ia tumau ma onosai, ae ia faapena foi ona faamama-ina atili faaleagaga a o tatou ola i taimi lelei ma taimi leaga. Ana le seanoa mo luitau ia faatoilaloina ma faafitauli ia foiaina, semanu o le a tatou tumau ai lava i le mea e tasi, i sina alualu i luma pe leai foi e agai atu i la tatou sini o le ola e faavavau. Sa faailoa mai e le fatusolo lea lava manatu e tasi i nei upu:

*O laau lelei e le tutupu ae i ni tulaga lelei,
O le malosi o le agi o le savili, o le malolosi foi na o laau lelei.
O le maualuga o le lagi, o lo tatou tutupu uumi foi lena,
O le tele o matagi, o lo latou malolosi foi lena.*



*E ala i le la, ma le malulu, le kiona ma uaga,
E maua ai laupapa lelei i laau ma uiga lelei i tagata.⁸*

Ua na o le Matai lava Na te silafiaina le o’oo’o o o tatou tofotofoga, o tatou tiga, ma o tatou mafatiaga. E na o Ia lava tatou te maua ai le filemu e faavavau i taimi o faigata. Ua na o Ia lava e pa’i mai i o tatou agaga ua faamaua i Lana fetalaiga faamafanafana:

“O mai ia te au, o outou uma o e tigaina ma mafatia i avega, o au foi e malolo ai outou.

“Ia outou amoina la’u amo, ma ia outou faaa’oa’o ia te au, aua o au le agamalu, ma le loto maualalo, ona maua lea e outou o le malologa mo outou agaga.

“Aua e avegofie la’u amo, o la’u avega foi e māmā ia.”⁹

Pe o ni taimi sili ona lelei po o taimi foi e sili ona leaga, o loo i ai lava o Ia faatasi ma i tatou. Ua Ia folafola mai o le a le suia lava lenei mea.

Ou uso e ma tuafafine, tau ina ia tatou faia se tautinoga i lo tatou Tama Faalelagi e le femoumouai i taimi po o faafitauli o o tatou olaga. E le tau manaomia ona tatou oo i faigata mo i tatou lava ina ia manatua

ai o Ia, ma e le tatau ona faamalosi i tatou e lotomauualalo a o lei tuu atua ia te Ia lo tatou faatuatua ma le faalagolago.

Ia tatou taumafai i taimi uma ia latala atu i lo tatou Tama Faalelagi. O le faia o lea mea, e tatau ona tatou tatalo atu ia te Ia ma faalogo atu ia te Ia i aso uma. Tatou te manaomia moni lava o Ia i taimi uma, e tusa lava pe o taimi lelei po o taimi leaga. Ia tatou manatua e le aunoa Lana folafolaga: “Ou te tuua lava oe, ou te le tuulafoai lava ia te oe.”¹⁰

Faatasi ai ma le malosi uma o lo’u agaga, ou te molimau atu ai o loo soifua le Atua ma e alofa ia i tatou, sa soifua ma maliu Lona Alo e Toatasi na Fanaua mo i tatou, ma o le talalelei a Iesu Keriso o le malamalama lea e susulu i taimi faigata o o tatou olaga. Ia faapena lava, ou te tatalo ai i le suafa paia o Iesu Keriso, amene. ■

FAAMATALAGA

1. Ieremia 8:22.
2. Iopu 5:7.
3. Iopu 1:1.
4. Iopu 2:9.
5. Iopu 16:19.
6. Iopu 19:25.
7. Iosua 1:5.
8. Douglas Malloch, “Good Timber,” in Sterling W. Sill, *Making the Most of Yourself* (1971), 23.
9. Mataio 11:28–30.
10. Iosua 1:5.



Saunia e Elder Quentin L. Cook

○ Le Korama a Aposetolo e Toasefululua

O Auega a Ieremia: Faaeteete i le Nofopologa

O la tatou lui o le aloese lea mai soo se ituaiga o nofo pologa, fesoasoani i le Alii e faapotopoto Lana au filifilia, ma ositaulaga mo le tupulaga faiaa.

I le popofou o le ma faaiipoipoga, na tonu ai ia i maua ma Mary o le a ma filifilia i le mea e gata ai le mafai ia gaoioga e mafai ona ma auai faatasi ai. Sa ma mananao foi ina ia ma faautauta i le faaaluina o a ma tupe. E fiafia Mary i musika ma sa popole ma le mautinoa o le a ou soona faamama-faina ia taaloga, o lea sa ia fautua mai ai e faapea ia ma auai i ni gaoioga tai lua faamusika, tala faamusika (opera) pe faaleaganuu mo taaloga taitasi uma e totogi ma te o i ai.

I le taimi muamua, sa ou le fia auai i le vaega tau tala faamusika (opera), ae i le aluga o taimi sa suia lau vaai. Sa patino lava lou fiafia i le tala faamusika a Giuseppe Verdi.¹ O lenei vaiaso o le a faamanatu ai le 200 tausaga o lona fanau mai.

I lona talavou, sa matua fiafia lava Verdi i le perofeta o Ieremia, ma i le 1842, i le 28 o tausaga, na lauiloa ai o ia i le tala faamusika o le *Nabucco*,

o le faapuupu faaItalia lea o le igoa Nepukanesa, le tupu o Papelonia.

I lenei tala faamusika o loo i ai ni manatu faavae o loo aumaia i le tusi o Ieremia, Auega, ma le Salamo i le Feagaiga Tuai. O le tala faamusika lea o loo aofia ai le toilalo o Ierusalem ma le ave faatagataotauaina ma le nofopologa o Iutaia. O le Salamo 137 o le uunaiga lea mo le tala faamomoi-loto ma le musuia a Verdi o le “Chorus of the Hebrew Slaves.” O le ulutala o lenei salamo i a tatou tusitusiga paia e matua tele se aafiaga: “A o nofo pologa ai, sa aue ai tagata Iutaia i talaane o vaitafe o Papelonia—Ona o le faanoanoa, sa le mafai ai ona latou pepese i viiga o Siona.”

O lou faamoemoega o le iloiloaina lea o le tele o ituaiga o nofo pologa ma le faatoilaloina. O le a ou faatusatusaina nisi o tulaga o o tatou aso ma tulaga o aso o Ieremia a o lei pa’u ia Ierusalem. A o tuuina atu lenei leo o

le lapataiga, ou te faafetai o le toatele o tagata o le Ekalesia o loo teenaina ma le amiotonu ia amioga sa matua faatiga ai i le Alii i taimi o Ieremia.

O valoaga ma auega a Ieremia e taua i le Au Paia o Aso e Gata Ai. O Ieremia ma tulaga o Ierusalem i lona vaitaimi o tulaga ia o loo i ai i le amata o mataupu i le Tusi a Mamona. O Ieremia o se tasi mai le taimi o le perofeta o Liae.² Sa faailoa manino atu lava e le Alii ia Ieremia e uiga i lona muai faauuga: “Na au iloa oe a o lei faia oe e au i le manava; na au faapa-iaina oe a o lei fanau mai oe, na au tofia oe e fai ma perofeta i nuu.”³

E ese le valaaua, misiona, ma le tofiga o Liae mai le Alii. Sa lei valaauina o ia i lona talavou ae i lona matua. I le taimi muamua sa avea o ia ma leo o le lapataiga, ae ina ua maea ona ia folafola atu ma le faamaoni lea lava savali e tasi e pei o Ieremia, sa poloaiina Liae e le Alii e ave lona aiga ma malaga ese atu i le togavao.⁴ I le faia o lea mea, sa le gata ina faamanuina ai e Liae lona aiga ae faapea foi tagata uma.

I tausaga ao lei faatafunaina ia Ierusalem,⁵ o savali ia na tuu atu e le Alii ia Ieremia e le mafaagaloina. Sa Ia fetalai:

“A o lou nuu ua suia lo latou mamalu i le mea e le aoga. . . .

. . . Ua latou tuu au le puna o le vai ola, a ua latou eli . . . o vaieli mavaevae e le tali ai ni vai.”⁶

Ao fetalai ai e uiga i mala o le a oo mai i e nonofo i Ierusalem, na faailoa mai ai le faanoanoa o le Alii e faapea, “Ua mavae ona po o le seleselega-saito, ua uma le tausaga vevela, a e le faaolaina i [latou].”⁷

Na faamoemoega le Atua o le a saoloto alii ma tamaitai e faia ni filifiliga i le va o le lelei ma le leaga. A oo ina avea filifiliga leaga ma uiga e pulea ai se aganuu po o se malo, o le a i ai



taunuuga ogaoga e le gata i le olaga nei ae faapea foi le olaga a sau. E mafai ona faapologaina tagata pe tuu i latou lava i le nofo pologa e le gata i vailaau lamatia ua fai ma vaisu ae faapena foi i filosofia lamatia ua fai ma vaisu lea ua o ese ai mai le ola amiotonu.

O le liliuese mai le tapuai atu i le Atua moni ma soifua ae tapuai i atua ese e pei o le oa ma le lauiloa ma le punouai i amioga le mama ma le amiotonu i le nofo pologa i ona ala uma ua aafia ai tagata. Ua aofia ai i nei mea le nofo pologa faaleagaga, faaletino, ma faaleatamai ma o nisi taimi e aumaia ai le faafanoga. Na aoao mai foi e Ieremia ma Liae e faapea o i latou o e amiotonu e tatau ona fesoa-soani i le Alii e faamautu Lana Ekalesia ma le malo ma faapotopoto mai ia Isaraelu ua faataapeapeina.⁸

O nei savali ua tau soo mai ma o loo faamalosia i le tele o seneturi i tisipenisione uma. Ua i ai nei savali i le fatu o le Toefuataiga o le talalelei a Iesu Keriso i lenei tisipenisione faaiu.

O le faatagataotauaina o tagata Iutaia ma le faataapeapeina o ituaiga

o Isaraelu, e aofia ai ituaiga e sefulu, o ni upumoni faaleaoaoga faavae taua ia e mafaufau i ai i le Toefuataiga o le talalelei. O ituaiga e sefulu ua leiloloa o vaega ia o le Malo i Matu o Isaraelu ma sa ave faatagaotauaina i Asuria i le 721t.l.m. Sa latou o atu i atunuu i matu.⁹ O la tatou mataupu faavae o le faatuatua lona sefulu o loo faapea mai, “Matou te talitonu i le faapotopotoina moni o Isaraelu ma le toefuataiga mai o Ituaiga e Sefulu.”¹⁰ Tatou te talitonu foi i le avea ai ma se vaega o le feagaiga na osia e le Alii ma Aperaamo, e le gata o le a faamanuiaina le gafa o Aperaamo ae faapena foi le faamanuiaina o tagata uma o le lalolagi. E pei ona saunoa Elder Russell M. Nelson, o le faapotopotoina “e le o se mataupu o nofoaga faitino ‘o se mataupu o tautinoga faaletagata lava ia. E mafai ona ‘aumaia [tagata] i le malamalama o le Alii’ [3 Nifae 20:13] e aunoa ma le tuua o o latou nuu moni.”¹¹

Ua manino lava le tatou aoaoga faavae: “Na faataapeapeina ma faapua-puagatia e le Alii ituaiga e sefululua o Isaraelu ona o lo latou amioleaga ma

le fouvale. Ae ui i lea, ua [faaaoga] foi e le Alii leni faataapeapeina o lona nuu filifilia i atunuu eseese o le lalolagi e faamanuiaina ai na atunuu.”¹²

Ua tatou aoaoina ni lesonea taua mai leni vaitaimi matautia. E tatau ona tatou faia mea uma i lo tatou malosi e aloese ai mai le agasala ma le fouvale lea e taitai atu ai i le nofo pologa.¹³ Ua tatou iloa foi o le ola amiotonu o se mea e manaomia mo le lagolagoina o le Alii i le faapotopotoina o Lana au filifilia atoa ai ma le faapotopotoina moni o Isaraelu.

O le nofo pologa, faatoilaloina, vaisu, ma le saisaitia e oo mai i le tele o auala. E mafai ona avea o se pologa moni faaletino ae e mafai foi ona avea ma mea e le toe maua pe ua faatamaia ai le faitalia lea e mafai ona faalavelave i lo tatou alualu i luma. Ua manino lava le upu a Ieremia e faapea o le amioletonu ma le fouvale o mafuaaga autu ia mo le faatafunaga o Ieruselema ma le ave faatagataotauaina i Papelonia.¹⁴

O isi ituaiga o nofopologa ua tutusa lava le faataumaioia i le agaga o le tagata soifua. O le faitalia e mafai ona soona tafili saunoa i ai i le tele o auala.¹⁵ O le a ou taua ni mea se fa o loo patino lava le faataumaioia i aganuu i aso nei.

Muamua, o vaisu ia ua faatamaia ai le faitalia, feteenai ai talitonuga moni, ma faaleagaina ai le soifua maloloina lelei ua mafua ai le nofo pologa. O le aafiaga o fualaau faasaina ma le ava malosi, ola le mama, ponokalafi, taaloga faitupe, faafitauli tautupe, ma isi mafatiaga ua mafua ai se avega i luga o i latou ua nofo pologa faapea ma malo i se fuataga tele, lea ua toetoe lava a le mafai ona fuatiaina.

Lua, o nisi o vaisu po o le manao e fai ni mea atonu e le o ni mea leaga pe a faia na o na mea e mafai ona faoa ai le tele o o tatou taimi taua ia

e mafai ona faaaoga e ausia ai a tatou sini amiotonu. E mafai ona aofia ai i lenei mea le soona faaaoga o ala faasalalau o agafesootai, taaloga vitio ma komepiuta, taaloga, tafaoga, ma le tele o isi mea.¹⁶

O le auala tatou te faasaoina ai le taimi mo le aiga o se tasi lea o mataupu sili ona taua o loo fetai ai ma i tatou i le tele o aganuu. I se taimi sa nao au ai le tagata o le Ekalesia i la matou ofisa o loia, sa faamalamalama mai ai e se tasi o tamaitai loia ia te au le auala na ia lagona ai i taimi uma e pei o ia o se fai maneta o loo taumafai e taofia ni polo se tolu i luga i le ea i le taimi lava e tasi. O le tasi polo o lana matata faaloia, o le tasi o lana faaipoipoga, ma le tasi o lana fanau. Sa toetoe lava a ia fiu i le leai o se taimi mo ia lava. Sa matuai popole lava o ia o se tasi o ia polo sa i ai pea i le palapala. Sa ou fautua atu ia matou fonon o se vaega ma talanoaina a matou mea e faamuamua. Sa matou iloina o le mafuaaga autu lava o loo matou faigaluega ai o le tausia lea o o matou aiga. Sa matou malilie o le sailia o nisi tupe se tele atu sa le latalata lona taua i le taua o o matou aiga, ae sa matou iloina o le tautuaina o a matou tagata i le mea sili matou te mafaia sa taua lea. Ona suia lea o le talanoaga i le mea sa matou faia i le falefaigaluega lea sa le manaomia ma sa le ogatusa ma le faasaoina o se taimi mo le aiga. Pe sa i ai se avega e faaalu se taimi i le falefaigaluega lea sa le taua?¹⁷ Sa tonu ia i matou o le matou sini o le faia lea o se siosiomaga faaleaiga ma faaleuo mo tamaitai ma alii uma. Ia avea i tatou ma taimua i le puipuia o taimi mo le aiga.

Tolu, o le toilalo popo ua sili ona taatele i o tatou aso, e pei lava ona i ai i le talafaasolopito atoa, o le filosofia po o talitonuga faaupufai ia e le ogatusa ma le talalelei a Iesu Keriso. O le suitulaga ai o filosofia a tagata mo upumoni o le talalelei e mafai ona taitai

ese ai i tatou mai le faigofie o le savali a le Faaola. Ina ua asiasi atu le Apisetolo o Paulo i Atenai, na ia taumafai e aoao atu le Toetu o Iesu Keriso. O lenei taumafaiga tatou te faitau ai i le Galuega, “Aua ua leai se isi mea ua faia e tagata Atenai uma atoa ma tagata ese e aumau ai, na ona tala atu ma faalogo mai *sina tala faatoa iloa*.”¹⁸ Ina ua iloa e le motu o tagata le natura faigofie faalelotu o le savali a Paulo, sa le o se mea fou, na latou teenaina.

O se faatusa lea o o tatou lava aso, lea e teena ai i le tele o taimi ia upumoni o le talalelei pe aveseseina ina ia avea ai ma mea faatosina sili atu faaleatamai pe sili atu ona talafeagai ma faiga faaleaganuu o loo i ai i le taimi nei ma filosofia faaleatamai. Afai tatou te le faaeteete, e mafai ona maileia ai i tatou e nei faiga ma tuu ai i tatou lava i le nofo pologa faaleatamai. O loo i ai le tele o leo i le taimi nei o loo tau atu ai i tamaitai le auala e ola ai.¹⁹ E tele ona feteenai ma le tasi ma le isi. O se atugaluga patino o na mea, o filosofia ia e faitioina pe faaitiitia ai le faaaloalo mo tamaitai o loo filifili e faia ni osigataulaga talafeagai e avea ai ma ni tina, faiaoga, uo, po o e e faafaileleina ia fanau.

I ni nai masina talu ai, e toalua a ma afafine a le ma fanau aupito laiti na asia

i maua—tasi i vaiaso taitasi. Sa ou i ai i le fale ma sa tatala atu le faitotoa. Sa i ai lou toalua o Mary i le isi potu. I asiasiga uma e lua, ina ua uma se fusi mai, sa toetoe lava a tutusa a la tala e fai. Sa la autilotilo solo ona fai mai lea, “Ou te fiafia e i ai i le fale o Tinamatua. O fea Tinamatua?” Sa ou lei fai atu ia i laua, ae sa ou mafaufau, “Pe le o le fale foi lenei a Tamamatua?” Ae sa ou iloina a o ou laitiiti, sa o atu ai lo matou aiga i le fale o Tinamatua. Sa oo mai upu o se pese e masani ai i lou mafaufau: “E asa le vaitafe ma le togavao i le fale o Tinamatua tatou te o atu i ai.”

Ia, sei ou fai atu ma le manino ua faagaetia lava au i avanoa faaleaoga ma isi o loo avanoa mo tamaitai. Ou te faatauaina le mea moni e faapea o le galuega faigata faaletino i le faatulagaina lelei o le fale o loo manaomia ai tamaitai ua faaitiitia i le tele o nofoaga o le lalolagi ona o avanoa faaonapo nei ma o loo faia e tamaitai ia saofaga ofoofogia i soo se vaega o galuega po o suesuega. Ae afai tatou te faatagaina la tatou aganuu na te faaitiitia le sootaga faapitoo o loo i ai i le fanau ma tina ma tinamatutua ma isi o loo faafaileleina i latou, o le a tatou salamo ai i se taimi mulimuli.

Fa, o malosiaga o loo solia ai



mataupu faavae faalelotu o loo tausisia ma le faamaoni, e mafai ona oo ai i le nofo pologa. O se tasi o ituaiga malosiaga sili ona le lelei, o le taimi lea e lagona ai e tagata amiotonu lo latou tali atu i le Atua mo a latou amioga ma ua faamalosi ai e fai gaoioiga ia e solia ai lo latou lotofuataiaifo mo se faataitaiga, e faamalosi ni fomai e filifili i le va o le lagolagoina o le faapauina o pepe lea e feteenai ma o latou lotofuataiaifo po o le faatea ma a latou galuega.

O le Ekalesia o se vaega toalaiteiti lava e tusa lava pe fesootai ma ni tagata e tutusa o latou manatu. O le a faigata ona suia se malo atoa, ae e tatau ona tatou galulue e faaleleia le aganuu moni lea o loo siomia ai i tatou. O le Au Paia o Aso e Gata Ai i atunuu uma e tatau lava ona avea ma ni tagatanuu lelei, ia auai i mataupu faalemalo, ia aotauina i latou lava i mataupu faaupufai, ma ia palota.

Peitai, o le tatou faamamafa autu, e tatau lava i taimi uma ona faia soo se osigataulaga talafeagai e puipui o tatou lava aiga ma le tupulaga faiaie.²⁰ O le toatele o i latou e le o nofo pologa i le taimi nei i ni vaisu ogaoga po o ni talitonuga sese. E tatau ona tatou fesoasoani atu ia i latou e tetea atu i se lalolagi ua talitutusa lava ma Ieruslema lea na oo i ai Liae ma Ieremia. Ma le isi, e manaomia ona tatou saunia i latou ia osia ma tausia ni feagaiga paia ma avea o ni auauna autu e fesoasoani i le Alii e faamautu Lana Ekalesia ma faapotopoto ia Isaraelu ua faataapepeina faapea ai ma le au filifilia a le Alii i soo se mea.²¹ E pei ona faitauina ma le matagofie i le Mataupu Faavae ma Feagaiga, “O le a oo mai o le a faapotopoto mai e e amiotonu i fafo mai atunuu uma, ma o le a o mai i Siona, ma pepese i pese o le olioli e tumau-faavavau.”²²

O la tatou lui o le aloese lea mai soo se ituaiga o nofo pologa,

fesoasoani i le Alii e faapotopoto Lana au filifilia, ma ositaulaga mo le tupulaga faiaie. E tatau ona tatou manatua i taimi uma tatou te le faasaoina i tatou lava. Ua faasaolotoina i tatou e le alofa, alofatunua, ma le taulaga togiola a le Faaola. Ina ua sosola ese le aiga o Liae, na taitaia i latou e le malamalama o le Alii. Afai tatou te faamaoni i Lona malamalama, mulimuli i Ana polo-aiga, ma faalagolago i Ana galuega, o le a tatou aloese mai le nofo pologa faaleagaga, faaletino, ma faaleatamai faapea ai foi ma faanoanoaga o le fesetetai solo i lo tatou lava togavao, ona ua malosi o Ia e faaola.

Ia tatou aloese mai le faavavau ma le faanoanoa o i latou e pauu atu i le nofo pologa ma ua le toe mafai ai ona pepese i viiga o Siona. I le suafa o Iesu Keriso, amene. ■

FAAMATALAGA

1. O le tele o tala faamusika (operas) a Verdi operas, e pei o le *Aida*, *La traviata*, ma le *Il trovatore*, o loo i ai i tala faamusika sili ona lauiloa ua faatinoina i le lalolagi i aso nei.
2. Tagai 1 Nifae 5:13; 7:14.
3. Ieremia 1:5.
4. Tagai 1 Nifae 2:2–3.
5. O le faatafunaga o le malumalu o Solomona, o le pau o Ierusalema, ma le avefaatagata-otauaina o le ituaiga o Iuta sa tupu pe tusa o le 586t.l.m.
6. Ieremia 2:11, 13.
7. Ieremia 8:20. Na tusia muamua e Ieremia le alaga a le Alii mo le salamo: “Ua tiga lo’u lotu i totonu ia te au” (Ieremia 4:19) ma augani mai, “Ia outou sailiili . . . pe tou te maua ai se tagata, pe ai se tasi ua ia faia le mea tonu, ma ua taumafai ina ia faamaoni, ona ou faamagaloina ai lea o le aai” (Ieremia 5:1).
8. Tagai Ieremia 31; 1 Nifae 10:14.
9. Tagai 2 Tupu 17:6; Mataupu Faavae ma Feagaiga 110:11.
10. Mataupu Faavae o le Faatuatua 1:10; tagai foi 2 Nifae 10:22.
11. Russell M. Nelson, “The Book of Mormon and the Gathering o Israel,” saunoaga na tuuina mai i le semina mo peresitene o misiona fou, i le aso 26 Iuni, 2013.
12. Taiala i Tusitusiga Paia, “Isaraelu,” scriptures.lds.org.
13. Na fetalai le Alii i o tatou aso e faapea, “Ua taoto le lalolagi atoa i le agasala, ma ua oi

- i lalo o le pouliuli ma lalo o le pologa o le agasala . . . ona ua latou le o mai ia te au” (Mataupu Faavae ma Feagaiga 84:49–50).
14. Ioe e mafai foi ona faapologaina tagata ta’umamaina.
 15. E le masuia lava mataupu faavae faaleao-aoga faavae, ae o auala o le nofo pologa, toilalo, ma le faatafunaga ua faatelevaveina i se faiga sili atu.
 16. Sa ta’ua ma le talafeagai ma pei e malie le mea leni i le faavaa o le *New York Times Magazine* i le tausaga ua tea (8, Ape., 2012) e faataata i le natura faavaisu o taaloga komepiuta. E faitauina, “O Le Malosiaga o Mea ua Matuai Fai ma Vaisu, Faamamautu Taimi, Faamalepe Mafutaga, Faaleaga Mafaufau ma le Faatosinaga o Taaloga Komepiuta Le Aoga.” Ma i mataitusi laiti: “(Lea e le o faapea mai tatou te le fiafia foi i ai.)” I se auala manatu mama, ua faamamafa mai e leni mea le taua o le faa-aogaina o le atamai i lo tatou faaogaina o mea fatufatuai ofoofogia faatekinolosi i lo tatou vaiata.
 17. O le manatu taatele i le tele o siosiomaga faalegaluega o le “Tatou galulue malolosi, ma tatou taalo malolosi.” E ui e taua fegalealeaiga faaletagata faigaluega, ae a suitulaga le “faigaluega ma le taalo” i le taimi faaleaiga, o le toilalo popo faaletagata lena.
 18. Galuega 17:21; faapoopo le faamamafa.
 19. Tagai i le Keli Goff, “Female Ivy League Graduates Have a Duty to Stay in the Workforce,” *Guardian*, Apr. 21, 2013, www.theguardian.com/commentisfree/2013/apr/21/female-ivy-league-graduates-stay-home-moms; Sheryl Sandberg, *Lean In: Women, Work, and the Will to Lead* (2013); Anne-Marie Slaughter, “Why Women Still Can’t Have It All,” *The Atlantic*, June 13, 2012, www.theatlantic.com/magazine/print/2012/07/why-women-still-cant-have-it-all/309020; Lois M. Collins, “Can Women ‘Have It All’ When It Comes to Work and Family Life?” *Deseret News*, June 28, 2012, A3; Judith Warner, “The Midcareer Timeout (Is Over),” *New York Times Magazine*, Aug. 11, 2013, 24–29, 38; Scott Schieman, Markus Schafer, and Mitchell McIvor, “When Leaning In Doesn’t Pay Off,” *New York Times*, Aug. 11, 2013, 12.
 20. Ua uunaia e le Ekalesia au epikopo ia fesoasoani i aiga e ala i le faaaluina o taimi sili atu faatasi ma alii talavou, tamaitai talavou, ma talavou nofufua matutua. Ua uunaia au epikopo ia faamatuu atu le tele o tiutetauave i totonu o le aufono a le uarota i korama a le Perisitua Mekisateko, i ausilali, ma i tagata o loo i ai tomai faapitua e fesoasoani ai ma le tataui i isi.
 21. Tagai Mataupu Faavae ma Feagaiga 29:7.
 22. Mataupu Faavae ma Feagaiga 45:71.



Saunia e Elder Neil L. Andersen

○ Le Korama a Aposetolo e Toasefululua

Mana o le Perisitua

E mafai e le tagata ona tatala ia pupuni ina ia susulu mai ai i totonu le malamalama mafanafana o le la, ae e lē anaina e le tagata le la po o le malamalama po o le mafanafana o maua mai ai.

O Faamanuiaga o le Perisitua E mo Tagata Uma

A o usuina ma le fiafia e tamaiti i le sauniga faamanatuga le pese Peraimeri “O Loo Tautalagia linei le Alofa,” na ataata ma le faamalieleina tagata uma. Sa faalogologo ma le gauai atu se tina lototoa na tausia se fanau e toalima i le fuaiupu lona lua: “O lo’u aiga e manuia i le mana o le perisitua.”¹ Sa ia mafau-fau ma le faanoanoa, “E lei iloina lava e lau fanau sea ituaiga aiga.”²

O lau savali la i lenei tamaitai faamaoni ma i tagata uma, e mafai ona tatou ola i taimi uma ma le “manuia i le mana o le perisitua,” po o le a lava o tatou tulaga.

O nisi taimi tatou te soona faafe-sootaia ai le mana o le perisitua ma alii i le Ekalesia. O le perisitua o le mana ma le pule a le Atua ua tuuina mai mo le olataga ma faamanuiaga o tagata uma—alii, tamaitai, ma tamaiti.

E mafai e le tagata ona tatala ia pupuni ina ia susulu mai ai i totonu le malamalama mafanafana o le la, ae e lē anaina e le tagata le la po o le malamalama po o le mafanafana o maua mai ai. O faamanuiaga o le perisitua ua mautinoa lava le sili atu nai lo le tagata lea ua talosagaina e faatautaia le meaalofo.

Ina ia maua faamanuiaga, mana, ma folafolaga a le perisitua i lenei olaga ma le isi olaga o se tasi lea o avanoa ma tiutetauave silisili o le olaga faaletino. A tatou agavaa, o le a faaoaina e sauniga o le perisitua o tatou olaga i luga o le lalolagi ma saunia i tatou mo folafolaga matagofie o le lalolagi o i luma. Na fetalai mai le Alii, “O . . . sauniga, ua faaalai ai le mana o le faaleatua.”³

E i ai faamanuiaga faapitoa mai le Atua mo tagata agavaa uma o e ua papatiso, maua le Agaga Paia, ma aai ma feinu soo i le faamanatuga. Ua aumaia e le malumalu se malamalama ma le malosi faaopoopo, faatasi ai ma le folafolaga o le ola e faavava.⁴

Ua valaaulia i tatou e sauniga uma ina ia faateleina lo tatou faatuatua ia Iesu Keriso ma ia osia ma tausia feagaiga ma le Atua. Ao tatou tausia nei feagaiga paia, o le a tatou maua le mana ma faamanuiaga o le perisitua.

Pe tatou te le o lagonaina ea lenei mana o le perisitua i o tatou lava olaga ma vaaia ai i tagata tausi feagaiga o le Ekalesia? Ua tatou vaaia i tagata fou liliu mai, ao latou o ese mai vai o le papatisoga ua lagonaina le faamagaloga ma le mama. Ua tatou vaaia le sili atu o le gauai atu o a tatou fanau ma talavou i musumusuga ma le taitaiga

a le Agaga Paia. Ua tatou vaaia le amata avea o sauniga o le malumalu ma faailoga o le malosi ma le malamalama mo alii ma tamaitai amiotonu i le salafa o le lalolagi.

Sa ou vaaia i le masina lea ua tea se ulugalii talavou na maua le malosi silisili mai folafolaga o le faamauga i le malumalu ao fanauina le la pepe tama pele ae na o le tasi le vaiaso na ola ai. E ala i sauniga o le perisitua, o lenei ulugalii talavou ma i tatou uma e mauaina le mafanafana, malosi, puipufiga, filemu, ma folafolaga e faavavau.⁵

O Mea ua Tatou Iloa e uiga i le Perisitua

Atonu e fesili ma le faamaoni nisi, “Afai e avanoa i tagata uma le mana ma faamanuiaga o le perisitua, aisea la e faatautaia ai e alii ia sauniga o le perisitua?”

Ina ua fesili se agelu ia Nifae, “Pe ua e iloa ea le faamaualalo o le Atua?” Na tali atu Nifae ma le faamaoni, “Ua ou iloa e alofa o ia i ana fanau; e ui i lea, ou te le iloa le uiga o mea uma.”⁶

A tatou talanoa i le perisitua, e anoanoai mea ua tatou iloa.

E Tutusa Tagata Uma

Ua tatou iloa e alofa le Atua i Ana fanau uma ma e le faailoga tagata. “E le teena e ia se tasi e sau ia te ia, . . . tane [po o le] fafine; . . . ma ua tutusa tagata uma i le Atua.”⁷

E pei lava ona tatou iloa ma le mautinoa e “tutusa” le alofa o le Atua mo Ona atalii ma Ona afafine, ua tatou iloa foi Na te lei foafoaina ia tutusa ia alii ma tamaitai. Ua tatou iloa o le itupa o se vaega e manaomia mo lo tatou faasinomaga ma faamoemoega faaletino ma le faavavau. Ua tuuina atu i itupa uma ni tiutetauave paia.⁸

Mai le Amataga

Na tatou iloa mai le amataga na faavaeina e le alii le ala e faatautaia ai

Lana perisitua. “O le perisitua na uluai tuuina atu ia Atamu.”⁹ Na faatautaia uma lava e Noa, Aperaamo, ma Mose ia sauniga o le perisitua. O Iesu Keriso sa avea lava ma o loo avea pea ma Faitaulaga Sili Maoae. Na Ia valaauina Aposetolo. “Ua le filifili au e outou,” na Ia fetalai, “a ua filifilia outou e au.”¹⁰ I lo tatou vaitaimi na auina mai e le Atua avefeau faalelagi. Na toe fuataina le perisitua i le lalolagi e Ioane le Papatiso, Peteru, Iakopo, ma Ioane e ala mai i le Perofeta o Iosefa Samita.¹¹ O le ala lenei na faatautaia ai e le Tama o i le Lagi Lana perisitua.¹²

E Tele Meaalofa mai le Atua

Ua tatou iloa o le mana o le perisitua paia e lē galue e aunoa ma le faatuatua, le Agaga Paia, ma meaalofa faaleagaga. Ua lapatai mai tusitusiga paia, “Ia outou le faafitia meaalofa a le Atua, ona e tele i latou. . . . Ma e eseese ala e faatino ai ia meaalofa; ae o le Atua e tasi o le na te galueaiina i soo se mea ma i mea uma.”¹³

Agavaa

Ua tatou iloa o le taua o le tagata lava ia o le a faatonugalemu ai pea le faataunuina ma le mauaina o sauniga o le perisitua. Fai mai Sister Linda K. Burton, o le peresitene aoao o le Aualofa, “O le amiotonu o se mea e manaomia . . . e valaauliaina le mana o le perisitua i o tatou olaga.”¹⁴

Mo se faataitaiga, mafaufau i le mala o ponokalafi ua salalau solo i le lalolagi atoa. E le faatagaina e tulaga faatonuina o le agavaa a le Alii ona matamata i ponokalafi i latou o e faafoeina ia sauniga o le perisitua. Na fetalai mai le Faaola:

“Salamo mai i a outou . . . mea inosia faaliloilo.”¹⁵

“O le lamepa o le tino, o mata ia. . . . afai e leaga ou mata, e pouliuli uma ai lou tino.”¹⁶

“[Aua] ai se vaai atu i le fafine ina ia manao i ai, ua uma ona mulilua ma ia i lona loto.”¹⁷

O le faautaitaiina ma le le agavaa po o le tufaina [ma le le agavaa] o

le faamanatuga, faamanuiaina o e mamai, po o le auai i le faatinoga o isi sauniga o le perisitua, o le ta’u fua lea o le suafa o le Atua, e pei ona saunoa i ai Elder David A. Bednar.¹⁸ Afai e le agavaa se tasi, e tatau ona ia tuumuli ese atu mai le faatinoina o sauniga o le perisitua ma ia agai atu ma le agaga tatalo i lona epikopo e avea ma se laasaga muamua i le salamo ma le toe foi atu e tausi ia poloaiga.

Lotomauualalo

O le isi mea ua tatou iloa e anoanoai ia faamanuiaga o le perisitua i aiga lea o loo tuufaatasia ai se tina ma se tama amiotonu i le taitaiina o a latou fanau. Ae ua tatou iloa ina foi e saunia ma le naunautai e le Atua nei lava faamanuiaga e tasi mo i latou i le tele o isi tulaga.¹⁹

O se tina, o loo tauaveina le avega o le sauniaina faaleagaga ma le faaletino o lona aiga, na faamatalaina ma le iloa o le valaau atu i ona faiaoga o aiga ina ia faia se faamanuiaga o se tasi o lana fanau na manaomia ai lona lotomauualalo. Ae sa ia faaopoopo mai ma le iloa na sili atu la le agaga faamaualalo na manaomia e ona faiaoga o aiga ao la sauni e faamanuia lana tama.²⁰

O Ki o le Perisitua

Ua tatou iloa o ki o le perisitua, o loo umia e sui o le Au Peresitene Sili ma le Korama a Aposetolo e Toasefululua, o loo taitaia ai le galuega a le Alii i luga o le fogaeleele. O ki faapitoo o le perisitua e faaee atu i luga o peresitene o siteki ma epikopo mo o latou tiute-tauave i o latou lava [siteki ma uarota]. Ma ua latou valaauina alii ma tamaitai e ala i faaaliga o e ua lagolagoina ma vaetofia e faaoga le pule ua faamatuu atu e aoao atu ai ma taitai ai.²¹

E ui e tele mea tatou te le o silafia e uiga i le perisitua, o le vaai atu i tioata o le olaga faaletino e le o aumaia





atoa ai le malamalama i galuega a le Atua. Ae o Lana faamanatu filemu, “O o’u manatu e le o outou manatua, o o’u ala e le o outou ala,”²² ua faamautinoa mai ai ia i tatou o le taimi ma le vaaiga e faavavau o le a tatou vaaia ai mea “e pei ona i ai moni lava”²³ ma sili atu ona malamalama i Lona alofa atoatoa.

Ua tatou galulue uma ma le nau-nautai. O nisi taimi tatou te lagona ai le lofituina i o tatou valaauga, ma moomoo ai pe ua talosagaina i tatou ia faia nisi mea e sili atu. O nisi taimi tatou te faafetai ai pe a faamaloloina i tatou. Tatou te le fuafuaina valaauga ua tatou maua.²⁴ Sa ou aoaoina lenei lesona i le popofou o la’u faaipoipoga. I le avefa ai ma se ulugalii talavou, sa ma nonofo ai ma lou toalua, o Kathy i Florida. I se tasi Aso Sa sa faamatala mai ai ia te au e se fesoasoani i le au peresitene o le siteki lo latou lagona musuia e valaauina Kathy e avefa ma faiaoga seminare i le taeao.

“O le a faafefea ona fai lena mea?” sa ou fesili ai. “E i ai le ma fanau laiti, e amata le seminare i le 5:00 i le taeao, ma o au o le peresitene o Alii Talavou i le uarota.”

Na ataata le fesoasoani ma faapea mai, “O le a Lelei, Uso Andersen. O le a matou valaauina o ia, ae faamalolo oe.”

Ma o le mea tonu lava lea sa tupu.

O Le Sao a Tamaitai

O le talosagaina ma le faamaoni ma le faalogologo atu i manatu ma popolega o faaleoina e tamaitai e taua i le

olaga, i faaipoipoga, ma i le fausiaina o le malo o le Atua.

O le luasefulu tausaga ua mavae i le konafesi aoao, na faamatala ai e Elder M. Russell Ballard se talanoaga sa ia faia ma le peresitene aoao o le Aualofa. Sa i ai se fesili na tulai ae e uiga i le faamalosia o le agavaa o talavou o loo sauniuni e auauna atu i ni misiona. Na fai mai ma le ataata Elaine Jack, “E te silafia, Elder Ballard, atonu o i ai i [tamaitai] o le Ekalesia ni fautuaga lelei . . . pe a fesiligia i latou. E le gata i lena, . . . o i matou o o latou tina!”²⁵

E i ai ia Peresitene Thomas S. Monson se talafaasolopito o le olaga atoa o le fesili atu ma le tali atu i popolega o tamaitai. O le tamaitai sa sili ona aafia ai o ia, o Sister Frances Monson. Ua matou misia uma o ia. Faapena foi, i le Aso Tofi ua tuanai, sa faamanatu mai ai e Peresitene Monson i le Au Pulega Aoao le tele o mea na ia aoaoina mai i tina ua oti a latou tane e toa 84 i lana uarota. Na latou unaia malosi lana auaunaga ma lona olaga atoa.

E le o se mea na faateia ai, ao lei faia le filifiliga agaga tatalo a



Vany Parrella

Peresitene Monsona e uiga i le suia o tausaga mo le auaunaga faafaifeautalā, sa tele ni talanoaga sa faia ma au peresitene aoao o le Aualofa, Tamaitai Talavou, ma le Peraimeri.

Epikopo, a outou mulimuli i le faataitaiga a Peresitene Monson, o le a outou lagonaina le sili atu ona lauolaola i le aao taiala a le Alii o loo faamanuiaina la outou galuega paia.

Sa matou nonofo mo ni nai tausaga i Pasila. E lei leva ona matou taunuu, ae ou feiloai ia Adelson Parrella, lea sa galue o se Fitugafulu, ma lona uso o Adilson, lea sa galue i lo matou au peresitene o le siteki. Sa ou feiloai mulimuli ane i lo la uso, o Adalton, sa galue o se peresitene o le siteki i Florianopolis ma le isi uso, o Adelmo, sa galue o se epikopo. Sa faagaetia lava au i le faatuatua o nei uso, ma sa ou fesili ai e uiga i o latou matua.

Na papatisoina le aiga i Santos, Pasila, i le 42 tausaga ua mavae. Fai mai Adilson Parrella, “I le taimi muamua, sa foliga mai na fiafia lava Tamā e auai i le Ekalesia. Peitai, na [vave] lava ona le toe toaga o ia ma sa ia fai i lo matou tina e aua nei toe alu i le lotu.”

Na tau mai e Adilson ia te au o lona tina sa suiina lavalava mo tuaoi e totogi ai le pasese o le pasi e o ai lana fanau i le lotu. Na silia ma le maila na savavali ai tamaiti e toafa i le isi aai, pue ai le pasi mo le 45 minute, ona savavali lea mo le isi 20 minute i le falesa.

E ui sa le mafai ona latou o ma lana fanau i le lotu, ae sa faitau faatasi e Sister Parrella ia tusitusiga paia ma lana fanau tama ma teine, aoao ia i latou le talalelei, ma tatalo faatasi ma i latou. Na faatumulia lona aiga faatauvaa i faamanuiaga silisili o le mana o le perisitua. Na tuputupu ae ia tamaiti, auauna atu i misiona, na a’otauina, ma faaipoipo i le malumalu. Na faatumulia lo latou aiga i faamanuiaga o le perisitua.

I tausaga e tele mulimuli ane, sa ulu-fale atu ai Vany Parrella, o se tuafafine nofotoatasi i le malumalu mo ona faa-eega paia ma, mulimuli ane, auauna atu i ni misiona se tolu i Pasila. Ua 84 nei ona tausaga, ma o loo faaauau pea ona faamanuia e lona faatuatua ia augatupu-laga o loo mulimuli mai ia te ia.

Molimau ma Folafolaga

O loo maua le mana o le perisitua paia a le Atua i Le Ekalesia a Iesu Keriso o le Au Paia o Aso e Gata Ai. Ou te molimau atu a o outou auai ma le agavaa i sauniga o le perisitua, o le a tuu atu ia te outou e le Atua le malosi silisili, filemu, ma le vaaiga e faavavau. Po o le a lava lou tulaga, o le a “manuia [lou aiga] i le mana o le perisitua” ma o le a manaomia atili e i latou o e latalata mai ia te outou nei faamanuiaga mo i latou lava.

I le avea ai ma alii ma tamaitai, tuafafine ma uso, atalii ma afafine o le Atua, o le a tatou agai faatasi pea i luma. O lo tatou avanoa lenei, lo tatou tiutetauave, ma o tatou faamanuiaga. O lo tatou faamoemoega lenei—ia saunia le malo o le Atua mo le toe afio mai o le Faaola. I le suafa o Iesu Keriso, amene. ■

FAAMATALAGA

1. “O Loo tautalagia linei le Alofa,” *Tusipese a Tamaiti*, 102–03.
2. Imeli patino, 5 Aok., 2013.
3. Mataupu Faavae ma Feagaiga 84:20.
4. Tagai Mataupu Faavae ma Feagaiga 138:37, 51.
5. Tagai Mataupu Faavae ma Feagaiga 84:35; 109:22.
6. 1 Nifae 11:16–17.
7. 2 Nifae 26:33.
8. Tagai “O Le Aiga: O Se Folafolaga i le Lalolagi,” *Liahona*, Nov. 2010, 129.
9. *Aoaoga a Peresitene o le Ekalesia: Iosefa Samita* (2007), 104; tagai foi Mataupu Faavae ma Feagaiga 84:16; 107:40–53; 128:18, 21; Russell M. Nelson, “Lesona mai ia Eva,” *Liahona*, Ian. 1988, 84–87.
10. Ioane 15:16.
11. Tagai Iosefa Samita—Talafaasolopito 1:72; tagai foi Mataupu Faavae ma Feagaiga 13; 27.
12. Tagai M. Russell Ballard, “Let Us Think Straight” (BYU Campus Education Week devotional, Aug. 20, 2013); speeches.byu.edu. Na saunua Elder Ballard e faapea: “Aisea ua faau ai alii i tofi o le perisitua ae le o tamaitai? Sa faamalamalama mai e Peresitene Gordon B. Hinckley e faapea o le Alii, ae le o le tagata, ‘na filifili o alii i Lana Ekalesia e tatau ona umiaina le perisitua’ ma o le Alii foi na faaee maia i tamaitai ia ni ‘gafatia e faalatele ai lenei faalapotopotoga maoae ma le ofoofogia, le Ekalesia ma le malo o le Atua’ (‘O Tamaitai o le Ekalesia,’ *Liahona*, Nov. 1996, 70). Ina ua uma ona fofogaina ma faia mea uma, e le faaalai mai lava e le Alii pe aisea ua Ia faatulagaina ai Lana Ekalesia e pei ona Ia faia ai.”

13. Moronae 10:8.
14. Linda K. Burton, “Priesthood: ‘A Sacred Trust to Be Used for the Benefit of Men, Women, and Children’” (Brigham Young University Women’s Conference address, May 3, 2013); ce.byu.edu/cw/womensconference/pdf/archive/2013/lindaBurtonTalk.pdf.
15. 3 Nifae 30:2.
16. Mataiao 6:22–23.
17. Mataiao 5:28; tagai foi Alema 39:9. Na saunua mai Peresitene Thomas S. Monson: “O ponokalafi e faapitoa lava le matautia o le a avea ma vaisu. O le faailoa o ponokalafi e mafai ona avea ma mausa e pulea ai, e tau atu ai i mea e sili atu ona mataga ma le solitulafono faalefeusuaga. Aloese mai ponokalafi i soo se itu” (“O Sauniuniga e Aumaia ai Faamanuiaga,” *Liahona*, Me 2010, 66).
“E matua maofa ai—ua lipotia mai le toatele o tagata o loo faaogaina le Initoneti mo faamoemoega faatiapolo ma le mataga, o le matamata i ponokalafi o le mea aupito sili lea ona taatele o na faamoemoega. Ou uso e ma tuafafine, o le auai i ia mea, o le a matua faataumaioia moni ai lava lou agaga. Ia outou malolosi. Ia outou mama. Aloese mai na ituaiga o mea faafiafia tusa lava po o le a le mea e manaomia ai—po o le a lava e maua ai! Ou te faaleoina atu lenei lapataiga i tagata uma lava, i soo se mea” (“Seia Tatou Toe Feiloai,” *Liahona*, Me 2009, 113).
“Aloese mai soo se ituaiga o ponokalafi. O le a le lagonaina ai le agaga ma e ave-eseina ai le mafaufau malamalama. O loo tau mai i le Mataupu Faavae ma Feagaiga, ‘ma o le mea ua le faagaetia ua le mai i le Atua, ma o le pouliuli lea’ [Mataupu Faavae ma Feagaiga 50:23]” (“Faamaoni i le Faatua-tua,” *Liahona*, Me 2006, 18–19).
18. Tagai David A. Bednar, *Act in Doctrine* (2012), 53.
19. Tagai Dallin H. Oaks, “Pule o le Perisitua i le Aiga ma le Ekalesia,” *Liahona*, Nov. 2005, 24–27.
20. Imeli patino 5 Aok, 2013; tagai Iakopo 5:14.
21. Tagai Eperu 5:4.
22. Isaia 55:8.
23. Iakopo 4:13.
24. Tagai Mataupu Faavae ma Feagaiga 81:4–5. Na saunua mai Peresitene Gordon B. Hinckley: “O lau galuega e taua tele i le tulaga o lou lava tiutetauave e pei foi o la’u galuega i lo’u tulaga. E lei se valaauga i lenei Ekalesia e faatauvaa pe itiiti foi lona tau” (“O Le Galuega lenei a le Matai,” *Liahona*, Iulai 1995, 76).
25. M. Russell Ballard, “Malosi i le Fautua,” *Liahona*, Ian. 1994, 88.





Saunia e David M. McConkie

Fesoasoani Muamua i le Au Peresitene Aoa o le Aoga Sa

Aoa Atu i le Mana ma le Pule a le Atua

Ua saunia e le Alii le ala mo tagata agavaa uma o le Au Paia o Aso e Gata Ai ina ia aoao atu i le ala a le Faaola.

E le mafai e upu ona faamatalaina lo matou agaga faafetai i faiaoga o le Ekalesia atoa. Matou te alolofa ia te outou ma e i ai lo matou talitonuga tele ia te outou. O outou o se tasi o vavega sili o le talalelei toefuataiina.

O loo i ai moni se mealilo i le avea ma se faiaoga faamanuiaina o le talelelei, ina ia mafai ona aoao atu i le mana ma le pule a le Atua. Ua ou faaaogaina le upu *mealilo* ona o mataupu faavae e faalagolago ai le faamanuiaina o se faiaoga, lea e na o i latou lava o loo i ai se molimau o le mea na tupu i lena taeao matagofie, manino, segisegi i le tautotogo o 1820, e mafai ona malamalama i ai.


I le tali mai i le tatalo faamaualalo a se alii e 14 tausaga, na matala ai le lagi. Na faaali ma fetalai mai le Atua le Tama Faavavau ma Lona Alo o Iesu Keriso, i le Perofeta o Iosefa Samita. Na amatalia ai le toefuataiga o mea uma lava lea ua leva ona tatalia, ma o le mataupu faavae o faaaliga sa faavaeina e faavavau i la tatou tisipenisione. O le savali a Iosefa, ma o la tatou savali i le lalolagi, e mafai ona aoteleina i upu e lima: “Ua fetalai mai le Atua.” Sa fetalai mai o Ia anamua, sa fetalai mai o Ia ia Iosefa, ma o le

a fetalai mai o Ia ia te oe. O le mea lenei e tulaga ese ai oe mai isi faiaoga uma o le lalolagi. O le pogai lenei e le mafai ai ona e toilalo.

Ua valaauina oe e le agaga o valogaga ma faaaliga, ma ua vaetofiaina e le pule o le perisitua. O le a le uiga o lenei mea?

Muamua, o lona uiga o loo e i ai i le feau a le Alii. O oe o Lona sui, ma ua faatagaina ma tuuina atu ia te oe le tiutetauave e suitulaga ia te Ia ma galue e fai ma Ona sui. I le avea ai ma Ona sui, ua e agavaa ai i Lana fesoasoaniga. E tatau ona e fesili ifo ia te oe lava, “O le

Roma, Italia



a se fetalai a le Faaola pe ana faapea Na te aoaoina la’u vasega i le asō, ma o le a le auala o le a Ia aoao atu ai?” E tatau la ona e faia faapena.

O lenei tiutetauave e ono mafua ai ona lagona e nisi le le agavaa po o sina fefe foi. E le faigata le ala. Ua saunia e le Alii le ala mo tagata agavaa uma o le Au Paia o Aso e Gata Ai ina ia aoao atu i le ala a le Faaola.

Lona lua, ua valaauina oe e talai atu le talalelei a Iesu Keriso. E le tatau ona e aoaoina atu ou oe lava manatu po o filosofia, e fefiloi ma tusitusiga paia. O le talalelei o “le mana lava lea o le Atua e ola ai i latou uma,”¹ ma ua na o le talalelei e faaolaina ai i tatou.

Lona tolu, ua poloaiina oe e aoao atu ia mataupu faavae o le talalelei e pei ona mauaina i tusitusiga faavae o le Ekalesia, ia aoao atu saunoaga a aposetolo ma perofeta o aso nei, ma ia aoao atu mea e aoaoina ai oe e le Agaga Paia.

O fea la tatou te amata atu ai?

O la tatou tiutetauave muamua lava ma le sili, o le ola lea ina ia tatou maua le Agaga Paia e fai ma o tatou taiala ma soa. Ina ua taumafai Ailama Samita ia auai i lenei galuega o aso e gata ai, na fetalai le Alii: “Faauta, o lau galuega lenei, e tausi i a’u poloaiga, ioe, ma lou manatu atoa, mafaufau ma lou malosi atoa.”² O le vaega lenei e amata ai. O le fautuaga, na tuuina mai e le Alii ia Ailama, o le fautuaga lava foi lea e tasi ua Ia tuuina mai i le Au Paia i augatupulaga uma.

I le saunoa atu ai i faiaoga i aso nei, na ta’ua ai e le Au Peresitene Sili e faapea: “O le vaega aupito taua o lau auunaga, o lau oe lava tapenaga faaleagaga i aso taiasi, e aofia ai le tatalo, suesueina o tusitusiga paia, ma le usi-usitai i poloaiga. Matou te uunaia oe ia tuuto atu oe lava ia ola i le talalelei ma se faamoemoega sili atu nai lo o se isi lava taimi muamua.”³



Arraiján, Panama

E taua e faapea e le'i saunoa mai le Au Peresitene Sili e faapea, o le vaega aupito taua o lau auaunaga o se faiaoga o le tapenaina lelei lea o au lesona po o le atamai i metotia eseese faafaiaoga. Ioe, e ao ona e saunia ma le filiga mo lesona taitasi ma taumafai ia iloa pe faapefea ona e aoao atu ina ia fesoasoani ai i au tagata o le vasega ia faaoga o latou faitalia ma faataga le talalelei ia ulu atu i totonu o o latou loto, ae o le vaega muamua ma aupito taua o lau auaunaga, o lau tapenaga patino lea faaleagaga. A o e mulimuli i lenei fautuaga ua folafolaina mai e le Au Peresitene Sili: "O le a fesoasoani le Agaga Paia ia te oe ina ia e iloa le mea e fai. O le a tuputupu a'e lau oe lava molimau, o le a faalolotoina lou lava liua, ma o le a faamalositia oe e feagai ma luitau o le olaga."⁴

O a nisi faamanuiaga sili atu e manao i ai se faiaoga?

O le isi, ua poloai mai le Alii, ae

tatou te le'i saili e talai atu Lana upu, e tataua ona tatou saili ia maua [Lana] upu.⁵ E ao ona avea outou o ni alii ma ni tamaitai e matua malolosi i le malamalama e ala i le sailiili ma le filiga i tusitusiga paia, ma e ala i le teufatuina i o outou loto. Ma a o e ole atu mo le fesoasoani a le Alii, o le a Ia faamanuia oe i Lona Agaga ma Lana upu. O le a e maua le mana o le Atua seia oo i le faatalitonuina o tagata.

Ua ta'u mai e Paulo ia i tatou, e lua auala e oo mai ai le talalelei i tagata, i le upu ma i le mana.⁶ O le upu o le talalelei ua tusia i tusitusiga paia, ma e mafai ona tatou maua le upu e ala i le suesue ma le filiga. E oo mai le mana o le talalelei i olaga o i latou o e o loo ola e avea le Agaga Paia ma a latou soa ma ē e mulimuli i uunaiga latou te maua. O nisi e na o le mauaina o le upu e taulai atu i ai o latou mafaufau, ma avea ai i latou ma tagata atamamai i le momoliina atu o faamatatalaga. O isi e le faia a latou tapenaga ae


faamoemoe i le agalelei o le Alii, o le a Ia fesoasoani ai ia i latou i le taimi o le vasega. E le mafai ona e faamoemoe e fesoasoani le Agaga ia te oe ia manatua mau ma mataupu faavae e te le'i suesueina pe mafaufauina. Ina ia lelei le aoaoina atu o le talalelei, e ao ona i ai le upu ma le mana o le talalelei i lou olaga.

Na malamalama Alema i nei mataupu faavae ina ua ia maua le olioli i atalii o Mosaea ma le auala na latou aoao atu ai ma le mana ma le pule o le Atua. Tatou te faitauina:

"O i latou o ni alii mafaufau lelei ma sa latou suesue i tusitusiga paia ma le filiga, ina ia latou iloa le afioga a le Atua.

"Ae sa le ona pau lea; sa latou tuu atu i latou lava i le tatalo tele, ma le anapogi; o lea na i ai ia i latou le agaga o . . . faaaliga."⁷

O le isi, e tataua ona e aoao ia faalogo. Sa aoao mai e Elder Jeffrey R. Holland le mataupu faavae lenei



lenei mea, o le a e tautala atu ai i se mea e te le'i fuafuaina e ta'u atu. Ma, afai o le a e gauai atu, o le a e aoaoina se mea mai mea e te tautala atu ai a o e aoao atu. Na saunoa Peresitene Marion G. Romney, "Ou te iloa i taimi uma pe a ou tautala i musumusuga a le Agaga Paia ona ou te aoaoina i taimi uma se mea mai se mea na ou tautala ai."¹⁰ Ia manatua, o le faiaoga o se tamaitiiti aoga foi.

Ma le mea mulimuli, e tatau ona tu o se molimau tutoatasi o mea uma e te aoaoina atu, ae ia le na o se siuleo o upu i se tusi lesona po o manatu o isi. A e taumafa i afioga a Keriso ma tauivi e ola i le talalelei ma se faamoemoega sili atu nai lo o se isi lava taimi muamua, o le a faaali atu e le Agaga Paia ia te oe o mea o loo e aoaoina e moni. O le agaga lenei o faaaliga, ma o lenei lava agaga e tasi o le a momoliina atu lau savali i loto o i latou o e o loo naunau ia maua.

Sei o tatou faamaea i le mea sa tatou amata ai—i le Vao Paia. Ona o le mea na tupu i lena taeao matagofie o le tautotogo e lei leva tele atu, ua e agavaa ai e aoao atu i le mana ma le pule a le Atua. Ou te tuuina atu ai la'u molimau paia ma le tutoatasi i nei mea i le suafa o Iesu Keriso, amene. ■

FAAMATALAGA

1. Roma 1:16.
2. Mataupu Faavae ma Feagaiga 11:20.
3. Au Peresitene Sili, i le *Aoao Atu i le Ala a le Faaola: O Se Taiala i le Sau*, Mulimuli Mai ia te Au: Punaoa Aoaoina mo le Aulavou (2012), 2.
4. Au Peresitene Sili, i le *Aoao Atu i le Ala a le Faaola*, 2.
5. Tagai Mataupu Faavae ma Feagaiga 11:21.
6. Tagai 1 Tesalonia 1:5.
7. Alema 17:2–3.
8. Jeffrey R. Holland, "The Divine Companionship" (lauga na tuu atu i le semina mo peresitene fou o misiona, 26 Iuni, 2009), 7, 8, Church History Library, Salt Lake City; faamamafa i le uluai kopi.
9. Mataupu Faavae ma Feagaiga 100:6.
10. Marion G. Romney, i le Boyd K. Packer, *Teach Ye Diligently* (1975), 304.

i faifeautalai. O le a ou sii maia le saunoaga a Elder Holland, ae ua ou faia i se faatagaga e suitulaga ai ia upu *faifeautalai* ma *tagata sailiili* i upu *faiaoga* ma *tagata aooga*: "E lona lua atu i le tiutetauave ua i ai i [faiaoga] e faalogo i le Agaga, o le tiutetauave lea e ao ona latou faalogo i le [tagata aoga]. . . . Afai o le a tatou faalogo i ni taliga faaleagaga, . . . o le a ta'u mai e a [tatou tagata aooga] ia i tatou po o a lesona latou te manaomia ona faalogo i ai!"

Sa faaauau le saunoaga a Elder Holland: "O le mea moni, o loo soona taulai atu pea [faiaoga] i le momoliina atu o anotusi o lesona ua masani ai, ma fai soo, nai lo o le taulai atu i a latou [tagata aooga] o ni tagata taitoatasi."⁸

A uma ona e sauniaina oe lava ma lau lesona i le mea sili e te gafatia, e tatau ona e loto loa e taatia atu [i le Agaga]. A oo mai ia uunaiga filemu a le Agaga Paia, e tatau ona e maua le

lototele e taatiaese ai lau lesona fuafuaina ma au faamatalaga ae alu atu i le mea e ave i ai oe e na uunaiga. A tatou faia lenei mea, o le lesona e te momoliina atu e le toe ave ma au lesona, ae e ave ma lesona a le Faaola.

A o e tuuto atu oe lava ia ola i le talalelei ma faamoemoega e sili atu nai lo o se isi lava taimi muamua, ma suesue i tusitusiga paia, ma teufatu i lou loto, o lena lava Agaga Paia, o le na faaaliga mai nei upu i aposetolo ma perofeta anamua, o le a molimau atu ia te oe i lo latou moni a'ia'i. O le mea moni, o le a toe faaali atu e le Agaga Paia ia te oe ia mea. A tupu lenei mea, o upu e te faitauina o le a le na o ni upu a Nifae po o Paulo po o Alema, ae o le a ave foi ma au upu. Ma, a o e aoao atu, o le a mafai e le Agaga Paia ona faamanatu atu ia te oe mea uma. Ioe, "o le a tuu atu ia te oulua i le itula tonu lava, ioe, i le minute tonu lava, mea e te lua fai atu ai."⁹ Pe a tupu



Saunia e Elder Kevin S. Hamilton

○ Le Fitugafulu

Piimau Pea

Tau ina ia tatou piimau pea i le ai uamea lea e taitai atu ai i le afioaga o lo tatou Tama Faalelagi.

E manatua lelei e lou tama le aso tonu, e oo lava i le itula tonu na tuua ai e lona aiga—tama, tina, ma le fanau e toafa—le Ekalesia, e toatele na feoti e lei toe foi mai lava. Sa 13 ona tausaga, o se tiakono, ma i na aso sa auai aiga i le Aoga Sa i le taeao ae o le sauniga faamanatuga i le aoauli. I se aso matagofie o le tautotogo, ina ua toe foi atu [i le fale] mai sauniga tapuai o le taeao o le Aso Sa ao faia se taumafataga faatasi a le aiga i le aoauli, na faliu atu lona tina i lona tama ma fai atu, “Ia, lau pele, o le a sou manatu e tatau ona tatou o i le sauniga faamanatuga i lenei aoauli pe tatau ona ave le aiga mo se tietiega i nuu i tua?”

O le manatu sa i ai se filifiliga i le sauniga faamanatuga sa lei mafau-fauina lava e lou tama, ae na latou nonofo sao i luga ma ona tei e toatolu ma gauai atu ma le toto. Masalo o lena tietiega i le aoauli o le Aso Sa i nuu i tua o se gaoioga fiafia faaleaiga, ae o lena filifiliga laitiiti na avea ma se amataga o se auala fou, lea na iu ai lava ina taitai ese ai lona aiga mai le Ekalesia mai lona saogalemu, pui-puiga, ma faamanuiga ma agai atu ai i se isi auala ese.

O se lesona la mo i latou i lenei vai-taimi mo e atonu o tofotofoina e filifili i se auala ese, na faaso atu e le

perofeta o Liae o le Tusi a Mamona se faaaliga i lona aiga lea na ia “vaai i motu o tagata e le masino, o le toatele o i latou sa fetaomi mai i luma, ina ia latou maua le ala e tau mai i le laau lea sa [ia] tu ai i ona tafatafa.

“Ma sa . . . latou o mai i luma ma amata ona savavali i le ala e tau mai i le laau.


“Ma . . . sa oo ina alu ae se puao o le pogisa; . . . sa oo ina le iloa ai e i latou o e na amata ona savavali i le ala, lo latou ala, ma latou feseseai ai, ma leiloloa.”¹

Na vaaia e Liae se vaega lona lua o e na “fetaomi mai i luma, ma sa latou o mai ma fepiiti i le pito o le ai uamea, ma sa latou fetaomi mai i luma e ala mai i le puao o le pogisa, ma fepiiti i le ai uamea, seia oo lava ina latou oo mai ma aai i le fua o le laau.” Ae paga lea, “ina ua uma ona latou aai i le fua o le laau sa fetepaai solo o latou mata e peiseai ua latou māmā” ona o i latou sa i “le fale tele ma le ateatea” lea na “faatauemu ma tusitusi mai o latou tamatamailima i e na o mai ma aai i le fua.” O nei tagata sa “pauu ese atu ai i ala faasaina ma ua leiloloa.”² Sa latou le mafai, po o le leai o se naunau, e tumau ai e oo i le iuga.

Peitai, sa i ai se vaega lona tolu sa le gata na faamanuaina i le oo atu i le laau o le ola, ae sa latou lei pauu

ese lava. O i latou nei, o loo fai mai ai tusitusiga paia sa latou fetaomi mai i “luma, ma piimau pea i le ai uamea i le ai uamea, seia oo ina latou o mai i luma ma faapauu i lalo ma aai i le fua o le laau.”³ Sa avea le ai uamea ma pui-puiga ma saogalemu mo lenei vaega o tagata na mafai ona latou maua, ma sa latou piimau pea; sa latou mumusu e faamaamulu e tusa lava pe mo se mea faigofie e pei o le tietiega i le aoauli o le Aso Sa i nuu i tua.

E faatatau i lenei vaega o tagata na aoao mai ai Elder David A. Bednar faapea: “O le fasifuaaitau autu i lenei fuaiupu o le ‘piimau pea’ i le ai uamea. . . . Atonu o lenei vaega lona tolu o tagata sa faitau pea e le aunoa ma sutesue ma sailiili i afioga a Keriso. . . . O le vaega lea e tatau ona e taumafai ma ou taumafai e auai.”⁴





O i tatou o tagata o le Ekalesia a le Atua i lenei vaitaimi ua uma ona osi feagaiga e mulimuli ia Iesu Keriso ma usitai i poloaiga a le Atua. I le papatisoga tatou te osi feagaiga ai e tutu o ni molimau a le Faaola,⁵ e fesoasoani i e vaivai ma e le tagolima,⁶ tausi poloaiga a le Atua, ma salamo pe a manaomia, aua e pei ona aoao mai le Aposetolo o Paulo, “Aua ua agasala tagata uma, ma ua le oo i le viiga mai le Atua.”⁷

O vaiaso taitasi tatou te maua ai le avanoa e auai ai i se sauniga faamanatuga lea e mafai ona tatou faafou ai nei feagaiga e ala i le taumamafa i le areto ma le vai o le sauniga o le faamanatuga. O lenei faatinoga faigofie tatou te mafai ai ona toe folafola atu o le a tatou mulimuli ia Iesu Keriso ma salamo pe a tatou le faataunuuna lena folafolaga. O le folafolaga a le Atua ia i tatou o le a avea Lona Agaga o se taiala ma se puipuiga.

Mai le *Talai Lau Talalelei*, o loo aoao ai a tatou faifeautalai e faapea e oo mai faaaliga ma le molimau pe a tatou auai i a tatou sauniga Lotu o le Aso Sa: “A o tatou auai ai i sauniga a le Ekalesia ma tapuai faatasi, tatou te faamalosalia le tasi ma le isi. E faafouina i tatou e ala i a tatou fegalegaleaiga ma uo ma aiga. E faamalosalia lo tatou

faatuatua pe a tatou suesue i tusitusiga paia ma aoao atili e uiga i le talalelei toefuataiina.”⁸

E ono fesili se tasi, aisea e tolu ai a tatou sauniga eseese i le Aso Sa ma pe aisea e manaomia ai sauniga taitasi? Sei o tatou tagatagai puupuu atu i nei sauniga e tolu:

- O le sauniga faamanatuga tatou te maua ai le avanoa e auai ai i le sauniga o le faamanatuga. Tatou te faafouina ai a tatou feagaiga, maua se fuataga faateleina o le Agaga, ma maua nisi faamanuiaga o le aoaoina ma le faagaetiaina e le Agaga Paia.
- O le Aoga Sa e faataga ai i tatou e “aoao i le tasi mataupu faavae o le malo,”⁹ ina ia “faagaetiaina ma olioli faatasi i laua uma.”¹⁰ E oo mai le mana sili ma le filemu patino pe a tatou malamalama i aoaoga faavae o le talalelei toefuataiina.
- O sauniga perisitua o se taimi lea mo alii matutua ma alii talavou e “aoao [ai o latou] tiute”¹¹ ma “ia aoaoina atoatoa atili,”¹² ma o sauniga a le Aualofa e saunia ai tamaitai o le Ekalesia mo se avanoa e “faateleina ai lo latou faatuatua . . . , faamalosalia [o latou] auai ma aiga, ma fesoasoani ia i latou e le tagolima.”¹³

E faapena foi, ia o tatou tamaitai talavou ma fanau, e i ai a latou lava sauniga ma vasega lea e aoao ai i latou i le talalelei ao latou sauniuni mo tiutetauave taua o le a oo mai ia i latou. I nei sauniga tulagaese taitasi ae fesootai, ua tatou aoao ai i aoaoga faavae, lagona le Agaga, ma auuuna atu ai le tasi i le isi. E ui atonu e i ai ni faaletonu ona o le mamao, tau o femalagaaiga, po o le soifua maloloina, ae e tatau ona tatou taumafai ia auai ia tatou sauniga uma o le Aso Sa. Ou te folafola atu o le a oo mai ni faamanuiaga o le olioli tele ma le filemu mai le tapuai i le taimi faatulagaina o a tatou sauniga e tolu itula i le Aso Sa.

Ua tautino lo matou aiga ina ia auai ia matou sauniga uma o le Aso Sa. Ua matou iloa o lenei mea ua faamalosalia ai lo matou faatuatua ma faateleina ai lo matou malamalama i le talalelei. Ua matou iloa le lelei o matou lagona e uiga i a matou faaiuga ina ia auai atu ia matou sauniga Lotu, aemaise lava pe a matou toe foi i lo matou fale ma faaaau ai pea le tausia o le Sapati. Matou te auai foi ia matou sauniga uma o le Aso Sa pe a matou faimalologa pe faimalaga foi. Sa tusi mai se tasi o le ma fanau teine talu ai nei sa ia auai i se lotu i totonu o le taulaga i

le mea sa ia malaga i ai ona ia faaopopo mai lea, “Toe, Tama, sa ou auai i sauniga uma e tolu o le Aso Sa.” Na matou iloa sa faamanuiaina o ia i lenei filifiliga amiotonu.

E tofua i tatou taitoatasi ma le tele o filifiliga e faia i le auala tatou te tausia ai le aso Sapati. O le a i ai lava nisi gaoioiga “lelei” e mafai ma e tatau ona ositaulagaina mo le filifiliga sili atu ona lelei o le auai i sauniga a le Ekalesia. O le mea moni o se tasi lea o auala o loo “olegia [ai] e le tiapolo o [tatou] agaga, ma taitai lemu ese atu ai i [tatou].”¹⁴ Na te faaogaina ni gaoioiga “lelei” e sui ai ni gaoioiga “lelei tele” po o ni gaoioiga “lelei silisili.”¹⁵

O le piimau pea i le ai uamea o lona uiga soo se taimi lava e mafai ai, ia tatou auai ia tatou sauniga o le Aso Sa: sauniga faamanatuga, Aoga Sa, ma sauniga perisitua po o le Aualofa. Ia auai foi a tatou fanau ia latou lava sauniga i le Peraimeri, Alii Talavou, ma Tamaitai Talavou. E le tatau lava ona tatou filifili po o fea o sauniga tatou te auai atu i ai. Ia tau na ona tatou pipiimau i le afioga a le Atua e ala i le tapuai ma auai ia tatou sauniga o le Sapati.

O le piimau pea i le ai uamea o lona uiga o le tatou taumafai lea e tausii poloaiga uma a le Atua, fai tatalo faaletagata lava ia ma faaleaiga i aso uma, ma suesue i tusitusiga paia i aso uma.

O le piimau pea o se vaega o le mataupu faavae a Keriso e pei ona aoaoina i le Tusi a Mamona. Tatou te faatinoina le faatuatua ia Iesu Keriso, salamo mai a tatou agasala, liua o tatou lotu, ona mulimuli lea ia te Ia i lalo o vai o le papatisoga ma maua le meaalofa faamautuina o le Agaga Paia, lea e avea o se taiala ma se faafanafana. Ona sosoo ai lea, e pei ona aao mai Nifae ia tatou “fetaomi atu i luma, ma taumamafa fiafia i le afioga a Keriso,” seia oo i le faaiuga o o tatou olaga.¹⁶



Ou uso e ma tuafafine, o i tatou o se nuu o le feagaiga. Ua tatou osia ma tausia ma le lotu i ai ia feagaiga, ma o faamanuiaga folafolaina e faapea o le a tatou maua “mea uma ua i ai i [le] Tama.”¹⁷ A tatou piimau pea i le ai uamea e ala i le tausia o a tatou feagaiga, o le a faamalolosia i tatou e tetee atu i faaososoga ma mea lamatia o le lalolagi. O le a mafai ona tatou faatonutonuina lenei olaga faaletino faatasi ai ma ona luitau uma seia tatou oo moni atu i le laau o i ai le fua “ua silisili ona pele ma silisili ona manaomia i lo o isi fua uma lava.”¹⁸

Na faamanuiaina lou tama e faaipoipo atu i se tamaitai lelei o le sa faamalosiua ia te ia e toe foi mai i le lotu o lona talavou ma toe amata ona alualu ai i luma i le ala. O o laua olaga faamaoni ua faamanuiaina ai olaga o a la fanau uma, le tupulaga o fanau a fanau e sosoo ai, ma i le taimi nei o fanau a fanau a fanau.

E pei lava ona faia e se faaiuga faigofie se eseese tele i olaga o le aiga a ou matua matutua e auai pe le auai i se tasi o a latou sauniga tapuai o le aso Sapati, e faapena foi i a tatou faaiuga i aso uma lea o le a aafia ai o tatou olaga i ni auala iloga. O se

faaiuga e foliga e faatauavaa e pei o le auai pe le auai i se sauniga faamanatuga e mafai ona i ai ni ona taunuuga loloto, e oo atu lava i le faavavau.

Tau ina ia tatou filifili ina ia filiga ma ia maua ni faamanuiaga ma pui-puiga sili lea o le a oo mai i le faapotopoto faatasi ma tausii feagaiga. Tau ina ia tatou piimau pea i le ai uamea lea o le a taitai atu ai i le afioga o lo tatou Tama Faalelagi, o lau tatalo lea i le suafa paia o Iesu Keriso, amene. ■

FAAMATALAGA

1. 1 Nifae 8:21–23.
2. 1 Nifae 8:24–28.
3. 1 Nifae 8:30; faaopoopo le faamamafa.
4. David A. Bednar, “O Se Faatanoa o le Vai Ola” (lauga o le faeasaita a le Ofisa o Aoga a le Ekalesia, Fep. 4, 2007), 8–9; speeches.byu.edu.
5. Tagai Mosaea 18:9.
6. Tagai Mataupu Faavae ma Feagaiga 81:5.
7. Roma 3:23.
8. *Talai Lau Talalelei: O Se Taiala mo le Galuega faafaijeautalai* (2004), 77.
9. Mataupu Faavae ma Feagaiga 88:77.
10. Mataupu Faavae ma Feagaiga 50:22.
11. Mataupu Faavae ma Feagaiga 107:99.
12. Mataupu Faavae ma Feagaiga 88:78.
13. *Tusitaulima 2: Taitaiina o le Ekalesia* (2010), 9.1.1.
14. 2 Nifae 28:21.
15. Tagai Dallin H. Oaks, “Lelei, Lelei Tele, Lelei Silisili,” *Liahona*, Nov. 2007, 104–8.
16. 2 Nifae 31:20.
17. Mataupu Faavae ma Feagaiga 84:38.
18. 1 Nifae 15:36.



Saunia e Elder Adrián Ochoa

○ Le Fitugafulu

Tepa i Luga

O le aso o le taimi lea e tagai ai i le Punavai o le upumoni ma faamautinoa ua malolosi a tatou molimau.

I na ua valu ou tausaga, sa auina atu au ma ou tausoga e toalua i se aai e lata ane e aumai ni meaai mo le isi 15 aso. A toe tepa i tua, ou te maofa i le tele o le talitonuina o i matou e tina matua ma le uso ma le tuagane o tina. Sa lagi lelei ma susulu manaia le taeao a o matou o ese atu i la matou vaega toalaiti o solofanua e tolu.

I le ogatotonu o le laufanua lafulemu, sa tonu i o matou manatu e tatau ona matou feosofi i lalo mai solofanua ma taaalo pelē mapu. O lea sa matou faia—mo se taimi umi. Sa matou pulunaunau i la matou taaloga na matou le iloa ai “faailoga o taimi” i luga ae o matou ulu a o ufitia e ao pogisa le lagi. E oo ifo i le taimi na matou iloa ai le mea ua tupu, sa leai se taimi e toe uta ai a matou solofanua. Sa matua taia i matou i timuga mamafa ma taia o matou foliga e matagi tofaata’uta’u, lea sa le mafai ai ona matou mafaufau i se mea e fai ae aveese nofoa solofanua ma pulolou ai i ie lalaga laiti o nofoa solofanua.

Sa aunoa ma solofanua, i le susu, ma le malulu, sa faaauau ai la matou faigamalaga, i le taumafai e faanatinati i le vave e mafai ai. A o matou latalata atu i lo matou taunuuga, sa matou vaaia ai o le auala tele e ulufale atu ai i le aai sa lolovaia ma sa pei o se vaitafe o loo tafe agai mai ia i matou. I lea

taimi sa pau le matou filifiliga o le tiai o ie lalaga na matou pulolou ai ae fe’a’ei i le pa uaea sa siomia ai le aai. Sa leva le po a o, vaivai ma tiga ma susupala, sa matou saili ai se malutaga i le fale muamua sa matou vaaia a o matou ulu-fale atu i le aai. O le aiga talavou lelei iina sa aumaia ni ofu mago, fafagaina i matou i se meaai manaia (burritos), ma faamomoe matou i sa matou lava potu. E lei pine ae matou iloina o le fola o le potu e gatasi lelei ma palapalā, o lea sa matou maua ai se isi manatu lelei tele. Sa matou tusiaina se lio i le fola ma faaauau la matou taaloga pelē mapu seia oo ina matou pauu i le fola ma momoe ai.

I le avefa ai tamaiti sa na o i matou lava na matou mafaufau i ai. Matou te le i mafaufau lava i e pele sa saili ma le atuatuvaale mo i matou i lo matou aiga—ana faapea na matou manatu i ai, semanu matou te le faatuai i le matou faigamalaga ona o le taaloga le aoga o le pele mapu. Ma ana faapea matou te popoto, semanu matou te tepa i le lagi, iloa atu faaputuga o ao, ma faateleai lo matou saoasaoa ia muamua atu i le matagi. Lea la ua ou maua sina potu masani, ou te faamanatu pea i taimi uma ia te au lava, “Aua nei galo ona tepa i luga.”

Sa aoaoina au e lou aafiaga ma ou tausoga ia nofouta i faailoga o o tatou

taimi. Ua tatou ola i aso matagiā, ma faigata sa faamatalaina e Paulo: “Aua e avefa tagata ma e alolofa i latou ia i latou lava, . . . o e le faalogo i matua, o e le faafetai, o e amioleaga, . . . o e faatuaupua, o e le taofi manao o le tino, . . . o e ua tele le manao i mea faafiafia a e leai se manao i le Atua” (2 Timoteo 3:2–4).

I le talanoaina o nei taimi, sa saunoa ai Elder Dallin H. Oaks: “E ao ina tatou taufai faia sauniuniga faaletino ma le faaleagaga. . . . Ma o le sauniuniga lava e tau le amana’iaina o [le sauniuniga] lea e tau le iloa ma sili atu ona faigata—o le faaleagaga” (“Sauniuniga mo le Afio Mai Faalua,” *Liahona*, Me 2004, 9). I nisi faaupuga, aua nei galo ona tepa i luga.

I le mauaina o le manaoga vave mo sauniuniga faaleagaga i se taimi o ia faigata, ou te manao e tuuina atu se upu o le lapataiga e uiga i se tasi o faailoga o taimi e malosi tele. Sa ou taimua i mea faatekinolosi ona o lau matata faalegaluega o le olaga, o lea sa ou iloa ai lona taua, aemaise lava i fesootaiga. O le tele o faamatalaga e fatuina e tagata ua faigofie ona maua. Ae ua tumu foi le Initoneti i le tele o mea eleelea ma taufaasese. Ua faaleleia e tekinolosi lo tatou saolotoga o le gagana, ae na te tuuina mai foi ni talitonuga le aloaia i se tagata le agavaa e tusiaina se mea i luga o le Initoneti lea e faituina e le toatele o tagata. O le mafuaaga lena i le taimi nei, ia sili atu nai lo se isi taimi, e tatau ona tatou manatua lena mataupu faavae e faavavau: “Tou te iloa ai i latou i o latou fua” (Mataio 7:20).

Aemaise lava, ou te fautuaina outou ia aua nei matamata i ata mataga pe gauai atu i tagata e tuuaia sese ia Keriso ma le Perofeta o Iosefa Samita. O amioga uma ia e lua e fatu ai le aafiaga lava e tasi: o le aveesea o le Agaga Paia ma Lona mana puipuiga



Brasilia, Pasila

ma lagolago. E mulimuli mai i taimi uma le agasala ma le faanoanoa.

Ou uso e ma tuafafine, afai lava e te feagai ma soo se mea e mafua ai ona e fesiligia lau molimau o le tala-lelei, ou te augani atu ia te outou ia tepa i luga. Tagai i Punavai o le potou uma ma le upumoni. Faafailele lou faatuatua ma le molimau i le afioga a le Atua. O loo i ai i latou i le lalolagi o loo saili e faavaivaia lou faatuatua e ala i le faafefiloia o pepelo ma mea e le atoatoa le moni. O le mafuaaga lea e matua taua ai le tumau o lou agavaa i taimi uma mo le Agaga. O le mafutaga a le Agaga Paia ua le na o se avanoa faafiafiaina—e taua mo lou ola faaleagaga. Afai e te le faatauaina ia afioga a Keriso ma faafofoga lelei i musumusuga a le Agaga, o le a faaseseina lava oe (tagai Iosefa Samita—Mataio 1:37). E tatau ona tatou faia nei mea.

O Iesu Keriso o le sa atoatoa, ma Iosefa Samita, o le sa tautino mai o ia lava e le atoatoa, sa fasiotia uma e faatuaupua ia sa le taliaina a la molimau. E faapefea ona tatou iloa e moni a la molimau—o Iesu Keriso o le Alo o le Atua ma o Iosefa Samita o se perofeta moni?

“O lea foi tou te iloa ai i latou i o latou fua.” E mafai ea ona fua mai ni fua lelei mai se laau leaga? Ou te iloa mo au lava ua faamagaloina au agasala e lou Togiola ma faasaoloto au mai lau lava amo patino, ma aumaia au i se tulaga o le fiafia sa ou le'i iloa ina o loo i ai. Ma ua ou iloa ina mo au lava o Iosefa Samita o se perofeta aua sa ou faatinoina le folafolaga faigofie o loo i le Tusi a Mamona: “Ole atu i le Atua, le Tama Faavavau, i le suafa o Iesu Keriso” (Morona 10:4). I se faaupuga faigofie: tepa i luga.

Ua i ai nisi atonu e fautuaina oe e tatau ona i ai sau faamaoniga faaletino ina ia mafai ona talitonu ai i le

Togiola a Keriso po o le moni a'ia'i o Lana talalelei toefuataina. Ia i latou ia, ou te sii mai upu a Alema ia Korioa, o le sa taumafai e tauanau isi ia aua nei talitonu: “Ua lava faailoga ua ia te oe; e te faaosooso ea i lou Atua? E te fai mai ea, Faaali mai ia te au se faailoga, ae ua ia te oe molimau a ou uso uma nei, ma perofeta paia uma foi? Ua folasia i ou luma tusitusaiga paia” (Alema 30:44).

O oe ma au o ni faailoga ola o le mana togiola a le Faola. O tatou o faailoga ola o le galuega a le Perofeta o Iosefa Samita ma le faatuatua o na uluai Au Paia o e sa tumau malosi i a latou molimau. Ua salalau atu nei Le Ekalesia a Iesu Keriso i le lalolagi atoa ma ua faatupulaia nai lo se isi lava taimi muamua—ua taliaina, e pei o taimi o Keriso, e tagata lotomauualalo o e e le manaomiaina le vaai pe fetagofi i ai ia talitonu ai.

E leai se tasi e silafia pe o afea e toe afio mai ai le Alii. Ae ua tatou oo nei i aso faigata. O le aso o le taimi lea e tagai ai i le Punavai o le upumoni ma faamautinoa ua malolosi a tatou molimau.

I le toe foi atu i la'u tala, sa matou feala ma ou tausoga i le taeao o se la susulu ma se lagi matagofie. Sa tuitui mai se tamaloa i le faitotoa e saili mo ni tamaiti leiloloa e toatolu. Sa ia faatie-tie i matou i solofanua, ma amata la matou faigamalaga i le aiga e ui atu i le laufanua valevalenoa lava e tasi. O le a le galo lava ia te au mea sa matou vaaia

i le ala i lo matou foi atu i le aiga—o le anoanoai o tagata o e sa sailia i matou i le po atoa, o a latou palau ma loli sa mau i le palapala. Sa latou mauaina se nofoa solofanua ii ma se solofanua i o, ma ina ua latou vaai mai i lo matou toe foi atu i le aiga, sa mafai ona ou lagonaina lo latou toomaga ma lo latou alolofa. I le auala e ulufale atu ai i le aai, sa toatele tagata sa faatalitali mai mo i matou, ma i luma atu o i latou uma sa i ai lou tina matua agaalofa ma le tuagane ma le uso o lou tina. Sa latou fusiina i matou ma fetagisi, ma le olioli ua latou mauaina a latou fanau sa leiloloa. O se faamanatu maoae lenei mo au e silafia i tatou e lo tatou Tama Faalelagi agaalofa. O loo ia faatalitali mai ma le popole mo lo tatou toe foi atu i le aiga.

Ioe, o loo i ai faailoga o afa o loo fa-tufatu faataamilo ia i tatou uma. Ia tatou tepa i luga ma saunia i tatou lava. O loo i ai le saogalemu i se molimau malosi. Ia tatou faapelepele ma faamalolosi a tatou molimau i aso uma.

Ou te iloa e mafai ona tatou ola faatasi o ni aiga mo le faavavau, ma o loo faatali mai lo tatou Tama Faalelagi agaalofa ia i tatou, o Lana fanau, faatasi ai ma Ona aao mafola. Ou te iloa o loo soifua Iesu Keriso, lo tatou Laveai. E pei lava o Peteru, e le o se tagata na faaali mai ia te au, a o lo'u Tama o i le lagi (tagai Mataio 16:15–19). I le suafa paia o Iesu Keriso, amene. ■



Saunia e Elder Terence M. Vinson

○ Le Fitugafulu

Faalatalata Atili i le Atua

E finagalo lo tatou Faaola ia tatou alolofa moni ia te Ia e oo i le tulaga tatou te faaogatasi ai o tatou loto ma Lona finagalo.

O le atalii o le ma tama teine e ono tausaga, o Oli, o le e valaauina ma le agaalofa au ia “Poppy,” sa alu e aumai se mea mai le taavale. Sa tu lona tama ma matamata mai totonu o le fale, e aunoa ma le iloaina e Oli, sa ia tatalaina le faitotoa o le taavale i le tamai masini faatonutonu (remote) a o latalata atu i ai Oli, ma toe lokaina ina ua uma. Ona momoe mai lea o Oli i totonu ma se ataata tele!

Sa fesili atu uma le aiga ia te ia, “Sa faapefea ona e faia ia matala le faitotoa o le taavale mo oe, ma toe lokaina?” Sa na ona ia ataata.

Sa fai mai lo ma afafine, o lona tina lea, “Atonu e pei ona faia e Poppy, e matala le taavale e aunoa ma le pa’i i ai—leilola pe i ai ni au mana faamaneta e pei o ia!”

Ina ua faalua ona tupu i ni nai minute mulimuli ane, o lana tali i isi fesili e uiga i ona tomai fou ua maua o le: “E ofoofogia! Ou te manatu ona e alofa Poppy ia te au ma o se tasi o au uo mamae, ma na te tausia au!”

Ua faamanuiaiina au i le iloaina o mea moni faavavega sa tutupu i olaga o Au Paia faatuatua i Aferika, Papua Niu Kini, Ausetalia, Niu Sila, ma atumotu o le Pasefika. Ou te ioeina faatasi ma Oli—Ou te manatu ona e lagona e na tagata faatuatua le auala e tasi e uiga i le Tama Faalelagi ma le

Faaola e pei ona lagona e Oli e uiga ia te au. Latou te alolofa i le Atua e pei o se uo mamae, ma Na te tausia i latou.

O tagata o lenei Ekalesia ua i ai le aia e maua ai, ma e toatele ua mauaina, se molimau faaleagaga ma osia feagaiga e mulimuli i le Alii. Ae e ui i lena mea, o loo agai atu pea nisi ia te Ia ae o isi e leai. O le fea o nei vaega o e i ai?

E tatau ona faatotonugalemu le Atua i o tatou olaga—lo tatou taulaiga moni lava. O Ia? Pe o nisi taimi o mamao mai o tatou mafaufauga ma faamoemoega o o tatou loto? (tagai Mosaea 5:13). Ia matau e le na o mafaufauga o o tatou loto e taua ae o “faamoemoega” foi. E faapefea e a tatou amioga ma faatinoga ona faaali atu le faamaoni o o tatou faamoemoega?


O le ma atalii o Ben, a o 16 ona tausaga ma a o lauga atu i le konafesi a le siteki, sa ia fesili: “O a ni ou lagona pe afai e folafola atu e se tasi ia te oe se mea i vaiaso uma ae le tausiaina lana folafolaga?” Sa ia faaauau faapea, “Pe mamafa ea ia i tatou le folafolaga o loo tatou faia pe a tatou aai i le faamanatuga faapea ma le feagaiga e tausi i Ana poloaiga ma manatua pea o Ia?”

Ua tuuina mai e le Alii ia i tatou auala e fesoasoani ai ia tatou manatua o Ia ma Lona mana e lagolago

ai tatou. O se tasi o auala o le vaega taatele lea tatou te oo uma i ai—o puapuaga (tagai Alema 32:6). A ou toe manatu i tofotofoga sa ou feagai ai, e manino lava o mea ia ua ou taunuu ai i lou tuputupu, malamalama, ma le agaalofa. O mea ia ua ou latalata atili ai i lou Tama Faalelagi ma Lona Alo faatasi ma aafiaga ma le faamamaina ua avea ma se vaega loloto ia te au.

O taitaiga ma faatonuga a le Alii e taua. Sa ia fesoasoani i le uso faatuatua o Iareto e ala i le foiaina o se tasi o ona luitau e lua ina ua Ia tau atu ia te ia le ala e maua ai le ea fou i totonu o vaa sa fausiaina ma le usiusitai (tagai Eteru 2:20). Ae, o le mea taua, sa le gata ina tuua e le Alii o latou faafitauli e le foiaina mo se taimi le tumau e uiga i le auala e maua ai le malamalama [i totonu o vaa], ae sa Ia faamamaina atu e faapea o Ia, o le Alii, o le a faatagaina faigata ma tofotofoga e manaomia mo le foiaina o na luitau. O le Alii lava o le a Ia auina atu matagi, o uaga, ma lologa (tagai Eteru 2:23–24).

Aisea Na te faia ai lena mea? Ma aisea Na te lapataia ai i tatou ia aveesea i tatou lava mai se mafuaaga o le lamatia, ae mafai lava ona Ia taofia



le tupu o se faalavelave? Sa faamatala e Peresitene Uilifoti Uutilafi le tala e uiga i le lapataiina faaleagaga e aveese le taavale solofanua sa latou momoe ai ma lona toalua ma le la tama, ma molimauiina i se taimi mulimuli ane, le seiina i luga e se asiosio o se laau tele mai le tafue ma palasi tonu i le mea sa tu muamua ai le taavale solofanua. (tagai *Aoaoga a Peresitene o le Ekalesia: Wilford Woodruff* [2004], 49).

I nei faataitaiga uma e lua, sa ono mafai ona fetuunai le tau e aveese ai faalavelave matautia. Ae o le manatu lenei—nai lo le foiaina o le faafitauli e le Alii lava Ia, ua finagalo ai o Ia ia tatou atiina ae le faatuatua o le a fesoasoani ia i tatou e faalagolago ai ia te Ia, i le foiaina o o tatou faafitauli ma faatuatuaina o Ia. Ona tatou lagonaina pea lea o lona alofa i taimi uma, sili atu ona mamana, sili atu ona manino, ma sili atu ona patino. E oo ina tatou lotogatasi ma Ia, ma mafai ona tatou ave e pei o Ia. O Lona faamoemoega o lo tatou ave lea e faapei o Ia. E moni lava, o Lana galuega ma Lona Mamalu foi (tagai Mose 1:39).

Sa taumafai se tamaitiiti laitiiti e faamafolafola le vaega sa i ai le palapala i tua o lona fale ina ia mafai ai ona ia taalo i ana taavale iina. Sa i ai se maa lapoa sa faalavelave i lana galuega. Sa tulei ma toso e le tamaitiiti ma lona malosi atoa, ae e tusa lava po o le a le malosi na taumafai ai, ae sa le mafai ona minoi le maa.

Sa matamata mai i ai lona tama mo sina taimi ona ia sau lea i lona atalii ma fai i ai, “E manaomia ona e faaogaina uma lou malosi e aveese ai se maa tele faapea.”

Sa tali le tamaitiiti, “Sa ou faaogaina uma lou malosi!”

Sa faasaoina o ia e lona tama: “Leai e te le i faaogaina uma. E te le i mauaina lau fesoasoani!”

Ona la punonou faatasi lea i lalo



Colleyville, Texas

ma aveese ma le faigofie le maa.

O le tama o lau uo o Vaiba Rome, o le uluai peresitene lea o le siteki i Papua Niu Kini, sa aoaoina foi e mafai ona ia liliu atu i lona Tama i le Lagi i taimi e manaomia ai. Sa mafai e ia ma tagata sa nonofo i le nuu ona ola i mea toto sa latou totoina. I se tasi aso sa ia tutuina se afi e faamama ai lana vaega o le faatoaga a le nuu mo le totoina. Peitai, sa amataina le afi e ala i se vaitaimi o le mugala faaumiumi, ma sa mamago ai laau. O lana afi sa pei o le afi a Peresitene Thomas S. Monson, e pei ona sa faamatalaina e lo tatou perofeta lava ia i le konafesi aoa ua mavae (tagai, “O Le Usiusitai e Aumaia ai Faamanuiaga,” *Liahona*, Me 2013, 89–90). Sa amata ona sosolo le afi i laufanua vaoa ma laau, ma i upu a lona atalii, sa oo ai i “se afi matautia tele.” Sa ia fefe ma popole mo tagata o le nuu faapea ai ma le ono faaleagaina o a latou mea toto. A faatamaiaina meatoto, o le a faasalaina o ia e le fonu a le nuu. O le le mafai ai ona tapeina le afi, o lea sa ia manatua ai le Alii.

Ou te sii mai upu a lona atalii, o la’u uo: “Sa ia tootuli i le maupuepue i le togavao ma amata ona tatalo i le Tama Faalelagi ia taofia le afi. Sa faafuasei lava ona faamalumalu mai i ona luga se ao pogisa tele i le mea sa ia tatalo ai, ma sa matuai timu malosi—ae sa na o le mea lava na sasao ai le afi. Ina ua ia autilo solo, sa manino le

lagi i mea uma sei vagana ai le mea sa mumu ai le afi. Sa ia le matalitonuina o le a tali mai le Alii i se alii faatauvaa e pei o ia, ma sa ia toe tootuli ai ma tagitui e pei o se tamaitiiti. Sa ia faapea mai o se lagona aupito sili ona matagofie tele” (tagai Alema 36:3).

E finagalo lo tatou Faola ia tatou alolofa moni ia te Ia e oo i le tulaga tatou te faaogatasi ai o tatou loto ma Lona finagalo. Ona mafai lea ona tatou lagonaina Lona alofa ma iloa Lona mamalu. Ona mafai lea ona Ia faamanuia i tatou i le ala e finagalo ai o Ia. Sa tupu lenei mea ia Nifae le atalii o Helamana, o le sa oo i le tulaga na matua faatuatuaina atoa ai o ia e le Alii ma, ona o lena mea, sa mafai ona faamanuia o ia e le Alii i mea uma sa ia ole atu ai (tagai Helamana 10:4–5).

I le *Life of Pi*, le tusi fatu sa tusia e Yann Martel, sa faamatalaina e le toa ona lagona e uiga ia Keriso: “Sa le mafai ona ou aveesea o Ia mai lou mafaufau. Ua le mafai lava. Sa ou faaluina aso atoa e tolu e mafaufau ai ia te Ia. O le tele lava o lou mafaufau ia te Ia, o le le mafai foi lena ona ou faagalo ia te Ia. Ma o le faatele lava ona ou aoa ia te Ia, o le ititi foi lena o lo’u fia alu ese mai ia te Ia” ([2001], 57).

O ou lagona moni na e uiga i le Faola. E latalata mai o Ia i taimi uma, aemaise lava i nofoaga paia ma i taimi o mafatiaga; ma o nisi taimi, pe a ou tau le mafaufau i ai, ou te lagona

toetoe lava e pei e pa'i mai o Ia i lou tauau e tau mai ia te au e alofa o Ia ia te au. E mafai ona ou toe faafoi atu lena alofa i ou lava ala le atoatoa e ala i le tuuina atu ia te Ia o lou loto (tagai MF&F 64:22, 34).

I nai masina talu ai, sa ma nofonofa ai ma Elder Jeffrey R. Holland, a o ia tofiaina faifeautalai i a latou misiona. Ina ua ma o ese mai sa ia faatali mo au, ma a o ma savavali sa ia faauouo atu au. Sa ou tau atu ia te ia na ia faia foi lea lava mea e tasi ia te au i se tasi taimi i Ausetalia. Sa ia faapea mai, "O le mafuaaga ona ou te alofa ia te oe!" Ma sa ou iloa e moni lena mea.

Ou te talitonu afai tatou te mauaina le avanoa e savavali faaletino ai ma le Faaola, o le a tatou lagonaina Ona aao i o tatou tauau e faapei lava o lena. E pei o soo a o agai atu i Emau, o o tatou loto o le a "mu i totonu" (Luka 24:32). O Lana savali lenei: "O mai ia, ina matamata" (Ioane 1:39). E patino, faatauanau, ma talileleia i lana valaaulia e feafioai ai ma Ona aao o loo faauouo atu i tatou.

Tau ina ia tatou lagona uma le mautilino e pei o Enosa, e pei ona atagia mai i le fuaiupu mulimuli o lenei tusi puupuu ae loloto: "Ma ou te olioli i le aso o le a faafouina ai lo'u tino faaletino i le tino ola pea, ma ou tu ai i ona luma; ona ou vaai ai lea i ona fofoga ma le fiafia, ma o le a fetalai mai o ia ia te a'u: Sau ia ia te a'u oe ua faamanuaina, ua i ai se nofoaga ua saunia mo oe i maota o lo'u Tama" (Enosa 1:27).

Ona o le tele o aafiaga sa ou oo i ai ma le mana lea na molimau mai ai le Agaga ia te au, ou te molimau atu ma le mautilino ato o loo soifua le Atua. Ou te lagonaina Lona alofa. O se lagona suamalie tele. Tau ina ia tatou faia mea e manaomia ia ogatasi ai o tatou loto ma Lona finagalo ma alofa moni ia te Ia. I le suafa, o Iesu Keriso, amene. ■



Saunia e Elder Russell M. Nelson

○ Le Korama a Aposetolo e Toasefululua

○ Filifiliga mo le Faavavau

O le faaaogaina ma le poto o lou saolotoga e fai ai a oe lava filifiliga, e taua i lou tuputupu ae faaleagaga, i le taimi nei ma mo le faavavau.

O'u uso e ma tuafafine pele, o aso taitasi o se aso o faiga filifiliga. Ua aoao mai i tatou e Peresitene Thomas S. Monson e faapea "o filifiliga e fuafua ai taunuuga."¹ O le faaaogaina ma le poto o lou saolotoga e fai ai a oe lava filifiliga, e taua i lou tuputupu ae faaleagaga, i le taimi nei ma mo le faavavau. E le mafai ona faapea, ua e laitiiti tele e aoao, pe ua e matua tele mo se suiga. O lou naunautaiga ina ia aoaoina ma suia e sau mai se taumafaiga e musuia faalelagi mo le alualu i luma e faavavau.² O aso taitasi e aumai ai se avanoa mo filifiliga mo le faavavau.

O i tatou o tagata e faavavau—o fanau agaga a ni matua faalelagi. O loo tusia i le Tusi Paia e faapea "Ona faia lea e le Atua o le tagata i lona faatusa, . . . na faia e ia o i laua o le tane ma le fafine."³ Lata mai nei na ou faalogo ai i se aufaipese a tamaiti na usuina le pese faapelepele "O A'u o se Atalii o le Atua."⁴ Sa ou mafaufau, "Aisea na ou le faalogo ai i lena pese o usu soo e ni tina po o ni tamā faamaoni?" Pe le o tatou *uma* ea o fanau a le Atua? O le mea moni, e leai se tasi o i tatou e mafai *ona taofia* le avea ma atalii o le Atua!

I le avea ai ma fanau a le Atua, e tatau ona tatou alolofa ia te Ia ma o tatou loto ma agaga atoa, ia sili atu nai lo lo tatou alolofa i o tatou matua faalelaloagi.⁵ E tatau ona tatou alolofa i o tatou tuaoi o ni uso ma ni tuafafine. E leai se isi poloaiga e sili atu nai lo o nei.⁶ Ma e tatau ona tatou faaaloalo pea i le taua o le ola o le tagata, e ala i vaega taitasi o ona vaega e tele.

O loo aoao mai tusinga paia e faapea, o le tino ma le agaga o le tagata lea.⁷ I le avea ai ma se tagata itulua, ua mafai ai e outou taitoatasi ona faafetai i le Atua mo Ana meaalofa tautele o lou tino ma lou agaga.

○ Le Tino o le Tagata

O ou tausaga faalematata o se fomai na ou maua ai se faaaloaloga loloto mo le tino o le tagata. Na foafoaina e le Atua e avea o se meaalofa ia te oe, e matuai ofoofogia lava! Mafaufau i ou mata e vaai ai, taliga e faalogo ai, ma tamailima e tagotago ai i mea ofoofogia uma o loo siomia ai oe. O lou faiai ua mafai ona e aoao ai, mafaufau, ma fetuunai ai. O lou fatu e tata ma le le faavaivai i le ao ma le po, e toetoe lava aunoa ma lou iloa.⁸



O lou tino e puipuia o ia lava. O tiga e oo mai o se lapataiga e faapea ua i ai se mea o faaletonu ma e manaomia ona gauai atu i ai. O faama'i pipisi e oo mai i lea taimi ma lea taimi, ma a oo mai, e fatufatu ni porotini puipui o le tino lea e faateleina ai lou puipuiga e tetee atu i siama e mulimuli mai.

O lou tino na te toe faaleleia o ia lava. O lavelavea ma totolia e toe te'a lava. O ponaivi gau'i e mafai ona toe malolosi. Ua ou ta'ua na o se faaitaitaiga laitiiti mai le tele o uiga e maofa ai i lou tino ua tuuina mai e le Atua.

Ae ui i lea, e foliga mai i totonu o aiga uma, pe afai e le o totonu o tagata taitoatasi uma, e i ai ni tulaga faaletino e manaomia ai le tausiga faapitoa.⁹ O se mamanu mo le taulimaina o se luitau faapena ua uma ona tuuina mai e le Alii. Na Ia fetalai, "Ou te avatu i tagata ia vaivaiga ina ia faalotomaua-lalalo ai i latou; . . . aua afai latou te faalotomaua-lalalo ina i latou lava . . . ma faatuatua mai ia te a'u, ona ou faia lea o mea vaivai ia avea ma mea malolosi ia te i latou."¹⁰

O agaga faapitoa e masani ona faofale i totonu o tino le atoatoa.¹¹ O le meaalofo o se tino faapena e mafai moni ona faamalosi ai se aiga, a o fausia ma le loto i ai e matua ma fanau o latou olaga faataamilo i lena

tamaitiiti ua fanau mai ma ni manaoga faapitoa.

O le faagasologa o le soifua matutua o le isi lea meaalofo mai le Atua, e faapena foi i le oti. O le iu o lou tino faaletino i le oti e taua lea i le fuafuaga sili o le fiafia a le Atua.¹² Aisea? Aua o le oti o le a mafai ai e lou agaga ona toe foi atu i le aiga ia te Ia.¹³ Mai se vaaiga e faavavau, e na o i latou e le o saunia e fetai ai ma le Atua e mafaufau e faapea ua vave oo mai le oti.

O le avea ai o lou tino ma se vaega sili ona taua o le fuafuaga e faavavau a le Atua, e le o se mea e faateia ai le faamatalaina e le Aposetolo o Paulo [o le tino] o se "malumalu o le Atua."¹⁴ O taimi taitasi e te tagai ai i le faaata, ia tagai i lou tino o lou malumalu. O lena upumoni—tatou te lagona ai le agaga faafetai i aso taitasi—e mafai ona faatosina ai mo le lelei au filifiliga i le auala o le a e tausia ai lou tino ma le auala o le a e faaaogaina ai. Ma o na filifiliga o le a fuafua ai lou taunuuga. E mafai faapefea lenei mea? Aua o lou tino o le malumalu mo lou agaga. Ma o le auala e te faaaoga ai lou tino e aafia ai lou agaga. O nisi o filifiliga o le a fuafua ai lou taunuuga e faavavau e aafia ai le:

- O le a faapefea ona e filifili e tausi ma faaaoga lou tino?

- O a ni uiga faaleagaga o le a e filifili e atiina ae?

O Le Agaga o le Tagata

O lou agaga o se tagata e faavavau. Na fetalai le Alii i Lana perofeta o Aperaamo: "Sa filifilia oe ae e te le'i fanau mai."¹⁵ Sa fetalai foi le Alii i se fetalai faapena ia Ieremia¹⁶ ma le toatele o isi tagata.¹⁷ Ua Ia fetalai mai ai foi ia te oe.¹⁸

Ua loa ona silafia oe e lou Tama Faalelagi. O oe, o Lona atalii po o le afafine, sa ia filifilia ia e sau i le lalolagi i le taimi tonu lava lenei, ia avea ma se taitai o Lana galuega maoae i le lalolagi.¹⁹ Sa filifilia oe e le ona o tulaga o lou tino ae ona o ou uiga *faaleagaga*, e pei o le toa, lototele, loto faamaoni, o se galala mo le upumoni, o se naunau mo le potu, ma se manao e auauna atu i isi.

Sa e atiina ae nisi o nei uiga i le muai olaga. O isi e mafai ona e atiina ae iinei i le lalolagi²⁰ pe a e saili ma le filiga i ai.²¹

O se uiga faaleagaga aupito taua o le pulea e le tagata o ia lava—o le malosiaga e fai ai filifiliga e faavae i mafuaaga ae le o manao. O le pulea e le tagata o ia lava e fausia ai se loto fuatiaifo malosi. Ma o lou loto fuatiaifo e fuafua ai au tali faamaoni i tulaga faigata, faatosina, ma tofotofoina. O le anapogi e fesoasoani i lou agaga e atiae ai le pulea o ou manaoga faaletino. O le anapogi e faateleina ai foi lou mauaina o le fesoasoaniga faalelagi, a o ia faalolotoina au tatalo. Aisea e manaomia ai le loto pulea? Ua tuuina e le Atua ni manaoga malolosi i totonu o i tatou mo le faafaileleina ma le alofa, e taua mo le aiga o tagata ona faaaauu pea ona i ai.²² A tatou pulea o tatou manaoga i totonu o tuaoi o tulafono a le Atua, e mafai ona tatou fiafia i se olaga faafualoa, alofa faateleina, ma le fiafia atoatoa.²³



E le o se mea la e faateaia ai, o le tele o faasoosoga ia o ese mai le fuafuaga o le fiafia a le Atua e oo mai e ala i le faaoga sese o na manaoga taua, ua tuuina mai e le Atua. O le puleaina o o tatou manaoga e le o taimi uma e faigofie ai. E leai se tasi o i tatou na te puleaina ma le atoatoa.²⁴ E tutupu mea sese. E i ai sasi. E solia agasala. O le a la se mea e mafai ona tatou faia? E mafai ona tatou aoao mai ai. Ma e mafai ona tatou salamo faamaoni.²⁵

E mafai ona tatou suia a tatou amioga. E mafai ona sui o tatou lava manaoga. E faapefea? E na o le tasi lava le auala. O le suiga moni—suiga tumau—e na o le faamaloloina, faamamaina ma le mana gafatia o le Togiola a Iesu Keriso e mafai ona oo mai ai.²⁶ E alofa o Ia ia te oe—ia te outou taitoatasi!²⁷ Ua Ia faatagaina oe e maua Lona mana a o e tausua Ana poloaiga ma le naunautai, faamaoni, ma le a'ia'i. O lona faigofie lena ma le mautinoa. O le talalelei a Iesu Keriso o se talalelei o suiga!²⁸

O se agaga malosi o le tagata, faatasi ai ma le pulea o manaoga o le tino, o le matai lea o lagona ma faananauga ae e le o se pologa ia i latou. O lena ituaiga o saolotoga e taua i le agaga e pei lava o le okesene i le tino! O le saolotoga mai le faapologaina e le tagata o ia lava o le laveaiga moni lea!²⁹

Ua tatou “saoloto e filifili le saolotoga ma le ola e faavavau . . . pe filifili le faatagataotauaina ma le oti.”³⁰ A tatou filifilia le ala maualuga e agai atu i le saolotoga ma le ola faavavau, o lena ala e aofia ai le faaiipoipoga.³¹ Ua

tautino atu le Au Paia o Aso e Gata Ai o le “faaiipoipoga i le va o se alii ma se tamaitai ua faauuina e le Atua, ma o le aiga o le totonugalemu lea o le fuafuaga a lē Fofofoa, mo le taunuuga e faavavau a Lana fanau.” Ua tatou iloa foi “o le tulaga tane po o le fafine [o le tagata] o se vaega taua lea o le muai olaga, olaga faitino, ma le faasinomaga e faavavau ma le faamoemoega.”³²

O le faaiipoipoga i le va o se alii ma se tamaitai o le vaega autu lea o le aoaoga faavae a le Alii ma e taua i le fuafuaga e faavavau a le Atua. O le faaiipoipoga i le va o se alii ma se tamaitai o le mamanu lea a le Atua mo le atoatoa o le olaga i le lalolagi ma i le lagi. O le mamanu a le Atua mo le faaiipoipoga e le mafai ona tafili saunoa i ai, malamalama sese i ai, pe faaseseina.³³ E le mafai pe afai e te manao i le fiafia moni. O le mamanu a le Atua mo le faaiipoipoga e puipuia ai le mana paia o le fofofoga ma le olioli o le alofa faamamai moni faaleulugalii.³⁴ Ua tatou iloa o Atamu ma Eva sa faaiipoipoina e le Atua a o le'i o laua oo i le olioli o le tuufaatasia o se tane ma se avā.³⁵

I o tatou vaitaimi, ua i ai i faigamalo i le lotoifale se atugaluga faapitoa ma patino i le puipuiga o faaiipoipoga ona o aiga malolosu i ai auala sili ona lelei mo le soifua maloloina, aoaoga, tulaga manuia, ma le uluola o tupulaga faia'e.³⁶ Peitai o faigamalo i le lotoifale ua malosi le faatosinaina e faiga faaagafesootai ma filosofia faalelalolagi a o latou tusia, ma toe tusia, ma faamalolosia tulafono. Po o a lava tulafono faalemalolo

e ono faavaeina, o le aoaoga faavae a le Alii e faatatau i le faaiipoipoga ma le ola mama e le mafai ona suia.³⁷ Ia manatua: o le agasala, e tusa lava pe ua faatagaina e tagata, o le agasala lava i le silafaga a le Atua!

E ui e ao ona tatou faataitai i le aga-lelei ma le agaalofoa o lo tatou Faaola, e ui e ao ona tatou faatauaaina aia tatau ma lagona o fanau uma a le Atua, ae e le mafai ona tatou suia Lana aoaoga faavae. E le o se tatou matafaioi le suia. O Lana aoaoga faavae ua mo i tatou e aoao ai, malamalama ai, ma tausua.

O le ituaiga soifuaga o le Faaola e lelei. O Lana ala e aofia ai le legavia a o le'i faaiipoipoina ma le faamaoni a'ia'i i totonu o le faaiipoipoga.³⁸ O le ala a le Alii ua pau lea o le ala mo i tatou e maua ai le fiafia tumau. O Lana ala e aumai ai le mafanafana faifaipea i o tatou agaga ma le filemu faifaipea i o tatou aiga. Ae o le mea sili i lo mea uma, o Lana ala e taitai atu ai i tatou ia te Ia ma lo tatou Tama Faalelagi, i le ola faavavau ma le faaeaga.³⁹ O le ute tonu lava lea o le galuega ma le mamalu o le Atua.⁴⁰

O'u uso e ma tuafafine pele, o aso taitasi o se aso o filifiliga, ma o a tatou filifiliga e fuafua ai lo tatou taunuuga. O le a i ai se aso, o le a tatou tutu ai taitoatasi i luma o le Alii i le faamasinoga.⁴¹ O le a faataunuu taitoatasi sa tatou faatalanoaga patino ma Iesu Keriso.⁴² O le a tatou tali atu mo filifiliga na tatou faia e uiga i o tatou tino, o tatou uiga faaleagaga, ma auala na tatou faamamaluina ai le mamanu a le Atua mo le faaiipoipoga ma le aiga. Tau ina ia tatou filifili ma le potu i aso taitasi ia filifiliga mo le faavavau, o la'u tatalo faatauanau lea i le suafa paia o Iesu Keriso, amene. ■

FAAMATALAGA

1. Thomas S. Monson, “Decisions Determine Destiny” (Church Educational System fireside, Nov. 6, 2005), 3; speeches.byu.edu.

2. O le aoaoga o le alualu i luma e faavavau sa faamatalaina lelei e W. W. Phelps i upu o le viiga "If You Could Hie to Kolob" (*Hymns*, no. 284). O le fuaiupu e 4 e faitauina faapenei: "E leai se mutaaga o le mama; / E leai se mutaaga o le malos; / E leai se mutaaga o le potu; / E leai se mutaaga o le malamalama. / E leai se mutaaga o le tuufaatasiga; / E leai se mutaaga o le talavou; / E leai se mutaaga o le perisitua; / E leai se mutaaga o le upumoni." E faaiuina i le fuaiupu e 5: "E leai se mutaaga o le mamalu; / E leai se mutaaga o le alofa; / E leai se mutaaga o le tagata; / E leai se oti i luga."
3. Kenese 1:27; tagai foi Kolose 3:10; Alema 18:34; Eteru 3:15; Mose 6:9.
4. "O le Atua Lo'u Tama," *Viiga*, nu. 184.
5. Tagai Mataio 10:37.
6. Tagai Mareko 12:30–31.
7. Tagai Mataupu Faavae ma Feagaiga 88:15.
8. O isi foi gaioiga ua tuuina mai e le Atua o loo galulue foi i lou tino. O elemene e pei o le sodium [sotiamel], potassium [potasiamel], ma le calcium [kalisiamel], ma elemene tuufaatasi e pei o le vai, sukka, ma polōtini e taua mo le ola. O le tino e nafa ma kasa e pei o le okesene ma le karaponi taiokesaita. Na te gaosia hormone e pei o le insulin [inisinili], adrenalin [atarelini], ma le thyroxin [tairosini]. O le mauiluga po o le tele o nei mea taitasi ma le tele o isi mea o loo maua i totonu o le tino e otometi ona fuafuaina i totonu o tuaoi faapitua. O le faia i le va o fatupuipui o le tino e otometi ona tauilimaina ma faamatuaiaina. Mo se faaitaiga, o le fatupuipui [pituitary gland] i le pito i lalo o le faia lea na te gaosia se hormone e faamatuaiaina le vaega pito i tua o fatupuipui [adrenal glands] e gaosi ai hormone fatupuipui pito i tua [adrenal cortical]. Ma o le faateleina o hormone pito i tua [cortical] e lofituina ai le gaosiga e le pituitary o le honome faamatuaiaina ma e faapena foi i le isi itu. O le vevela o lou tino ia tautasia lava i se vaega masani o le 98.6°F po o le 37°C, e tusa pe o e i le ekueta po o le Pole i Matu.
9. O nisi tulaga e faigofie ona iloa; o isi e punitia. O isi e mafua mai ona o tulaga faakenera; o isi e leai. O isi tagata atonu o le a tele se avanoa e maua ai i le kanesa, o isi e i ai mea e le taliaina e o latou tino, ma isi mea faapena. E mafai e i tatou taitoatasi ona nofouta i ona lava itu e vaivai ai ma aoao ai ma le faamaualalo mea o le a aoao mai e le Alii, ina ia avea le vaivaiga ma se malosiaga.
10. Eteru 12:27.
11. O nisi tulaga o le a le faasa'oina atoatoa seia oo i le Toetutu, lea "o le a toefuataia mea uma i o latou autino tatau ai ma atoatoa" (Alema 40:23).
12. Tagai Alema 42:8.
13. Na tusia e le Fai Salamo, "E silisili i le manatu o Ieova le oti o ona tagata amio Atua" (Salamo 116:15). E silisili le oti ona o le "feiloaiga" a le tagata amio Atua ma le Alii.
14. 1 Korinito 3:16; tagai foi 6:19.
15. Aperaamo 3:23.
16. Tagai Ieremia 1:5.
17. Tagai Alema 13:2–3.
18. Tagai Mataupu Faavae ma Feagaiga 138:55–56.
19. Tagai Alema 13:2–3; Mataupu Faavae ma Feagaiga 138:58–57.
20. O uiga e pei o le "faatuatua, amio mama, potu, faautauta, onosai, agalelei faaleuso, amioatua, alofa mama, lotomauualalo, [ma le] filiga" (Mataupu Faavae ma Feagaiga 4:6) ua aofia ai i meaalofo faaleagaga e mafai ona tatou atinaeina ma tuuina mai. O le lotu faafetai o le isi lea uiga faaleagaga e mafai ona atinaeina. O le lotu faafetai e mamanuina ai lagona ma le faamanuiaina. Ma afai ua e "fanuina faaleagaga i la le Atua," e mafai ona e mauaina ma le lotu faafetai Ona foliga i ou mata (tagai Alema 5:14).
21. Tagai 1 Korinito 12; 14:1–12; Moronae 10:8–19; Mataupu Faavae ma Feagaiga 46:10–29.
22. O isi ua faaososoina ia tausami tele. "O le tino puta ua avea ma faafitauli ogaoga i le lalolagi atoa, ma e le ititi ifo ma le 2.8 miliona tagata e maliliu i tausaga taitasi ona o se taunuuga o le soona puputa" (World Health Organization, "10 Facts on Obesity," Mar. 2013, www.who.int/features/factfiles/obesity/en). O isi ua faaososoina ia tau le aai. O le 'ino'ai [anorexia] ma le bulimia [soonai ma toe faapua'i] ua faatamaia ai le tele o soifua, faaipoipoga, ma aiga. Ae o isi ua faaososoina e tuimanau i faiga faalefeusua'i ia ua faasaina e lo tatou Fofofo. O loo i ai i le *Tusitaulima 2: Taitaaina o le Ekalesia*, le faamaninoga lea o loo faapea mai: "O le tulafono a le Alii o amioga mama e faasaina ai faiga faalefeusua'i i fafo o faaipoipoga faatulafonoina ma le faamaoni i le faaipoipoga. . . . O le mulilua, faitaaga, sootaga faatauatane po o le faaulugalii o tane po o tamaitai foi lava latou, ma isi faiga uma e le paia, e le faalenatura, pe le mama, e tausalaina." E sii mai pea mai le tusitaulima: "O amioga faatauatane po o le faatauafafine e solia ai poloaiga a le Atua, e feteenai ma faaomomoga o tulaga faalefeusua'i o tagata, e aveesea ai faamanuiaga o tagata e mafai ona maua ai le olaga faaleaiga ma sauniga faaola o le talalelei. . . . A o tetea atu i amioga faatauatane, o loo faapea foi ona aapa atu le Ekalesia ma le malamalama ma le faaaloalo i tagata taitoatasi o e o loo tosina atu i tagata o lana lava itupa" ([2010], 21.4.5, 6).
23. Tagai 1 Korinito 6:9–20; Iakopo 1:25–27; Mataupu Faavae ma Feagaiga 130:20–21. Ma e ao ona tatou manatua, "ua i ai le tagata, ina ia latou maua le olioli" (2 Nifae 2:25).
24. O le olaga faaletino o se vaiitaimi o le tofotofoina, e pei ona faamalamalama mai i le mau: "Ma o le a tatou tofotofoina ai i latou, e vaai pe latou te faia mea uma o soo se mea e poloaiina ai i latou e le Alii lo latou Atua" (Aperaamo 3:25).
25. Tagai Mosaea 4:10; Alema 39:9; Helamana 15:7. *Tusitaulima 2* o loo i ai le savali lenei: "O amioga faatauatane e mafai ona faamagaloina e ala i le salamo faamaoni" (21.4.6).
26. E ala i le Togiola a Iesu Keriso ma pe a ususitai i mataupu faavae o le talalelei, o le a faaolaina ai tagata uma (tagai Mataupu Faavae ma Feagaiga 138:4; Mataupu Faavae o le Faatuatua 1:3).
27. Tagai Eteru 12:33–34; Moronae 8:17.
28. Tagai Mosaea 5:2; Alema 5:12–14.
29. Tagai Roma 8:13–17; Kalatia 5:13–25; Mataupu Faavae ma Feagaiga 88:86.
30. 2 Nifae 2:27.
31. Tagai Mataupu Faavae ma Feagaiga 131:1–4.
32. "O Le Aiga: O Se Folafofola i le Lalolagi," *Liahona*, Nov. 2010, 129.
33. Tagai Mataio 19:4–6; Mosaea 29:26–27; Helamana 5:2..
34. Ua fananau mai tagata taitoatasi ma se faasinomaga, koromasome, ma DNA (deoxyribonucleic acid) maoae. O le DNA o se vaega aupito laitiiti o se elemene na te faamatalaina faatonuga faakenera e faaoga i le atinae ma le faagaioaioa o sela ola. O le DNA o tagata taitoatasi e fatuina pe afai e tuufaatasi le DNA mai se tama ma se tina ina ia fatu ai le DNA o se tino fou—o se faigapaaga i le va o le tama, tina, ma se tamaitiiti.
35. Tagai Kenese 2:24–25; 3:20–21; 4:1–2, 25.
36. Na tusia e Dr. Patrick F. Fagan: "O le faavae manaomia lea e faalagaloa i ai le tulaga o le tamaoaga o se aiga ua faaipoipoina matua—ae maise lava o se aiga ua i ai se fanu e tapuai faalevaiaso. . . . O faaipoipoga uma lava e faatuina ai se aiga fou, se iunite tutoatasi o le tamaoaga e faapea ona maua ai tupe maua, faalu, sefe, ma faaputu" ("The Family GDP: How Marriage and Fertility Drive the Economy," *The Family in America*, vol. 24, no. 2 [spring 2010]: 136).
37. Tagai Esoto 20:14; Levitiko 18:22; 20:13; Teuteronomi 5:18; Mataio 5:27–28; Mareko 10:19; Luka 18:20; Roma 1:26–27; 13:9; Mosaea 13:22; 3 Nifae 12:27–28; Mataupu Faavae ma Feagaiga 42:24; 59:6.
38. Tagai Gordon B. Hinckley, "This Thing Was Not Done in a Corner," *Ensign*, Nov. 1996, 49.
39. Tagai Mataupu Faavae ma Feagaiga 14:7.
40. Tagai Mose 1:39.
41. Tagai 2 Nifae 9:41, 46; Mosaea 16:10.
42. O le a faamasinoina i tatou e tusa ai ma a tatou galuega ma manaoga o o tatou lotu (tagai Mataupu ma Feagaiga 137:9; tagai foi Eperu 4:12; Alema 18:32; Mataupu Faavae ma Feagaiga 6:16; 88:109).



Saunia e Peresitene Thomas S. Monson

Seia Tatou Toe Feiloai

Tau ina ia tatou faaali atu le agalelei faateleina i le tasi ma le isi, ma tau ina ia maua pea i tatou o faia e le aunoa le galuega a le Alii.

Ou uso e ma tuafafine, ua tumu lo'u loto a o tatou faaiuina lenei konafesi aoao matagofie o le Ekalesia. Ua fafagaina i tatou

faaleagaga a o tatou faalogologo atu i fautuaga ma molimau a i latou na saunoa i sauniga taitasi. Ua faamanuiaina i tatou e feiloai



iinei i le Nofoga Autu ofoofogia mo Konafesi i le filemu ma le saogalemu. Ua i ai a tatou faasalalaua mata'ina o le konafesi, ua oo atu ai i le salafa o konetineti i tagata i soo se mea. E ui matou te vava mamao faaletino mai le toatele o outou, ae matou te lagonaina o outou agaga.

I o tatou uso na faamaloloina i lenei konafesi, ou te faailoa atu le agaga faafetai o'oo'o o le Ekalesia atoa mo le tele o tausaga o la outou tautua tuuto. E le mafaitaulia le anoanoai o tagata ua faamanuiaina i la outou sao i le galuega a le Alii.


Ou te faailoa atu le agaga faafetai i le Aufaipese a le Tapeneko ma isi aufaipese na auai i lenei konafesi. Ua matagofie lava musika ma ua faaopopo tele ai le Agaga ua tatou lagonaina i sauniga taitasi.

Ou te faafetai atu mo a outou tatalo mo a'u faapea ai ma le Pulega Aoao atoa ma taitai aoao o le Ekalesia. Ua faamalosia i matou e na tatalo.

Ia tumau ia te outou faamanuiaga o le lagi. Ia faatumulia o outou aiga i le alofa ma le feāvata'i faapea ai ma le Agaga o le Alii. Ia outou faafaileleina e le aunoa a outou molimau o le talalelei, ina ia avea ma puipuiga ia te outou e tete'e atu ai i tu'iga a Satani.

Ua maea nei le konafesi. A o tatou toe foi atu i o tatou aiga, ia tatou o ma le saogalemu. Tau ina ia tatou faatasi ma le Agaga ua tatou lagonaina iinei a o tatou feoai ma faia na mea ia tatou te faia i aso taitasi. Tau ina ia tatou faaali atu le agalelei faateleina i le tasi ma le isi, ma tau ina ia maua pea i tatou o faia e le aunoa le galuega a le Alii.

Ou uso e ma tuafafine, ia faamanuia outou e le Atua. Ia i ai lona filemu folafolaina ma outou i le taimi nei ma taimi uma. Ou te faatofa atu ia te outou seia tatou toe feiloai i le isi ono masina. I le suafa o lo tatou Faaola, le Alii o Iesu Keriso, amene. ■



Saunia e Linda K. Burton
Peresitene Aoa o le Aualofa

O Le Mana, Olioli, ma le Alofa e Maua i le Tausiga o Feagaiga

Ou te valaaulia outou taitoatasi ina ia toe iloilo po o le a le tele o lo tatou alolofa i le Faaola, e faaoga o se fua le tulaga o tatou olioli ai i le tausiga o a tatou feagaiga.

Ou te fia amata i le faasoia atu o se tala na ootia ai lou loto.

I se tasi afiafi na valaau ai e se alii ana mamoe e lima e o mai i le malutaga mo le po. Na matamata atu ma le naunau tele lona aiga ao ia valaau atu, “O mai” ma sa vave ona ea ae uma i luga ulu e lima ma liliu mai i lona itu. E fa mamoe na taufetuli mai ia te ia. Faa-tasi ma le alofa agamalu sa ia pōpō ai ma le agalelei ia ulu taitasi e fa. Na iloa e mamoe lona leo ma alolofa ia te ia.

Ae e lei sau le mamoe lona lima. O se mamoe fafine lapoa lea sa foai mai e se tasi tagata i ni nai vaiaso na muamua ai, ma sa tau mai e ulavale, faalogogata, ma na te taitaia lava isi mamoe ina ia se. Na taliaina o ia e lona matai fou ma nonoa o ia i lona lava fanua mo ni nai aso ina ia aoao ai ia nofo lelei. Sa ia aoaoina o ia ma le onosai ia alofa ia te ia ma isi mamoe, seia oo lava ina tuu ai na o se maea puupuu i lona ua ae ua le toe nonoaina.

I lona afiafi ao matamata atu lona aiga, na alu atu le alii i le mamoe fafine, lea na tu i le tausiusiuga o le fanua, ma sa ia toe fai atu lemu, “Sau loa. E le o toe nonoaina oe. Ua e saoloto.” Ona ia aapa atu lea ma le alofa, tuu lona lima i lona ulu, ma savavali faatasi atu ma ia ma isi mamoe e agai i le fale.¹

O le agaga o lona tala, ou te tatalo atu ai ina ia fesoasoani mai le Agaga Paia ia i tatou e aoao faatasi i lenei po e uiga i le tausiga o feagaiga. O le osia ma le tausia o feagaiga o lona uiga o le filifili lea e noatia i tatou lava i lo tatou Tama oi le Lagi ma Iesu Keriso. O le tautino atu lea e mulimuli i le Faaola. O le faalagolago atu lea ia te Ia ma manao e faaalua lo tatou agaga faafetai mo le tau Na ia totogiina e faasaoloto ai i tatou e ala i le meaalofa le iu o le Togiola.

Na faamatalaina e Elder Jeffrey R. Holland faapea “o se feagaiga o se maliega e fusia ai faaleagaga, o se

tautoga faamaoni i le Atua lo tatou Tama o le a tatou ola ma mafaufau ma galulue i se ala faapitoa—le ala a Lona Alo, le Alii o Iesu Keriso. O le tau, ua folafola mai ai e le Tama, le Alo, ma le Agaga Paia le matagofie ma le mamalu sili o le ola e faavavau.”² I lona feagaiga e fusia ai, ua faatulagaina ai e le Alii ni tuutuuga ma ua tatou malilie e tausia. O le osiaina ma le tausiaina o a tatou feagaiga o se faailoaga lea o la tatou tautinoga ia avea faapei o le Faaola.³ O le talitonuga o le taumafai lea mo uiga ia ua sili ona faailoa mai i nai fuaiupu o se pese e sili ona ou fiafia i ai: “Ou te alu i mea e te tofia. . . . Au afioga ou te alaga. . . . Avea au pei na e tofia.”⁴

Aisea e Osia ai ma Tausia Feagaiga?

1. O le tausia o feagaiga e faamallosia ai, maua ai le mana, ma puipua ai.

Na vaai Nifae e ala i se faaaliga i faamanuiga maoae e tuuina mai e le Alii i e tausia feagaiga. “Ma sa oo ina ou, vaai au o Nifae, i le mana o le Tamai Mamoe a le Atua, ua alu ifo . . . i luga o tagata o le feagaiga a le Alii, . . . ma sa faaaaupegaina i latou i le amiotonu ma le mana o le Atua i le mamalu tele.”⁵

Sa ou feiloai talu ai nei i se uo pele fou. Sa ia molimau mai ina ua uma ona maua ona faaeega paia, sa ia lagona le malosiaga ma le mana e tetee atu ai i faaosoosoga ia sa ia tauivi ai muamua.

Ao tatou tausia a tatou feagaiga, o le a tatou mauaina foi le lototoa ma le malosi e fesoasoani ia i tatou e tauave avega a le tasi. Sa i ai i se tamaitai loto nutimomoia se atalii sa aafia i se luitau faigata e ono maliu ai. O lona faatua-tuaina o ona uso Aualofa i le avea ma tausia feagaiga, sa ia valaauliaina ai ma le lototoa i latou e anapopogi ma tatalo mo lana tama. Na faaalua e se isi uso lona moomoo maimau pe ana faapea sa ia talosagaina ia foi tatalo mai ona uso. I tausaga ua mavae, sa tauivi ai foi lana tama. Sa ia moomoo maimau pe ana ia valaauliaina i latou e fesoasoani i lona aiga e tauave lenei avega. Na fetalai mai le Faaola, “O le mea lea e iloa ai e tagata uma lava o ou soo outou, pe afai ua outou fealofani.”⁶

Uso e, e tofia uma lava i tatou ma avega o tauave ma tausoina faatasi. O



se valaaulia e tausoa faatasi le avega a le tasi ma le tasi o se valaaulia lea e tausia a tatou feagaiga. O le fautuaga a Lusi Maki Samita i le uluai usoga a le Aualofa ua sili atu le fitoitonu i lenei vaitaimi nai lo se isi lava taimi muamua: “E tatau ona tatou faapelepele le tasi i le isi, leoleo e le tasi le isi, faamafanafana e le tasi le isi ma ia maua aoaoga, ina ia mafai ai ona tatou nonofo uma faatasi i le lagi.”⁷ O le tasi feagaiga lenei faapea ai ma faiaoga asiiasi i lona tulaga silisili!

Ua faamanatu mai ia i tatou e le Tusi a Mamona na oo lava i le perofeta o Alema na tauaveina se avega i le i ai o se atalii faalogogata. Ae na faamanuiaina Alema i le i ai o ni uso ma tuafafine tasi feagaiga i le talalelei o e na liua loloto i le Alii ma sa iloa le uiga o le tauave faatasi o le avega a le tasi ma le isi. Ua tatou masani i le mau o i le Mosaea o loo talanoa ai e uiga i le maoae o le faatuatua o tatalo a Alema mo lona atalii. Ae na fai mai le faamaumauga “ua faafogaina e le

Alii talosaga *a lona nuu*, ma talosaga foi a lana auuana, o Alema.”⁸

Ua tatou iloa e olioli le Alii “i le agaga e salamo,”⁹ ae ua sili atu lo tatou naunautai i lo mea uma ina ia mulumuli a tatou fanau i le fautuaga a Peresitene Henry B. Eyring ina ia “vave amata ma tutumau ai” i le osia ma le tausia o feagaiga.¹⁰ E lei leva atu, sa tulai mai ai se fesili faamaoni faatupu-manatu i se fonotaga a taitai perisitua ma ausilali: pe o tatou faamoemoe moni ea e tausia e tamaiti tai valu tausaga a latou feagaiga? Ao matou fefautuagai faatasi, sa fautua mai ai o se tasi o auala e saunia ai le fanau ina ia osia ma tausia feagaiga paia o le papatisoga o le fesoasoani lea ia i latou e aoao e fai ma tasi se folafolaga faigofie.

E agavaa matua faamaoni ia iloa pe faapefea ona aoao atu ni auala e sili ona faafetaia ai manaoga o a latou fanau. A o saili ma galulue matua e tusa ma faaaliga patino, fefautuagai faatasi, ma auuana atu ma aoao ia mataupu faavae faigofe o le talalelei, o le a latou

maua le mana e faamalolosa ai ma puipuia ai o latou aiga. E mafai foi ona fesoasoani isi tagata o le aiga. Na aoao mai e lou tama matua aulelei ia i matou le taua o le tausia o folafolaga e ala i se pese faigofie. O se [pese] faapenei: “Ae e te lei faia se folafolaga, mafaufau lelei i lona taua. Afai e fai, ia tusi ai i le papa o lou loto. Tusi ai i le papa o lou loto.” O lona tamai pese na aoaoina mai ma le alofa, talitonuga, ma le malosi aua na tusia ai e Tama matua ana lava ia folafolaga i lona loto.

O se tina atamai ou te iloa, sa faa-aofia lana lava fanau i ana taumafaga e tausia ana feagaiga. Na te tauave ma le fiafia ia avega a tuaoi, uo, ma tagata o le uarota—ma faamafanafana ia i latou o e manaomia le faamafanafana. E le o se mea e ofo ai ina ua sau lata mai nei lana tama teine laitiiti e talosaga se fesoasoani i le ala sili e faamafanafana ai i sana uo ua faatoa maliu lona tama. O se faatulagaga atoatoa lenei o le aoao faapea, o ona naunautaiga e faamafanafana i lana uo o se tasi lea o auala e tasi ai lana feagaiga o le papatisoga. E mafai faafefea ona tatou faamoemoe i fanau e osia ma tausia feagaiga o le malumalu pe afai tatou te le o faamoemoe ia i latou e tausia a latou uluai feagaiga—a latou feagaiga o le papatisoga?

Na matauina e Elder Richard G. Scott, “O se tasi o faamanuiaga silisili e mafai ona tatou ofoina atu i le lalolagi, o le mana lea o se aiga e faatotoungalemu ia Keriso lea e aoaoina ai le talalelei, tausia ai feagaiga, ma ola lauusi ai le alofa.”¹¹ O a nisi auala e mafai ona tatou fatu ai sea ituaiga aiga e saunia ai a tatou fanau e osia ma tausia feagaiga o le malumalu?

- E mafai ona tatou aoao faatasi i le uiga o le agavaa mo se pepa faataga o le malumalu.
- E mafai ona tatou aoao faatasi i le

auala e faalogo ai i le Agaga Paia. Talu ai ona o le pepa faataga o le malumalu e maua e ala i se faaaliga, e manaomia lo tatou aoaoina o lena tomāi taua.

- E mafai ona tatou aoao faatasi pe faapefea ona iloa le faaaogaina o faatusa, amata i faatusa paia o le papatisoga ma le faamanatuga.
- E mafai ona tatou aoao faatasi pe aisea e paia ai le tino, aisea e faasino i ai i nisi taimi o se malumalu, ma e faapefea ona faatatau ia laei tauagafau ma teuga i le natura paia o lavalava o le malumalu.
- E mafai ona tatou aoao faatasi i le fuafuaga o le fiafia i tusitusiga paia. O le sili atu ona tatou faamasani i le fuafuaga a le Tama Faalelagi ma le Togiola i tusitusiga paia, o le sili atu foi lea ona anoa ia tapuaiga faalemalumalu.
- E mafai ona tatou aoao faatasi i tala a o tatou tuua, saili ia talafaasolopito o aiga, faavasega ia igoa, ma faia galuega sui i le malumalu mo e pele ua maliliu.
- E mafai ona aoao faatasi i le uiga o faaupuga e pei o le faaeega paia, sauniga, faamauga, perisitua, ki, ma nisi upu e faatatau i le tapuaiga i le malumalu.
- E mafai ona tatou aoao atu tatou te o i le malumalu e osi feagaiga ma le Tama Faalelagi—tatou te toe foi i le aiga e tausi ai!¹²

Sei o tatou manatuina le manatu faavae o le “lelei, lelei tele, ma le lelei silisili” ao tatou aoao atu.¹³ E lelei le aoao atu o a tatou fanau e uiga i le malumalu. E lelei tele le saunia ma faamoemoeina i latou e osia ma tausia feagaiga. E lelei silisili le faaali atu ia i latou e ala i faaitaiga tatou te pipii ma le fiafia ia tatou lava feagaiga o le papatisoga ma le malumalu! Uso e, ua tatou iloa ea la tatou matafaioi taua i

le galuega o le faaolataga ao tatou faa-failele, aoao atu, ma saunia le fanau ia alualu i luma i le ala o le feagaiga? O le a oo mai le mana e faia ai ao tatou faamamaluina ma tausia a tatou feagaiga.

2. O le tausia o feagaiga e taua mo le fiafia moni.

Na aoao mai Peresitene Thomas S. Monson, “O feagaiga paia e faamamaluina e i tatou, ma o le faatuatua i ai o se tulaga moomia lea mo le fiafia.”¹⁴ I le 2 Nifae tatou te faitau ai, “Ma sa oo ina matou ola e tusa ma le ala o le fiafia.”¹⁵ I luma o lenei lava mataupu ua tatou aoao ai na fausia e Nifae ma lona nuu se malumalu. E moni o i latou o ni tausi feagaiga fiafia! Ma i le Alema ua tatou faitauina ai, “Ae faauta sa leai se taimi sili ona fiafia i totonu o le nuu o Nifae, talu mai aso o Nifae, nai lo aso o Moronae.”¹⁶ Aisea? Ua tatou toe aoaoina i se fuaiupu i luga ifo, o i latou “o e sa faamaoni i le tausiga o poloaiga a le Alii.”¹⁷ O tagata tausi feagaiga o tagata foi ia e tausi i poloaiga!

Ou te fiafia i le mau e faitauina: “Ma o lenei ina ua faalogo mai tagata i nei upu [o lona uiga o upu o loo faamatalaina ia le feagaiga o le papatisoga], sa pati o latou lima i le olioli, ma alalaga mai: O le manao lea o o matou loto.”¹⁸ Ou te fiafia i le manao o o latou loto. Sa latou mananao ma le olioli e osia ma tausia a latou feagaiga!


Na alaga fiafia se uso talavou i se tasi Aso Sa, “Ua mafai ona ou ai ma inu i le faamanatuga i le asō!” O le a se taimi mulimuli na e olioli ai i lena avanoa? Ma o faapefea ona tatou faaaliga? Tatou te faia lenei mea i le manatuina *pea* o le Faaola ma tausia [*pea*] Ana poloaiga, lea e aofia ai le tausia o Lona aso Sapati ia paia. Tatou te faia i le manatuina *pea* o Ia ao tatou faia e le *aunoa* a tatou tatalo patino ma faaleaiga, suesue i tusitusiga paia i aso uma, ma afiafi faaleaiga i vaiaso uma. Ma pe a tatou le mautonu pe faaleano i nei mea taua,

tatou te salamo ma toe amata.

O le osia ma le tausia ma le fiafia o a tatou feagaiga e aumaia ai le malosi ma le uiga i sauniga faaola e taua ma paia ia e manaomia ona tatou mauaina ina ia mafai ai ona maua “mea uma ua i ai [i le] Tama.”¹⁹ O sauniga ma feagaiga o ni “tulaga maoae faaleagaga” ia na faatatau i ai Peresitene Henry B. Eyring ao ia aoao mai: “O le Au Paia o Aso e Gata Ai o ni tagata o le feagaiga. Mai lava i le aso na papatiso ai seia oo mai i taimi faaleagaga taua o o tatou olaga, tatou te faia ai lava ni folafolaga i le Atua ma Ia faia foi ni folafolaga ia i tatou. Na te tausia *pea* ana folafolaga sa faia e ala mai i Ana auauna faata-gaina, ae o se tofotofoga taua tele i o tatou olaga le vaai pe o le a *tatou* osia ma tausia a tatou feagaiga ma Ia.”²⁰

3. O le tausiga o a tatou feagaiga e faaaliga ai lo tatou alolofa mo le Faaola ma lo tatou Tama i le Lagi.

Mai mafuaaga uma lava e ao ai ona tatou filiga atili i le tausiga o a tatou feagaiga, o le mafuaaga lenei e sili atu





tuu atu e le leoleo mamoe lelei o lona ola e sui ai mamoe.”²⁶ E mafai ona ia faia lona mea aua na Ia tausia Lana feagaiga ma le alofa. O le fesili la e faapea, tatou te faia? Tau ina ia tatou agai i luma ma le faatuatua, loto faafiafiaina, ma se manao tele ina ia avea ma ni tagata tausia feagaiga. O le ala lea tatou te faaalua ai lo tatou alolofa i lo tatou Tama oi le Lagi ma lo tatou Faaola, lea ou te molimau atu ai ma le alofa silisili, i le suafa o Iesu Keriso, amene. ■

FAAMATALAGA

1. Tagai D. Todd Christofferson, “Ua E Saoloto,” *Liahona*, Mat. 2013, 16, 18.
2. Jeffrey R. Holland, “Tausia o Feagaiga: O Se Savali mo i Latou O Le a Auauna Atu i se Misiona,” *Liahona*, Ian. 2012, 49.
3. Tagai “Malamalama i a Tatou Feagaiga ma le Atua,” *Liahona*, Iulai 2012, 23.
4. “Ou Te Alu i Mea E Te Tofia,” *Viiga*, nu. 169; faaopoopo le faamamafa.
5. 1 Nifae 14:14.
6. Ioane 13:35.
7. Lusi Maki Samita, i *O Afafine i Lo'u Malo: O Le Talafaasolopito ma le Galuega a le Aualofa* (2011), 26.
8. Mosaea 27:14; faaopoopo le faamamafa.
9. Mataupu Faavae ma Feagaiga 18:13.
10. Tagai Henry B. Eyring, “Sauniuniga Faaaleagaga: Ia Vave Amata ma Ia Tumau Ai,” *Liahona*, Nov. 2005, 37–40.
11. Richard G. Scott, “Mo Le Filemu i le Aiga,” *Liahona*, Me 2013, 30.
12. Tagai D. Todd Christofferson, “The Gospel Answers Life’s Problems and Challenges” (worldwide leadership training meeting, Feb. 2012); lds.org/broadcasts.
13. Tagai Dallin H. Oaks, “Lelei, Lelei Atu, Lelei Silisili,” *Liahona*, Nov. 2007, 104.
14. Thomas S. Monson, “Fiafia—o le Sailiga Lautele,” *Liahona*, Mat. 1996, 5.
15. 2 Nifae 5:27.
16. Alema 50:23.
17. Alema 50:22.
18. Mosaea 18:11.
19. Mataupu Faavae ma Feagaiga 84:38.
20. Henry B. Eyring, “O Molimau mo le Atua,” *Liahona*, Ian. 1997, 34; faaopoopo le faamamafa.
21. Kenese 29:20.
22. Ioane 3:16.
23. Joseph Fielding Smith, “Importance of the Sacrament Meeting,” *Relief Society Magazine*, Oct. 1943, 592.
24. Jeffrey R. Holland, “O Le Poloaga Muamua ma le Sili,” *Liahona*, Nov. 2012, 84.
25. Ioane 14:21.
26. Ioane 10:11.

le malosi nai lo mafuaaga uma—o le alofa. E i ai se mau i le Feagaiga Tuai e ootia ai lou loto pe a tatou mafaufau i le mataupu faavae o le alofa. E i ai se tasi o i tatou e le ootia i le tala faama-ma’i faatusipaia ia Iakopo ma Rasela ao tatou faitauina, “Ona auauna ai lea o Iakopo i tausaga e fitu ona o Rasela, ua peiseai o nai aso itiiti ia i lona manatu, aua o lona manao tele ia te ia?”²¹ Uso e, o tatou tausia ea a tatou feagaiga i lona lava ituaiga o alofa loloto ma tuuto?

Aisea na naunau ai le Faaola e tausia Lana feagaiga ma le Tama ma faataunuu Lana misiona paia e togiola mo agasala a le lalolagi? Ona o Lona alofa mo Lona Tama ma Lona alofa mo i tatou. Aisea na naunau ai le Tama e faataga Lona Alo atoatoa e Toatasi na Fanaua ina ia mafatia i tiga e le mafai ona faamatalaina e tauave ia agasala, faanoanoaga, ma’i, ma le vaivaiga o le lalolagi ma mea uma ua le talafeagai i lenei lalolagi? Tatou te maua le tali i upu nei: “Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi.”²²

“Afai tatou te talisapaia ma le atoatoa le anoanoai o faamanuiga ua tatou maua e ala mai i le togiola na saunia mo i tatou, e leai la se mea o le a le mafai ai ona tatou faia ma le naunautai ma le malie i ai pe a fetalai mai le Alii.”²³ E tusa ai ma lenei faamatalaga mai ia Peresitene Iosefa Filitia

Samita, o le tausiga o feagaiga o se tasi lea o ala e faaalua ai lo tatou alolofa mo le Togiola le iu a lo tatou Faaola ma le Togiola ma le alofa atoatoa a lo tatou Tama oi le Lagi.

Na fautua mai ma le agaalofo ia Elder Holland, “Ou te le o mautinoa pe o le a le mea o le a tatou oo i ai i le Aso Faamasino, ae o le a ou matuai ofo lava pe afai i lona talanoaga, e le fesili mai le Atua ia i tatou i le mea tonu foi lea na fesili ai Keriso ia Peteru: ‘Pe na e alofa mai ea ia te au?’”²⁴ I le po nei ou te valaaulia outou taitoatasi ina ia toe iloilo po o le a le tele o lo tatou alolofa i le Faaola, ia faaaga o se fua le tulaga o tatou olioli ai i le tausiga o a tatou feagaiga. Na fetalai mai le Faaola, “O le ua ia te ia au poloaga ma tausii ai, o ia lea e alofa o ia i a te au: o le alofa mai foi ia te au, e alofaina o ia e lo’u Tama, ou te alofa foi ia te ia, ma ou faaali ia te ia.”²⁵ Tatou te mananao uma lava i se faaaliga faisoo a le Faaola i o tatou olaga i aso uma!

Sei o tatou manatuaina e oo lava ia i latou o e na faalogogata i le taimi ua tuana'i pe o loo tauivi i le taimi nei e mafai ona lagona le pai mai o aao o le Leoleo Mamoe Lelei i luga o o latou ulu ma faalogo atu i Lona siufofoga o fetalai mai: “Sau loa. E le o toe nonoaina oe. Ua e saoloto.” Na fetalai mai le Faaola, “O au le leoleo mamoe lelei, e



Saunia e Carole M. Stephens

Fesoasoani Muamua i le Au Peresitene Aoa o le Aualofa

E I Ai se Mafuaaga Sili mo i Tatou e Olioli Ai

Afai tou te alolofa atu, tausia, ma auauna atu i isi i ni auala itiiti ma faigofie, o loo e auai ma le naunautai i le galuega o le faaolataga.

I na ua maliu lou tama faaletulafono, na potopoto faatasi lo matou aiga e faafeiloai atu i isi o e na o mai e faaalia lo latou faaloalo. I le afiafi atoa ao matou faatasi ai ma aiga ma uo, sa tele ina ou matauina le atalii a le ma tama teine e 10 tausaga, o Porter, o tu i autafa o lo'u tina faaletulafono—lona “tina matua.” O nisi taimi na te tu ai i ona tua, ma vaaia o ia. I se tasi taimi sa ou vaaia ai o uuina le lima o tina matua. Sa ou vaai atu o ia milimiliina ona lima, opo mai o ia, ma tu i ona autafa.

Ina ua mavae lena aafiaga mo le tele o aso, sa le mafai ona aveesea lena vaaiga mai lou mafaufau. Sa uunaia au e auina atu ia Porter se tamai tusi, e tau atu ia te ia le mea sa ou matauina. Sa ou imeli atu ia te ia ma tau i ai le mea sa ou vaaia ma lagonaina. Sa ou faamanatu atu ia Porter ia feagaiga sa ia osia ina ua ia papatiso, ma sii atu upu a Alema i le Mosaea mataupu e 18:

“Ma o lenei, ona ua outou mananao e o mai i le lafu a le Atua, ma ta’ua

o ona tagata, ma outou loto e tauave avega a le tasi, ina ia mama;

“Toe, ma outou loto e faanoanoa faatasi ma e e faanoanoa; ioe, ma faamafanafana atu ia te i latou o e e manaomia le faamafanafana, ma tutu o ni molimau a le Atua i taimi uma ma i mea uma, ma i nofoaga uma atonu tou te i ai, seia oo lava i le oti, . . . ina ia mafai ona outou maua le ola e faavavau—

“. . . Afai o le manao lea o o outou loto, se a se mea tou te tetee ai i le papatisoina i le suafa o le Alii, o se molimau i ona luma ua outou ulu atu i se feagaiga faatasi ma ia, o le a outou auauna atu ia te ia ma tausii ana polo-aiga, ina ia mafai ona liligi atili tele mai e ia lona Agaga i luga o outou?”¹

Sa ou faamalalamaina ia Porter na aoa mai Alema o i latou o e mananao e papatiso e manaomia le naunau e auauna atu i le Alii e ala i le auauna atu i isi—mo lou olaga atoa! Sa ou fai atu: “Ou te le iloa pe ua e iloina, ae o le ala sa e faaalia ai le alofa ma le popole mo Tina matua, o le tausiga lea o au feagaiga. Tatou te tausii a tatou feagaiga i aso uma pe a tatou agalelei atu, faaalia le alofa, ma fetausiai le tasi ma le isi. Ou te fia manao ia e iloa ua ou mitamita lava ia te oe i le avea ma se e tausii feagaiga! Ma a e tausii feagaiga na e osia ina ua e papatiso, o le a e saunia e faauuina i le perisitua. O nei feagaiga faaopopo o le a atili tuuina atu ai ia te oe ni avanoa e faamanuia ai ma auauna atu ai i isi ma fesoasoani ia te oe e saunia mo feagaiga o le a e osia i le malumalu. Faafetai tele lava mo le avea ma se faataitaiga lelei ia te au! Faafetai mo le faaalia mai ia te au o foliga o se tagata e tausii feagaiga!”

Sa toe tali mai Porter: “Tina matua, faafetai mo le savali. O taimi uma ou te fusiina ai Tinamatua, ou te leiloa o loo ou tausii a’u feagaiga, ae sa ou



Porter (taumatau) ma le tina o lona tina matua.

lagona le mafanafana i lou loto ma sa matuai lelei lava le faalogona. Ou te iloa o le Agaga Paia lea sa i lou loto.”

Sa ou lagonaina foi le mafanafana i lou loto ina ua ou iloa ua malama-lama Porter i le tausiga o ana feagaiga faatasi ai ma le folafolaga ina ia “maua pea lona Agaga e faatasi ma i [tatou]”²—o se folafolaga na maua mai e ala i le mauaina o le meaalofa o le Agaga Paia.

Uso e, ao o’u asiasi atu ia te outou i le salafa o le lalolagi, na ou iloa ai o le toatele o outou e faapei lava o Porter. O loo outou tutu filemu o ni molimau a le Atua, faanoanoa faatasi ma e o faanoanoa, ma faamafanafana ia i latou o e o manaomia le faamafanafanaga e aunoa ma le iloina o loo outou tausia a outou feagaiga—o feagaiga na outou faia i vai o le papatisoga ma le malumalu. Afai tou te alolofa atu, tausia, ma auauna atu i isi i ni auala itiiti ma faigofie, o loo e auai ma le naunautai i le galuega o le faaolataga, le galuega a le Atua “ia aumaia le tino ola pea ma le ola faavavau o le tagata.”³

I le avea ai ma ni “afafine i [le] malo [o le Alii],”⁴ ua tatou osia ni feagaiga paia. Ua tatou savavali i le mea ua ta’ua e Nifae o le “ala lauitiiti ma le vaapiapi e tau atu i le ola e faavavau.”⁵ E eseese uma nofoaga o tatou i ai i le ala. Ae e mafai ona tatou galulue faatasi e fesoasoani le tasi i le isi ia “fetaomi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma.”⁶

O Jeanne o loo galue o se faufautua a Tamaitai Talavou. Na ia iloa i le tele o masina ua tea e uiga i se gaoioiga o loma mo le autalavou i le uarota: savalisopo i se nofoaga e ta’ua o le Tumutumu o Malan. Sa fiafia o ia aua talu ai nei lava sa ia seti ai se sini e faia lena a’ega.

Ina ua ia taunuu i le amataga o le alasopo, sa alu atu lana uo lelei

o Ashley ia te ia. Sa la uulima ma Jeanne, ma ofo atu la te fe’a’ei faatasi ma sa ia fai atu, “Ta te o faatasi.” O Ashley, lea ua 16 ona tausaga i lena taimi, na i ai ni faaletonu faaletino na faigata ai ona vave lana a’e. Ma o lea sa la savavali lemu ai ma Jeanne, ma maimoaina ia foafoaga a le Tama Faalelagi: o papa i luga o tumutumu mauga i luga ae o i laua ma fugalaau o siomia ai laua. Na fai mai Jeanne mulimuli ane, “E lei umi se taimi ae galo ia te au lau sini o le savalisopo atu i le tumutumu, aua o lea ua avea ma se isi ituaiga malaga—o se malaga ua faaali mai ai le matagofie o mea i le aluga o le ala, semanu ou te misia nei vaega e tele pe ana faapea nao lo’u savalisopo lava ia taunuu i le Tumutumu o Malan.”

Ao faaauau pea le fe’a’ega a Jeanne ma Ashley, ua mamao lava i tua mai le vaega atoa, sa faatasi atu i ai ma Ema, o se isi tamaitai talavou i le uarota, lea sa filifili e faatalitali latou te savavali faatasi. Sa faaopopo atu Ema i lo la fiafia. Sa ia aoao atu ia i laua se pese ma tuuina atu se lagolago ma le faamalosiuga faaopopo. Na manatua e Jeanne: “Sa matou saofafai i lalo ma malolo, matou pepese, matou talanoa, ma sa matou talie. Sa mafai ona ou faamasani ia Ashley ma Ema i se auala semanu e le mafai ona ou faia i se isi tulaga. Sa lei faatatau i le mauga i lena po—ae sa faatatau i se mea na sili atu. Sa faatatau i le fesoasoani o le tasi i le isi i luga o le ala, i lea laa ma lea laa.”

Ao fe’a’ei ia Jeanne, Ashley, ma Ema ma usu pese ma malolo ma talie faatasi, atonu latou te lei mafafauina, “Ei, o loo tatou tausia a tatou feagaiga i le taimi nei.” Ae sa latou tausia a latou feagaiga. Sa auauna atu le tasi i le isi i le alofa, agaalofa, ma le tautinoga. Sa latou fefaamalosiua i le faatuatua o le tasi ma le isi ao latou uunaia, ma feuaunaai le tasi i le isi.

Na aoao mai Elder Russell M. Nelson: “Pe a tatou iloa o i tatou o fanau o le feagaiga, ua tatou iloa ai pe o ai i tatou ma mea ua faamoemoeina e le Atua mai ia i tatou. Ua tusia Lana tulafono i o tatou loto.”⁷

O Maria Kuzina o se afafine o le feagaiga a le Atua ma e na te iloa lena mea ma iloa foi le mea o faamoemoe mai le Atua ia te ia. Ina ua ia faafeiloaia au i totonu o lona fale i Omsk, Rusia, sa ou faapea sa ou i ai iina e auauna atu ia te ia, ae e lei umi ae ou iloa ai sa ou i ai iina e aoao mai ia te ia. O Maria o se tagata liliu mai i le Ekalesia, ma o loo ola i le aoaoga o loo maua i le Luka 22: “Pe a e liua mai, ona e faamalosi ai lea i ou uso.”⁸ E faatuatua o ia i upu a lo tatou perofeta soifua, o Peresitene Thomas S. Monson, lea na saunoa mai:

“O le taimi lenei mo tagata o le ekalesia ma faifeautalai e o mai faatasi ai, e galulue faatasi, e galueaiina le tovine a le Alii ma aumai agaga ia te Ia. . . .

. . . A tatou galulue i le faatuatua o le a faaali mai e le Alii ia i tatou le ala e faamalosi ai Lana Ekalesia i uarota ma paranesi o tatou nonofo ai. O le a i ai o Ia ma i tatou ma o le a avea ma se soa mataalia ia tatou galuega faafaifeautalai.

. . . Faaoga lo outou faatuatua . . . ao e mafaufau ma le agaga tatalo po o ai o lou aiga, o au uo, ou tuaoi, ma e tou te masani e te fia valaauliaina i lou fale e feiloai ma faifeautalai, ina ia latou faalogo i le savali o le Toefuataiga.”⁹

E mulimuli Maria i lenei fautuaga e ala i le leoleo ma auauna atu i uso ua tofia o ia e faiaoga asiasi ai ma faia ia sili atu nai lo le na o le faiaoga asiasi. E tele ana uo e le toaaga mai pe e lei faalogo i le savali o le talalelei toefuataiina a Iesu Keriso. Na te faaao-gaina lona faatuatua i aso taitasi ma

tatalo ai ia iloa po o ai o manaomia lana fesoasoani, ona ia galue lea i le musumusuga na ia maua. Na te faia ni valaau i le telefoni, faaalua lona alofa, ma tau atu i ana uo, “Matou te manaomia oe.” Na te faia afiafi faaleaiga i lona fale mautotogi i vaiaso taitasi ma valaaulia ai tuaoi, tagata o le ekalesia, ma faifeautalai e o mai—ma e na te fafagaina i latou. Na te valaauliaina i latou e o mai i le lotu, faatalitali mo lo latou taunuu atu, ma saofafai faatasi ma i latou pe a taunuu.

E malamalama Maria i le faamatu talu ai nei a Elder Jeffrey R. Holland faapea “e fanau mai se valaaulia i lo tatou alofa mo isi ma mo le Alii o Iesu Keriso . . . o le a le vaailava o se osofaiga pe faamasinoina.”¹⁰ Na te teuina se lisi o tagata o e fai mai na faamaasia i latou, e faaauau pea ona ia auu atu ia i latou. Talu ai latou te iloa e alofa o ia ia i latou, e mafai ona ia fai atu ia i latou, “Aua e te tigagofie. E valea lena mea!”

O Maria o se soo tausi feagaiga a Iesu Keriso. E ui e leai se tagata o umia le perisitua i lona aiga, ae na te lagona le mana o le Atua i aso taitasi i lona faataunuuina o ana feagaiga o le malumalu ao ia fetaomi atu i luga i le ala, tumau ai e oo i le iuga ma fesoasoani i isi e auai i le galuega o le faaolataga i le aluga o le ala.

Ao ou faasoaina atu ia te outou nei aafiaga, na outou vaai atu ia te outou i le galuega o le faaolataga? Faaalu sina taimi e mafaufau ai i se isi afafine o le Atua o loo manaomia se faamalosiaga e toe foi ai i le ala o le feagaiga pe o manaomia sina fesoasoani e tumau ai i le ala. Ole atu i le Tama oi le Lagi e uiga ia te ia. O ia o Lona afafine. Na te silafia o ia i lona igoa. Na te silafia foi oe, ma o le a Ia tau atu ia te oe mea o loo ia manaomia. Ia onosai ma faaauau pea ona faatuatua ma tatalo mo ia, ma galue i



musumusuga e te mauaina. A e faatinoina nei uunaiga, o le a faamautu atu e le Agaga le taliaina e le Alii o lau taulaga.

“Sa faailoa ai ma le agaga faafetai e Sister Eliza R. Snow. . . taumafaiga a tamaitai e faamalosi e le tasi le isi. Sa ia tau atu ia i latou e ui lava sa lei tausia e le Ekalesia se faamaumauga o foai uma sa latou faia e fesoasoani ai ia i latou o e le tagolima, ae sa tausia lava e le Alii se faamaumauga sa’o atoatoa o a latou galuega laveai:

“ . . . Sa saunua Peresitene Iosefa Samita o lenei sosaiete sa faatulagaina e laveai ai agaga. O le a le mea ua [tatou] faia "e toe aumaia ai i latou ua se? E faamafanafana ai loto o i latou ua maluluina i le talalelei? O loo tausia se tasi tasi o lo outou faatuatua, o lo outou agalelei, o a outou galuega lelei, ma upu. O loo tausia se isi tasi. E leai lava se mea o leiloa.”¹¹

I le Tusi a Mamona, o loo talanoa ai Amona i le mafuaaga sili e tatau ai ona tatou olioli. Fai mai o ia: “Ma o lenei, ou te fesili atu, o a faamanuiaga silisili ua. . . tuuina mai [le Atua] ia te i tatou? E mafai ona outou ta’u mai?”

I lona fiafia, e lei faatali Amona mo se tali. Fai mai o ia, “Faauta, ou te tali atu mo outou; . . . O le faamanuiaga lenei ua faaee mai i o tatou luga, lea ua avea ai i tatou o ni mea faigaluega i aao o le Atua e faataunuu ai lenei galuega tele.”¹²

O i tatou o afafine o le feagaiga i le malo o le Alii, ma ua tatou maua le avanoa e avea ai ma ni meafaigaluega i Ona aao. A o tatou auai i le galuega o le faaolataga i aso taitasi i auala itiiti ma faigofie—tausia, faamalosi, ma aao atu le tasi i le isi—o le a tatou auai faatasi ma Amona, o le na tautino mai:

“Ae faauta, ua atoatoa lou olioli, ioe, ua tumu lou loto i le olioli, ma o le a ou olioli i lou Atua.

“Toe, ua ou iloa o au o se meanoa; a faatatau i lou malosi ua ou vaivai, o lea ou te le mitamita ai ia te au lava ia, ae ou te mitamita i lou Atua, ona o lona malosi e mafai ai ona ou faia o mea uma.”¹³

Ou te molimau atu ai i le suafa o Iesu Keriso, amene. ■

FAAMATALAGA

1. Mosaea 18:8–10.
2. Mataupu Faavae ma Feagaiga 20:77.
3. Mose 1:39.
4. Mataupu Faavae ma Feagaiga 25:1.
5. 2 Nifae 31:18.
6. 2 Nifae 31:20.
7. Russell M. Nelson, “Feagaiga,” *Liahona*, Nov. 2011, 88.
8. Luka 22:32.
9. Thomas S. Monson, “Faatuatua i le Galuega o le Faaolataga” (faasalalauga o le aooaga mo taitai i le lalolagi atoa ia Iuni 2013), [lds.org/broadcasts](https://www.lds.org/broadcasts).
10. Jeffrey R. Holland, “O La Tatou Tiutetauave le Valaaulia” (faasalalauga o le aooaga mo taitai i le lalolagi atoa ia Iuni 2013), [lds.org/broadcasts](https://www.lds.org/broadcasts).
11. *O Afafine i Lou Malo: O Le Talafaasolopito ma le Galuega a le Aualofa* (2011), 91.
12. Alema 26:2–3.
13. Alema 26:11–12.



Saunia e Linda S. Reeves
Fesoasoani Lua i le Au Peresitene Aoao o le Aualofa

Avatu Faamanuiaga o a Outou Feagaiga

A tatou faafouina ma faamamaluina a tatou feagaiga, e mafai ona faamamaina a tatou avega, ma e mafai ona faaauau pea ona faamamaina ma faamalosi i tatou.

Uso e, e ese le matagofie o le toe faatasi ma outou.

Talu ai nei sa ou feiloai ai i se tamaitai sa sauni e papatiso. O lea Aso Sa faapitoa sa ia taunuu ai i le lotu mai le savalia o le lua maila (3 km) i le mafiafia o le palapala. Sa ia alu atu i le faleletaua i le taimi lava lena, sa aveese ona lavalava palapala, faamālū, ma fai ona laei mama o le Aso Sa. I le sauniga a le Aualofa sa ia faamatalaina ai lona liuaina. Sa ou ootia i lona naunau ma le faagaetia ia faamama ma faapaia e ala i le salamo ma le taulaga togiola a le Faaola ma lona naunau e lafoai ese lona “olaga tuai” ina ia osia ai feagaiga paia ma lo tatou Tama Faalelagi. Sa ia nofoese mai i lana uo tama, sa faatoilaloina ia vaisu ina ia ola ai i le Upu o le Poto, sa faamavae i lana galuega i Aso Sa, ma le toe mauaina le faauooga ma e pele ina ua folafola i ai lana fuafuaga o le a papatiso. Sa ia naunau tele e salamo i ana agasala, ina ia faamamaina o ia ma lagonaina le alofa togiola o le Faaola. Sa musuia au i lena taeao e lona manao ia mama uma i la le tino ma la le agaga.

Matou te iloa o le toatele o outou sa faia ni osigataulaga faapena ina

ua outou lagonaina le molimau a le Agaga Paia ma naunau ia salamo, ia papatisoina, ma ia mama. Atonu o le a leai lava se isi taimi tatou te lagonaina ai le faateleina o le alofa paia o le Faaola e pei ona tatou mauaina pe a tatou salamo ma lagonaina ia aafiaga o lona alofa mo i tatou ma faamautinoia mai ia i tatou Lona alofa ma Lana taliaina o i tatou.

I nai Aso Sa ua tuanai atu a o ou faalogo atu i le tatalo o le faamanatuga, sa ou ootia lava i le ala na faaleoina ai e le ositaulaga upu taitasi i se lagona



maoae. Mulimuli ane, sa ou valaau atu i lena ositaulaga e faafetai i ai mo lana fesoasoani i le faia o le faamanatuga o se aafiaga loloto faaleagaga mo au ma le faapotopotoga. Sa le i i ai o ia i le fale, ae sa tali mai lona tina, “Oi, o le a fiafia tele o ia i lou valaau mai! O lona taimi muamua lea na faia ai le tatalo o le faamanatuga, ma sa matou saunia faatasi, i le talanoaina o le taua o le faamanatuga ma le faafouina ma le agavaa o a tatou feagaiga o le papatisoga ma le Faaola.” E maeu lou alofa i lenei tina pele mo le aoaoina o lona atalii e uiga i le mana o feagaiga o le papatisoga ma le auala e mafai ai ona ia fesoasoani i tagata o le uarota ia lagonaina lena mana.

O se isi tina ou te iloa sa nofo na o ia i le lotu mo le tele o tausaga ma lana fanauiti e toafa. Talu ai sa seasea ona mafai ona taulai atu i le Faaola i le taimi o le faamanatuga, sa ia faia ai se fuafuaga. I le taimi nei e taumafai o ia e faaaluina Aso Toonai taitasi e iloilo ai lona vaiaso ma mafaufau e uiga i ana feagaiga ma mea e moomia ona ia salamo mai ai. “Ia,” na ia fai mai ai, “e tusa lava po o a ituaiga o aafiaga ou te oo i ai ma lau fanau i Aso Sa, ua ou saunia lava e ai ma inu i le faamanatuga, faafou au feagaiga, ma lagonaina le mana faamama o le Togiola.”

Uso pele, aisea ua tuu ai e le Faaola le faataua tele i le faamanatuga? O le a le taua o lenei faafouina faalevaiaso o a tatou feagaiga o le papatisoga i o tatou olaga? Ua tatou iloina ea le gafatia o le Faaola e faamamaina atoa i tatou i vaiaso uma a o tatou fetagofi atu ma le agavaa ma le mafaufau atoa i le faamanatuga? Sa molimau mai Peresitene Boyd K. Packer, “O le faamoemoga lena o le talalelei a Iesu Keriso ma le Togiola: . . . i le faaiuga o lo [tatou olaga, o le a mafai ona tatou] o atu i le veli ua salamo i a [tatou] agasala ma ua faamamaina e ala i le toto o Keriso.”¹



E lagonaina e lo matou au peresitene le olioli maoae a o osia ma tausia e o tatou uso ma o latou aiga ia feagaiga, ae e lagona lo matou faanoanoa mo outou na o e o feagai ma le tele o faigata i o outou olaga ona o feagaiga ua solia e e pele ia te outou. O le perofeta o Iakopo, le uso o Nifae, sa poloaiina e le Alii e talanoa atu i ona uso e faatatau i tamaitai ma fanau amiontonu o ona aso. Ou te molimau atu o ana upu sa faapolopoloina faapitoa mo o tatou aso. Ua ia saunoa mai ia i tatou e pei o fetalai mai le Faola lava Ia. O Iakopo sa “sili atu ona mamafa ma . . . popole” a o ia molimau atu i tane ma tamā:

“Ma ou te faanoanoa foi i le tatau ai ona ou faaoga o le tautala tuusa’o . . . i luma o a outou ava ma a outou fanau, o le toatele o o latou lagona ua agavai-vai lava ma mama ma maaleale. . .

“ . . . Ma ua alu a’e masusu o o latou loto i le Atua. . . . Ua tele fatu [ua] pepe, ua tuia i manu’a loloto.”²

Mo tamaitai ma fanau tausii feagaiga o e sa soifua i ona aso ma e o soifua i le aso, ua folafola mai e Iakopo:

“Ia outou tepa taulai atu i le Atua ma le mausali o le mafaufau, ma tatalo atu ia te ia ma le faatuatua tele, ma o le a ia faamafanafanaina outou i o outou puapuaga. . . .

“ . . . Ia ea ia o outou ulu ma tali le afioga malie a le Atua, ma taumamafa fiafia i lona alofa.”³

Ou te molimau atu i le malosi ma le mana o le tatalo a o faailoa atu i ai o tatou tiga matuitui ma manaoga i lo tatou Tama Faalelagi, ma tali ua tatou mauaina a o tatou “taumamafa” i tusitusiga paia ma upu a perofeta soifua.

Toetiiti lava tolu tausaga talu ai sa faaleagaina ai e se afi matautia totonu o le tapeneko pele ma logologoa i Provo, Iuta. O lona faatamaiaina ua manatu i ai o se mala tele lea i le nuu ma tagata o le Ekalesia. Sa manatu le toatele, “Aisea na faatagaina ai e le Alii lenei mea e tupu? E mautinoa lava e mafai ona Ia taofia le afi pe taofia lona faatafunaga.”

Sefulu masina mulimuli ane, a o faia le konafesi aoao ia Oketopa 2011, sa lagonaina se leo o le maofa ina ua faasilasila mai e Peresitene Thomas S. Monson e faapea o le tapeneko sa toetoe a faaleagaina atoa o le a avea ma se malumalu paia—o se maota o le Alii! Sa faafuasei lava ona mafai ona tatou vaaia le mea ua leva ona silafia e le Alii! Na te le i faatupuina le afi, ae sa Ia faatagaina le afi e faaleagaina totonu o le fale. Sa ia silasila i le tapeneko o se malumalu ofoofogia—o se maota tumau mo le osia o feagaiga paia ma faavavau.⁴

Ou uso pele, e faatagaina e le Alii i tatou ia tofotofoina ma faaosoosoina, o nisi taimi e oo lava i le mea e gata ai lo tatou malosi. Ua tatou vaaia olaga o e pele—ma atonu o a tatou foi—ua susunuina moni i le eleele ma fesili ai pe aisea e faatagaina ai e se Tama Faalelagi alofa ma le agalelei ia mea ia tutupu. Ae Na te le tuua i tatou e aunoa ma le fesoasoani; e tu o Ia ma Ona aao mafola, ma naunau e valaaulia i tatou e o mai ia te Ia. Ua Ia fausiaina o tatou olaga i ni malumalu matagofie ina ia mafai e Lona Agaga ona mafuta ai e faavavau.

I le Mataupu Faavae ma Feagaiga 58:3–4, ua fetalai mai le Alii ia i tatou:

“E le mafai ona outou vaaia i o outou mata faalenatura, i le taimi nei, le fuafuaga a lo outou Atua e faatatau i mea o le a oo mai pe a mavae le taimi nei, ma le mamalu e mulimuli mai pe a mavae puapuaga e tele.

“Aua a mavae puapuaga e tele ona oo mai lea o faamanuiaga. O le mea lea e oo mai le aso o le a faapaleina ai outou i le mamalu tele.”

Uso e, ou te molimau atu e i ai se fuafuaga a le Alii mo o tatou olaga taitoatasi. E leai se mea e tupu fua pe tupu faafuasei ia te Ia. O Ia e silafia mea uma ma tumu i le alofa. E naunau o Ia e fesoasoani ia i tatou, e



faamafanafana i tatou, ma faamama o tatou tiga pe a tatou faalagolago atu i le mana o le Togiola ma faamamaluina a tatou feagaiga. O tofotofoga ma faigata ua tatou oo i ai atonu o mea tonu ia e taiala ai i tatou e o atu ia te Ia ma pipiimau i a tatou feagaiga ina ia mafai ona tatou toe foi atu i Lona afioaga ma mauaina mea uma ua i ai i le Tama.

O lenei tausaga ua tea, sa ou manaomia ma moomia le lagonaina atili le loloto o le alofa o le Alii, ia maua faaaliga patino, ia malamalama atili i au feagaiga o le malumalu, ma ia faamāmāina au avega. A o ou tatalo faapitoa mo nei faamanuiaga, sa ou lagonaina le taitaiina o au e le Agaga e alu i le malumalu ma faalogo ma le totoia i upu taitasi o faamanuiaga ua folafolaina mo au. Ou te molimau atu a o ou faalogo lelei atu ma le naunautai ma taumafai e faatino lou faatuatua, sa alofa mutimutivale le Alii ia te au ma sa fesoasoani e faamamaina au avega. Sa ia fesoasoani ia ou lagonaina le filemu maoae e uiga i tatalo sa le i taliina lava. Tatou te noatia le Alii ia tausia Ana folafolaga pe a tatou tausia

a tatou feagaiga ma faatino lo tatou faatuatua.⁵ O mai i le malumalu, uso pele, ma avatu o outou faamanuiaga!

Ou te mana'o e talanoa atu i se isi auala e mafai ai ona tuuina mai ia i tatou le mautinoa ma le faatuatua. O nisi taimi, i le avea ai ma tamaitai, ua i ai se tatou masani o le faitio ia i tatou lava. A oo i nei taimi e manaomia ona tatou saili atu i le Agaga ma ole atu, "Mata o le mea lea o finagalo le Alii ou te mafaufau ai ia te au lava, pe mata o taumafai Satani e faavaivai au?" Manatua o le natura o lo tatou Tama Faalelagi, o lona alofa ua atoatoa ma e le iu.⁶ E finagalo o Ia e faamalosia i tatou i luga, e le o le faavaivaia o i tatou.

I le avea ai ma tagata o le Ekalesia, atonu tatou te lagonaina i nisi taimi lo tatou manaomia e avea ma se vaega o se "aiga atoatoa o le AAG" ina ia mafai ai ona taliaina e le Alii. E tele lava ina tatou lagonaina le "le agavaa" po o le le fetau'i mo le malo pe afai ua tatou lagonaina lo tatou le talafeagai ma lena aiga atoatoa. Uso pele, pe a faataunuaina mea uma, o le mea o le

a taua i lo tatou Tama o i le Lagi, o le auala na tatou tausia lelei ai a tatou feagaiga ma le tele o a tatou taumafai na faia e mulimuli ai i le faataitaiiga a lo tatou Faaola, o Iesu Keriso.

Ou te molimau atu o Iesu Keriso o lo tatou Faaola ma le Togiola. Ona o Lana taulaga togiola, ua mafai ai ona faamamaina i tatou i vaiaso taitasi pe a tatou fetagofi atu ma le agavaa i Lana faamanatuga. A tatou faafouina ma faamamaluina a tatou feagaiga, e mafai ona faamamaina a tatou avega, ma e mafai ona faaauau pea ona faamamaina ma faamalosia i tatou ina ia oo atu i le iuga o o tatou olaga o le a faitaulia lo tatou agavaa e maua le faaeaga ma le ola e faavavau. Ou te molimau atu ai i nei mea i le suafa o lo tatou Faaola pele, o Iesu Keriso, amene. ■

FAAMATALAGA

1. Boyd K. Packer, "O Le Togiola," *Liahona*, Nov. 2012, 77.
2. Iakopo 2:3, 7, 35.
3. Iakopo 3:1-2.
4. Tagai Mosaea 23:21-22.
5. Tagai Mataupu Faavae ma Feagaiga 82:10.
6. Tagai Russell M. Nelson, "Alofa Faalelagi," *Liahona*, Fep. 2003, 12-17.



Saunia e Peresitene Thomas S. Monson

E Le Tuua Lava Na o i Tatou

O le a i ai se aso tou te mafaufau ai i o outou olaga ma toe tepa i o outou taimi faigata, ma o le a outou iloa ai na i ai lava o Ia iina e le aunoa i ou autafa.

O u tuafafine pele, o le agaga ua tatou lagonaina i lenei afaifi o se faailoga lea o lo outou malosiaga, lo outou tuuto ma lo outou lelei. E sii mai le fetalaiga a le Matai: “O outou o le masima o le lalolagi. . . O outou o le malamalama o le lalolagi.”¹

A o ou mafaufau loloto i lou avanoa e lauga atu ai ia te outou, sa faamanatu mai ia te au le alofa o lou toalua pele, o Frances sa i ai mo le Aualofa. I lona olaga sa ia auauna atu ai i le tele o tofiga i le Aualofa. A o tau fai 31 uma o ma tausaga, na valaauina au e avea ma peresitene o le Misiona a Kanata. I le taimi o le tolu tausaga o lena tofiga, na pulefaamalumu ai Frances i Aualofa uma i lena eria atoa, lea sa aofia ai itumalo o Ontario ma Quebec. O nisi o ana faigauo mafana na tupu mai ona o se taunuuga o lena tofiga, faapea ai foi ma le tele o valaauaga na mulimuli ane ia faatumuina i le Aualofa a le matou lava uarota. Sa avea o ia ma se afafine faamaoni o lo tatou Tama Faalelagi, o la’u soa faapelepele, ma o la’u uo mamae lava. Ua ou misia lava o ia e sili atu i lo upu e mafai ona faamatalaina.

Ou te alofa foi i le Aualofa. Ou te molimau atu ia te outou sa faatulagina e ala i musumusuga ma o se vaega taua o le Ekalesia a le Alii iinei i le lalolagi. O le a le faigofie ona fuatiaina mea lelei uma ia e sau mai lenei faalapotopotoga atoa ai ma olaga uma ua faamanuiaina ona o le Aualofa.

Ua aofia i le Aualofa ia tamaitai eseese. O loo i ai nisi o outou o e nofofua—masalo o loo aoga, masalo o loo faigaluega—o loo atiaaina se olaga lelei ma faamalieina. O nisi o outou o ni tina pisi tele i le faafaileleina o fanau. Ma isi o outou ua le o toe i ai ni tane ona ua tatala faaipopipoga pe ua maliliu foi ma o loo tauivi e tausi a outou fanau e aunoa ma se fesoasoani a se tane ma se tamā. O nisi o outou ua tausaiaina a outou fanau ae ua iloaina o le manaoga mo la outou fesoasoani e faaauau pea. E toatele outou o loo i ai ni matua matutua o loo manaomiaina le tausiga agaalofa lea e na o outou e mafai ona tuuina atu.

Po o fea lava o tatou i ai i le olaga, e i ai taimi e tofu ai i tatou uma ma ni luitau ma ni faigata. E ui e eseese mo tagata taitoatasi, ae e tupu i tagata uma.

O le tele o luitau o loo tatou fetaiiai e mafua ona o loo tatou ola i lenei lalolagi faaletino, ua faatumulia i le tele o ituaiga eseese o tagata. E i ai taimi tatou te tuufesili ai ona o le atu-atuvale, “E mafai faapefea ona faatumau lo’u taulai atu ma le mausali i se lalolagi selesitila a o o’u nofo ai i lenei lalolagi telesitila?”

O le a i ai taimi o le a e uia ai ala tiga o tofotofoga ma faigata. Atonu o le a i ai taimi o le a e lagonaina ai lou le pipii atu—pe ua mamao ese—mai Lē Foai mai ia meaalofo lelei uma. E te popole e faapea ua tuua na o oe. Ua suitulaga ai e le fefe le faatuatua.

A e iloaina ua e oo i ia tulaga, ou te aioi atu ia te oe ia e manatua e tatalo. Ou te fiafia i upu a Peresitene Ezra Taft Benson e faatatau i le tatalo. Na ia saunoa:

“I lo’u olaga atoa lava ua avea ai le fautuaga ia faalagolago i le tatalo ua faasilisili lea i lo isi fautuaga uma lava ua ou . . . mauaina. Ua avea ma se vaega taua mo au—o se taula, o se punavai ola e le aunoa o le malosi, ma le faavae o lo’u malamalama i mea paia. . . .


“. . . E ui lava e oo mai ni mea faafeagai, ae e mafai ona tatou maua i le tatalo le faamautinoaga, aua o le a fetalai mai e le Atua le filemu i le loto. O lena filemu, o le agaga o le toafimalie, o le faamanuiaga aupito sili lea o le olaga.”²

Sa apoapoi mai le Aposetolo o Paulo:

“Ia faailoa atu o outou manao i mea uma lava i le Atua.

“O le manuia foi mai le Atua, o loo silisili lava i mea uma e manatu i ai, e leoleoina ai o outou loto atoa ma o outou mafaufau ia Keriso Iesu.”³

O se folafolaga mamalu lena! O le filemu lena lea tatou te sailia, lea e matuai o tatou manaomia lava.



E lei tuu maia i tatou i lenei lalolagi ia savavali na o i tatou. O se puna ofoofogia o le mana, o le malosi, ma le mafanafana o loo avanoa mo i tatou taitoatasi. O Ia o le ua sili atu lona silafiaina o i tatou nai lo i tatou lava, o Ia o le ua silasila i se ata tele atu, ma o le ua silafiaina le taunuuga mai le amataga ua faamautinoa mai ia i tatou o le a i ai pea o ia iina mo i tatou e tuuina mai le fesoasoani pe afai tatou te ole atu. Ua tatou maua le folafolaga: “Tatalo e le aunoa, ma ia talitonu, ma o le a galulue faatasi mea uma mo lo outou lelei.”⁴

A o tuuina atu a tatou tatalo i le lagi, ia aua nei galo ia i tatou ia upu na aoao mai e le Faaola ia i tatou. Ina ua Ia fetaiai ma tiga matuitui o Ketese-manē ma le satauro, sa Ia tatalo atu i Lona Tama, “A e aua nei faia lo’u loto a o lou finagalo.”⁵ Atonu e i ai taimi e faigata ai, ae o lo tatou tiute foi le faatuatuaaina o lo tatou Tama Faalelagi ua Ia silafia le auala sili ma le taimi faapea ai ma le ituaiga o fesoasoani e tuu mai lea tatou te sailia.

Ou te faamemelo i upu a se fatusolo:

*Ou te le iloa po o a ni auala,
Ae ou te iloa e tali mai le Atua i
talosaga.*

*Ou te iloa ua Ia tautino mai,
Ua ou iloa ai o taimi uma e
faafofoga mai,*

*Ma o le a tali mai, vave pe tuai.
O lea ou te tatalo ma faatalitali
filemu ai.*

*Ou te leiloa i le faamanuiaga ou te
saili i ai*

*Pe oo mai i auala tonu ou te
mafaufau ai;*

*Ae tuu atu a’u tatalo ia te Ia lava,
O Lona finagalo e potu atu i lo o’u ala,
E mautinoa lava o le a Ia tali mai i au
talosaga,*

*Pe tali mai i nisi auala sili atu o
faamanuiaga.*⁶

Ioe, o le tatalo e le mo na o taimi o faafitauli. Ua tau soo mai ia i tatou i tusitusiga paia ia “tatalo e le aunoa”⁷ ma ia tatalo pea i o tatou loto.⁸ O upu o se viiga masani ou te fiafia i ai o loo tuu mai ai se fesili lea e sili ona tatou fesiligia ai i tatou lava i aso uma: “Pe na faia sau tatalo?”⁹

E faaopoopo atu i le tatalo e fesoasoani ai ia i tatou i le taulimaina o lo tatou lalolagi ua faigata i le tele o taimi, o le suesueina lea o tusitusiga paia. O upumoni ma musumusuga o loo maua i a tatou tusi faavae e fa o ni meatotino taugata ia ia te au. Ou te le fiu e faitau i ai. E siitia au faaleagaga i soo se taimi lava ou te sailiili ai i tusitusiga paia. O nei upumoni paia ma le alofa e tuu mai ai le taitaiga i lou olaga ma faasino ai le ala e tau atu i le atoatoa e faavavau.

A o tatou faitau ma mafaufau loloto i tusitusiga paia, o le a tatou lagonaina ia musumusuga mālū o le Agaga i o tatou agaga. E mafai ona tatou maua ai ni tali i a tatou fesili. Tatou te iloa ai faamanuiaga e oo mai e ala i le tausaiaina o poloaiga a le Atua. Tatou te maua ai se molimau maumaututu e uiga i lo tatou Tama Faalelagi ma lo tatou Faaola, o Iesu Keriso, faapea ai ma lo La alolofa mo i tatou. Pe a tuufaatasia ia suesuega i tusitusiga paia ma a tatou tatalo, o le a mafai ai ona tatou iloa ma le mautinoa e moni le talalelei a Iesu Keriso.

Sa saunoa mai Peresitene Gordon B. Hinckley, “Tau ina ia faamanuiaina i tatou taitoatasi e le Alii ia taumamafa i ana [afioga] paia ma ia utuvai mai ai [i na afioga] lena malosi,

lena filemu, [ma] lena malamalama lea ‘o loo silisili lava i mea uma e manatu i ai’ (Filipi. 4:7).”¹⁰

A tatou manatuaina le tatalo ma faaalu se taimi e faitau ai tusitusiga paia, o le a matua faamanuiaina atili o tatou olaga ma o le a faamāmāina a tatou avega.

E mafai ona ou faasoa atu ia te outou se tala i le auala na tali atu ai lo tatou Tama Faalelagi i tatalo ma aioiga a se tasi o tamaitai, ma tuu atu ia te ia le filemu ma le faamautinoaga sa ia matua saili malosi i ai?

Sa amata ona oo faigata ia Tiffany i le tausaga ua tea a o ia talimalo i lona fale mo le Aso Faafetai ma le Kerisimasi. Sa a’oga lona toaluia i le a’oga faafomai ma ua i ai nei i le lua tausaga o lana a’oga faafomai. Ona e manaomia ona faigaluega o ia mo le tele o itula, o lea sa le mafai ai ona ia fesoasoani i lona toaluia i le tele e mafai ai i tulaga uma la te tau fai fiafia ai, ma o lea la, o le tele o mea sa manaomia ona faatuuuina i lea vaiata o aso fiafia, e faaopoopo i ai ma le tausiga o le la fanau laiti e toafa, sa palasi uma ia Tiffany. Sa faasolo ina lofituina o ia, ona oo lea ina ia iloina o se tasi sa matua pele ia te ia ua aafia i le kanesa. O le atuatuvaale ma le popole sa amata ona avea ma avega mamafatu ia te ia, ma ia oo atu ai i se vaiata o le lotovaivai ma le faanoanoa. Sa ia saili atu i se fesoasoani faafomai, ae sa leai se suiga. Sa mou atu foi lona fia tausami, ma sa amata ai ona pa’e’e, lea sa le lelei mo lona tino itiiti. Sa ia sailia le filemu i tusitusiga paia ma tatalo mo se laveaiga mai le faanoanoa ua lofituina ai o ia. Ina ua foliga mai ua leai se filemu po o se fesoasoani e oo atu, sa amata loa ona ia lagonaina le tuulafoaiina e le Atua. Sa tatalo lona aiga ma uo mo ia ma taumafai malosi e fesoasoani i ai. Sa latou auina atu ana meaai sa fiafia i ai i se taumafaiga ia faatumauina lona soifua maloloina

faaletino, ae sa na o sina tofo lava i ai ma lē mafai ai ona taumafa uma.

I se tasi aso sa patino le faigata, sa le faamanuiaina le taumafai a se uo e faatosina o ia i meaai sa masani ona fiafia i ai. Ina ua leai ma se mea e aoga, sa fai atu lea uo, “Masalo e i ai lava se *mea* e logo lelei ia te oe.”

Sa mafaufau Tiffany mo sina taimi ona fai mai lea, “E na o le pau le mea ou te mafaufau i ai e logo lelei o se falaoa e tao i le fale.”

Ae sa leai se falaoa na maua i lena taimi.

O le aoauli na sosoo ai sa tatagi ai le logo o le faitotoa a Tiffany. Sa i ai lona toalua i le fale ma sa ia alu atu i le faitotoa. Ina ua ia foi ane, sa ia tau-aaoina se papa falaoa na tao i le fale. Sa faateia Tiffany ina ua ia ta’u atu i ai sa aumai i se tamaitai e igoa ia Sherrie lea la te tau le iloaina. O ia o le uo a Nicole, le uso o Tiffany, e nofo o ia i Denver, Colorado. Sa faailoa puupuu atu Sherrie ia Tiffany ma lona toalua i ni nai masina na muamua atu ao nonofo ai Nicole ma lona aiga faatasi ma Tiffany i le Aso Faafetai. O Sherrie, sa nofo i Omaha, sa sau i le fale o Tiffany e asiasi mai ia Nicole.

A o lea la i ni masina mulimuli ane, faatasi ai ma le sasala o le manogi o le falaoa ua ia uuina, sa valaau atu ai Tiffany i lona uso o Nicole e faafetai i ai mo le auina atu o Sherrie i se feau o le alofa mutimutivale. Peitai, sa ia iloa ai e le i uunaia e Nicole lea asiasiga ma na te leiloaina foi.

Sa malamalama le tala atoa ina ua valaau atu Nicole i lana uo o Sherrie e fia iloa po o le a se mea na uunaia o ia e auina atu lena papa falaoa. O le mea sa ia iloaina o se musumusuga lea ia te ia, ia Tiffany, ia Sherrie—ma o se musumusuga foi ia te au.

I lena taeao patino lea na auina atu ai le falaoa, sa uunaia ai Sherrie e fai ni papa falaoa se lua nai lo le tasi sa ia

fuafua e fai. Fai mai a ia sa ia lagonaina se uunaiga e alu ma ave le falaoa lona lua i lana taavale i lena aso, e ui lava na te leiloa pe aisea. Ina ua maea se aiga o le aoauli i le fale o se uo, sa amata ona tagi lana tama teine e tasi le tausaga ma na manaomia ona ave i le fale e faamoe. Sa faatuai ia Sherrie ina ua oo atu le lagona le mafaaseseina e faapea e manaomia ona ia auina atu lena falaoa i le uso o Nicole, o Tiffany, lea e 30 minute le mamao i le isi itu o le taulaga ma o le na te tau le masani i ai. Sa ia taumafai ia le amanaiaina lea uunaiga, i le manao e ave lana pepe ua lelava i le fale ma e lagona foi le matamuli e ave se papa falaoa i tagata e le masani tele i ai. Peitai, sa malosi le uunaiga e alu i le fale o Tiffany, o lea sa ia usitai ai i le uunaiga.

Ina ua ia taunuu, sa tali mai e le toalua o Tiffany le faitotoa. Sa faamanatu atu i ai e Sherry ia te ia o ia o le uo a Nicole lea sa la feiloai i le Aso Faafetai, ma tuu atu ia te ia le papa falaoa, ma alu ese atu.

Ma o le mea lena sa tupu, na auina atu e le Alii se tagata e tau le masani ai mai le isi itu o le taulaga e auina atu e le gata o le papa falaoa na tao i le fale sa manaomia ae faapena foi se feau manino o le alofa ia Tiffany. O le mea sa tupu ia te ia e le mafai ona faamatalaina i se isi lava auala. Sa ia te ia se manaoga faanatinati ia lagonaina e le o tuua na o ia—o loo silafia e le Atua o ia ma e le o tuulafoaiina o ia. O lena falaoa—le mea tonu lea sa ia manao i ai—na auina atu ia te ia e se tasi na te tau leiloaina, o se tasi sa lei i ai ma sona iloa e uiga i lona manaoga, ae o se tasi na faalogo i le uunaiga a le Agaga ma mulimuli ai i lena uunaiga. Sa avea ma se faailoga manino ia Tiffany sa silafia ona manaoga e lona Tama Faalelagi ma lava Lona alofa ia te ia e auina atu ai le fesoasoani. Sa tali atu o Ia i ana tagi mo se toomaga.

Ou tuafafine pele, e alofa lo outou Tama Faalelagi ia te outou—outou taitoatasi. E le suia lava lena alofa. E



le faatosinaina e ou foliga vaaia, o au meatotino, po o le tele o tupe o loo i ai i lau teugatupe i le faletupe. E le sua e au taleni ma tomai. Ua i ai lava iina. Ua i ai iina mo outou pe a outou faanoanoa pe fiafia, lotovaivai po o le tumu i le faamoemoe. Ua i ai le alofa o le Atua iina mo outou e tusa lava pe ua outou lagona lo outou manaomia pe leai foi se alofa. O loo i ai lava iina i taimi uma.

A tatou saili atu i lo tatou Tama Faalelagi e ala i tatalo faatauana ma le faamaoni, ma le suesueina o tusitusiga paia ma le naunautai ma le tuuto sili, o le a malolosi ma mauaa loloto a tatou molimau. O le a tatou iloina le alofa o le Atua mo i tatou. O le a tatou malamalama e le tuua lava na o i tatou. Ou te folafola atu ia te outou o le a i ai se aso tou te mafaufau ai i o outou olaga ma toe tepa i o outou taimi faigata, ma o le a outou iloa ai na i ai lava o Ia iina e le aunoa i ou autafa. Ou te iloa le moni o lenei mea i le maliu ai o la'u soa e faavavau—o Frances Berverly Johnson Monson.

Ou te tuuina atu ia te outou au faamanuiaga. Ou te tuuina atu ia te outou lou lotofaafetai mo mea lelei uma ua outou faia ma mo olaga o outou ola ai. Ou te tatalo ia faamanuiaina outou i meaalofa lelei uma i le suafa o lo tatou Faaola ma le Togiola, le Alii o Iesu Keriso, amene. ■

FAAMATALAGA


1. Mataio 5:13–14.
2. Ezra Taft Benson, “Ia Tatalo Pea,” *Liahona*, Iuni 1990, 4–5, 6.
3. Filipi 4:6–7.
4. Mataupu Faavae ma Feagaiga 90:24.
5. Luka 22:42.
6. Eliza M. Hickok, “Prayer,” in James Gilchrist Lawson, ed., *The Best Loved Religious Poems* (1933), 160.
7. Luka 21:36; tagai foi 2 Nifae 32:9; 3 Nifae 18:15; Mataupu Faavae ma Feagaiga 10:5; 19:38; 20:33; 31:12; 61:39; 88:126; 93:49.
8. Tagai 3 Nifae 20:1.
9. “Pe Na Faia Sau Tatalo?” *Viiga*, nu. 75.
10. Gordon B. Hinckley, “Ia Fiafia i Tusitusiga Paia,” *Liahona*, Iuni 1986, 4.

Au Peresitene Aoao o Ausilali


AUALOFA



Carole M. Stephens
Fesoasoani Muamua



Linda K. Burton
Peresitene



Linda S. Reeves
Fesoasoani Lua

TAMAITAI TALAVOU



Carol F. McConkie
Fesoasoani Muamua




Bonnie L. Oscarson
Peresitene



Neill F. Marriott
Fesoasoani Lua


PERAIMERI



Jean A. Stevens
Fesoasoani Muamua



Rosemary M. Wixom
Peresitene



Cheryl A. Esplin
Fesoasoani Lua

ALII TALAVOU



Larry M. Gibson
Fesoasoani Muamua



David L. Beck
Peresitene



Randall L. Ridd
Fesoasoani Lua

AGO SA



David M. McConkie
Fesoasoani Muamua



Russell T. Ogusthorpe
Peresitene



Matthew O. Richardson
Fesoasoani Lua

Faasino Upu o Tala o le Konafesi

O le lisi lea o aafiaga na filifilia mai saunoaga o le konafesi aoao, e mafai ona faaaoga i suesuega a le tagata lava ia, afaifi faaleaiga, ma isi aoaoga. O loo lisi atu le au failauga i le faasologa faaalafapeta, ma o numera e faasino i le itulau muamua o le lauga.

FAILAUGA	TALA
Neil L. Andersen	(92) O se tina Pasila faamaoni, na faasaina e lona toalua ona auai i le ekalesia, o loo auina atu lana fanau i le lotu.
M. Russell Ballard	(43) Ua olioli se aiga i le tulaga manuia o le misiona ina ua uma ona manatu mamafa i le lu'i ia faanatinati le galuega o le faaolataga.
David A. Bednar	(17) Ua faamanuaina le aiga o Susan Bednar (a o tamaitai talavou) i le ola ai i le tulafono o le sefuluai.
Gérald Caussé	(49) Ua iloa e Gérald Caussé ma lona aiga le faigofie ona ola i se aai fou ona o le talileleia ma le mafanafana o i latou e le Au Paia o Aso e Gata Ai.
D. Todd Christofferson	(29) Ua auai Anna Daines i se vaega volenitia ma fesoasoani atu i lona nuu e faatoilalo le faailogalanu e faasaga i le Au Paia o Aso e Gata Ai.
Quentin L. Cook	(88) Ua filifili Quentin L. Cook ma isi loia i lona ofisa loia e fatu se siosiomaga o faauoga faaleaiga i le falefaigaluega.
Edward Dube	(15) Ua ta'u atu e le tina o le taulealea o Edward Dube ia te ia ia tepa i luma, ae le o tua, ao la galulue faatasi ai i se fanua.
Timothy J. Dyches	(37) Ua faamagalo e Carrie ten Boom se tagata na avea muamua ma fitafita Nazi lea sa avea ma se tasi o ona leoleo i se toluapiga faapagota.
Henry B. Eyring	(58) Ua faamanuaina le taulealea o Henry B. Eyring ao ia faafeaoina lona epikopo i asiasiga i tagata mafatia o le au paia. (69) Ua lotogatasi Mildred ma Henry Eyring i le la faaiuga e toe foi atu i luta, e latalata i le aiga [o Mildred].
Randy D. Funk	(52) Ina ua uma ona faalogo i le tala e uiga ia Iosefa Samita i se gagana e le mafai ona malamalama i ai, na talosaga atu ai se tagata sailiili i Initia mo le papafisoga.
Kevin S. Hamilton	(99) Ua amata ona tuua e se aiga le Ekalesia i se faaiuga e o i se tietiega i se Aso Sa nai lo le auai i le sauniga faamanatuga.
Jeffrey R. Holland	(40) Ua maua e se tuafafine le faamoemoega o se tina ina ua uma ona lavea i ni manuaaga matuia i se vaalele na pa'ū.
Richard J. Maynes	(79) Ua malie le tama o le tama matua o Richard J. Maynes i se mai fatu oso faafuasei ao auuina atu i se misiona.
Thomas S. Monson	(61) Ua faatumulia se faiaoga o aiga i le lotofaafetai ina ua auai se tasi na ia asia mo le tele o tausaga i le Ekalesia. (85) Ua tuu atu e Thomas S. Monson se faamanuiga faaleperisitua i se uso ua toaina lava ua le mafai ona toe vaai pe faalogo.
S. Gifford Nielsen	(33) Ua faalanu auro e se peresitene o se siteki ia seevae masaesae o se faifeautalai faamanuaina.
Adrián Ochoa	(102) Ua fiafia tagata o le aiga ina ua toe foi atu le taulealea o Adrián Ochoa ma tausoga e toalua i le aiga ina ua mavae ai se matagi malosi.
Bonnie L. Oscarson	(76) Ua musu ia Agnes Hoggan e faataga lana tama teine e 16 tausaga ona vaetamaina e se aiga e le auai i le Ekalesia.
Boyd K. Packer	(26) Ua fautuaina Boyd K. Packer ia uunaia tagata o se siteki o loo tauivi ina ia faitau ia tusitusiga paia.
L. Tom Perry	(46) Ao tamaitiiti, sa savavali sopo ai L. Tom Perry ma isi tamaiti o le Peraimeri i se tamai vanu e fiafia i ai faatasi ma lo latou faiaoga.
Linda S. Reeves	(118) O se tamaitai o loo agai i luma ia papafisoina na savali i le lua maila (3 km) i le palapala ina ia auai i le lotu.
Ulisses Soares	(9) O Moses Mahlangu ma isi tagata i Aferika i Saute o loo nonofo i fafo o se lotu ma faalogologo i sauniga e ala atu i se faamalama.
Carole M. Stephens	(12) Ua maua e tuafafine faamaoni i Honduras ia faamanuiga o le perisitua mai o latou taitai o le Ekalesia. (115) Ua tausua e se tamaitiiti e 10 tausaga le matua lana feagaiga ia faanoanoa faatasi ma isi ao ia faamafanafana atu i le tina o lona tina matua ua oti lana tane.
Dieter F. Uchtdorf	(21) O se alii na fai sana miti lea ua faamalalama atu i ai e se ulugalii o le Au Paia o Aso e Gata Ai ni avanoa mo auuunaga i le Ekalesia. (55) Ua pa'ū ia Dieter F. Uchtdorf ao faasee i le aisa ma ua faigata ona toe tu ae i luga seia oo ina fesoasoani i ai le atalii o lona atalii.
Arnulfo Valenzuela	(35) Ua toefoi mai se tuafafine le toaga i le lotu i le mae'a ai ona lagonaina o le Agaga Paia ao usuina se viiga faatasi ma ana faiaoga asiasi.
Terence M. Vinson	(104) Ua taliina le tatolo a se tagata faamaoni o le Ekalesia i Papua Niu Kini ina ua faafuasei ona maligi ifo uaga ma tape ai se afi na lamatia ai faatoaga a le nuu.



Na Faasilasila atu le Faatupulaia o le Faitau Aofai o Tagata ma Faifeautalai i le Konafesi Aoao

Ua ausia le 15 miliona o le faitau aofai o tagata o le Ekalesia, na faasilasila ai e Peresitene Thomas S. Monson i le sauniga na tata-laina ai le Konafesi Aoao Lona 183 Faaleafatausaga i le aso 5 Oketopa, 2013. Sa ia faasilasilaina ai foi e faapea talu lava ona tuu i lalo le tausaga mo auu-naga faafaifeautalai ia Oketopa 2012, ua matua televave lava le faatupulaia o faifeautalai faamisiona i le lalolagi atoa—mai le 58,500 i le 80,333.

“O loo faaauau pea ona tupu-tupu ae le Ekalesia ma le mausali ma ua suia ai olaga o tagata e toatele i tausaga uma,” sa saunoa ai Peresitene Monson. “Ua salalau atu i le salafa o le lalolagi a o saili e a tatou faifeautalai i latou o loo sailia le upumoni.”

Sa ia uunaia tagata o le ekalesia ma faifeautalai ia aufaatasi le tasi ma le isi i le faasoaina atu o le talalelei. “O le taimi leni mo tagata uma ma faifeautalai e o mai faatasi ai, ia galulue faatasi, ma galueaiina le tovine a le Alii ina ia aumai agaga ia te Ia,” sa saunoa ai Peresitene Monson, lea ua atoa nei le 50 tausaga talu ona auauna atu o se Aposetolo.

I le sauniga o le aoauli o le Aso Toonai, e toatolu ia uso o le Korama Muamua a Fitugafulu—Elder John B. Dickson, Paul E. Koelliker, ma

F. Michael Watson—na faamaloloina ai ma le mamalu ma aloaia o ni pulega aoao ua malolo ma le mamalu, faapea ai foi ma Elder Kent D. Watson o le Korama Lona Lua o Fitugafulu na faamaloloina foi ma le mamalu. E faaopoopo atu i ai, o Julio A. Angulo, 45, o Bogotá, Kolomupia; Peter F. Evans, 54, o le Aai o Sate Leki, Iuta, ISA, ma Gennady N. Podvodov, 47, o Donetsk, Iukureini, sa lagolagoina o



ni Fitugafulu Eria. Sa faasilasila ai foi le faamaloloina o César H. Hooker ma Craig T. Wright o ni Fitugafulu Eria.

E faitau miliona tagata na maimoa pe faafofoga i le konafesi i le lalolagi atoa e ala i faasalalauga i televise, Initoneti, leitio, ma satellite. O le taimi muamua leni, na maua ai le sauniga a le au perisitua i le afiafi o le Aso Toonai i luga o faasalalauga faatelevise faapea ma faasalalauga tuusao i luga o le Initoneti. E silia ma le 100,000 tagata na auai i sauniga e lima i le Nofoga Autu mo Konafesi i le Aai o Sate Leki, Iuta, i le aso 5 ma le 6 o Oketopa. Sa maua foi le konafesi e auala atu i ala o faasalalauga eseese i gagana e 95 ma faasalalau atu ai i atunuu ma teritori e 197.

Sa faamaeaina e Peresitene Monson le konafesi i se aioiga mo tagata o le Ekalesia ina ia faaali se agalelei faateleina i le tasi ma le isi ma ia “maua pea . . . o faia e le aunoa le galuega a le Alii.” ■

O PERESITENE MONSON O SE APOSETOLO MO LE 50 TAUSAGA

O le konafesi aoao faaleafatausaga o Oketopa 2013, ua faailo-gaina ai le 50 tausaga o le valaauga o Peresitene Thomas S. Monson i le Korama a Aposetolo e Toasefululua. Sa lagolagoina o ia o se Aposetolo i le aso 4 Oketopa, 1963, i le 36 o ona tausaga. ■

O Thomas S. Monson i le Tapeneko i le Lotoa o le Malumalu i le 1963, i nai minute a o lei lagolagoina o ia o se Pulega Aoao.

Itulau o Ala o Faasalalauga Faaleagafesootai mo Taitai o le Ekalesia

Saunia e Eric Murdock

Talafou ma Mea e Tutupu mai le LDS.org

Ua fatuina e le Ekalesia ni itulau aloaia o ala o faasalalauga faaleagafesootai mo uso o le Au Peresitene Sili ma le Korama a Aposetolo e Toasefululua i luga o le Facebook ma le Google Plus. O nei itulau ua avea ma se foliga vaaia aloaia o ala o faasalalauga mo uso taitasi o le Usoga, o e o le a faatonutonuina ia itulau a o tausia ai e le Ekalesia mo i latou.

O faitotoa aloaia o le Facebook ma le Google Plus e mafai ona maua e ala i le sailia o le facebook.com/lds ma le plus.google.com. Tagai mo le faailoga a le Ekalesia e iloa ai pe o se saite o ala o faasalalauga faaleagafesootai po o se itulau aloaia.

O i latou e mulimulitaia nei itulau o

le a mauaina soo ni faafouga e faatatau i galuega a uso taitasi o le Usoga. “O le a tuu i luga e le Ekalesia ni sootaga mo lauga, tusiga, vitio, ma isi anotusi fitoitonu mo i latou,” sa saunoa ai Dale Jones, o se fofoga mo le Ekalesia.

O nei itulau o le a faatagaina ai tagata ia faigofie atili ona maua upu a perofeta soifua, ma o le “fiafia” [like] i itulau o le a mafua ai ona oo a latou anotusi i le utu [feed] a tagata e fiafia [like] i anotusi o le facebook, lea e mafai ai ona maimoaina ma fefaasoai saoloto atu i isi.

O le fatuina o itulau aloaia ua fesoasoani lea i tagata o le ekalesia ia iloa pe o a itulau o loo tausia e le Ekalesia ma puipuia ai tagata taitoatasi mai itulau taufaasese. ■



ATA NA PUJENA E NICOLAS CARRASCO, FAAMAILOGA A LE CHURCH NEWS



Tala Fou o Malumalu

Suatiaina o le Eleele mo le Uluai Malumalu i Connecticut

Ua amatalia le fausiaina o le uluai malumalu a le Au Paia o Aso e Gata Ai i Connecticut, ISA, ina ua maea sauniga o le suatiaina o le eleele na taitaia e Peresitene Thomas S. Monson i Hartford i le Aso Toonai, 17 Aokuso. O le Malumalu o Hartford Connecticut o le a avea ma malumalu lona lua i New England (o le isi o loo i Boston, Massachusetts) ma o se tasi o le 170 malumalu AAG o loo faaagaina, o loo fausia, pe o loo i ai i laasaga o fuafuaga i le salafa o le lalolagi.

Malumalu Lona Lua i Colorado

I le Aso Toonai, 24 Aokuso, sa taitaia ai e Elder Ronald A. Rasband o le Au Peresitene o Fitu-gafulu ia sauniga o le suatiaina o le eleele mo le malumalu lona lua i Colorado, ISA, le Malumalu o Fort Collins Colorado. O le isi malumalu o loo i Denver, pe tusa ma le 59 maila (95 km) i saute o Fort Collins. ■

Ua Faatulagaina Siteki i Roma ma Pale

Sa faatulagaina e Elder Dallin H. Oaks ma Elder M. Russell Ballard o le Korama a Aposetolo e Toasefululua le siteki lona lua i Roma, Italia, ma le siteki lona tolu i le eria o Pale, Farani, i se asiasiga ia Setema 2013 lea foi na aofia ai ma fonotaga i Leeds ma Manchester, Egelani, ma Madrid, Sepania. O loo faagasolo le fausiaina o se malumalu i Roma, ma o le a le pine ae fausia le isi tasi i Pale.

“O loo ola ma lelei le Ekalesia ma alualu i luma ma le faagaetia i Europa,” sa saunoa ai Elder Oaks. Sa tau atu e Elder Ballard i tagata o le ekalesia i Europa e faapea e tatau i le Ekalesia ona “faamamaluina le Alii i le faanatinatiina o Lana galuega o le faolataga ma e ao ona tatou tau fai auai uma ai.” ■

O Aoaoga Mo O Tatou Taimi

Mai ia Oketopa 2013 e oo atu ia Mati 2014, e tatau ona saunia ia lesona o le Aso Sa Fa a le Au Perisitua Mekisateko ma le Aualofa mai se lauga se tasi pe sili atu na tuuina mai i le konafesi aoao ia Oketopa 2013. Ia Aperila 2014, e mafai ona filifili mai ni lauga a le o le konafesi ia Oketopa 2013 po o le konafesi ia Aperila 2014. E tatau i peresitene o siteki ma itu ona filifili po o a lauga o le a faaoga ina i a latou eria, ae e mafai foi ona faamatuu atu lea tiutetauave i epikopo ma peresitene o paranesi.

Aoao atili e ala i le suesueina o le vaega “O Aoaoga mo o Tatou Taimi” i le Liahona o Me 2013 *Liahona* po o le *Ensign*. ■



Randall L. Ridd

Fesoasoani Lua Fou i le Au Peresitene Aoao o Alii Talavou

Ile avea ai ma se atalii o se faufale, sa vave ona aoao Randall L. Ridd i le taua o le faia o se galuega i le ala sao. O nisi taimi, a faamaea e le taulealea o Randall se galuega, e faalogo atu i lona tama, o Leon Ridd, o tautino mai, “E le i uma lava lau galuega.”

O lea sa’o a’ia’i na tuua ai se uunaiga tumau i le tamalii ua auauna atu nei o le fesoasoani lua i le au peresitene aoao o Alii Talavou. E oo mai i le asō na te faalogoina ai lava i nisi taimi ia upu maumaututu ma agaalofa a lona tama ao ia faatinoina ona tiute faalegaluega, faaleaiga, ma faaletaitai o le ekalesia. “E lei uma lava lau galuega;fai ia sao.”

Sa saunoa Brother Ridd e faapea o le metotia faalegaluega a lona aiga ua avea ma se faamanuiaga i lona olaga. O lea sa i ai ni faufautua ma taitai perisitua o e na taiaina o ia i nisi taimi i le ala o le talalelei. Ao taliaina e le toatele o ana uo o lana vasega mai le aoga maua luga ni valaauga o misiona i le 19 tausaga, sa filifili ia Randall e lesitala i le kolisi ma auai i le vaegaau. Sa mulimuli ane ia tauaveina se galuega o se faieletise o Faaata Tetele (X-ray) ao faaauau ai pea ana aoaoga i le Iunivesite o Iuta. Sa lava le lototooa o ni nai alii atamamai e tau atu ia te ia o lona tulaga sa i ai i le galuega faamisiona. Sa ia mulimuli i la latou taitaiga ma tuu ai i totonu lana talosaga e auauna atu. E lei pine ae ia faasoaina atu le talalelei i le Misiona a Mekisiko i Matu. “Ou te le mailoa pe o faapei lou olaga pe ana ou le auauna atu i se misiona,” na ia fai mai ai.

Sa ia toe foi atu i le fale, faaauau lana aoga, ma faaipoipo atu ia Tamina Roark i le Malumalu o Sate Leki i le 1975. Sa tausaga e le au Ridd se fanau e toafa ao atiae e Brother Ridd lana matata faalegaluega i pisinisi faatau fanua ma fale ma isi pisinisi tumaoti.

Sa tumau pea lona fiafia i galuega faafaifeautalai. Sa ia pulefaamalumalu i le Misiona a Ecuador Guayaquil i Matu mai le 2005 i le 2008 ma toe molimauina ai foi le suiga e mafai ona faia e se misiona faamamaluina i le olaga o se alii talavou po o se tamaitai talavou.

Sa auauna atu Brother Ridd o se sui o le fono faatonu aoao o Alii Talavou ina ua valaauina o ia i le au peresitene aoao o Alii Talavou ia Me 2013. ■



© MICHAEL T. MALM, FAALALOGA A LE ILLUME GALLERY OF FINE ART, E LE MAFAI ONA KOPINA

O Se Loto Toafilemu, tusia e Michael T. Malm

“Ma o le Agaga na te tuuina mai le malamalama i tagata taitoatasi e sau i le lalolagi; ma o le Agaga e faamalamalamaina tagata taitoatasi i le lalolagi atoa, o e e faalogo i le siufofoga o le Agaga” (MF&F 84:46).



“Ia tatou taumafai i taimi uma ia latalata atu i lo tatou Tama Faalelagi,” sa saunoa ai Peresitene Thomas S. Monson i le sauniga o le taeao o le Aso Sa o le Konafesi Aoa Faaleafatausaga Lona 183 o le Ekalesia. “Ina ia faia lea mea, e tataua ona tatou tatolo atu ia te la ma faalogo atu ia te la i aso uma. Tatou te manaomia moni lava o la i taimi uma, e tusa lava pe o taimi lelei po o taimi leaga. Ia tatou manatua e le aunoa Lana folafolaga: ‘Ou te le tuua lava oe, ou te le tuulafoai lava ia te oe.’”

O LE EKALESTIA A
IESU KERISO
O LE AU PAIA O ASO
E GATA AI